

王国维文存

王国维

文硕阁

wenshuoge.com

关于我们	6
论教育之宗旨	8
文学与教育	10
奏定经学科大学文学科大学章程书后	11
教育小言十二则	18
教育小言十则	21
教育小言十三则	23
哲学辨惑	26
孔子之美育主义	29
国朝汉学派戴阮二家之哲学说	32
叔本华与尼采	37
论哲学家与美术家之天职	45
去毒篇	47
古雅之在美学上之位置	49
人间嗜好之研究	52
屈子文学之精神	55
释史	58
《史籀篇疏证》序	62
战国时秦用籀文六国用古文说	65
《史记》所谓古文说	66
《后汉》所谓古文说	68
说文所谓古文说	69
周代金石文韵读序	71
六朝人韵书分部说	72
书巴黎国民图书馆所藏唐写本《切韵》后☆	73
李舟《切韵》考	76
书吴县蒋氏藏唐写本《唐韵》后	78
五声说	81
尔雅草木虫鱼鸟兽释例自序☆	84
书郭注《方言》后一☆	86
书郭注《方言》后二☆	88
书郭注《方言》后三☆	91
与友人论《诗》《书》中成语书（一）☆	93
与友人论《诗》《书》中成语书（二）☆	94
宋越州本《礼记正义》跋	96
《汉书·艺文志》举例后序	97

聚珍本戴校《水经注》跋	99
殷卜辞中所见先公先王考☆	102
殷卜辞中所见先公先王续考☆	113
殷周制度论	117
殷墟书契考释跋	126
殷墟书契考释序	129
《宋代金文著录表》序	130
《国朝金文著录表》序	131
生霸死霸考	132
《毛公鼎考释》序	135
说觥	136
说环玦	138
魏石经考一	139
魏石经考二	141
魏石经考三	143
魏石经考四	146
魏石经考五	148
隋铜虎符跋☆	149
《齐鲁封泥集存》序	150
书《齐鲁封泥集存》后	153
桐乡徐氏《印谱》序	154
简牍检署考（节选）	156
《流沙坠简》序	158
《流沙坠简》后序	164
敦煌汉简跋一☆	166
敦煌汉简跋二☆	168
敦煌汉简跋三☆	169
敦煌汉简跋四☆	170
敦煌汉简跋五☆	171
敦煌汉简跋六☆	172
敦煌汉简跋七☆	173
敦煌汉简跋八☆	174
敦煌汉简跋九☆	175
敦煌汉简跋十☆	176
敦煌汉简跋十一☆	177
敦煌汉简跋十二☆	178
敦煌汉简跋十三☆	180
敦煌汉简跋十四☆	181

唐写本残《职官书》跋	182
唐写本《食疗本草》（残卷）跋	183
唐写本《灵棋经》（残卷）跋	184
唐写本失名残书跋	185
唐写本《大云经疏》跋☆	186
唐写本《老子化胡经》（残卷）跋	187
唐写本韦庄《秦妇吟》跋	188
敦煌发见唐朝之通俗诗及通俗小说	190
唐写本《云谣集杂曲子》跋	195
唐写本《敦煌县户籍》跋	196
宋初写本《敦煌县户籍》跋	198
说商	199
说殷	200
明堂庙寝通考	201
太史公行年考	208
汉魏博士考☆	221
记现存历代尺度	236
秦都邑考	240
秦郡考	242
汉郡考	245
浙江考	252
鬼方昆夷獯豳考☆	253
西胡续考	261
匈奴相邦印跋	263
九姓回鹘可汗碑跋	264
高昌宁朔将军麴斌造寺碑跋	267
书虞道园高昌王世勋碑后	269
《唐贤力苾伽公主墓志》跋	270
鞞鞞考	271
萌古考	276
南宋人所传蒙古史料考	284
《元朝秘史》之主因亦儿坚考	293
致藤田博士书一	300
致藤田博士书二	302
金界壕考	303
西辽都城虎思斡耳朵考	311
元铜虎符跋	314
蒙文《元朝秘史》跋	315

《圣武亲征录校注》序	317
《长春真人西游记校注》序	319
《蒙鞑备录》跋	320
《黑鞑事略》跋	321
黑车子室韦考	323
蒙古札记	325
《东洋史要》序	329
《欧罗巴通史》序	330
论近年之学术界	331
论新学语之输入	334
《国学丛刊》序	336
《国学丛刊》序	338
国朝三百年学术	340
沈乙庵先生七十寿序	341
译本《琵琶记》序	343
《玉溪生诗年谱会笺》序	344
雪堂校刊群书叙录序	345
《殷虚文字类编》序	347
《金文编》序	348
传书堂记	349
库书楼记	351
经学概论讲义	353
致沈兼士	359
致何之兼等	362
罗君楚传	363
论政学疏	365
最近二三十年中中国新发见之学问	367
宋代金石学	370

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

论教育之宗旨

教育之宗旨何在？在使人为完全之人物而已。何谓完全之人物？谓人之能力无不发达且调和是也。人之能力分为内外二者：一曰身体之能力，一曰精神之能力。发达其身体而萎缩其精神，或发达其精神而罢敝其身体，皆非所谓完全者也。完全之人物，精神与身体必不可不为调和之发达。而精神之中又分为三部：知力、感情及意志是也。对此三者而有真美善之理想：“真”者知力之理想，“美”者感情之理想，“善”者意志之理想也。完全之人物不可不备真美善之三德，欲达此理想，于是教育之事起。教育之事亦分为三部：智育、德育（即意育）、美育（即情育）是也。如佛教之一派，及希腊罗马之斯多噶派，抑压人之感情而使其能力专发达于意志之方面；又如近世斯宾塞尔之专重智育，虽非不切中一时之利弊，皆非完全之教育也。完全之教育，不可不备此三者，今试言其大略。

一、智育

人苟欲为完全之人物，不可无内界及外界之知识，而知识之程度之广狭，应时地不同。古代之知识至近代而觉其不足，闭关自守时之知识，至万国交通时而觉其不足。故居今之世者，不可无今世之知识。知识又分为理论与实际二种；溯其发达之次序，则实际之知识常先于理论之知识，然理论之知识发达后，又为实际之知识之根本也。一科学如数学、物理学、化学、博物学等，皆所谓理论之知识。至应用物理、化学于农工学，应用生理学于医学，应用数学于测绘等，谓之实际之知识。理论之知识乃人人天性上所要求者，实际之知识则所以供社会之要求，而维持一生之生活。故知识之教育，实必不可缺者也。

二、德育

然有知识而无道德，则无以得一生之福祉，而保社会之安宁，未得为完全之人物也。夫人之生也，为动作也，非为知识也。古今中外之哲人无不以道德为重于知识者，故古今中外之教育无不以道德为中心点。盖人人至高之要求，在于福祉，而道德与福祉实有不可离之关系。爱人者人恒爱之；敬人者人恒敬之。不爱敬人者反是。如影之随形，响之随声，其效不可得而诬也。《书》云：“惠迪，吉；从逆，凶。”希腊古贤所唱福德合一论，固无古今中外之公理也。而道德之本原又由内界出而非外铄我者。张皇而发挥之，此又教育之任也。

三、美育

德育与智育之必要，人人知之，至于美育有不得不一言者。盖人心之动，无不束缚于一己之利害；独美之为物，使人忘一己之利害而入高尚纯洁之域，此最纯粹之快乐也。孔子言志，独与曾点；又谓“兴于诗”，“成于乐”。希腊古代之以音乐为

普通学之一科，及近世希痕林、希尔列尔等之重美育学，实非偶然也。要之，美育者一面使人之感情发达，以达完美之域；一面又为德育与智育之手段，此又教育者所不可不留意也。

然人心之知情意三者，非各自独立，而互相交错者。如人为一事时，知其当为者“知”也，欲为之者“意”也，而当其为之前（后）又有苦乐之“情”伴之：此三者不可分离而论之也。故教育之时，亦不能加以区别。有一科而兼德育智育者，有一科而兼美育德育者，又有一科而兼此三者。三者并行而得渐达真善美之理想，又加以身体之训练，斯得为完全之人物，而教育之能事毕矣。

（原载《教育世界》56号，1903年8月）√

文学与教育

生百政治家，不如生一大文学家。何则？政治家与国民以物质上之利益，而文学家与以精神上之利益。夫精神之于物质，二者孰重？且物质上之利益，一时的也；精神上之利益，永久的也。前人政治上所经营者，后人得一旦而坏之。至古今之大著述，苟其著述一日存，则其遗泽且及于千百世而未沫。故希腊之有鄂谟尔也、意大利之有唐旦也、英吉利之有狭斯1尔也、德意志之有格代也，皆其国人人之所尸而祝之、社而稷之者，而政治家无与焉。何则？彼等诚与国民以精神上之慰藉，而国民之所恃以为生命者，若政治家之遗泽，决不能如此广且远也。

今之混混然输入于我中国者，非泰西物质的文明乎？政治家与教育家，坎然自知其不彼若，毅然法之。法之诚是也，然回顾我国民之精神界则奚若？试问我国之大文学家，有足以代表全国民之精神，如希腊之鄂谟尔、英之狭斯丕尔、德之格代者乎？吾人所不能答也。其所以不能答者，殆无其人欤？抑有之而吾人不能举其人以实之欤？二者必居一焉。由前之说，则我国之文学不如泰西；由后之说，则我国之重文学不如泰西。前说我所不知，至后说，则事实较然，无可讳也。

我国人对文学之趣味如此，则于何处得其精神之慰藉乎？求之于宗教欤？则我国无固有之宗教，印度之佛教亦久失其生气。求之于美术欤？美术之匮乏，亦未有如我中国者也。则夫蚩蚩之氓，除饮食男女外，非鸦片赌博之归而奚归乎！故我国人之嗜鸦片也，有心理的必然性，与西人之细腰、中人之缠足有美学的必然性无以异。不改服制而禁缠足，与不培养国民之趣味而禁鸦片，必不可得之数也。夫吾国人对文学之趣味既如此，况西洋物质的文明又有滔滔而入中国，则其压倒文学，亦自然之势也。夫物质的文明，取诸他国，不数十年而具矣，独至精神上之趣味，非千百年之培养，与一二天才之出不及此。而言教育者不为之谋，此又愚所大惑不解者也。

。

奏定经学科大学文学科大学章程书后

今日之《奏定学校章程》草创之者黄陂陈君毅，而南皮张尚书实成之。其小学、中学诸章程中，亦有不合于教育之理法者，以世多能知之，能言之，余故勿论。今分科大学之立有日矣，且论大学。大学中若医、法、理、工、农、商诸科，但袭日本大学之旧，不知中国现在之情形有当否，以非予之专门，亦不具论，但论经学科、文学科大学。

分科大学章程中之最宜改善者，经学、文学二科是已。余谓此张尚书最得意之作也。尚书素以硕学名海内，又于政事之暇不废稽古。观此二科之章程内详定教授之细目及其研究法，肫肫焉不惜数千言，为国家名誉最高、学问最深之大学教授言之，而于中学小学国家所宜详定教授之范围及其细目者，反无闻焉。吾人不能不服尚书之重视此二科，又于其学术上所素娴者不憚忠实陈其意见也。且尚书不独以经术文章名海内，又公忠体国，以扶翼世道为己任者也。故惧邪说之横流，国粹之丧失之意，在在溢于言表，于此二章程中，尤情见乎辞矣。吾人固推重尚书之学问，而于其扶翼世道人心之处，尤不能不再三倾倒也。虽然，尚书之志则善矣，然所以图国家学术之发达者，则固有所未尽焉。今不暇细论其误，特就其根本之处言之如左，以俟当局者采择焉。

其根本之误何在？曰在缺哲学一科而已。夫欧洲各国大学无不以神、哲、医、法四学为分科之基本。日本大学虽易哲学科以文科之名，然其文科之九科中，则哲学科裒然居首，而余八科无不以哲学概论、哲学史为其基本学科者。今经学科大学中虽附设理学一门，然其范围限于宋以后之哲学，又其宗旨在贵实践而忌空谈（《学务纲要》第三十条），则夫《太极图说》、《正蒙》等必在摈斥之例。则就宋人哲学中言之，又不过其一部分而已。吾人且不论哲学之不可不特置一科，又不论经学、文学二科中之必不可不讲哲学，且质南皮尚书之所以必废此科之理由如何？

（一）必以哲学为有害之学也。

夫言哲学之害，必自其及于政治上者始矣。数年前，海内自由革命之说虽与欧洲18世纪哲学上之自然主义稍有关系，然此等说宁属于政治法律之方面，而不属于哲学之方面。

今不以此说之故，而废直接之政治法律，何独于间接之哲学科而废之。

且吾信昔之唱此说以号召天下者，不独于哲学上之自然主义瞢无所知，且亦不知政治法律为何物者也，不逞之徒，何地蔑有？昔之洪、杨，今之孙、陈，宁皆哲学家哉！且自然主义不过哲学中之一家言，与之反对者何可胜道。余谓不研究哲学则已，苟有研究之者，则必博稽众说而唯真理之从。其有奉此说者，虽学问之自由独立

上所不禁，然理论之与实行其间必有辨矣。今者，政体将改，上下一心，反侧既安，莠言自泯，则疑此学为酿乱之麴蘖者，可谓全无根据之说也。

（二）必以哲学为无用之学也。

虽余辈之研究哲学者，亦必昌言此学为无用之学也。何则？以功用论哲学，则哲学之价值失。哲学之所以有价值者，正以其超出乎利用之范围故也。且夫人类岂徒为利用而生活者哉。人于生活之欲外，有知识焉，有感情焉。感情之最高之满足，必求之文学、美术；知识之最高之满足，必求诸哲学。叔本华所以称人为形而上学的动物而有形而上学的需要者，为此故也。故无论古今东西，其国民之文化苟达一定之程度者，无不有一种之哲学。而所谓哲学家者，亦无不受国民之尊敬，而国民亦以是为轻重。光英吉利之历史者！非威灵吞、纳尔孙，而培根、洛克也。大德意志之名誉者，非俾思麦、毛奇，而汗德、叔本华也。即在世界所号为最实际之国民如我中国者，于《易》之太极、《洪范》之五行、《周子》之无极，伊川、晦庵之理气等，每为历代学者研究之题目，足以见形而上学之需要之存在。而人类一日存，此学即不能一日亡也。而中国之有此数人，其为历史上之光，宁他事所可比哉！今若以功用为学问之标准，则经学文学等之无用亦与哲学等，必当在废斥之列。而大学之所授者，非限于物质的应用的科学不可，坐令国家最高之学府与工场阛闾等，此必非国家振兴学术之意也。夫就哲学家言之，固无待于国家之保护。哲学家而仰国家之保护，哲学家之大辱也。又国家即不保护此学，亦无碍于此学之发达。然就国家言之，则提倡最高之学术，国家最大之名誉也。有腓立大王为之君，有崔特里兹为之相，而后汗德之《纯理批评》得出版而无所惮。故学者之名誉，君与相实共之。今以国家最高之学府，而置此学而不讲，断非所以示世界也。况哲学自直接言之，固不能辞其为无用之学，而自间接言之，则世所号为最有用之学如教育学等，非有哲学之预备，殆不能解其真意。即令一无所用，亦断无废之之理，况乎其有无用之用哉。

（三）必以外国之哲学与中国古来之学术不相容也。

吾谓张尚书之意，岂独对外国哲学为然哉，其对我国之哲学，亦未尝不有戒心焉。故周、秦诸子之学，皆在所摈弃，而宋儒之理学，独限于其道德哲学之范围内研究之。然此又大谬不然者也。《易》不言太极，则无以明其生生之旨，《周子》不言无极，则无以固其主静之说；伊川、晦庵若不言理与气，则其存养省察之说为无根柢。故欲离其形而上学而研究其道德哲学，全不可能之事也。至周、秦诸子之说，虽若时与儒家相反对，然欲知儒家之价值，亦非尽知其反对诸家之说不可，况乎其各言之有故，持之成理者哉。今日之时代，已入研究自由之时代，而非教权专制之时代。苟儒家之说而有价值也，则因研究诸子之学而益明其无价值也，虽罢斥百家，适足滋世人之疑惑耳。吾窃叹尚书之知之与杞人等也！昔日杞人有忧天堕而压己者，尚书之忧道！无乃类是。若夫西洋哲学之于中国哲学，其关系亦与诸子哲学之于儒

教哲学等。今即不论西洋哲学自己之价值，而欲完全知此土之哲学，势不可不研究彼土之哲学。异日发明光大我国之学术者，必在兼通世界学术之人，而不在一孔之陋儒，固可决也。然则尚书之远虑及此，亦不免三思而惑者矣。

尚书所以废哲学科之理由，当不外此三者。此恐不独尚书一人之意见为然，吾国士大夫之大半，当无不怀此疑虑者也。而其不足疑虑也，既如上所述，则尚书之废此科，虽欲不谓之无理由，不可得也。若不改此根本之谬误，则他日此二科中所养成之人才，其优于占毕帖括之学者几何，而我国之经学文学，不至坠于地不已。此余所为不能默尔而息者也。

由上文所述观之，不但尚书之废哲学一科为无理由，而哲学之不可不特立一科，又经学科中之不可不授哲学，其故可睹矣。至文学与哲学之关系，其密切亦不下于经学。今天吾国文学上之最可宝贵者，孰过于周、秦以前之古典乎？《系辞》上、下传实与《孟子》、《戴记》等为儒家最粹之文学，若自其思想言之，则又纯粹之哲学也。今不解其思想，而但玩其文辞，则其文学上之价值已失其大半。此外周、秦诸子，亦何莫不然。自宋以后，哲学渐与文学离，然如《太极图说》《通书》、《正蒙》、《皇极经世》等，自文辞上观之，虽欲不谓之工，岂可得哉？此外如朱子之于南宋、阳阴之于明，非独以哲学鸣，言其文学，亦断非同时龙川、水心及前后七子等之所能及也。凡此诸子之书，亦哲学，亦文学。今舍其哲学，而徒研究其文学，欲其完全解释，安可得也！西洋之文学亦然。柏拉图之《问答篇》、鲁克来谟斯之《物性赋》，皆具哲学文学二者之资格。特如文学中之诗歌一门，尤与哲学有同一之性质。

其所欲解释者，皆宇宙人生上根本之问题。不过其解释之方法，一直观的，一思考的，一顿悟的，一合理的耳。读者观格代、希尔列尔之戏曲，所负于斯披诺若、汗德者如何，则思过半矣。今文学科大学中，既授外国文学矣，不解外国哲学之大意而欲全解其文学，是犹却行而求前，南辕而北其辙，必不可得之数也。且定美之标准与文学上之原理者，亦唯可于哲学之一分科之美学中求之。虽有文学上之天才者，无俟此学之教训，而无才者亦不能以此等抽象之学问养成之。然以有此等学故，得使旷世之才稍省其劳力，而中智之人不惑于歧途，其功固不可没也。故哲学之重要，自经学上言之则如彼，自文学上言之则如此，是故不冀经学、文学之发达则已，苟谋其发达进步，则此二科之章程不可不自根本上改善之也。

除此根本之大谬外，特将其枝叶之谬，论之如左：

一、经学科大学与文学科大学之不可分而为二也。经学家之言曰：“六经天下之至文。”文学家之言曰：“约六经之旨以成文。”二者尚书岂不知之，而顾别经学科于文学科中者，则出于尊经之意，不欲使孔、孟之书与外国文学等侏离之言为伍也。夫尊孔、孟之道，莫若发明光大之，而发明光大之道，又莫若兼究外国之学说

。今徒于形式上置经学于各分科大学之首，而不问内容之关系如何，断非所以尊之也。且果由尚书之道以尊孔、孟，曷为不废外国文学也？貌为尊孔以自附于圣人之徒，或貌为崇拜外国以取媚于时势，二者均窃为尚书不取也。为尚书辩者曰：西洋大学之神学科皆为独立之分科，则经学之为一独立之分科，何所不可？曰：西洋大学之神学科，为识者所诟病久矣。何则？

宗教者，信仰之事，而非研究之事。研究宗教是失宗教之信仰也，若为信仰之故而研究，则又失研究之本义。西洋之神学，所谓为信仰之故而研究者也。故与为研究之故而研究之哲学，不能并立于一科中。若我孔、孟之说，则固非宗教而学说也，与一切他学均以研究而益明，而必欲独立一科，以与极有关系之文学相隔绝，此则余所不解也。若为尊经之故，则置文学科于大学之首可耳，何必效西洋之神学科，以自外于学问者哉。

一、群经之不可分科也。夫“不通诸经，不能解一经”，此古人至精之言也。以尚书之遽于经学，岂不知此义，而顾分经学至十一科者，则以既别经学于文学，则经学科大学中之各科，未免较他科大学相形见少故也。今若合经学科于文学科大学中，则此科为文学科大学之一科，自不必分之至析。夫我国自西汉博士既废以后，所谓经师，无不博综群经者。国朝诸老亦然。且大学者，虽为国家最高之专门学校，然所授者，亦不过专门中之普通学与以毕生研究之预备而已。故今日所最亟者！在授世界最进步之学问之大略，使知研究之方法。至于研究专门中之专门，则又毕生之事业，而不能不俟诸卒业以后也。

一、地理学科不必设也。文学科大学中之有地理科，斯最可异者已。

夫今日之世界，人迹所不到之地殆少，故自地理学之材料上言之，殆无可云进步矣。其尚可研究之方面，则在地文地质二学。然此二学之性质属于格致科，而不属于文学科。今格致科大学中既有地质科矣，则地理学之事可附于此科中研究之，若别置一科，不免有重复之弊矣。

由余之意则可合经学科大学于文学科大学中，而定文学科大学之各科为五：一、经学科，二、理学科，三、史学科，四、中国文学科，五、外国文学科（此科可先置英、德、法三国，以后再及各国）。而定各科所当授之科目如左：

一、经学科科目：

（一）哲学概论

（二）中国哲学史

(三) 西洋哲学史

(四) 心理学

(五) 伦理学

(六) 名学

(七) 美学

(八) 社会学

(九) 教育学

(十) 外国文。

二、理学科科目：

(一) 哲学概论

(二) 中国哲学史

(三) 印度哲学史

(四) 西洋哲学史

(五) 心理学

(六) 伦理学

(七) 名学

(八) 美学

(九) 社会学

(十) 教育学

(十一) 外国文。

三、史学科科目：

- (一) 中国史
- (二) 东洋史
- (三) 西洋史
- (四) 哲学概论
- (五) 历史哲学
- (六) 年代学
- (七) 比较言语学
- (八) 比较神话学
- (九) 社会学
- (十) 人类学
- (十一) 教育学
- (十二) 外国文。

四、中国文学科科目：

- (一) 哲学概论
- (二) 中国哲学史
- (三) 西洋哲学史
- (四) 中国文学史
- (五) 西洋文学史
- (六) 心理学

(七) 名学

(八) 美学

(九) 中国史

(十) 教育学

(十一) 外国文。

五至八、外国文学科科目：

(一) 哲学概论

(二) 中国哲学史

(三) 西洋哲学史

(四) 中国文学史

(五) 西洋文学史

(六) 口国文学史

(七) 心理学

(八) 名学

(九) 美学

(十) 教育学

(十一) 外国文。

教育小言十二则

一

学部之职，各国所谓伴食大臣也。今朝廷立学部，而以亲贤之枢臣领之，上之视学部如是其重也，学部之足以有为，如是其易也。学部立二月矣，而不闻发一号施一令，部臣之于学事如是其慎也。处甚重之地，乘易为之势，而又临之以谨慎，其有所为也，则世之所以颂祷学部者，当如何？其无所为也，则世之责备之者，又当如何矣？

二

今人日日言初等教育，至中等教育则往往谢不敏，若进而主张高等及专门教育，未有不惊其河汉者也！夫以学生修学之次序言之，则先初等、中等，而后及高等教育，固甚当也。若论学问之根柢与教师之所自出，则初等教育之根柢存于中等教育，中等教育之根柢存于高等教育，不兴高等教育，则中等及初等教育亦均无下手之处。世人之主义，余曩者谓之平凡主义，既而思之，此名尚未适当，彼等实苟且主义也、颠倒主义也，曰师范传习所、曰私塾改良会，尤苟且主义中之苟且者也。

三

吾国之所素乏及现在之所最需要者，高等及中等教育也。若夫初等教育，则夫城市村落之蒙塾，虽其鹵莽灭裂实甚，然仅可谓之不完全，未可谓之绝无也。至高等教育，则在今日谓之无也，可矣。今之君子动曰小学、小学，然不兴中等教育，则小学之教师其能贤于昔之蒙塾者几何？不兴高等教育，则中学之教师又安从得乎？兴高等教育，则食其利者不独初等及中等教育，而二者实于是立其根柢。若但言初等小学，则虽平凡乎，苟且乎，恐平凡苟且之成绩，亦终不可得也。

四

吾人之主义谓之贵族主义，但所谓贵族主义者，非政治上之贵族主义，而知力上之贵族主义也。夫人类知力之不齐，此彰明较著之事实，无可讳也。初等教育以普及全国为宗旨，故虽下愚之人，亦有受教育之权利，而国家亦有教育之之义务。初等教育之所以为最难之事业者，其故半由于此也。若高等教育，其性质则全与此异。今举我全国中学生而行选拔试验，集其知力之优胜及稍有普通学及外国文之知识者约可得数千人，然后与以一二年严密之预备，而授以专门之学，吾知其成迹较之外国之蹈小学、中学之次序而按格而入大学者，必有优无劣也。以今日人才之取乏如彼，而国家待用之亟如此，则育才之方法未有适于此者也。故贵族主义，今日最适之主义也，况其馀润所及又足以立中学、小学之根柢乎！

五

难者曰：如子之说，则今之小学、中学既无教师矣，则高等教育之教师又乌乎取之？曰：此非用外人不可。夫外人者，当事者之所患也，患其侵教育权也，患其不得其人也，患得其人而不为用也。夫用舍之权在我，则权何自而侵？至后二者，唯监督者之不得其人，斯有之耳。然以观今日监督学堂之人，则其于本国人未必能用之，况外人乎！以监督者之不得其宜，而谓外人之不可用，则未免因噎而废食也。

六

高等教育既兴，则外国留学可废。以后海外留学生限于分科大学毕业生中选之，以研究学术之阃奥。全国官费生以百余人额为限，私费者听之。其大学中未设立之科，则亦得委托外国大学教授，以后分科大学之教师渐以大学毕业后之留学生及学力与之相等者代之。如此十年，则分科大学中除授外国语学外，可无以外国人而担任讲座者矣。此永久之策也。

七

留学生之数之多，如我中国之今日，实古今中外之所未闻也。通东西洋之留学生数不下万人，每人平均岁以五百元计，则岁需五百万元，以此五百万元兴国之高等教育，不虞其不足。即令稍有不足，其受教育之人数必倍于今日之留学生之数无疑也。且留学生之大半所学者，速成政法耳，速成师范耳。以不谙外国语之人，涉数千里之外学至粗浅之学，而令东京之私立学校得因之以为市此日本文部省限制私立学校令之所以发也。而我国留学生之大半起而争之，曰停课，曰归国，其问题悬至今日而未有所决，此足以窥留学生多数之知识，而昔之勇于派遣者亦不得不分任其责也。既派遣者已无可如何，后之谋教育者不可不知所变计矣。

八

异哉，我国绅士之势力竟如此其大乎！吾非谓绅士之不可有势力也，以绅士之不知教育之无异于官也，则不能不惊其势力之大矣。夫教育之事，以明教育者为之，则可耳，官可也，绅亦可也。苟一为绅士而即可以任教育之事，吾不能知绅之有以异于官否也。以今日之某省学会之所陈议观之，余始知绅士之为万能之人也。

九

世之勇于任教育者，有四途：有以为公益者焉，有以为势力者焉，有以为名高者焉，有以为实利者焉。为公益而为之者，圣贤也。为势力而为之者，豪杰也。为名与利而为之者，小人也。圣贤不可得，得豪杰而用之，斯可矣。若夫小人，则以教育

为一手段，而不以为目的，虽深明教育之人，犹不可用，况乎以群盲而聚讼乎！

十

去岁之冬，我中国学界最多事之时代也。于东京，则有留学生多数之停课；于南京，则有苏学生与赣、皖学生之争额，于苏州，则有苏、松太学生与常、镇、淮、扬、徐、海学生之争。东京之事，既如上文所论矣；南京之事所争者，犹省界也；苏州之事，则浸而及府界、县界矣。曾谓我国最有望、最可爱之学生，而量如是狭隘乎！人类同胞之思想在今日固有所不可行，至于中国人之思想，则凡书左行字而说单独语者，当无不有之，乃以我国最有望、最可爱之学生而所争者如此。此不能不为教育前途惜者也。

十一

管理学堂者湘人，则湘籍之学生居其半额矣。若为闽人、浙人，则闽浙籍之学生居其半额矣。管理学堂者，以同乡之谊取学生。学生以同乡之力抵抗之，十七省非同乡会之独摈苏人，则亦同乡会之一种也。故我中国，无中国人也，有湘人、浙人、苏人……而已。人初相见，必问贵省，省乎、府乎、县乎？此种陋劣根性，其根柢远存于千百年以前，欲一旦扫除而廓清之，吾知其难也，是在有教育之责者，有以渐而化之矣。

十二

以中国之大、当事及学者之众、教育之事之亟，而无一人深究教育学理及教育行政者，是可异已。以余之不知教育且不好之也，乃不得不作教育上之论文及教育上之批评，其可悲为如何矣！使教育上之事，余辈可以无言，即欲有言而有人代为之也，则岂独我中国教育之幸哉，亦余个人之私幸也！

教育小言十则

一

名与实之相背驰也，久矣。地方自治也，教育普及也，皆天下至美之名，而其实固非一朝一夕之所能几也。今日之时代，乃预备之时代，而非实行之时代，若以预备为实行，是犹伐一年之木而刈五月之禾，必无效矣。今之言政治、言教育者，殆此类也。

二

今日教育行政上之官，非不备也；大中小学校之名目，非不具也。苟但以教育为名，则吾不知如欲养成国民之资格、增进国民之知识，以与列国角逐，则天下之学校之不在当闭之列者，盖寡；而关系教育人员之不在当淘汰之列者，盖无几矣。

三

今有人籽种未下，而延人食其秋之实；牛羊未字，而约人享其子之肉；未有不笑其愚且妄者也。今未有学校之设备，而设劝学所，此亦前者之类也。

四

凡用人之要：一国之中专任一职之人多，而坐论大局之人少，则一国之事鲜不举矣。一校之中实行教授之人多，而名为管理之人少，则一校之成绩必可观矣。今日中学以上之监督、庶务、斋务等员（外国此项职员例以教员兼充），小学之堂长、董事等员（今日各地方小学殆无不有董事，而堂长亦鲜有以教员兼充者），犹苦其冗，而复继之以劝学总董、劝学员，是以冗员为未足，而又益之也。

五

甚矣，行政之事牵一发而全身俱动也！今欲核定教育经费，非整理全国之财政不可；欲调查学龄儿童，非作全国人口之统计不可。此系度支部、民政部、学部公共之事业，苟财政之预算未定，警察之制度未备，而欲冀教育之普及，虽圣贤豪杰亦唯有束手坐困而已。

既限制留学，则国内之高等教育不可不兴；既设劝学所，则初等教育之设备不可不亟。而初等教育之设备，其事关于财政户口上之大问题，较之高等教育尤为繁赜，故限制留学之令不必反汗，而劝学所之设自不可不缓之数年之后也。

七

欲兴高等教育，则其教员必聘诸外国矣。今有人欲建一大工厂！则其机器锅炉必购诸外国，未有用旧日之器械者也。苟我国自有适用之器械、合格之教员，岂不甚善，其如今日之绝无何。而言者谈及用外人辄以为惧，夫以不习重学、汽学之人而管理机器，则汽炉必有爆烈之患；以不能用人之人而统率外人，则外人之不能用，固其所也。以不能用外人之故，而诋外人为不足用，亦犹不明重学之理，而毁机器也。

八

今日上所恃，以为奔走天下之具者，高官耳，厚禄耳。其上者，则知用礼貌矣。善用人者，固不能不用爵禄与礼貌，然其要尤在能尽其用。夫人之有一长者，未有不自知者也，使上亦能知之而能尽之，则知己之感，固有视爵禄、礼貌为重者，此郭子仪所以能以奴隶役浑瑊，而海兰察所以甘受阿桂之怒骂者也。用中人然，用外人亦然。夫彼苟能为我用，则安有揽权旷职之弊，如人人所惧者哉？若以今日之用人者当之，岂徒外人，虽本国人亦乌见其必能用也！

九

吾人所悲者，岂独今日专门之教师不能悉求之本国哉！即此寥寥用人之人，而亦不可多得，则天下人才之消乏，何如矣！夫能用人者，必其人之学识等于所用之人，而又有虚心实力之美德，即不然，亦必明白事理而又素有德望者，然后人敬服之。若此寥寥数十人而亦不得其人，则不佞所主张高等教育之计画亦终于失败矣。

十

专门学教师之非外人所能胜任者，其他日之文科大学乎？其中之授外国哲学、外国文学者，固聘诸他国而有余，至欲求经学、国史、国文学之教师，则遗老尽矣。其存者，或笃老或病废，故致之不易；就使能致，或学问虽博而无一贯之系统，或迂疎自是而不屑受后进之指挥，不过如商彝周鼎藉饰观瞻而已。故今后之文科大学，苟经学、国文学等无合格之教授，则宁虚其讲座，以俟生徒自己之研究，而专授以外国哲学、文学之大旨；既通外国之哲学、文学，则其研究本国之学术必有愈于当日之耆宿者矣。故真正之经学、国史、国文学之专门家，不能不望诸此辈之生徒，而非今日之所能得也。

教育小言十三则

一

今有一厂主，集群职工而谕之曰：汝等各勤汝职，数年后，余将使汝治会计，事少而偿多，足以剂汝今日之劳矣。汝等虽不嫻，余不汝责也。群职工大喜，日夜以希主人之所以许之者，事益不治。呜呼！如斯厂者，为职工计，诚得矣；其如一厂之资本何？余以为，今之以官爵奖励人才者，实无以异于此也。

二

今之世界，分业之世界也。一切学问、一切职事，无往而不需特别之技能、特别之教育，一习其事，终身以之。治一学者之不能使治他学，任一职者之不能使任他职，犹金工之不能使为木工，矢人之不能使为函人也。

三

今之用人行政者，则殊异乎是。夫天下之事至繁赜也，所需之人才至纷沓也，而上所以驭之者至简；始则以“洋服”二字括之，继则以“新学”或“新政”二字括之。其所以奔走之者尤简，则以“官”之一字括之。

四

夫治官之事而以官奔走之，犹可言也，然必须所与之官与其所治之事相合，然后在上者能收其用，而在下者能尽其职。今则不然，师范生服务期满，则与以官矣；高等教育之卒业者，亦与以官矣。

五

夫官之名，至广莫也；种类，至复杂也。以能任一事之才，而与以至广漠之名，使之他日治不可知之事，比之厂主之使职工治会计者，其智之相越，盖不远矣。

六

且官之为物，兼劳动与报酬二义。其所受之报酬，即所以偿其同时之劳动，非可以为奖励之具也。如以是为奖励，则人之得之者，必但注意于报酬之一面，而忘其劳动之一面，不然则奖励之谓何矣。且师范生服务期限止于五年，以五年之劳动而于相当之报酬外，又得终身之报酬，为劳动者计则得矣。上之所以报之者，独不虑有所不给乎？

七

吾国下等社会之嗜好，集中于利之一字上；中社会之嗜好，亦集中于此；而以官为利之代表，故又集中于官之一字。夫欲以一二人之力拂社会全体之嗜好，以成一事，吾知其难也。知拂之之不可，而忘夫奖励之之尤不可，此谓能见秋毫之末，而不能见泰山者矣。

八

教育者，神圣之事业也。日本之不以教员待教员，而以官待教员，吾人之素所不喜也。然以今日我国上下之趋势观之，则知彼国之以教员为一官职，而即于其中迁转者，真可谓斟酌于教育之独立与社会人心之趋向之间，而得其平者矣。

九

夫教员、医生、政治家、法律家、工学家之学，固职业的学问也。对此等学问家，而以其职业上相当之官与之，则上得以收其用，而下得以尽其长，固非徒奖励之为而已。但美其名曰奖励，曰报酬，而浑其报酬之之物曰官，则于用人之目的已失，而其手段又误，如上文之所批评，其理固人人之所易解也。以职业的学问而犹若是，况于非职业的学问乎？

十

非职业的学问何？科学、哲学、文学、美术四者，是已。治职业者，苟心乎职业外之某物（官），则已不能平心于其职，况乎对非职业的学问家，而与以某种之职业（官）乎？故以官奖励职业，是旷废职业也；以官奖励学问，是剿灭学问也。今以官与服务期满之师范生，非所谓以官奖励职业者乎？以官之媒介之举人进士，予毕业生，非所谓以官奖励学问者乎？上之所以奖励之者如此，无怪举天下不知有职业学问，而惟官之是知也。

十一

日本当明治七年间，日人谓其大学校曰，官吏制造所。试问我国之制造官吏者，独一大学而已乎？以大学为未足，而又制造之于优级、初级师范学校矣；以国内为未足，而又制造之于国外矣。

十二

今之人士之大半，殆舍官以外无他好焉。其表面之嗜好，集中于官之一途，而其里

面之意义，则今日道德、学问、实业等皆无价值之证据也。夫至道德、学问、实业等皆无价值，而惟官有价值，则国势之危险何如矣！社会之趋势既已如此，就令政府以全力补救之，犹恐不及，况复益其薪而推其波乎？

十三

故为今日计，政府不可不执消极及积极之二方法。消极之法，则不以官为奖励之具是已；积极之法，则必使道德、学问、实业等有独立之价值，然后足以旋转社会之趋势。然用第二方法而一不慎，则世且有以道德、学问、实业为手段而求官者，失之毫厘，差以千里。此又不可不注意也。

哲学辨惑

【1903年刊于《教育丛书》三集。】

甚矣名之不可以不正也！观去岁南皮尚书（案张之洞）之陈学务摺，及管学大臣张尚书（案张百熙）之复奏摺：一虞哲学之有流弊，一以名学易哲学，于是海内之士颇有以哲学为诟病者。夫哲学者，犹中国所谓理学云尔。艾儒略《西学（发）凡》有“费禄琐非亚”之语，而未译其义。“哲学”之语实自日本始。日本称自然科学曰“理学”，故不译“费禄琐非亚”曰理学，而译曰“哲学”。我国人士骇于其名，而不察其实，遂以哲学为诟病，则名之不正之过也。

今辨其惑如下。

一、哲学非有害之学

今之诟病哲学者，岂不曰自由平等民权之说由哲学出，今弃绝哲学，则此等邪说可以熄乎？夫此等说之当否，姑置不论。夫哲学中亦非无如此之说，然此等思想于哲学中不占重要之位置。霍布士（案1588—1679，英国哲学家）之绝对国权论，与福禄特尔（案伏尔泰，1694—1778，法国哲学家）、卢骚（案1712—1778，法国哲学家）之绝对民权论，皆为哲学说之一。

今以福禄特尔、卢骚之故而废哲学，何不一思霍布士之说乎？且古之时有倡言民权者矣，孟子是也。今若举天下之言民权，而归罪于孟子，废孟子而不立诸学官，斯亦过矣！欲废哲学者何以异于是！且今之言自由平等、言革命者，果皆自哲学上之研究出欤？抑但习闻他人之说而称道之欤？夫周秦与宋代，中国哲学最盛之时也。而君主之威权不因之而稍替。明祖之兴，而李自成、洪秀全之乱，宁皆有哲学家说以鼓舞之欤？故不研究哲学则已，苟研究哲学则必博稽众说而唯真理之是从。其视今日浅薄之革命家，方鄙弃之不暇，而又奚惑焉！则竟以此归狱于哲学者非也。且自由平等说非哲学之原理，乃法学、政治学之原理也。今不以此等说废法学、政治学，何独至于哲学而废之？此余所不解者一也。

二、哲学非无益之学

于是说者曰：哲学即令无害，决非有益，非叩虚课寂之谈，即鹜广志荒之论。此说不独我国为然，虽东西洋亦有之。夫彼所谓无益者，岂不以哲学之于人生日用之生活无关系乎？夫但就人生日用之生活言，则岂徒哲学为无益，物理学、化学、博物学，凡所谓纯粹科学，皆与吾人日用之生活无丝毫之关系。其有实用于人者，不过医、工、农等学而已。然人之所以为人者，岂徒饮食男女，芸芸以生，厌厌以死云尔哉！饮食男女，人与禽兽之所同，其所以异于禽兽者，则岂不以理性乎哉！宇宙

之变化，人事之错综，日夜相迫于前，而要求吾人之解释，不得其解，则心不宁。叔本华（案1788—1860，德国哲学家）谓人为形而上学之动物，洵不诬也。哲学实对此要求而与吾人以解释。夫有益于身者与有益于心者之孰轩孰轻，固未易论定者。巴尔善（案泡尔生，1864—1909，德国哲学家）曰：“人心一日存，则哲学一日不亡。”使说者而非人，则已；说者而为人，则已于冥冥之中，认哲学之必要，而犹必诋之为无用，此其不可解者二也。

三、中国现时研究哲学之必要

尤可异者，则我国上下，日日言教育，而不喜言哲学。夫既言教育，则不得不言教育学；教育学者实不过心理学、伦理学、美学之应用。心理学之为自然科学而与哲学分离，仅曩日之事耳；若伦理学与美学则尚俨然为哲学中之二大部。今夫人之心意，有知力，有意志，有感情。此三者之理想，曰真曰善曰美。哲学实综合此三者而论其原理者也。教育之宗旨亦不外造就真善美之人物，故谓教育学上之理想即哲学上之理想，无不可也。试读西洋之哲学史、教育学史。哲学者而非教育学者有之矣，未有教育学者而不通哲学者也。不通哲学而言教育，与不通物理化学而言工学，不通生理学解剖学而言医学，何以异？今日日言教育、言伦理，而独欲废哲学，此其不可解者三也。

四、哲学为中国固有之学

今之欲废哲学者，实坐不知哲学为中国固有之学故。今姑舍诸子不论，独就六经与宋儒之说言之。夫六经与宋儒之说，非著于功令而当时所奉为正学者乎？周子“太极”之说，张子“正蒙”之论，邵子之《皇极经世》，皆深入哲学之问题。此岂独宋儒之说为然，六经亦有之。《易》之“太极”，《书》之“降衷”，《礼》之“中庸”，自说者言之，谓之非虚非寂，得乎？今欲废哲学，则六经及宋学皆在所当废，此其所不解者四也。

五、研究西洋哲学之必要

于是说者曰：哲学既为中国所固有，则研究中国之哲学足矣，奚以西洋哲学为？此又不然。余非谓西洋哲学之必胜于中国，然吾国古书大率繁散而无纪，残缺而不完，虽有真理，不易寻绎，以视西洋哲学之系统灿然，步伐严整者，其形式上之孰优孰劣，固自不可掩也。且今之言教育学者，将用《论语》《学记》作课本乎？抑将博采西洋之教育学以充之也？于教育学然，于哲学何独不然？且欲通中国哲学，又非通西洋之哲学不易明也。近世中国哲学之不振，其原因虽繁，然古书之难解，未始非其一端也。苟通西洋之哲学以治吾中国之哲学，则其所得当不止此。异日昌大吾国固有之哲学者，必在深通西洋哲学之人，无疑也。今欲治中国哲学，而废西洋哲学，其不可解者五也。

余非欲使人人哲学家，又非欲使人人研究哲学，但专门教育中，哲学一科必与诸学科并立，而欲养成教育家，则此科尤为要。吾国人士所以诟病哲学者，实坐不知哲学之性质之故，苟易其名曰“理学”，则庶可以息此争论哉！庶可以息此争论哉！

孔子之美育主义

(1904年刊于《教育世界》第69号。)

诗云：“世短意常多，斯人乐久生。”（案陶渊明《九日闲居》）岂不悲哉！人之所以朝夕营营者，安归乎？归于一己之利害而已。人有生矣，则不能无欲；有欲矣，则不能无求；有求矣，不能无生得失；得则淫，失则戚：此人人之所同也。世之所谓道德者，有不为此嗜欲之羽翼者乎？所谓聪明者，有不为嗜欲之耳目者乎？避苦而就乐，喜得而恶丧，怯让而勇争：此又人人之所同也。于是，内之发于人心也，则为苦痛；外之见于社会也，则为罪恶。然世终无可以除此利害之念，而泯人已之别者欤？将社会之罪恶固不可以稍减，而人心之苦痛遂长此终古欤？曰：有，所谓“美”者是已。

美之为物，不关于吾人之利害者也。吾人观美时，亦不知有一己之利害。德意志之大哲人汗德，以美之快乐为不关利害之快乐（Disinterested Pleasure）。至叔本华而分析观美之状态为二原质：（一）被观之对象，非特别之物，而此物之种类之形式；（二）观者之意识，非特别之我，而纯粹无欲之我也（《意志及观念之世界》第一册，二百五十三页（案指英译本））。

何则？由叔氏之说，人之根本在生活之欲，而欲常起于空乏。既偿此欲，则此欲以终；然欲之被偿者一，而不偿者十百，一欲既终，他欲随之：故究竟之慰藉终不可得。苟吾人之意识而充以嗜欲乎？吾人而为嗜欲之我乎？则亦长此辗转于空乏、希望与恐怖之中而已，欲求福祉与宁静，岂可得哉！然吾人一旦因他故，而脱此嗜欲之网，则吾人之知识已不为嗜欲之奴隶，于是得所谓无欲之我。无欲故无空乏，无希望，无恐怖；其视外物也，不以为与我有利害之关系，而但视为纯粹之外物。此境界唯观美时有之。

苏子瞻所谓“寓意于物，《宝绘堂记》）；邵子曰：“圣人所以能一万物之情者，谓其能反观也。所以谓之反观者，不以我观物也。不以我观物者，以物观物之谓也。既能以物观物，又安有有（案此字为衍）我于其间哉？，《皇极经世·观物内篇》七）此之谓也。其咏之于诗者，则如陶渊明云采菊东篱下，悠然见南山。山气日夕佳，飞鸟相与还。此中有真意，欲辨已忘言。”谢灵运云：“昏旦变气候，山水含清晖。清晖能娱人，游子澹忘归。”或如白伊龙云（案拜伦，1788—1874，英国诗人）：

I live not in myself, but I become portion of that around me: and to me high mountains are a feeling.

案“我不是生活于我自身，而我成为围绕着我的一切中的一份，对于我高高的山峰

乃是一种感情。

皆善咏此者也。

夫岂独天然之美而已，人工之美亦有之。宫观之瑰杰，雕刻之优美雄丽，图画之简淡冲远，诗歌音乐之直诉人之肺腑，皆使人达于无欲之境界。故秦西自雅里大德勒以后，皆以美育为德育之助。至近世，谟夫志培利（案夏夫兹伯里[shaft-sbury, 1671—1713]，英国美学家）、赫启孙（案哈奇生，1694—1747，英国美学家）等皆从之。乃德意志之大诗人希尔列尔出，而大成其说，谓人曰与美相接，则其感情日益高，而暴慢鄙倍之心自益远。故美术者科学与道德之生产地也。又谓审美之境界乃不关利害之境界，故气质之欲灭，而道德之欲得由之以生。故审美之境界乃物质之境界与道德之境界之津梁也。于物质之境界中，人受制于天然之势力；于审美之境界则远离之，于道德之境界则统御之（希氏《论人类美育之书简》）。由上所说，则审美之位置犹居于道德之次。

然希氏后日更进而说美之无上之价值，曰：“如人必以道德之欲克制气质之欲，则人性之两部犹未能调和也。于物质之境界及道德之境界中，人性之一部，必克制之以扩充其他部；然人之所以为人，在息此内界之争斗，而使卑劣之感跻于高尚之感觉。如汗德之严肃论中气质与义务对立，犹非道德上最高之理想也。最高之理想存于美丽之心（Beautiful Soul），其为性质也，高尚纯洁，不知有内界之争斗，而唯乐于守道德之法，此性质唯可由美育得之。（芬特尔朋《哲学史》第六百页）此希氏最后之说也（案实指《审美教育书简》的最后一封书简）。顾无论美之与善，其位置孰为高下，而美育与德育之不可离，昭昭然矣。

今转而观我孔子之学说。其审美学上之理论虽不可得而知，然其教人也，则始于美育，终于美育。《论语》曰：“小子何莫学夫诗。诗可以兴，可以观，可以群，可以怨。迩之事父，远之事君。多识于鸟兽草木之名。”（案《阳货》）又曰：“兴于诗，立于礼，成于乐。”（案泰伯）其在古昔，则胄子之教，典于后夔（案《书·舜典》）大学之事，董于乐正（《周礼·大司乐》、《礼记·王制》）。然则以音乐为教育之一科，不自孔子始矣。荀子说其效曰：“乐者，圣人之所乐也，而可以善民心。其感人深，其移风易俗。……故乐行而志清，礼修而行成，耳目聪明，血气和平，移风易俗，天下皆宁。（《乐论》）此之谓也。故“子在齐闻《韶》，则“三月不知肉味”（案《述而》）。而《韶》乐之作，虽挈壶之童子，其视精，其行端。音乐之感人，其效有如此者。

且孔子之教人，于诗乐外，尤使人玩天然之美。故习礼于树下，言志于农山，游于舞雩，叹于川上，使门弟子言志，独与曾点。点之言曰：莫春者，春服既成，冠者五六人，童子六七人，浴乎沂，风乎舞雩，咏而归。”（案《论语·先进》）由此观之，则平日所以涵养其审美之情者可知矣。之人也，之境也，固将磅礴万物以为

一，我即宇宙，宇宙即我也。光风霁月不足以喻其明，泰山华岳不足以语其高，南溟渤澥不足以比其大。邵子所谓“反观”者非欤？叔本华所谓“无欲之我”、希尔列尔所谓“美丽之心”者非欤？此时之境界：无希望，无恐怖，无内界之争斗，无利无害，无人无我，不随绳墨而自合于道德之法则。一人如此，则优入圣域；社会如此！则成华胥之国。孔子所谓“安而行之（案《中庸》），与希尔列尔所谓“乐于守道德之法则”者，舍美育无由矣。

呜呼！我中国非美术之国也，一切学业，以利用之大宗旨贯注之。治一学，必质其有用与否；为一事，必问其有益与否。美之为物，为世人所不顾久矣！故我国建筑、雕刻之术，无可言者。至图画一技，宋元以后，生面特开，其淡远幽雅实有非西人所能梦见者。诗词亦代有作者。而世之贱儒辄援“玩物丧志”之说相诋。故一切美术皆不能达完全之域。美之为物，为世人所不顾久矣！庸詎知无用之用，有胜于有用之用者乎？以我国人审美之趣味之缺乏如此，则其朝夕营营，逐一己之利害而不知返者，安足怪哉！安足怪哉！庸詎知吾国所尊为“大圣”者，其教育固异于彼贱儒之所为乎？故备举孔子美育之说，且诂其所以然之理。世之言教育者，可以观焉。

国朝汉学派戴阮二家之哲学说

近世哲学之流，其胶浅枯涸，有甚于国朝三百年间者哉！国初承明之后，新安、姚江二派，尚相对皇，然各抱一先生之言，姝姝自悦，未有能发明光大之者也。雍、乾以后，汉学大行，凡不手许慎、不口郑玄者，不足以与于学问之事。于是昔之谈程、朱、陆、王者屏息敛足，不敢出一语。至乾、嘉之间，而国朝学术与东汉比隆矣。然其中之巨子，亦悟其说之庞杂破碎，无当于学，遂出汉学固有之范围外，而取宋学之途径。于是孟子以来所提出之人性论，复为争论之问题。其中之最有价值者，如戴东原之《原善》、《孟子字义疏证》，阮文达之《性命古训》等，皆由三代、秦、汉之说，以建设其心理学及伦理学。其说之幽玄高妙，自不及宋人远甚；然一方复活先秦之古学，一方又加以新解释，此我国最近哲学上唯一有兴味之事，亦唯一可纪之事也。兹略述二氏之说如左：

戴氏之学说，详于《原善》及《孟子字义疏证》。然其说之系统，具于《读易系辞论性》一篇，兹录其全文于左。由此而读二书，则思过半矣。

《易》曰：“一阴一阳之谓道，继之者善也，成之者性也。”一阴一阳，盖言天地之化不已也，道也。一阴一阳，其生生乎？其生生而条理乎？以是见天地之顺，故曰“一阴一阳之谓道”。生生，仁也，未有生生而不条理者。条理之秩然，礼至著也；条理之截然，义至著也：以是见天地之常。三者咸得，天下之至善也，人物之常也，故曰“继之者善也”。言乎人物之生，其善则与天地继承不隔者也。有天地，然后有人物；有人物，于是有人物之性。人与物同有欲，欲也者，性之事也。

人与物同有觉，觉也者，性之能也。事能无有失，则协于天地之德，协于天地之德，理至正也。理也者，性之德也。言乎自然之谓顺，言乎必然之谓常，言乎本然之谓德。天下之道尽于顺，天下之教一于常，天下之性同之于德。性之事配阴阳五行，性之能配鬼神，性之德配天地之德。所谓血气心知之性，发于事能者是也。所谓天之性者，事能之无有失是也，为夫不知德者别言之也。人与物同有欲，而得之以生也各殊。人与物同有觉，而喻大者大，喻小者小也各殊。人与物之中正同协于天地之德，而存乎其得之以生，存乎喻大喻小之明昧也各殊。此之谓阴阳五行以成性，故曰“成之者性也”。善以言乎天下之大共也，性言乎成于人人之举凡自为。性其本也；所谓善，无他焉，天地之化，性之事能，可以知善矣。君子之教也，以天下之大共正人之所自为。性之事能，合之则中正，违之则邪僻，以天地之常，俾人咸知由其常也。明乎天地之顺者，可与语道；察乎天地之常者，可与语善；通乎天地之德者，可与语性。（《戴东原集》卷八）

宋儒之言性也，以性为即理。又虽分别理义之性与气质之性，然以欲为出于气质之性，而其所谓性，概指义理之性言之。（朱子《论语》“性相近也”章注引程子曰：“此言气质之性，非性之本也。若言其本，则性即是理，理无不善，孟子之言性

善是也，何相近之有哉？”又《孟子》“生之谓性”章注：“告子不知性之为理，而以所为气者当之。故由宋儒之说，欲者，性以外之物；又义理者，欲以外之物也。戴氏则以欲在性中，而义理即在欲中，曰：“欲也者，性之事也。”“事无有失，则协于天地之德。协于天地之德，理至正也。理也者，性之德也。见上）又曰：“欲不流于私则仁，不溺而为愚则义，情发而中节则和，如是之谓天理。情欲未动，湛然无失！是为天性。非天性自天性！情欲自情欲！天理自天理也。”（《答彭进士书》）又曰：“理也者，情之不爽失也。，《孟子字义疏证》卷上）又曰：“无过情、无不及情之谓性。，同上）此所谓情兼欲而言之。兹将其论情及欲二条对照之可知：

问：古人之言天理，何谓也？曰：理也者，情之不爽失也，未有情不得而理得者也。凡有所施于人，反躬而静思之：人以此施于我，能受之乎？凡有所责于人，反躬而静思之：人以此责于我，能尽之乎？以我絜之人，则理明。天理云者，言乎自然之分理也。自然之分理，以我之情絜之情，而无不得其平是也。《乐记》曰：“人生而静，天之性也。感于物而动，性之欲也。物至知知，然后好恶形焉。好恶无节于内，知诱于外，不能反躬，天理灭矣。”“夫物之感人无穷，而人之好恶无节，则是物至而人化物也。人化物也者，灭天理而穷人欲者也。于是有悖逆诈伪之心，有淫佚作乱之事。是故强者胁弱，众者暴寡，知者诈愚，勇者苦怯，疾病不养，老幼孤独不得其所。此大乱之道也。”诚以弱、寡、愚、怯与夫疾病、老幼、孤独，反躬而思其情，人岂异于我？盖方其静也，未感与物，其血气心知，湛然无有失，故曰“天之性”。及其感而动，则欲出于性，一人之欲，天下人之所同欲也，故曰“性之欲”。好恶既形，遂己之好恶，忘人之好恶，往往贼人以逞欲。反躬者，以人逞其欲思身受之情也。情得其平，是为好恶之节，是为依乎天理。古人所谓天性，未有如后儒所谓天理者矣（《孟子字义疏证》卷上）

又曰：

问：《乐记》言“灭天理而穷人欲”，其言有似以理欲为正邪之别，何也？曰：性，譬则水也；欲，譬则水之流也。节而不过，则为依乎“天理”，为相生相养之道，譬则水由地中行也，穷人欲”而至于“有悖逆诈伪之心，有淫佚作乱之事”，譬则洪水横流，泛滥于中国也。圣人教之反躬，以己之加于人，设人如是加于己，而思躬受之之情，譬则禹之行水，行其所无事，非恶泛滥而塞其流也。恶泛滥而塞其流，其立说之工者直绝其源，是遏欲无欲之喻也。“口之于味也，目之于色也，耳之于声也，鼻之于臭也！四肢之于安佚也”！此后儒视为人欲之私者！而孟子曰“性也”！继之曰“有命焉”。命者限制之名，如命之东则不得而西，言性之欲之不可无节也。节而不过，则依乎天理，非以天理为正、人欲为邪也。天理者，节其欲而不穷人欲也。是故欲不可穷，非不可有，有而节之，使无过情，无不及情，可谓之非天理乎！（同上）

由此观之，上之所谓“情”，即此之所谓“欲”也。其《与彭进士（绍升）书》所谓“情者，有亲疏长幼尊卑而发于自然。”又曰：“欲患其过，而情患其不及”者，则狭义之情，而非此所谓情也。此所谓情者，欲而已矣。而欲之得其平、得其节者，即谓之理。又引《中庸》之“文理”、《乐记》之“伦理”、《孟子》之“条理”、《庄子》之“天理”（养生主）、《韩非子》之“腠理”之训，以为理者，非具于物之先而存于物之中，物之条分缕析者即是也。盖生生者天地之性，由是而有阴阳五行，由是而有山川原隰，由是而有飞潜动植，所谓“生生而条理”者也，此天地之理也。人之性感于物而动，于是乎有欲，天下之人，各得遂其欲而无所偏，此人之理也。而使吾人之欲，在在依乎天理，其道在行，孔子之所谓“恕”，《大学》所谓“絜矩之道”。所谓“理”者，自客观上言之，所谓“恕”与“絜矩之道”者，自主观上言之，所谓“理”者，自其究竟言之，所谓“恕”与“絜矩之道”者，自其手段言之：其实则一而已矣。

然则使吾人节人欲而依乎天理者何欤？使吾人以己之情絜人之情，而无不得其平者何欤？夫戴氏之所谓性，固兼心知与血气言之，则所以使吾人如此者，其为心知必矣。故曰：

凡血气之属，皆有精爽。其心之精爽、巨细不同。如火光之照物，光小者其照也近，所照者不谬也，所不照者疑谬承之，不谬之谓得理；其光大者其照也远，得理多而失理少。且不特远近也，光之及又有明暗，故于物有察有不察；察者尽其实，不察斯疑谬承之，疑谬之谓失理。失理者，限于质之昧，所谓愚也。惟学可以增益其不足而进于智。益之不已，至乎其极，如日月有明，容光必照，则圣人矣。（《孟子字义疏证》卷上）

然则，如戴氏之说，则非理之行存于知之失，而不存于欲之失，故驳周子“无欲”之说。又曰：朱子亦屡言“人欲所蔽”，皆以为无欲则无蔽，非《中庸》“虽愚必明”之道也。有生而愚者，虽无欲亦愚也。凡出于欲，无非相生相养之事，欲之失为私不为蔽……私生于欲之失，蔽生于知之失。（同上）

然由戴氏之说推之，则必欲之失根于知之失而后可，必私与蔽相因而后可。不然，则理者情欲之不丧失之谓，知之失，安得即谓之非理？今乃曰：“欲之失为私不为蔽”，一若私与蔽全为二物者，自其哲学之全体观之，不可谓之非矛盾也。

厥后阮文达又推阐戴氏之说，而作《性命古训》（《挈经室一集》卷十），复括其意，作《节性斋主人小像跋》一篇（《挈经室再续集》卷一），其文曰：

余讲学不敢似学案立宗旨，惟知言性则溯始《召诰》之“节性”，迄于《孟子》之“性善”，不立空谈、不生异说而已。性字之造，于周召之前，从心则包仁、义、礼、智等在内，从生则包味、臭、色、声等在内。是故周召之时，解性字者朴实不

乱。何也？字如此实造，事亦如此实讲。周召知性中有欲，必须节之。节者，如有所节制，使不逾尺寸也。以节字制天下后世之性，此圣人万世可行，得中庸之道也。《中庸》之“率性”（率同帅），犹《召诰》之“节性”也……至于各义，已详余《性命古训》篇。

《虞夏书》内无性字。性字始见于《书·西伯戡黎》（天性）、《召诰》（节性）、《诗·卷阿》（弥性）。古性字之义，包于命字之中，其字乃商、周孳生之字，非仓颉所造。从心则包仁义等事（人非仁义，无以为生），从生则包食色等事（人非食色，无以生生）。孟子曰：“动心忍性。”若性但须复，何必言忍？忍即节也。

故阮氏之说，全祖戴氏，其所增益者，不过引《书·召诰》，《诗·卷阿》之说，为戴氏之未及，又分析性之字义而已。二氏之意，在申三代秦汉之古义以攻击唐宋以后杂于老、佛之新学。戴氏于《孟子字义疏证》外，其攻击新学，尤详于《答彭进士书》。其弟子段若膺氏谓此书“以六经、孔孟之旨，还之六经、孔孟，以程朱之旨，还之程朱，以陆王、佛氏之旨，还之陆王、佛氏”。诚哉此言也！阮氏于《性命古训》中，亦力攻李翱复性之说。又作《塔性说》（《挈经室续集》卷三）以为翻译者，但用典中“性”字，以当佛经无得而称之物，而唐人更以经中“性”字当之。其说与唐宋以来千余年之说，其优劣如何，暂置勿论。要之，以宋儒之说还宋儒，以三代之说还三代，而使吾人得明认三代与唐宋以后之说之所以异，其功固不可没也。

盖吾中国之哲学，皆有实际的性质，而此性质于北方之学派中为尤著。古代北方之学派中非无深邃统一之哲学，然皆以实用为宗旨。《易》之旨在于前民用，《洪范》之志在于叙彝伦，故生生主义者，北方哲学之唯一大宗旨也。苟无当于生生之事者，北方学者之所不道。故孔墨之徒，皆汲汲以用世为事。惟老庄之徒，生于南方，（庄子楚人，虽生于宋，而钓于濮水。陆德明《经典释文》曰：“陈地，水也。”此时陈已为楚灭，则亦楚地也。故楚王欲以为相）遁世而不悔，其所说虽不出实用之宗旨，然其言性与道，颇有出于北方学者之外者。盖北方土地硗瘠，人民图生事之不暇，奚暇谈空理？其偏于实际，亦自然之势也。至江、淮以南，富水利，多鱼盐，其为生也较易，故有思索之余暇。《史记·货殖列传》曰：

总之，吴越之地，地广人稀，饭稻羹鱼，或火耕而水耨，果隋蠃蛤，不待贾而足，地势饶食，无饥馑之患。以故皆麻偷生，无积聚而贫。是故江、淮以南，无冻饿之人，亦无千金之家。沂、泗水以北，宜五谷桑麻六畜，地小人众，数被水旱之害。理论哲学之起于南方，岂不以此也乎？此外古代幽深玄远之哲学，所以起于印度、希腊者，其原因亦存于此。至魏晋以后，南方之哲学，与印度哲学之一部代兴于中国，然以不合于我国人实际之性质，故我国北方之学者亦自觉其理论之不如彼也。三者混合，而成宋元明三朝之学术。至国朝而三者之说俱微矣。自汉学盛行，而学

者以其考证之眼转而攻究古代之性命、道德之说，于是古代北方之哲学复明，而有复活之态度。度戴、阮二氏之说，实代表国朝汉学派一般之思想，亦代表吾国人一般之思想者也。此足以见理论哲学之不适于吾国人之性质，而我国人之性质，其彻头彻尾实际的有如是也。至数者是非优劣之问题，则不具论于此。

叔本华与尼采

19世纪中，德意志之哲学界有两大伟人焉：曰叔本华（Schopenhauer），曰尼采（Nietzsche）。二人者，以旷世之文才，鼓吹其学说也同；其说之风靡一世，而毁誉各半也同。就其学说言之，则其以意志为人性之根本也同，然一则以意志之灭绝，为其伦理学上之理想，一则反是，一则由意志同一之假说。而唱绝对之博爱主义，一则唱绝对之个人主义。夫尼采之学说，本自叔本华出，曷为而其终乃反对若是？岂尼采之背师，固若是其甚欤，抑叔本华之学说中，自有以启之者欤？自吾人观之，尼采之学说全本于叔氏：其第一期之说，即美术时代之说，其全负于叔氏，固可勿论；第二期之说，亦不过发挥叔氏之直观主义；其末期之说，虽若与叔氏相反对，然要之不外以叔氏之美学上之天才论，应用于伦理学而已。兹比较二人之说，好学之君子以览观焉。

叔本华由锐利之直观与深邃之研究，而证吾人之本质为意志，而其伦理学上之理想，则又在意志之寂灭。然意志之寂灭之可能与否，一不可解之疑问也（其批评见《红楼梦评论》第四章）。尼采亦以意志为人之本质，而独疑叔氏伦理学之寂灭说，谓欲寂灭此意志者亦一意志也，于是由叔氏之伦理学出！而趋于其反对之方向；又幸而于叔氏之伦理学上所不满足者，于其美学中发见其可模仿之点，即其天才论与知力的贵族主义，实可为超人说之标本者也。要之，尼采之说，乃彻头彻尾发展其美学上之见解，而应用之于伦理学，犹赫尔德曼之无意识哲学发展其伦理学之见解者也。

叔氏谓吾人之知识，无不从充足理由之原则者，独美术之知识不然，其言曰：

一切科学，无不从充足理由原则之某形式者。科学之题目但现象耳，现象之变化及关系耳。今有一物焉，超乎一切变化关系之外，而为现象之内容，无以名之，名之曰实念。问此实念之知识为何？曰：美术是已。夫美术者，实以静观中所得之实念，寓诸一物焉而再现之。由其所寓之物之区别，而或谓之雕刻，或谓之绘画，或谓之诗歌、音乐。然其惟一之渊源，则存于实念之知识，而又以传播此知识为其惟一之目的也。一切科学，皆从充足理由之形式。当其得一结论之理由也，此理由又不可无他物以为之理由，他理由亦然。譬诸混混长流，永无涘涘之日；譬诸旅行者，数周地球，而曾不得见天之有涯、地之有角。

美术则不然，固无往而不得其息肩之所也。彼由理由结论之长流中，拾其静观之对象，而使之孤立于吾前。而此特别之对象，其在科学中也，则藐然全体之一部分耳；而在美术中，则遽而代表其物之种族之全体，空间时间之形式对此而失其效，关系之法则至此而穷于用。故此时之对象，非个物而但其实念也。吾人于是得下美术之定义曰：美术者，离充足理由之原则而观物之道也。此正与由此原则观物者相反对。后者如地平线，前者如垂直线。后者之延长虽无限，而前者得于某点割之。后

者合理之方法也，惟应用于生活及科学；前者天才之方法也，惟应用于美术。后者雅里大德勒之方法，前者柏拉图之方法也。后者如终风暴雨，震撼万物，而无始终、无目的；前者如朝日漏于阴云之罅，金光直射，而不为风雨所摇。后者如瀑布之水，瞬息变易而不舍昼夜；前者如涧畔之虹，立于鞞鞞澎湃之中，而不改其色彩。（英译《意志及观念之世界》第一百三十八页至一百四十页）

夫充足理由之原则，吾人知力最普遍之形式也。而天才之观美也，乃不沾沾于此。此说虽本于希尔列尔（Schiller）之游戏冲动说，然其为叔氏美学上重要之思想，无可疑也。尼采乃推之于实践上，而以道德律之于超人，与充足理由原则之于天才，一也。由叔本华之说，则充足理由之原则非徒无益于天才，其所以为天才者，正在离之而观物耳。由尼采之说，则道德律非徒无益于超人，超道德而行动，超人之特质也。由叔本华之说，最大之知识在超绝知识之法。由尼采之说，最大之道德，在超绝道德之法。天才存于知之无所限制，而超人存于意之无所限制。而限制吾人之知力者，充足理由之原则；限制吾人之意志者，道德律也。于是尼采由知之无限限制说，转而唱意之无限限制说，其《察拉图斯德拉》第一篇中之首章，述灵魂三变之说曰：

察拉图斯德拉说法于五色牛之村曰：吾为汝等说灵魂之三变。灵魂如何而变为骆驼，又由骆驼而变为狮子，由狮子而变为赤子乎？于此有重荷焉，强力之骆驼，负之而趋，重之又重，以至于无可增，彼固以此为荣且乐也。此重物何？此最重之物何？此非使彼卑弱而污其高严之袈裟者乎？此非使彼炫其愚而匿其知者乎？此非使彼拾知识之橡栗而冻饿以殉真理者乎？此非使彼离亲爱之慈母而与聋瞽为侣者乎？世有真理之水，使彼入水而友蛙龟者非此乎？使彼爱敌而与狞恶之神握手者非此乎？

凡此数者，灵魂苟视其力之所能及，无不负也；如骆驼之行于沙漠，视其力之所能及，无不负也。既而风高日黯，沙飞石走，昔日柔顺之骆驼，变为猛恶之狮子，尽弃其荷，而自为沙漠主，索其敌之大龙而战之。于是昔日之主，今日之敌；昔日之神，今日之魔也。此龙何名？谓之“汝宜”狮子何名？谓之“我欲”邦人兄弟，汝等必为狮子，毋为骆驼。岂汝等任载之曰尚短，而负担尚未重欤？汝等其破坏旧价值（道德）而创作新价值狮子乎？言乎破坏则足矣，言乎创作则未也。然使人有创作之自由者，非彼之力欤？汝等胡不为狮子？邦人兄弟，狮子之变为赤子也何故？狮子之所不能为，而赤子能之者何？赤子若狂也，若忘也，万事之源泉也，游戏之状态也，自转之轮也，第一之运动也，神圣之自尊也。邦人兄弟，灵魂之变为骆驼，骆驼之变而为狮，狮之变而为赤子，余既诏汝矣！（英译《察拉图斯德拉》二十五至二十八页）

其赤子之说，又使吾人回想叔本华之天才论曰：

天才者不失其赤子之心者也。盖人生至七年后，知识之机关即脑之质与量已达完全

之域，而生殖之机关尚未发达，故赤子能感也，能思也，能教也，其爱知识也较成人深，而其受知识也亦视成人易。一言以蔽之曰：彼之知力盛于意志而已，即彼之知力之作用远过于意志之所需要而已。故自某方面观之，凡赤子皆天才也；又凡天才，自某点观之，皆赤子也。昔海尔台尔（Herder）谓格代（Goethe）曰巨孩。音乐大家穆差德（Mozart）亦终生不脱孩气，休利希台额路尔谓彼曰：“彼于音乐，幼而惊其长老；然于一切他事，则壮而常有童心者也。”英译《意志及观念之世界》第三册六十一页至六十三页）

至尼采之说超人与众生之别、君主道德与奴隶道德之别，读者未有不惊其与叔氏伦理学上之平等博爱主义相反对者。然叔氏于其伦理学及形而上学所视为同一意志之发现者，于知识论及美学上则分之为种种之阶级。故古今之崇拜天才者，殆未有如叔氏之甚者也。彼于其大著述第一书之补遗中，说知力上之贵族主义曰：

知力之拙者常也，其优者变也。天才者，神之示现也。不然，则宁有以八百兆之人民，经六千年之岁月，而所待于后人之发明思索者，尚如斯其众耶？夫大智者，固天之所吝。天之所吝，人之幸也。何则？小智于极狭之范围内，测极简之关系，此大智之冥想宇宙人生者，其事逸而且易。昆虫之在树也，其视盈尺以内，较吾人为精密，而不能见人于五步之外。故通常之知力，仅足以维持实际之生活耳。而对实际之生活，则通常之知力固亦已胜任而愉快。若以天才处之，是犹用天文镜以观优，非徒无益，而又蔽之。故由知力上言之，人类真贵族的也，阶级的也。此知力之阶级，较贵贱贫富之阶级为尤著。其相似者，则民万而始有诸侯一，民兆而始有天子一，民京垓而始有天才一耳。故有天才者，往往不胜孤寂之感。白衣龙（Byron）于其《唐旦之预言诗》中咏之曰：

To feel me in the solitude of kings

Without the power that make them bear a crown.

予岑寂而无友兮，羌独处乎帝之庭。冠玉冕之崔巍兮，夫固踟蹰而不能胜。（略译其大旨）

此之谓也。（同前书第二册三百四十二页）

此知力的贵族与平民之区别外，更进而立大人与小人之区别曰：

一切俗子因其知力为意志所束缚，故但适于一身之目的。由此目的出，于是有俗滥之画，冷淡之诗，阿世媚俗之哲学。何则？彼等自己之价值，但存于其一身一家之福祉，而不存于真理故也。惟知力之最高者，其真正之价值，不存于实际，而存于理论，不存于主观，而存于客观，端端焉力索宇宙之真理而再现之，于是彼之价值

，超乎个人之外，与人类自然之性质异。如彼者，果非自然的欤？宁超自然的也。而其人之所以大，亦即存乎此。故图画也，诗歌也，思索也，在彼则为目的，而在他人则为手段也。彼牺牲其一生之福祉，以殉其客观上之目的，虽欲少改焉而不能。何则？彼之真正之价值，实在此而不在彼故也。他人反是，故众人皆小，彼独大也。（前书第三册第一百四十九页至一百五十页）

叔氏之崇拜天才也如是。由是对一切非天才而加以种种之恶谥：曰俗子（Philistine），曰庸夫（populase），曰庶民（Mob），曰舆台（Rabble），曰合死者（Mortal）。尼采则更进而谓之曰众生（Herd），曰众庶（Far-too-many）。其所以异者，惟叔本华谓知力上之阶级惟由道德联结之，尼采则谓此阶级于知力道德皆绝对的而不可调和者也。

叔氏以持知力的贵族主义，故于其伦理学上虽奖卑屈（Humility）之行，而于其美学上大非谦逊（Modesty）之德曰：

人之观物之浅深明暗之度不一，故诗人之阶级亦不一。当其描写所观也，人人殆自以为握灵蛇之珠、抱荆山之玉矣。何则？彼于大诗人之诗中，不见其所描写者或逾于自己。非大诗人之诗之果然也，彼之肉眼之所及实止于此，故其观美术也，亦如其观自然，不能越此一步也。惟大诗人见他人之见解之肤浅，而此外尚多描写之余地，始知己能见人之所不能见而言人之所不能言。故彼之著作，不足以悦时人，只以自赏而已。若以谦逊为教，则将并其自赏者而亦夺之乎？然人之有功绩者，不能擅其自知之明。譬诸高八尺者，颡而过市，则肩背昂然，齐于众人之首矣。千仞之山，自巔而视其麓也，与自麓而视其巔等。霍兰士（Horace）、鲁克来鸠斯（Lucilius）、屋维特（Ovid）及一切古代之诗人，其自述也，莫不有矜贵之色。唐旦（Dante）然也，狭斯玉尔（Shakespeare）然也，柏庚（Bacon）亦然也。故大人而不自见其大者，殆未之有，惟细人者，自顾其一生之空无所有，而聊托于谦逊以自慰，不然，则彼惟有蹈海而死耳。某英人尝言曰：“功绩（Merit）与谦逊（Modest），除二字之第一字母外，别无公共之点。”格代亦云：“惟一无所长者乃谦逊耳。”特如以谦逊教人责人者，则格代之言，尤不我欺也。（同前书第三册二百零二页）

吾人且述尼采之《小人之德》一篇中之数节以比较之，其言曰：

察拉图斯德拉远游而归，至于国门，则眇焉若狗窦，匍匐而后能入。既而览乎民居，粲焉若傀儡之箱，鳞次而栉比，叹曰：夫造物者宁将以彼为此拘拘也？吾知之矣。使彼等藐焉若此者，非所谓德性之教耶？彼等好谦逊，好节制，何则？彼等乐其平易故也。夫以平易而言，则诚无以逾乎谦逊之德者矣。彼等尝学步矣，然非能步也，蹙也。彼且且顾，且顾且，彼之足与目不我欺也。彼等之小半能欲也，而其大半被欲也。其小半本然之动作者也，其大半反是。彼等皆不随意之动作者也，无意识之动作者也，其能为自发之动作者希矣。其丈夫既藐焉若此，于是女子亦皆男子

自处。惟男子之得全其男子者，得使女子之位置复归于女子。其最不幸者，命令之君主，亦不得不从服役之奴隶之道德，“我役、汝役、彼役”，此道德之所命令者也。哀哉！乃使最高之君主，为最高之奴隶乎？哀哉！其仁愈大，其弱愈大；其义愈大，其弱愈大。此道德之根柢，可以一言蔽之，曰：“毋害一人。”噫！道德乎？卑怯耳！然则彼等所视为道德者，即使彼等谦逊驯扰者也，是使狼为羊、使人为人之最驯之家畜者也。（《察拉图斯特拉》第二百四十八页至二百四十九页）

尼采之恶谦逊也亦若此，其应用叔氏美学之说于伦理学上，昭然可覩。夫叔氏由其形而上学之结论，而谓一切无生物之物，与吾人皆同一意志之发现，故其伦理学上之博爱主义，不推而放之于禽兽草木不止。然自知力上观之，不独禽兽与人异焉而已，即天才与众人之间，男子与女子间，皆有斛然不可逾之界限。但其与尼采异者，一专以知力言，一推而论之于意志，然其为贵族主义则一也。又叔本华亦力攻基督教曰：今日之基督教，非基督之本意，乃复活之犹太教耳。”其所以与尼采异者，一则攻击其乐天主主义，一则并其厌世主义而亦攻之，然其为无神论则一也。叔本华说涅槃，尼采则说转灭，一则欲一灭而不复生，一则以灭为生超人之手段，其说之所归虽不同，然其欲破坏旧文化而创造新文化则一也。况其超人说之于天才说，又历历有模仿之迹乎！然则吾人之视尼采，与其视为叔氏之反对者，宁视为叔氏之后继者也。

又叔本华与尼采二人之相似，非独学说而已，古今哲学家性行之相似，亦无若彼二人者。巴尔善之《伦理学系统》与文特儿朋《哲学史》中，其述二人学说与性行之关系，甚有兴味，兹援以比较之。巴尔善曰：

叔本华之学说与其生活，实无一调和之处。彼之学说，在脱屣世界与拒绝一切生活之意志，然其性行则不然。彼之生活，非婆罗门教、佛教之克己的，而宁伊壁鸠鲁之快乐的也。彼自离柏林后，权度一切之利害，而于法兰克福特及曼亨姆之间定其隐居之地。彼虽于学说上深美悲悯之德，然彼自己则无之。古今之攻击学问上之敌者，殆未有酷于彼者也。虽彼之酷于攻击，或得以辩护真理自解乎，然何不观其对母与妹之关系也？彼之母妹暂焉陷于破产之境遇，而彼独保其自己之财产。彼终其身惴惴焉，惟恐分有他人之损失及他人之苦痛。要之，彼之性行之冷酷，无可讳也。然则彼之人生观，果欺人之语欤？曰：否。彼虽不实践其理想上之生活，固深知此生活之价值者也。人性之二元中，理欲二者，为反对之两极，而二者以彼之一生为其激战之地。彼自其父遗传忧郁之性质，而其视物也，恒以小为大，以常为奇，方寸之心，充以弥天之欲，忧患劳苦，损失疾病，迭起互伏，而为其恐怖之对象，其视天下人无一可信赖者。

凡此数者，有一于此，固足以疲其生活而有余矣。此彼之生活之一方面也。其在他方面，则彼大知也，天才也，富于直观之力，而饶于知识之乐，视古之思想家，有过之无不及。当此时也，彼远离希望与恐怖，而追求其纯粹之思索，此彼之生活中

最慰藉之顷也。逮其情欲再现，则畴昔之平和破，而其生活复以忧患恐惧充之。彼明知其失，而无如之何，故彼每曰：“知意志之过失而不能改之，此可疑而不可疑之事实也。”故彼之伦理说，实可谓其罪恶之自白也。（巴尔善《伦理学系统》第三百十一页至三百十二页）

巴氏之说固自无误，然不悟其学说中于知力之元质外，尚有意志之元质（见下文）。然其叙述叔氏知意之反对，甚为有味。吾人更述文特尔朋之论尼采者比较之曰：

彼之性质中争斗之二元质，尼采自谓之曰地哇尼苏斯（Dionysus），曰亚波罗（Apollo）。前者主意论，后者主知论也；前者叔本华之意志，后者海额尔之理念也。彼之知力的修养与审美的创造力，皆达最高之程度。彼深观历史与人生，而以诗人之手腕再现之。然其性质之根柢，充以无疆之大欲，故科学与美术不足以拯之。其志则专制之君主也，其身则大学之教授也，于是彼之理想，实往复于知力之快乐与意志之势力之间。

彼俄焉委其一身于审美的直观与艺术的制作，俄焉而欲展其意志，展其本能，展其情绪，举昔之所珍赏者一朝而舍之。夫由其人格之高尚纯洁观之，则耳目之欲，于彼固一无价值也。彼所求之快乐，非知识的即势力的也。彼之一生，疲于二者之争斗。迨其暮年，知识、美术、道德等一切，非个人及超个人之价值不足以厌彼，彼翻然而欲于实践之生活中发展其个人之无限之势力。于是此战争之胜利者，非亚波罗而地哇尼苏斯也，非过去之传说而未来之希望也，一言以蔽之，非理性而意志也。（文特尔朋《哲学史》第六百七十九页）

由此观之，则二人之性行何其相似之甚欤！其强于意志相似也，其富知力相似也，其喜自由相似也。其所以不相似而相似，相似而又不相似者何欤？

呜呼！天才者，天之所靳，而人之不幸也。蚩蚩之民，饥而食，渴而饮，老身长子，以遂其生活之欲，斯已耳。彼之苦痛，生活之苦痛而已；彼之快乐，生活之快乐而已。过此以往，虽有大疑大患，不足以撓其心。人之永保此蚩蚩之状态者，固其人之福祉，而天之所独厚者也。若夫天才，彼之所缺陷者与人同，而独能洞见其缺陷之处。彼与蚩蚩者俱生，而独疑其所以生。一言以蔽之，彼之生活也与人同，而其以生活为一问题也与人异，皮之生于世界也与人同，而其以世界为一问题也与人异。然使此等问题，彼自命之而自解之，则亦何不幸之有？然彼亦一人耳，志驰乎六合之外，而身局乎七尺之内，因果之法则与空间、时间之形式束缚其知力于外，无限之动机与民族之道德压迫其意志于内。而彼之知力、意志，非犹夫人之知力、意志也。彼知人之所不能知，而欲人之所不敢欲，然其被束缚压迫也与人同。夫天才之大小！与其知力、意志之大小为比例！故苦痛之大小，亦与天才之大小为比例。彼之痛苦既深，必求所以慰藉之道，而人世有限之快乐，其不足慰藉彼也明矣。于是彼之慰藉，不得不反而求诸自己。其视自己也如君王，如帝天；其视他人也如喽

蚁，如粪土。彼故自然之子也，而常欲为其母，又自然之奴隶也，而常欲为其主。举自然所以束缚彼之知意者，毁之裂之，焚之、弃之，草薶而兽猕之。彼非能行之也，姑妄言之而已；亦非欲言诸人也，聊以自娱而已。何则？以彼知意之如此，而苦痛之如彼，其所以自慰藉之道，固不得不出于此也。

叔本华与尼采，所谓旷世之天才，非欤？二人者，知力之伟大相似，意志之强烈相似。以极强烈之意志，而辅以极伟大之知力，其高掌远蹶于精神界，固秦皇、汉武之所北面，而成吉思汗、拿破仑之所望而却走者也。九万里之地球与六千年之文化，举不足以厌其无疆之欲。其在叔本华，则幸而有汗德者为其陈胜、吴广，为其李密、窦建德，以先驱属路。于是于世界现象之方面，则穷汗德之知识论之结论，而曰世界者吾之观念也；于本体之方面，则曰世界万物，其本体皆与吾人之意志同，而吾人与世界万物，皆同一意志之发现也。自他方面言之，世界万物之意志，皆吾之意志也，于是我所有之世界，自现象之方面而扩于本体之方面；而世界之在我，自知力之方面而扩于意志之方面。然彼犹以有今日之世界为不足，更进而求最完全之世界，故其说虽以灭绝意志为归，而于其大著第四篇之末，仍反覆“灭不终灭，寂不终寂”之说。彼之说博爱也，非爱世界也，爱其自己之世界而已；其说灭绝也，非真欲灭绝也，不满足于今日之世界而已。由彼之说，岂独如释迦所云“天上地下，惟我独尊”而已哉？必谓“天上地下，惟我独存”而后快！

当是时，彼之自视，若担荷大地之阿德拉斯（Atlas）也，孕育宇宙之婆罗麦（Brahma）也。彼之形而上学之需要在此，终身之慰藉在此。故古今之主张意志者，殆未有过于叔氏者也，不过于其美学之天才论中，偶露其真面目之说耳。若夫尼采，以奉实证哲学，故不满于形而上学之空想。而其势力炎炎之欲，失之于彼岸者欲恢复之于此岸，失之于精神者欲恢复之于物质。于是叔本华之美学占领其第一期之思想者！至其暮年！不识不知！而为其伦理学之模范。彼效叔本华之天才而说超人，效叔本华之放弃充足理由之原则而放弃道德，高视阔步而恣其意志之游戏。宇宙之内，有知意之优于彼或足以束缚彼之知意者，彼之所不喜也。故彼二人者，其执无神论同也，其唱意志自由论同也。譬之一树，叔本华之说，其根柢之盘错于地下；而尼采之说，则其枝叶之干青云而直上者也。尼采之说，如太华三峰，高与天际；而叔本华之说，则其山麓之花冈石也。其所趋虽殊，而性质则一。彼等所以为此说者无他，亦聊以自慰而已。

要之，叔本华之自慰藉之道，不独存于其美学，而亦存于其形而上学。彼于此学中发见其意志之无乎不在，而不惜以其七尺之我殉其宇宙之我，故与古代之道德尚无矛盾之处。而其个人主义之失之于枝叶者，于根柢取偿之。何则？以世界之意志，皆彼之意志故也。若推意志同一之说，而谓世界之知力皆彼之知力，则反以俗人知力上之缺点加诸天才，则非彼之光荣，而宁彼之耻辱也，非彼之慰藉，而宁彼之苦痛也。其于知力上所以持贵族主义，而与其伦理学相矛盾者以此。《列子》曰：

周子尹氏大治产，其下趣役者侵晨昏而弗息。有老役夫筋力竭矣，而使之弥勤，昼则呻吟而即事，夜则昏惫而熟寐。昔昔梦为国君，居人民之上，总一国之事。游燕宫观，恣意所欲，觉则复役。（《周穆王篇》）

叔氏之天才之苦痛，其役夫之昼也；美学上之贵族主义与形而上学之意志同一论，其国君之夜也。尼采则不然。彼有叔本华之天才而无其形而上学之信仰，昼亦一役夫，夜亦一役夫；醒亦一役夫，梦亦一役夫，于是不得不弛其负担，而图一切价值之颠覆。举叔氏梦中所以自慰者，而欲于昼日实现之，此叔本华之说所以尚不反于普遍之道德，而尼采则肆其叛逆而不憚者也。此无他，彼之自慰藉之道，固不得不出于此也。世人多以尼采暮年之说与叔本华相反对者，故特举其相似之点及其所以相似而不相似者如此。

论哲学家与美术家之天职

天下有最神圣、最尊贵而无与于当世之用者，哲学与美术是已。天下之人嚣然谓之曰无用，无损于哲学、美术之价值也。至为此学者自忘其神圣之位置，而求以合当世之用，于是二者之价值失。夫哲学与美术之所志者，真理也。真理者，天下万世之真理，而非一时之真理也。其有发明此真理（哲学家）或以记号表之（美术）者，天下万世之功绩，而非一时之功绩也。唯其为天下万世之真理，故不能尽与一时一国之利益合，且有时不能相容，此即其神圣之所存也。且夫世之所谓有用者，孰有过于政治家及实业家者乎？世人喜言功用，吾姑以其功用言之。夫人之所以异于禽兽者，岂不以其有纯粹之知识与微妙之感情哉？至于生活之欲，人与禽兽无以或异。

后者政治家及实业家之所供给；前者之慰藉满足，非求诸哲学及美术不可。就其所贡献于人之事业言之，其性质之贵贱，固以殊矣。至就其功效之所及言之，则哲学家与美术家之事业，虽千载以下，四海以外，苟其所发明之真理与其所表之之记号之尚存，则人类之知识感情由此而得其满足慰藉者，曾无以异于昔；而政治家及实业家之事业，其及于五世十世者希矣。此又久暂之别也。然则人而无所贡献于哲学、美术，斯亦已耳；苟为真正之哲学家、美术家，又何嫌乎政治家哉！

披我中国之哲学史，凡哲学家无不欲兼为政治家者，斯可异已！孔子大政治家也，墨子大政治家也，孟、荀二子皆抱政治上之大志者也。汉之贾、董，宋之张、程、朱、陆，明之罗、王无不然。岂独哲学家而已，诗人亦然。“自谓颇腾达，立登要路津。致君尧舜上，再使风俗淳”，非杜子美之抱负乎？“胡不上书自荐达，坐令四海如虞唐”，非韩退之之忠告乎？“寂寞已甘千古笑，驰驱犹望两河平”，非陆务观之悲愤乎？如此者，世谓之大诗人矣。至诗人之无此抱负者，与夫小说、戏曲、图画、音乐诸家，皆以侏儒、倡优自处，世亦以侏儒、倡优畜之。所谓“诗外尚有事在”、“一命为文人便无足观”，我国人之金科玉律也。呜呼，美术之无独立之价值也久矣！此无怪历代诗人，多托于忠君爱国、劝善惩恶之意以自解免，而纯粹美术上之著述，往往受世之迫害，而无人为之昭雪者也。此亦我国哲学、美术不发达之一原因也。

夫然，故我国无纯粹之哲学，其最完备者，唯道德哲学与政治哲学耳。至于周、秦、两宋间之形而上学，不过欲固道德哲学之根柢，其对形而上学非有固有之兴味也。其于形而上学且然，况乎美学、名学、知识论等冷淡不急之问题哉！更转而观诗歌之方面，则咏史、怀古、感事、赠人之题目弥满充塞于诗界，而抒情叙事之作，十百不能得一，其有美术上之价值者，仅其写自然之美之一方面耳。甚至戏曲、小说之纯文学，亦往往以惩劝为旨，其有纯粹美术上之目的者，世非惟不知贵，且加贬焉，于哲学则如彼，于美术则如此，岂独世人不具眼之罪哉，抑亦哲学家、美术家自忘其神圣之位置与独立之价值，而蕙然以听命于众故也？

至我国哲学家及诗人所以多政治上之抱负者，抑又有说。夫势力之欲，人之所生而即具者，圣贤豪杰之所不能免也。而知力愈优者，其势力之欲也愈盛。人之对哲学及美术而有兴味者，必其知力之优者也，故其势力之欲亦准之。今纯粹之哲学与纯粹之美术既不能得势力于我国之思想界矣，则彼等势力之欲，不于政治，将于何求其满足之地乎？且政治上之势力，有形的也，及身的也；而哲学、美术上之势力，无形的也，身后的也。故非旷世之豪杰，鲜有不为一时之势力所诱惑者矣。

虽然，无亦其对哲学、美术之趣味有未深，而于其价值有未自觉者乎？今夫人积年月之研究，而一旦豁然悟宇宙人生之真理，或以胸中惆怅不可捉摸之意境，一旦表诸文字、绘画、雕刻之上，此固彼天赋之能力之发展，而此时之快乐，决非南面王之所能易者也。且此宇宙人生而尚如故，则其所发明所表示之宇宙人生之真理之势力与价值必仍如故。之二者所以酬哲学家、美术家者，固已多矣。若夫忘哲学、美术之神圣，而以为道德政治之手段者，正使其著作无价值者也。愿今后之哲学、美术家，毋忘其天职而失其独立之位置，则幸矣！

去毒篇

（鸦片烟之根本治疗法及将来教育上之注意）

人之谨疾也，必审夫疾之所由起。起居之不时，饮食之无节，侈于嗜欲而啬于运动，此数者，致病之大源也。不治其源，而俟其病而谨之，虽旋病旋愈，未为善卫生也。医之治疾也亦然。不告以摄生之道，而惟标之是治，虽百试百效，未为良医也。此不独个人身体上之疾病然也，国民之精神上之疾病，其治之之道亦无异于是也。

今试问中国之国民，曷为而独为鸦片的国民乎？夫中国之衰弱极矣，然就国民之资格言之，固无以劣于他国民。谓知识之缺乏欤？则受新教育而罹此癖者，吾见亦夥矣。谓道德之腐败欤？则有此癖者不尽恶人，而他国民之道德，亦未必大胜于我国也，要之，此事虽非与知识道德绝不相关系，然其最终之原因，则由于国民之无希望，无慰藉。一言以蔽之：其原因存于感情上而已。

人之有生，以欲望生也。欲望之将达也，有希望之快乐；不得达，则有失望之苦痛。然欲望之能达者一，而不能达者什佰，故人生之苦痛亦多矣。若胸中偶然无一欲望，则又有空虚之感乘之。此空虚之感，尤人生所难堪，人所以图种种遣日之方法者，无非欲祛此感而已。彼鸦片者，固遣日之一方法，而我国民幸而于数百年前发见之，则其鸩而趋之固不足怪，顾独我国民之笃嗜之也，其故如何？

古人之疾，饮酒田猎，今人之疾，鸦片赌博。西人之疾在酒，中人之疾在鸦片。前者阳疾，后者阴疾也；前者少壮的疾病，后者老耄的疾病也，前者强国的疾病，后者亡国的疾病也；前者欲望的疾病，后者空虚的疾病也。然则我国民今日之有此疾病也何故？吾人进而求其原因，则自国家之方面言之，必其政治之不修也，教育之不溥及也；自国民之方面言之，必其苦痛及空虚之感深于他国民，而除鸦片外别无所慰藉之术也。此二者中，后者尤其最要之原因。苟不去此原因，则虽尽焚二十省之罂粟种，严杜印度、南洋之输入品，吾知我国民必求所以代鸦片之物，而其害与鸦片无以异，则固可决也。

故禁鸦片之根本之道，除修明政治，大兴教育，以养成国民之知识及道德外，尤不可不于国民之感情加之意焉。其道安在？则宗教与美术二者是。前者适于下流社会，后者适于上等社会；前者所以鼓国民之希望，后者所以供国民之慰藉。兹二者，尤我国今日所最缺乏，亦其所最需要者也。

宗教之说，今世士大夫所斥为迷信者也。自知识上言之，则神之存在灵魂之不灭，固无人得而证之，然亦不能证其反对之说。何则？以此等问题，超乎吾人之知识外故也。今不必问其知识上之价值如何，而其对感情之效，则有可言焉。今夫蚩蚩之

氓，终岁勤动，与牛马均劳逸，以其血汗，易其衣食，犹不免于冻馁，人世之快乐，终其身无斯须之分，百年之后，奄归土壤。自彼观之，则彼之生活果有何意义乎！而幸而有宗教家者，教之以上帝之存在，灵魂之不灭，使知暗黑局促之生活外，尚有光明永久之生活；而在此生活中，无论知愚、贫富、王公、编氓，一切平等，而皆处同一之地位，享同一之快乐，今世之事业，不过求其足以当此生活而不愧而已。

此说之对富贵者之效如何，吾不敢知，然其对劳苦无告之民，其易听受也，必矣。彼于是偿现世之失望以来世之希望，慰此岸之苦痛以彼岸之快乐。宗教之所以不可废者，以此故也。人苟无此希望，无此慰藉，则于劳苦之暇，厌倦之余，不归于鸦片，而又奚归乎？余非不知今日之佛教已达腐败之极点，而基督教之一部，且以扩充势力干涉政治为事，然苟有本其教主度世之本意，而能造国民之希望与慰藉者，则其贡献于国民之功绩，虽吾侪之不信宗教者，亦固宜尸祝而社稷之者也。

吾人之奖励宗教，为下流社会言之，此由其性质及位置上有不得不如是者。何则？国家固不能令人人受高等之教育，即令能之，其如国民之智力不尽适何？若夫上流社会，则其知识既广，其希望亦较多，故宗教之对彼，其势力不能如对下流社会之大，而彼等之慰藉，不得不求诸美术。美术者，上流社会之宗教也。彼等苦痛之感无以异于下流社会，而空虚之感则又过之。此等感情上之疾病，固非乾燥的科学及严肃的道德之所能疗也。感情上之疾病，非以感情治之不可。

必使其闲暇之时心有所寄，而后能得以自遣。夫人之心力，不寄于此则寄于彼；不寄于高尚之嗜好，则卑劣之嗜好所不能免矣。而雕刻、绘画、音乐、文学等，彼等果有解之之能力，则所以慰藉彼者，世固无以过之。何则？吾人对宗教之兴味，存于未来，而对美术之兴味，存于现在。故宗教之慰藉，理想的，而美术之慰藉，现实的也。而美术之慰藉中，尤以文学为尤大。何则？雕刻、图画等，其物既不易得，而好之之误，则留意于物之弊固所不能免也。若文学者，则求之书藉而已无不足，其普遍便利，决非他美术所能及也。故此后中学校以上宜大用力于古典一科，虽美术上之天才不能由此养成之，然使有解文学之能力，爱文学之嗜好，则其所以慰空虚之苦痛而防卑劣之嗜好者，其益固已多矣。此言教育者所不可不大注意者也。

以上所述，不过就大略言之，非谓上流社会不能有宗教上之信仰，下等社会不许有美术之嗜好也。鸦片之根本治疗法，不出于此二者，若不注意于此，而惟禁之之务，则虽以完全之警察、严酷之刑罚随其后，亦必归于无效，就令有效，不过横溢而为他嗜好而已耳。防民之口，甚于防川，况民之感情乎！今政府有禁鸦片之议，而民间亦渐有自知戒绝者，特不就根本上下手，则恐如庸医之治标，终无勿药之一日。故略抒所见，为社会告焉。

古雅之在美学上之位置

“美术者天才之制作也”，此自汗德以来百余年间学者之定论也。然天下之物，有决非真正之美术品，而又决非利用品者。又其制作之人，决非必为天才，而吾人之视之也，若与天才所制作之美术无异者。无以名之，名之曰“古雅”。

欲知古雅之性质，不可不知美之普遍之性质。美之性质，一言以蔽之曰：可爱玩而不可利用者是已。虽物之美者，有时亦足供吾人之利用，但人之视为美时，决不计及其可利用之点。其性质如是，故其价值亦存于美之自身，而不存乎其外。而美学上之区别美也，大率分为二种：曰优美，曰宏壮。自巴克及汗德之书出，学者殆视此为精密之分类矣。至古今学者对优美及宏壮之解释，各由其哲学系统之差别而各不同。要而言之，则前者由一对象之形式不关于吾人之利害，遂使吾人忘利害之念，而以精神之全力沉浸于此对象之形式中。自然及艺术中普通之美，皆此类也。后者则由一对象之形式，越乎吾人知力所能驭之范围，或其形式大不利于吾人，而又觉其非人力所能抗，于是吾人保存自己之本能，遂超越乎利害之观念外，而达观其对象之形式，如自然中之高山大川、烈风雷雨，艺术中伟大之宫室、悲惨之雕刻象，历史画、戏曲、小说等皆是也。此二者，其可爱玩而不可利用也同，若夫所谓古雅者则何如？

一切之美，皆形式之美也。就美之自身言之，则一切优美皆存于形式之对称变化及调和。至宏壮之对象，汗德虽谓之无形式，然以此种无形式之形式能唤起宏壮之情，故谓之形式之一种，无不可也。就美术之种类言之，则建筑雕刻音乐之美之存于形式固不俟论，即图画诗歌之美之兼存于材质之意义者，亦以此等材质适于唤起美情故，故亦得视为一种之形式焉。释迦与马利亚庄严圆满之相，吾人亦得离其材质之意义，而感无限之快乐，生无限之钦仰。戏曲小说之主人翁及其境遇，对文章之方面言之，则为材质；然对吾人之感情言之，则此等材质又为唤起美情之最适之形式。故除吾人之感情外，凡属于美之对象者，皆形式而非材质也。而一切形式之美，又不可无他形式以表之，惟经过此第二之形式，斯美者愈增其美，而吾人之所谓古雅，即此第二种之形式。即形式之无优美与宏壮之属性者，亦因此第二形式故，而得一种独立之价值，故古雅者，可谓之形式之美之形式之美也。

夫然故古雅之致存于艺术而不存于自然。以自然但经过第一形式，而艺术则必就自然中固有之某形式，或所自创造之新形式，而以第二形式表出之。即同一形式也，其表之也各不同。同一曲也，而奏之者各异，同一雕刻绘画也，而真本与摹本大殊；诗歌亦然。“夜阑更炳烛，相对如梦寐”（杜甫《羌村》诗），之于“今宵剩把银红照，犹恐相逢是梦中”（晏几道《鹧鸪天》词），“愿言思伯，甘心首疾，《诗·卫风·伯兮》），之于“衣带渐宽终不悔，为伊消得人憔悴，欧阳修《蝶恋花》词），其第一形式同。而前者温厚，后者刻露者，其第二形式异也。一切艺术无不皆然，于是有所谓雅俗之区别起。优美及宏壮必与古雅合，然后得显其固有之价值

。不过优美及宏壮之原质愈显，则古雅之原质愈蔽。然吾人所以感如此之美且壮者，实以表出之之雅故，即以其美之第一形式，更以雅之第二形式表出之故也。

虽第一形式之本不美者，得由其第二形式之美（雅），而得一种独立之价值。茅茨土阶，与夫自然中寻常琐屑之景物，以吾人之肉眼观之，举无足与于优美若宏壮之数，然一经艺术家（若绘画，若诗歌）之手，而遂觉有不可言之趣味。此等趣味，不自第一形式得之，而自第二形式得之无疑也。绘画中之布置，属于第一形式，而使笔使墨，则属于第二形式。凡以笔墨见赏于吾人者，实赏其第二形式也。此以低度之美术（如法书等）为尤甚。三代之钟鼎，秦汉之摹印，汉、魏、六朝、唐、宋之碑帖，宋、元之书籍等，其美之大部实存于第二形式。吾人爱石刻不如爱真迹，又其于石刻中爱翻刻不如爱原刻，亦以此也。

凡吾人所加于雕刻书画之品评，曰神、曰韵、曰气、曰味，皆就第二形式言之者多，而就第一形式言之者少。文学亦然，古雅之价值大抵存于第二形式。西汉之匡、刘，东京之崔、蔡，其文之优美宏壮，远在贾、马、班、张之下，而吾人之嗜之也亦无逊于彼者，以雅故也。南丰之于文，不必工于苏、王，姜夔之于词，且远逊于欧、秦，而后人亦嗜之者，以雅故也。由是观之，则古雅之原质，为优美及宏壮中不可缺之原质，且得离优美宏壮而有独立之价值，则固一不可诬之事实也。

然古雅之性质，有与优美及宏壮异者。古雅之但存于艺术而不存于自然，既如上文所论矣，至判断古雅之力亦与判断优美及宏壮之力不同。后者先天的，前者后天的、经验的也。优美及宏壮之判断之为先天的判断，自汗德之《判断力批评》后，殆无反对之者。此等判断既为先天的，故亦普遍的、必然的也。易言以明之，即一艺术家所视为美者，一切艺术家亦必视为美。此汗德所以于其美学中，预想一公共之感官也。若古雅之判断则不然，由时之不同而人之判断之也各异。吾人所断为古雅者，实由吾人今日之位置断之。古代之遗物无不雅于近世之制作，古代之文学虽至拙劣，自吾人读之无不古雅者，若自古人之眼观之，殆不然矣。故古雅之判断，后天的也，经验的也，故亦特别的也，偶然的也。此由古代表出第一形式之道与近世大异，故吾人睹其遗迹，不觉有遗世之感随之，然在当日，则不能若优美及宏壮，则固无此时间上之限制也。

古雅之性质既不存于自然！而其判断亦但由于经验！于是艺术中古雅之部分，不必尽俟天才，而亦得以人力致之。苟其人格诚高，学问诚博，则虽无艺术上之天才者，其制作亦不失为古雅。而其观艺术也，虽不能喻其优美及宏壮之部分，犹能喻其古雅之部分。若夫优美及宏壮，则非天才殆不能捕攫之而表出之。今古第三流以下之艺术家，大抵能雅而不能美且壮者，职是故也。以绘画论，则有若国朝之王晕，彼固无艺术上之天才，但以用力甚深之故，故摹古则优而自运则劣，则岂不以其舍其所长之古雅，而欲以优美宏壮与人争胜也哉。以文学论，则除前所述匡、刘诸人外，若宋之山谷，明之青邱、历下，国朝之新城等，其去文学上之天才盖远，徒以

有文学上之修养故，其所作遂带一种典雅之性质。而后之无艺术上之天才者亦以其典雅故，遂与第一流之文学家等类而观之，然其制作之负于天分者十之二三，而负于人力者十之七八，则固不难分析而得之也。又虽真正之天才，其制作非必皆神来兴到之作也。以文学论，则虽最优美最宏壮之文学中，往往书有陪衬之篇，篇有陪衬之章，章有陪衬之句，句有陪衬之字。一切艺术，莫不如是。此等神兴枯竭之处，非以古雅弥缝之不可。而此等古雅之部分，又非藉修养之力不可。若优美与宏壮，则固非修养之所能为力也。

然则古雅之价值，遂远出优美及宏壮下乎？曰：不然。可爱玩而不可利用者，一切美术品之公性也。优美与宏壮然，古雅亦然。而以吾人之玩其物也，无关于利用故，遂使吾人超出乎利害之范围外，而恹恹于缥渺宁静之域。优美之形式，使人心和平；古雅之形式，使人心休息，故亦可谓之低度之优美。宏壮之形式常以不可抵抗之势力唤起人钦仰之情，古雅之形式则以不习于世俗之耳目故，而唤起一种之惊讶。惊讶者，钦仰之情之初步，故虽谓古雅为低度之宏壮，亦无不可也。

故古雅之位置，可谓在优美与宏壮之间，而兼有此二者之性质也。至论其实践之方面，则以古雅之能力，能由修养得之，故可为美育普及之津梁。虽中智以下之人，不能创造优美及宏壮之物者，亦得由修养而有古雅之创造力；又虽不能喻优美及宏壮之价值者，亦得于优美宏壮中之古雅之原质，或于古雅之制作物中得其直接之慰藉。故古雅之价值，自美学上观之诚不能及优美及宏壮，然自其教育众庶之效言之，则虽谓其范围较大成效较著可也。因美学上尚未有专论古雅者，故略述其性质及位置如右。篇首之疑问，庶得由是而说明之欤。

人间嗜好之研究

活动之不能以须臾息者，其为人之心也。夫人心本以活动为生活者也。心得其活动之地，则感一种之快乐，反是则感一种之苦痛。此种苦痛，非积极的苦痛，而消极的苦痛也。易言以明之，即空虚的苦痛也。空虚的苦痛，比积极地苦痛尤为人所难堪。何则？积极的苦痛，犹为心之活动之一种，故亦含快乐之原质，而空虚的苦痛，则并此原质而无之故也。人与其无生，不也如恶生；与其不活动也，不如恶活动。此生理学及心理学上之二大原理，不可巫也。人欲医此苦痛，于是用种种之方法，在西人名之曰“ To kill time ”，而在我中国，则名之曰“消遣”。其用语之确当，均无以易，一切嗜好由此起也。

然人心之活动亦伙矣。食色之欲，所以保持个人及其种姓之生活者，实存于人心之根柢，而时时要求满足。然满足此欲，固非易易也，于是或劳心，或劳力，戚戚眊眊，以求其生活之道。如此者吾人谓之曰“工作”。工作之为一种积极的苦痛，吾人之所经验也。且人固不能终日从事于工作，岁有闲月，月有闲日，日有闲时，殊如生活之道不苦者。其工作愈简，其闲暇愈多，此时虽乏积极的苦痛，然以空虚之消极的苦痛代之，故苟足以供其心活动者，虽无益于生活之事业，亦鹜而趋之。如此者，吾人谓之曰“嗜好”。虽嗜好之卑劣高尚万有不齐，然其所以慰空虚之苦痛而与人心之活动者，其揆一也。

嗜好之为物，本所以医空虚的苦痛者。故皆与生活无直接之关系，然若谓其与生活之欲无关系，则其不然者也。人类之于生活，即竞争而得胜矣，于是此根本之欲复变为势力之欲，而务使其物质上与精神上之生活超于他人之生活之上。此势力之欲，即谓之生活之欲之苗裔，无不可也。人之一生，唯由此二欲以策其知力及体力，而使之活动。其直接为生活故而活动时，曰“工作”，或其势力有余，而唯为活动故而活动时，谓之曰“嗜好”。故嗜好之为物，虽非表直接之势力，亦必为势力之小影，或足以遂其势力之欲者，始足以动人心，而医其空虚的苦痛。不然，欲其嗜之也难矣。今吾人当进而研究种种之嗜好，且示其与生活及势力之欲之关系焉。

嗜好中之烟酒者，其令人心休息之方面多，而活动之方面少。易言以明之，此二者之效，宁在医积极之苦痛，而不在医消极之苦痛。又此二者，于心理上之结果外，兼有生理上之结果，而吾人对此二者之经验亦甚少，故不具论。今先论博弈。夫人生者，竞争之生活也。苟吾人竞争之势力无所施于生活之实际，或实际上既竞争而胜矣，则其剩余之势力仍不能不求发洩之地。博弈之事，正在抽象上表出竞争之世界，而使吾人于此满足其势力之欲者也。且博弈以但表普遍的抽象的竞争，而不表所竞争者为某物（故为金钱而赌博者不在此例）。故吾人竞争之本能，遂于此以无嫌疑、无忌惮之态度而发表之，于是得窥人类极端之利己主义。至实际之人生，人类之竞争虽无异于博弈，然能如是之磊磊落落者鲜矣。且博与弈之性质，亦自有辨。此二者虽皆世界竞争之小影，而博又为运命之小影。人以执着于生活故，故其

知力常明于无望之福，而暗于无望之祸。而于赌博中，此无望之福随时有可能性，在以博之胜负，人力与命运二者决之，而弈之胜负，则全由人力决之故也。又但就人力言，赌博者悟性上之竞争，而弈者理性上之竞争也。长于悟性者，其嗜博也甚于弈，长于理性者，其嗜弈也甚于博。嗜博者之性格，机警也，脆弱也，依赖也。嗜弈者之性格，谨慎也，坚忍也，独立也。譬之治生，前者如朱公居陶，居与时逐；后者如任氏之折节为俭，尽力田蓄，亦致千金。人亦各随其性之所近，而欲于竞争之中，发见其势力之优胜之快乐耳。吾人对博弈之嗜好，殆非此无以解释之也。

若夫宫室、车马、衣服之嗜好，其适用之部分属于生活之欲，而其装饰之部分则属于势力之欲。驰骋、田猎、跳舞之嗜好，亦此势力之欲之所发表也。常人之对书画、古物也亦然。彼之爱书籍，非必爱其所含之真理也；爱书画古玩，非必爱其形式之优美古雅也。以多相炫，以精相炫，以物之稀而难得也相炫。读书者亦然，以博相炫。一言以蔽之，炫其势力之胜于他人而已矣。常人对戏剧之嗜好，亦由势力之欲出。先以喜剧（即滑稽剧）言之。夫能笑人者，必其势力强于被笑者也，故笑者实吾人之势力之发表。然人于实际生活中，虽遇可笑之事然非其人非我所素狎者，或其位置远在吾人之下者，则不敢笑。独于滑稽剧中，以其非事实故，不独使人能笑，而且使人敢笑，此即对喜剧之快乐所存也。悲剧亦然。霍雷士曰：“人生者，自观之者言之，则为一喜剧，自感之者言之，则为一悲剧也。”自吾人思之，则人生之运命固无以异于悲剧，然当人演此悲剧时，亦俯首杜口，或故示整暇，汶汶而过耳。欲如悲剧中之主人公，且演且歌以诉其胸中之苦痛者，又谁听之，而谁怜之乎！夫悲剧中之人物之无势力之可言，固不待论。然敢鸣其苦痛者与不敢鸣其痛苦者之间，其势力之大小必有辨矣。夫人生固无独语之事，而戏曲则以许独语故，故人生中久压抑之势力独于其中筐倾而筐倒之，故虽不解美术上之趣味者，亦于此中得一种势力之快乐。普通之人之对戏曲之嗜好，亦非此不足以解释之矣。

若夫最高尚之嗜好，如文学、美术，亦不外势力之欲之发表。希尔列尔即谓儿童游戏存于用剩余之势力矣，文学美术亦不过成人之精神的游戏。故其渊源之存于剩余之势力，无可疑也。且吾人之内界之思想感情，平时不能语诸人或不能以庄语表之者，于文学中以无人与我有一定关系故，故得倾倒而出之。易言以明之。吾人之势力所不能于实际表出者，得以游戏表出之是也。若夫真正之大诗人，则又以人类之感情为其一己之感情。彼其势力充实，不可以已，遂不以发表自己之感情为满足，更进而欲发表人类全体之感情。彼之著作，实为人类全体之喉舌，而读者于此得闻其悲欢啼笑之声，遂觉自己之势力亦为之发扬而不能自己。故自文学言之，创作与赏鉴之二方面亦皆以此势力之欲为其根柢也。文学既然，他美术何独不然？岂独美术而已，而哲学与科学亦然。柏庚有言曰：“知识即势力也。”则一切知识之欲，虽谓之即势力之欲，亦无不可。彼等以其势力卓越于常人故，故不满足于现在之势力，而欲得永远之势力。虽其所用以得势力之手段不同，然其势力固无以异。夫然，始足以活动人心而医其空虚之苦痛。以人之心之根柢实为一生活之欲，若势力之

欲苟不足以遂其生活或势力之欲者，决不能使之活动。以是观之，则一切嗜好虽有高卑优劣之差，固无非势力之欲所为也。

然余之为此论，固非使文学美术之价值下齐于博弈也。不过自心理学言之，则数者之根柢皆存于势力之欲，而其作用皆在使人心活动，一疗其空虚之苦痛。以此所论者，乃事实之问题，而非价值之问题故也。若欲抑制卑劣之嗜好，不可不易之以高尚之嗜好，不然，则必有溃决之一日。此又从人心活动之原理出，有教育之责，乃欲教育自己者，不可不知所注意焉。

一九零七年

王国维√

屈子文学之精神

我国春秋以前，道德政治上之思想，可分之为二派：一帝王派，一非帝王派。前者称道尧、舜、禹、汤、文、武，后者则称其学出于上古之隐君子（如庄周所称广成子之类），或托之于上古之帝王。前者近古学派，后者远古学派也。前者贵族派，后者平民派也。前者入世派，后者遁世派也（非真遁世派，知其主义之终不能行于世，而遁焉者也），前者热性派，后者冷性派也。前者国家派，后者个人派也。前者大成于孔子、墨子，而后者大成于老子（老子，楚人，在孔子后，与孔子问礼之老聃，系二人，说见汪容甫《述学·老子考异》），故前者北方派，后者南方派也。此二派者，其主义常相反对，而不能相调和。观孔子与接舆、长沮、桀溺、荷蓑丈人之关系，可知之矣。战国后之诸学派，无不直接出于此二派，或出于混合此二派。故虽谓吾国固有之思想，不外此二者，可也。

夫然，故吾国之文学，亦不外发表二种之思想。然南方学派则仅有散文的文学，如《老子》、《庄》《列》是已。至诗歌的文学，则为北方学派之所专有。《诗》三百篇，大抵表北方学派之思想者也。虽其中如《考槃》、《衡门》等篇，略近南方之思想。然北方学者所谓“用之则行，舍之则藏”，“有道则见，无道则隐”者，亦岂有异于是哉？故此等谓之南北公共之思想则可，必非南方思想之特质也。然则诗歌的文学，所以独出于北方之学派中者，又何故乎？

诗歌者，描写人生者也（用德国大诗人希尔列尔之定义）。此定义未免太狭。今更广之曰“描写自然及人生”，可乎？然人类之兴味，实先人生，而后自然。故纯粹之模山范水，留连光景之作，自建安以前，殆未之见。而诗歌之题目，皆以描写自己之感情为主。其写景物也，亦必以自己深邃之感情为之素地，而始得于特别之境遇中，用特别之眼观之。故古代之诗，所描写者，特人生之主观的方面；而对于人生之客观的方面，及纯处于客观界之自然，断不能以全力注之也。故对古代之诗，前之定义，宁苦其广，而不苦其隘也。

诗之为道，既以描写人生为事，而人生者，非孤立之生活，而在家族、国家及社会中之生活也。北方派之理想，置于当日之社会中；南方派之理想，则树于当日之社会外。易言以明之，北方派之理想，在改作旧社会；南方派之理想，在创造新社会。然改作与创造，皆当日之社会之所不许也。南方之人，以长于思辩，而短于实行，故知实践之不可能，而即于其理想中，求其安慰之地，故有遁世无闷，嚣然自得以没齿者矣。若北方之人，则往往以坚忍之志，强毅之气，恃其改作之理想，以与当日之社会争；而社会之仇视之也，亦与其仇视南方学者无异，或有甚焉。故彼之视社会也，一时以为寇，一时以为亲，如此循环，而遂生欧穆亚（Humour）之人生观。《小雅》中之杰作，皆此种竞争之产物也。且北方之人，不为离世绝俗之举，而日周旋于君臣父子夫妇之间，此等在在畀以诗歌之题目，与以作诗之动机。此诗歌的文学，所以独产于北方学派中，而无与于南方学派者也。

然南方文学中，又非无诗歌的原质也。南人想象力之伟大丰富，胜于北人远甚。彼等巧于比类，而善于滑稽。故言大则有若北溟之鱼，语小则有若蜗角之国，吾久则大椿冥灵，语短则螻蛄朝菌；至于襄城之野，七圣皆迷；汾水之阳，四子独往；此种想象，决不能于北方文学中发见之。故庄、列书中之某部分，即谓之散文诗，无不可也。夫儿童想象力之活泼，此人人公认之事实也。国民文化发达之初期亦然，古代印度及希腊之壮丽之神话，皆此等想像之产物也。以我中国论，则南方之文化发达较后于北方，则南人之富于想象，亦自然之势也。此南方文学中之诗歌的特质之优于北方文学者也。

由此观之，北方人之感情，诗歌的也，以不得想象之助，故其所作遂止于小篇。南方人之想像，亦诗歌的也，以无深邃之感情之后援，故其想象亦散漫而无所丽，是以无纯粹之诗歌。而大诗歌之出，必须俟北方人之感情，与南方之想像合而为一，即必通南北之驿骑而后可，斯即屈子其人也。

屈子南人而学北方之学者也。南方学派之思想，本与当时封建贵族之制度，不能相容。故虽南方之贵族，亦常奉北方之思想焉。观屈子之文，可以征之。其所称之圣王，则有若高辛、尧、舜、禹、汤、少康、武丁、文、武，贤人则有若皋陶、摯说、彭、咸（谓彭祖、巫咸，商之贤臣也，与“巫咸时夕降兮”之巫咸，自是二人，列子所谓“郑有神巫，名季咸”者也）、比干、伯夷、吕望、宁戚、百里、介推、子胥，暴君则有若夏启、羿、浞、桀、纣，皆北方学者之所常称道，而于南方学者所称黄帝、广成等不一及焉。虽《远游》一篇，似专述南方之思想，然此实屈子愤激之词，如孔子之居夷浮海，非其志也。《离骚》之卒章，其旨亦与《远游》同。然卒曰，“陟升皇之赫戏兮，忽临睨夫旧乡。仆夫悲余马怀兮，赌局顾而不行。”《九章》中之《怀沙》，乃其绝笔，然犹称重华、汤、禹，足知屈子固彻头彻尾抱北方之思想，虽欲为南方之学者，而终有所不慊者也。

屈子之自赞曰“廉贞”。余谓屈子之性格，此二字尽之矣。其廉固南方学者之所优为，其贞则其所不屑为，亦不能为者也。女嬃之詈，巫咸之占，渔父之歌，皆代表南方学者之思想，然皆不足以动屈子。而知屈子者，唯詹尹一人。盖屈子之于楚，亲则肺腑，尊则大夫，又尝管内政外交上之大事矣，其于国家既同累世之休戚，其于怀王又有一日之知遇，一疏再放，而终不能易其志，于是其性格与境遇相待，而使之成一种欧穆亚。《离骚》以下诸作，实此欧穆亚所发表者也。使南方之学者处此，则贾谊（《吊屈原文》）、扬雄（《反离骚》）是，而屈子非矣。此屈子之文学，所负于北方学派者也。

然就屈子文学之形式言之，则所负于南方学派者，抑又不少。彼之丰富之想象力，实与庄、列为近。《天问》、《远游》凿空之谈，求女谬悠之语，庄语之不足，而继之以谐，于是思想之游戏，更为自由矣。变《三百篇》之体，而为长句，变短什而为长篇，于是感情之发表，更为宛转矣。此皆古代北方文学之所未有，而其端自

屈子开之。然所以驱使想象而成此大文学者，实由其北方之肫挚的性格。此庄周等之所以仅为哲学家，而周、秦间之大诗人，不能不独数屈子也。

要之，诗歌者，感情的产物也。虽其中之想象的原质（即知力的原质），亦须有肫挚之感情，为之素地，而后此原质乃显。故诗歌者实北方文学之产物，而非儇薄冷淡之夫所能托也。观后世之诗人，若渊明，若子美，无非受北方学派之影响者。岂独一屈子然哉！岂独一屈子然哉！

释史

《说文解字》：史，记事者也。从又持中。中，正也。其字古文、篆文并作，从中（秦泰山刻石御史大夫之史，《说文》大、小徐二本皆如此作）。案：古文中正之字作诸形，而伯仲之仲作，无作者，唯篆文始作。且中正，无形之物德，非可手持，然则史所从之中，果何物乎？吴氏大澂曰：史，象手执简形，然中与简形殊不类。江氏永《周礼疑义举要》云：凡官府簿书谓之中，故诸官言治中受中，小司寇断庶民狱讼之中，皆谓簿书，犹今之案卷也。此中字之本义，故掌文书者谓之史，其字从又从中。又者，右手，以手持簿书也。吏字事字皆有中字。天有司中星，后世有治中之官，皆取此义。江氏以中为簿书，较吴氏以中为简者得之。（简为一简，簿书则需众简）顾簿书何以云中，亦不能得其说。案《周礼·大史职》，凡射事，饰中，舍筭。《大射仪》，司射命释获者设中。大史释获，小臣师执中，先首，坐设之，东面，退。大史实八筭于中，横委其余于中西。又，释获者坐取中之八筭，兴执而俟，乃射。若中，则释获者每一个释一筭。上射于右，下射于左，若有余筭，则反委之。又取中之八筭，改实八筭于中，兴执而俟，云云。此即《大史职》所云饰中舍筭之事。是中者，盛筭之器也。中之制度，《乡射记》云：鹿中髹前足跪，凿背容八筭，释获者奉之先首。又云：君国中射则皮树中，于郊则闾中，于竟则虎中，大夫兕中，士鹿中。是周时甲制皆作兽形，有首有足，凿背容八筭，亦与字形不类。余疑中作兽形者，乃周末弥文之制，其初如形，而于中之上横凿空以立筭，达于下横；其中央一直，乃所以持之，且可建之于他器者也。考古者简与筭为一物。古之简策，最长者二尺四寸；其次二分取一，为一尺二寸；其次三分取一，为八寸；其次四分取一，为六寸（详见余《简牍检署考》）。筭之制亦有一尺二寸与六寸二种，射时所释之筭，长尺二寸，投壶筭长尺有二寸。《乡射记》，箭筭八十，长尺有握，握素，注：箭，亩也。筭，筭也。握，本所持处也。素，谓刊之也。刊本一肤，贾疏云：长尺复云有握，则握在一尺之外，则此筭尺四寸矣。云刊本一肤者，《公羊传》僖三十一年，肤寸而合。何休云：侧手为肤。

又投壶，室中五扶。注云：铺四指曰扶，（案《文选》应休璉《与从弟君苗君胄书》注引《尚书大传》曰：扶寸而合，不崇朝而雨天下。郑玄曰：四指为扶。是扶肤一字）一指案寸，皆谓布四指，一指一寸，四指则四寸，引之者证握肤为一，谓刊四寸也。所纪筭之长短，与投壶不同。疑《乡射记》以周八寸尺言，故为尽四寸，投壶以周十寸尺言，故为尺有二寸，犹《盐铁论》言二尺四寸之律，而《史记·酷吏传》言三尺法，《汉书·朱博传》言三尺律令，皆由于八寸尺与十寸尺之不同，其实一也。计历数之算则长六寸，《汉书·律历志》，筭法用竹径一分长六寸，《说文解字》，筭长六寸，计历数者尺二寸与六寸，皆与简策同制，故古筭二字往往互相[用？]。《既夕礼》，主人之史，请读娚，执筭，从枢东。注：古文筭皆作，《老子》，善计者不用筹策，意谓不用筹筭也。《史记·五帝本纪》，迎曰推。

《集解》引晋灼曰：策，数也，迎数之也。案：策无数义，惟《说文解字》云：算

，数也。则晋灼时本当作迎日推筭，又假筭为算也。汉荡阴令张迁碑，八月民，案《后汉书·皇后纪》，汉法，常以八月算人，是八月民，即八月算民，亦以为算，是古筭同物之证也。射时舍筭，既为史事，而他事用筭者，亦史之所掌，（《周礼·马相氏、保章氏》皆大史属官，《月令》乃命大史守兴奉法司天日月星辰之行，是计历数者史之事也。又古者筮多用以代蓍。《易》击辞传言：乾之策，坤之策，《士冠礼》筮我执。又周秦诸书多言龟策，罕言蓍龟，筭筹一字，而古者卜筮亦史掌之。《少牢馈食礼》筮者为史。《左氏传》亦有筮史，是筮亦史事）筭与简策本是一物，又皆为史之所执，则盛筭之中，盖亦用以盛简。简之多者，自当编之为篇，若数在十简左右者，盛之于中，其用较便，《逸周书·尝麦解》，宰乃承王中，升自客阶，作，执，从中，宰坐尊中于大正之前。是中二物相将，其为盛之器无疑。故当时簿书亦谓之中，《周礼·天府》，凡官府乡州及都鄙之治中，受而藏之。《小司寇》以三刺断民狱讼之中，又登中于天府。《乡士》、《遂士》、《方士》，狱讼成，士师受中。《楚语》，左执鬼中。盖均谓此物也。然则史字从又持中，义为持书之人，与尹之从又持筭（象笔形）者同意矣。

然则谓中为盛之器，史之义不取诸持筭而取诸持，亦有说乎？

曰有。持筭为史事者，正由持而为史事故也。古者书皆史掌之。

《书·金縢》，史乃册祝。《洛诰》，王命作册，逸祝册。又，作册逸诰。《顾命》，大史秉书，由宾阶，御王册命。《周礼》：大史掌建邦之六典，掌法掌则。凡邦国都鄙及万民之有约剂者藏之，以贰六官，六官之所登。大祭祀，戒及宿之日，与群执事读礼书而协事。祭之日，执书以次位常。太会同朝觐，以书协礼事，及将币之日，执书以诏王。

大师，抱天时，与大师同车。大迂国，抱法以前。大丧，执法以莅劝妨，遣之日，读诰。小史掌邦国之志，奠系世，辨昭穆。若有事，则诏王之忌讳。大祭，读礼法，史以书辨昭穆之俎簋。卿大夫令之贰，以考政事，以逆会计。凡命诸侯及公卿大夫则册命之。凡四方之事书，内史读之；王制禄则赞为之，以方出之。内史掌书王命，遂贰之；外史掌书外令，掌四方之志，掌三皇五帝之书，掌达书名于四方。若以书便于四方，则书其令，御史掌赞书，女史掌书内令。《聘礼》：夕幣，史读书展幣。

又，誓于其竟，史读书。《觐礼》，诸公奉篚服，加命书于其上，升自西阶东面。大史是右，侯氏升西面立，大史述命（注：读王命书也）。

《既夕礼》：主人之史请读赗。又，公史自西方东面，读遣卒命。《曲礼》，史载笔。《王制》，大史典礼，执简记奉讳恶。《玉藻》，动则左史书之，言则右史书之。《祭统》，史由君右执策命之。《毛诗·静女》传，古者后夫人必有女史彤管

之法，史不记过其罪杀之。又，周六官之属，掌文书者亦皆谓之史，则史之职专以藏书、读书、作书为事，其字所以从之中，自当为盛之器，此得由其职掌证之也。

史为掌书之官，自古为要职。殷商以前，其官之尊卑虽不可知，然大小官名及职事之名多由史出，则史之位尊地要可知矣。《说文解字》，事，职也，从史省声。又，吏，治人者也。从一从史，史亦声。然殷人卜辞皆以史为事，是尚书无事字。周初之器，如毛公鼎、番生敦二器，卿事作事，大史作史，始别为二字。然毛公鼎之事作，小子师敦之卿事作，师寰敦之嗇事作，从中，上有旂，又持之，亦史之繁文。或者作，皆所以微与史之本字相别，其实犹是一字也。古之官名多由史出，殷周间王室执政之官，经传作卿士（《书·牧誓》是以为大夫卿士。《洪范》，谋及卿士。又，卿士惟月。《顾命》，卿士邦君。《诗·商颂》，降予卿士。是殷周间已有卿士之称）。而毛公鼎、小子师敦、番生敦作卿事，殷墟卜辞作卿史（《殷虚书契》前编卷二篇第二十三叶，又卷四第二十一叶），是卿士本名史也。又，天子诸侯之执政，通称御事，（《书·牧誓》我友邦冢君，御事。《大诰》，猷，大诰猷尔多邦，越尔御事。又，肆余（予）告我友邦君，越严氏，庶士，御事。《酒诰》，厥诰毖庶邦庶士，越少正，御事。又，我西士集健邦君御事小子。《梓材》，王其郊邦君，越御事。《召诰》，诰告庶殷，越自乃御事。又，王先服殷御事，比尔于我有周御事。《洛诰》，予旦以多子，越御事。

《文侯之命》，即我御事，罔或耆寿。峻在厥服。多以邦君御事并称，盖谓诸侯之执政者也）而殷虚卜辞则称御史，（《殷虚书契》前编卷四第二十八叶）是御事亦名史也。又古之六卿，《书·甘誓》为之六事，《司徒》、《司马》、《司空》、《诗·小雅》谓之三事，又谓之三有事。《春秋左氏传》谓之三吏，此皆大官之称事若吏即称史者也。《书·酒诰》，有正有事。又，兹乃允惟王正事之臣，立政。立政立事，正与事对文，长官谓之正若政，庶官谓之事，此庶官之称事，即称史者也。史之本义，为持书之人，引申而为大官及庶官之称，又引申而为职事之称。其后三者各需专字，于是史、吏、事三字于小篆中截然有别：持书者谓之吏，职事谓之事，此盖出于秦汉之际，而诗书之文尚不甚区别，由上文所征引知之矣。

殷以前，史之尊卑虽不可考，然卿事御事均以史名，则史官之秩亦略可知。《曲礼》，天子建天官，先六大，曰大宰、大宗，大史、大祝、大士、大卜。“典司六典”注：此盖殷时制，大史与大宰同掌天官，固当在卿位矣。《左传》桓十七年，天子有日官，诸侯有日御，日官居卿以底日。以日官为卿，或亦殷制。周则据春官序官，大史，下大夫二人，上士四人；小史，中士八人，下士十有六人；内史，中大夫一人，下大夫二人，上士四人，中士八人，下士十有六人；外史，上士四人，中士八人，下士十有六人；御史，中士八人，下士十有六人。其中，官以大史为长，（郑注：大史，史官之长，或疑《书·酒诰》称大史友、内史友。

《大戴礼记·盛德篇》云，大史、内史，左右手也。似大史、内史各自为僚，不相

统属。且内史官在大史上，尤不得为大史之属。然毛公鼎云，御事僚大夫。番生敦云，御事大夫僚。不言内史。盖析言之，则大史、内史为二僚；合言之则为大史一僚。又周官长贰，不问官之尊卑，如乡老以公，乡大夫以卿，而为大司徒之属；世妇以卿，而为大宗伯之属，皆是。则内史为大史之属，亦不嫌也）秩以内史为尊；内史之官员在卿下，然其职之机要，除冢宰外，实为他卿所不及。自《诗》、《书》彝器观之，内史实执政之一人，其职与后汉之后之尚书令、唐宋之中书舍人、翰林学士、明之大学士相当，盖枢要之任也。此官，周初谓之作册，其长谓之尹氏。尹字从又持丨，象笔形。《说文》所载尹之古文作，虽传写讹舛，未可尽信，然其下犹为聿形，可互证也。持中为史，持笔为尹，作册之名，亦与此意相会。试详证之。《书·洛诰》，王命作册，逸祝册。又，作册逸告。作册二字，伪《孔传》以王为册书法度释之。

《顾命》，命作册度，传亦以命史作册书释之。孙氏诂让《周官正义》，始云尹逸盖为内史，以其所掌职事言之，谓之作册，（《古籀拾遗》冗卣跋略同）始以作册为内史之异名，余以古书及古器证之，孙说是也。

案《书·毕命序》，康王命作册毕，分居里，成周东郊，作毕命。（《史记·周本纪》作康王命作册毕公，盖不知作册为官名，毕为人名，而以毕公当之，为《伪古文》毕命之所本）。《汉书·律历志》引《逸毕命·丰刑》曰：王命作册丰刑。《逸周书·尝麦解》亦有作，此皆作册一官之见于古书者。其见于古器者，则癸亥父己鼎云：王赏作策丰贝。鬲卣云：王姜命作册鬲安夷。伯吴尊盖云：宰肫右作册吴入门。皆以作册二字冠于人名上，与《书》同例。而吴尊盖之作册吴，虎敦、牧敦皆作内史吴，是作册即内史之明证也，亦称作册内史。师觶敦：王呼作册内史册命师觶。亢盃：王在周，命作册内史锡亢卣□□。亦称作命内史。刺鼎：王呼作命内史册命刺是也。内史之长曰内史尹，亦曰作册尹。师兑敦：王呼内史尹册命兑。师鼎，王呼作册尹册命师。亢敦：王受作册尹者（假为诸字），俾册命亢是也。亦单称尹氏。《诗·大雅》；王谓尹氏，命程伯休父。颂鼎、寰盘：尹氏受王命书。克鼎：王呼尹氏册命克。师斿敦，王呼尹氏册命师斿是也。或称命尹。（古命、令同字，命尹即令尹。楚正卿令尹之名盖出于此）伊敦，王呼命尹册命伊是也。作册尹氏，皆《周礼·内史》之职，而尹氏为其长，其职在书王命与制禄命官，与大师同秉国政，故《诗·小雅》曰：赫赫师尹，民具尔瞻。又曰：赫赫师尹，不平谓何？又曰：尹氏大师，维周之氏，秉国之钧。诗人不欲斥王。故呼二执政者而告之。师与尹乃二官，与《洪范》之师尹惟曰，《鲁语》百官之政事师尹同，非谓一人而师其官尹其氏也。《书·大诰》：肆予告我友邦君，越尹民，庶士，御事。《多方》：诰尔四国多方，越尔殷侯尹民。民当为氏字之误也。尹氏在邦君、殷侯之次，乃侯国之正卿，殷周之间已有此语。说《诗》者乃以诗之尹氏为大师之氏，以春秋之尹氏当之，不亦过乎！且春秋之尹氏，亦世掌其官，因以为氏耳，然则尹氏之号，本于内史，《书》之庶尹百尹，盖推内史之名以名之，与卿事、御事之推史之名以名之者同。然则前古官名多以史出，可以觐古时史之地位矣。

《史籀篇疏证》序

《叙》曰：“《史籀》十五篇。”古之遗书，战国以前未见称述。爰逮秦世，李、赵、胡母本之以作《苍颉》诸篇，刘向校书，始著于录。建武之世，亡其六篇。章帝时，王育为作解说。许慎纂《说文》，复据所存九篇，存其异文，所谓籀文者是也。其书亦谓之《史篇》，即《史籀篇》之略称。《说文》于𠂔、缶、女三部三引《史篇》，盖存其字，谓之籀文；举其书，谓之《史篇》，其实一也。《史篇》为字书之祖，故《苍颉》以下亦蒙其名。《汉书·平帝纪》，征天下通知小学《史篇》者；《王莽传》，征天下《史篇》文字；《扬雄传》，《史篇》莫善于《苍颉》，作《训纂》、《扬子》、《法言》，或欲学《苍颉》、《史篇》。皆以《史篇》为字书之通名，犹汉时间里书师呼《爰历》、《博学》二篇为《苍颉》，魏晋以后并呼扬雄、班固、贾鲂之书为《三苍》，六朝以后呼《字林》为《说文》也。然其名固有自《史籀篇》出。唐元度谓此篇废于晋世，而自许君以后，马、郑诸儒即不复征引，盖自《三苍》盛行，此书之微久矣。今就诸文所存遗字疏通证明之，而论其最要于篇首，览者详之。

一，史籀为人名之疑问也。自班《志》、许《序》以史籀为周宣王太史，其说盖出刘向父子，而班、许从之，二千年来无异论。余顾窃有疑者，《说文》云：“籀，读也。”（《方言》：“抽，读也。”）又云：“读，籀书也。”（《毛诗·鄘风》传云：读，抽也）古籀、读二字同音同义。又古者读书皆史事，《周礼·春官·大史职》，大祭祀，戒及宿之日，与群执事读礼书而协事；大丧，遣之日读诔。《小史职》，大祭祀读礼法，史以书叙昭穆之俎簋，卿大夫之丧，赐谥读诔。《内史职》，凡命诸侯及公、卿、大夫，则册命之（谓读册书）。凡四方之事书，内史读之。《聘礼》，夕币，史读书展币。《士丧礼》，主人之史读赗，公史读遣。是古之书皆史读之。《逸周书·世俘解》乃俾史佚繇书于天号，尝麦解，作莢许诺，乃北向繇书于两楹之间。（作莢即《书·洛诰》之作册，乃内史之异名也。）繇即籀字，《春秋左氏传》之卜繇，《说文解字》引作卜籀，知《左氏》古文繇本籀，《逸周书》之繇书亦当即籀书矣。

籀书为史之专职，昔人作字书者，其首句盖云“大史籀书”，以目下文。后人因取首句“史籀”二字名其篇，（《诗》、《书》及周秦诸子大抵可以首句二字名篇，此古代书名之通例，字书亦然。《苍颉篇》首句虽不可考，然《流沙坠简》卷二第十八简上有汉人学书字中有“苍颉作”三字，疑是苍颉篇首句中语，故学书者书之。其全句当云“苍颉作书”，句法正仿“大史籀书”。《爰历》、《博学》、《凡将》诸篇当以首二字名篇，今《急就篇》尚存，可证也）大史籀书犹言大史读书，《太史公自序》言“石室金匱之书”，犹用此语。刘、班诸氏不审，乃以史籀为著此书之人，其官为大史，其生当宣王之世，是亦不足怪。李斯作《苍颉》，其时去汉甚近，学士大夫类能言之，然俗儒犹以为古帝之所作，以《苍颉篇》为苍颉所作，惑于以《史籀篇》为史籀所作矣。不知大史籀书乃周世之成语，以首

句名篇，又古书之通例，而猥云有大史名籀者作此书。此可疑者一也。

一，《史籀篇》时代之疑问也。史籀之为人名可疑，则其时代亦愈可疑。《史篇》文字，就其见于许书者观之，固有与殷周间古文同者，然其作法大抵左右均一，稍涉繁复，象形象事之意少而规旋矩折之意多，推其体势，实上承石鼓文，下启秦刻石，与篆文极近。至其文字出于《说文》者，才二百二十余，然班固谓《苍颉》、《爱历》、《博学》三篇文字多取诸《史籀篇》，许慎谓其皆取《史籀》大篆，或颇省改，或之者、疑之；颇之者，少之也。《史籀》十五篇，文成数千，而《说文》仅出二百二十余字，其不出者必与篆文同者也。考战国时秦之文字，如传世秦大良造鞅铜量，乃孝公十六年作，其文字全同篆文，大良造鞅戟亦然。新郢虎符作于秦并天下以前，其符凡四十字，而同于篆文者三十六字。《诅楚文》摹本文字亦多同篆文，而、麥、字则同籀文。篆文固多出于籀文，则李斯以前，秦之文字，谓之用篆文可也，谓之用籀文亦可也。则《史籀篇》文字、秦之文字，即周秦间西土之文字也。至许书所出古文，即孔子壁中书，其体与籀文、篆文颇不相近，六国遗器亦然。壁中古文者，周秦间东土之文字也。然则《史籀》一书，殆出宗周文胜之后，春秋战国之间，秦人作之以教学童，而不行于东方诸国，故齐鲁间文字，作法体势与之殊异；诸儒著书口说，亦未有及之者。惟秦人作字书，乃独取其文字，用其体例，是《史篇》独行于秦之一证。若谓其字颇或同于殷周古文者亦多矣，且秦处宗周故地，其文字自当多仍周旧，未可因此遽定为宗周之书，此可疑者二也。

其可得而断定者又有三事：一，籀文非书体之名，世莫不以古、籀、篆为三体，谓籀文变古文，篆文又变籀文，不知自其变者观之，则文字殆无往而不变，故有一卷之书面前后异文，一人之作而器盖殊字；自其不变者而观之，则文字之形与势皆以渐变。凡既有文字之国，未有能以一人之力创造一体者。许君谓《史籀》大篆与古文或异，则固有不异者；且所谓异者，亦由后人观之，在作书时亦只用当世通行之字，有所取舍，而无所谓创作及增省也。罗叔言参事《殷商贞卜文字考》，谓《史籀》一篇亦犹《苍颉》、《爱历》、《凡将》、《急就》等篇，取当世用字，编纂章句，以便诵习。其识卓矣。此可断定者一也。

一，《史篇》字数，张怀瓘谓籀文凡九千字，《说文》字数与此适合，先民谓即取此而释之。近世孙氏星衍序所刊《说文解字》，犹用其说，此盖误读《说文》叙也。《说文叙》引汉尉律讽籀书九千字，讽籀即讽读，《汉书·艺文志》所引无籀字可证。且《苍颉》二篇仅二千五百字，加以扬雄训纂，亦仅五千三百四十字，不应《史籀篇》反有九千字，此可断定者二也。

至《史篇》文体，段氏玉裁据《说文》所引三事，（奭下云：此燕召公名，《史篇》名丑。甸下云：《史篇》读与缶同。姚下云：《史篇》以为姚易也）以为亦有说解，又疑即王育解说中语。然据此三事，不能定其即有说解，凡此三者，亦得由其文义知之。苟篇中有周旦召丑语，便可知丑为召公之名；苟假甸为缶，便可知甸字

之读苟；姚易二字连言，便可知其以姚为姚易字，不为女姓矣，若以此三事为王育说《史篇》语，则《说文》引《苍颉训纂》、《苍颉故》等书，但称扬雄说杜林说，不称《苍颉》，则其引史篇解说语，亦当如为秃无诸字下经称王育说，不得云《史篇》，故《史篇》文体，决非如《尔雅》、《说文》，而当如秦之《苍颉篇》。

《苍颉篇》，据许氏《说文序》、郭氏《尔雅注》所引，皆四字为句；又据近日敦煌所出残简，不知四字为句，二句一韵。《苍颉》文字既取诸《史篇》，文体亦当仿之，又观于其墙二文，知篇中之有复字，雱姚诸字，知用字之多假借，皆与《苍颉篇》同，此可断定者三也。此二疑三断，关于全书之宏旨，故书以弁其首，也有达者，董而教之。若文字之变化正误，则散见于各条下，兹不赘云。

丙辰二月

战国时秦用籀文六国用古文说

（作于1916年，1917年刊于《学术丛编》第十册，收入《观堂集林》卷七。案本篇及以下《【史记】所谓古文说》、《【汉书】所谓古文说》、《【说文】所谓古文说》都作于此时。）

余前作《史籀篇疏证序》，疑战国时秦用籀文、六国用古文，并以秦时古器遗文证之。后反覆汉人书，益知此说之不可易也。班孟坚言《苍颉》、《爰历》、《博学》三篇文字多取诸《史籀篇》，而字体复颇异，所谓秦篆者也”。许叔重言：“秦始皇帝初兼天下，丞相李斯乃奏同文字，罢其不与秦文合者。斯作《仓颉篇》，中车府令赵高作《爰历篇》、太史令胡毋敬作《博学篇》，皆取《史籀》大篆，或颇省改，所谓小篆者也。”是秦之小篆，本出大篆。而《仓颉》三篇未出、大篆未省改以前，所谓秦文，即籀文也。司马子长曰：“秦拨去古文。”扬子云曰：“秦划灭古文。”许叔重曰：“古文由秦绝。”案秦灭古文，史无明文。有之，惟一文字与焚《诗》、《书》二事。六艺之书行于齐、鲁，爰及赵、魏，而罕流布于秦（犹《史籀篇》之不行于东方诸国），其书皆以东方文字书之。汉人以其用以书六艺，谓之古文。而秦人所罢之文，与所焚之书，皆此种文字。是六国文字即古文也。观秦书八体中有大篆无古文。而孔子壁中书与《春秋左氏传》，凡东土之书，用古文，不用大篆，是可识矣。故古文、籀文者，乃战国时东、西二土文字之异名，其源皆出于殷周古文，而秦居宗周故地，其文字犹有丰镐之遗。

故籀文与自籀文出之篆文，其去殷周古文反较东方文字（即汉世所谓“古文”，为近。自秦灭六国，席百战之威，行严峻之法，以同一文字，凡六国文字之存于古籍者，已焚烧划灭；而民间日用文字，又非秦文不得行用。观传世秦权、量等，“始皇廿六年诏”后多刻“二世元年诏”，虽亡国一二年中，而秦法之行如此，则当日同文字之效可知矣。故自秦灭六国以至楚汉之际，十余年间，六国文字遂遏而不行。汉人以六艺之书皆用此种文字，又其文字为当日所已废，故谓之“古文”。此语承用既久，遂若六国之古文即殷周古文，而籀、篆皆在其后，如许叔重《说文序》所云者，盖循名而失其实矣。√

《史记》所谓古文说

自秦并天下，同一文字，于是篆、隶行而古文、籀文废。然汉初古文、籀文之书未尝绝也。《史记·张丞相列传》：“张丞相苍好书律历，秦时为御史，典柱下方书。”而许氏《说文·序》言“北平侯张苍献《春秋左氏传》”，盖即“柱下方书”之一，是秦柱下之书至汉初未亡也。

《太史公自序》言：“秦拨去古文，焚灭《诗》、《书》，故明堂石室金匱玉版图籍散乱。”而武帝元封三年，司马迁为太史令，史记石室金匱之书，是秦石室金匱之书至武帝时未亡也。故太史公修《史记》时所据古书，若《五帝德》，若《帝系姓》，若《谍记》，若《春秋历谱谍》，若《国语》，若《春秋左氏传》，若《孔氏弟子籍》，凡先秦六国遗书，非当时写本者，皆谓之古文。

《五帝本纪》云：“孔氏所传宰予《五帝德》及《帝系姓》，儒者或不传。余尝西至崆峒，北过涿鹿，东渐于海，南浮江淮矣。至长老皆各称黄帝、尧、舜之处，风教固殊焉，总之不离古文者近是。”《索隐》云：“古文谓《帝德》、《帝系》二书也。”是《五帝德》及《帝系姓》二篇本古文也。《三代世表》云：“余读《谍记》，黄帝以来皆有年数，稽其《历谱谍》、《终始五德之传》，古文悉不同乖异。”是《谍记》与《终始五德传》褚先生补《三代世表》引《黄帝终始传》。是《终始五德传》亦书命名。亦古文也。《十二诸侯年表》云：“太史公读《春秋历谱谍》。”又云：“《谱谍》独记世谥，其辞略，欲一观诸要难。于是谱十二诸侯，自共和始迄孔子，表见《春秋》、《国语》，学者所讥盛衰大指著于篇，为成学治古文者要删焉。”由是言之，太史公作《十二诸侯年表》，实为《春秋》、《国语》作目录，故云“为成学治古文者要删”，是《春秋》、《国语》皆古文也。《吴太伯世家》云：“余读《春秋》古文，乃知中国之虞与荆蛮句吴兄弟也。”此即据《左氏传》宫之奇所云“太伯、虞仲，太王之昭者”以为说，而谓之“《春秋》古文”，是太史公所见《春秋左氏传》亦古文也。

《七十二弟子列传》云：“《弟子籍》，出孔氏古文近是。”此孔氏古文非谓壁中书，乃谓孔氏所传旧籍，而谓之古文，是《孔子弟子籍》亦古文也。然则太史公所谓古文，皆先秦写本旧书，其文字虽已废不用，然当时尚非难识，故《太史公自序》云：“年十岁则诵古文。”太史公自父谈时已掌天官，其家宜有此种旧籍也。惟六艺之书为秦所焚，故古写本较少。然汉中秘有《易》古文经，河间献王有古文先秦旧书《周官》、《尚书》、《礼》、《礼记》，固不独孔壁书为然。至孔壁书出，于是《尚书》、《礼》、《春秋》、《论语》、《孝经》皆有古文。孔壁书之可贵，以其为古文经故，非徒以其文字为古文故也。盖汉景、武间，距用古文之战国时代不及百年，其识古文当较今日之识篆、隶为易。乃《论衡·正说》篇谓：“鲁恭王得百篇《尚书》于屋壁中，使使者取视，莫能读者。”作伪《孔安国尚书序》者仍之，谓：“科斗书废已久，时人莫能知。”卫恒《四体书势》亦云：“汉武时

鲁恭王坏孔子宅，得《尚书》、《春秋》、《论语》、《孝经》。时人已不复知有古文，谓之‘科斗书’是亦疏矣。”求之《史记》，但云“孔氏有古文《尚书》，而安国以今文读之，因以起其家。《逸书》得十余篇。”此数语，自来读者多失其解。

王氏念孙《读书杂志》用其子伯申氏之说曰：“当读‘因以起其家’为句，‘《逸书》’二字连下读。起，兴起也。家，家法也。汉世《尚书》多用今文，自孔氏治古文经，读之、说之，传以教人，其后遂有古文家。是古文家法自孔氏兴起也。故曰‘因以起其家’。”又云：《汉书·艺文志》曰“凡《书》九家”，谓孔氏《古文》，伏生《大传》，欧、大、小夏侯说及刘向《五行传记》，许商《五行传记》，《逸周书》，《石渠议奏》也。《刘歆传》曰“数家之事，皆先帝所亲论，今上所考视”，谓《逸礼》、古文《尚书》、《春秋左氏》也。是古文《尚书》自为一家之证。《书序正义》引刘向《别录》曰：“武帝末，民间有得《泰誓》，献之。与博士使读说之，数月皆起。”

《后汉书·桓郁传》注引华峤书，明帝问郁曰：子几人能传学？郁曰：臣子皆未能传学，孤兄子一人，学方起。帝曰：努力教之，有起者即白之。是起谓其学兴起也。盖古文《尚书》初出，其本与伏生所传颇有异同，而尚无章句训诂，安国因以今文定其章句，通其假借，读而传之，是谓“以今文读之”，其所谓“读”，与班孟坚所谓“齐人能正《苍颉》读”，马季长所谓“杜子春始通《周官》读”之“读”，无以异也。

然则安国之于古文《尚书》，其事业在读之、起之，至于文字，盖非当世所不复知如王仲任辈所云也。自武、昭以后，先秦古书传世益少，其存者往往归于秘府，于是古文之名渐为“壁中书”所专有。然秘府古文之书，学者亦类能读之，如刘向以中古文《易经》校施、孟、梁邱经及费氏经；以中古文《尚书》校欧阳、大、小夏侯三家经文。又谓《礼古经》与十七篇文多相似，多三十九篇。谓《孝经》诸家说不安处，古文字读皆异。刘歆校秘书，见古文《春秋左氏传》，大好之。子政父子皆未闻受古文字学，而均能读其书，是古文讫西京之末尚非难识如王仲任辈所云也。嗣是讫后汉，如杜伯山、卫敬仲、徐巡、班孟坚、贾景伯、马季长、郑康成之徒，皆亲见壁中书或其传写之本，然未有苦其难读者，是古文难读之说起于王仲任辈未见壁中书者。其说至魏、晋间而大盛。不知汉人初未尝有是事也。

《后汉》所谓古文说

后汉之初所谓“古文”者，专指孔子壁中书。盖自前汉末亦然。《说文·叙》记亡新“六书”，一曰“古文”，孔子壁中书也，二曰“奇”字，即古文而异者也。《汉书·艺文志》所录经籍冠以“古文”二字若“古”字者，惟《尚书古文经》四十六卷（为五十七篇）、《礼古经》五十六卷、《春秋古经》十二篇、《论语》古二十一篇、《孝经古孔氏》一篇，皆孔子壁中书也（惟《礼古经》有淹中及孔壁二本）。然中祕古文之书，固不止此。

司马子长作《史记》时，所据石室金匱之书，当时未必尽存，固亦不能尽亡。如《六艺略》所录《孔子徒人图法》二卷，未必非太史公所谓《弟子籍》。《数术略》所录《帝王诸侯世谱》二十卷、《古来帝王年谱》五卷，未必非太史公所谓《谍记》及《春秋历谱谋》。而《志》于诸经外书，皆不著“古”、“今”字。盖诸经之冠以“古”字者，所以别其家数，非徒以其文字也。六艺于书籍中为最尊，而古文于六艺中又自为一派，于是“古文”二字，遂由书体之名，而变为学派之名。

故《地理志》于古文《尚书》家说，亦单谓之“古文”。如右扶风“汧县”下云：“吴山在西，古文以为汧山。”又“武功”下云：“太壹山，古文以为终南。垂山，古文以为敦物。皆在县东。”潁川郡“崇高”下云古文以崇高为外方山。”江夏郡“竟陵”下云章山在东，古文以为内方山。”又“安陆”下云横尾山在北，古文以为陪尾山。”东海郡“下邳”下云：“葛绎山，古文以为峯阳。”会稽郡“吴县”下云：“具区泽在西，扬州藪，古文以为震泽。”豫章郡“历陵”下云：“傅易山、傅易川在南，古文以为敷浅原。”武威郡“武威”下云：“休屠泽在东北，古文以为猪野泽。”张掖郡“居延”下云居延泽在东北，古文以为流沙。”

凡汧山、终南、敦物、外方、内方、陪尾诸名，欧阳、大小夏侯三家经文用字或异，而名称皆同。而《地理志》独云“古文以为”者，盖古“文尚”书家如王璜（《儒林传》作王璜，《沟洫志》作“王横”）。桑钦、杜林等说《禹贡》，以右扶风汧县之吴山为《禹贡》之汧山，以武功之太壹、垂山为《禹贡》之终南、敦物。是《地理志》所谓“古文”，非以文字言，以学派言也。

其以文字言者，则亦谓之“古文”或谓之“古文字”。《郊祀志》言“张敞好古文字”，又载敞《美阳得鼎议》曰：“臣愚不足以迹古文。”是孔壁书外之彝器文字，亦谓之“古文”，与许叔重谓鼎彝之铭皆“前代之古文”同。然后汉以降，凡言“古文”者，大抵指壁中书。故许叔重言“古文，者，孔子壁中书”，又云“孔氏古文”也。

说文所谓古文说

许叔重《说文解字·叙》言“古文”者凡十，皆指汉时所存先秦文字言之。其一曰：“周宣王太史籀著大篆十五篇，与古文或异。”此古文似指苍颉以来迄五帝三王之世改易殊体之文字，即余前所谓“殷、周古文”，以别于战国古文者。实则不然，叔重但见战国古文，未尝多见殷、周古文。《叙》云：“郡国往往于山川得鼎彝，其铭即前代之古文，皆自相似。”潘文勤公《攀古楼彝器款识序》遂谓：“《说文》中古文本于经文者，必言其所出；其不引经者，皆凭古器铭识也。”吴清卿中丞则谓：“《说文》中古文皆不似今之古钟鼎，亦不言某为某钟、某为某鼎字，必响拓以前，古器无毡墨传布，许君未能足征。”

余案：吴说是也。拓墨之法，始于南北朝之拓石经，浸假而用以拓秦刻石。至拓彝器文字，赵宋以前未之前闻。则郡国所出鼎彝，许君固不能一一目验，又无拓本可致，自难据以入书。全书中所有重文、古文五百许字，皆出壁中书及张苍所献《春秋左氏传》，其在正字中者亦然。故其所谓“籀文与古文或异”者，非谓《史籀》大篆与《史籀》以前之古文或异，而实谓许君所见《史籀》九篇与其所见壁中书时或不同。以其所见《史籀》篇为周宣王时书，所见壁中古文为殷、周古文，乃许君一时之疏失也。其二曰：“至孔子书六经，左邱明述《春秋》，皆以古文。”此亦似谓殷、周古文。然无论壁中所出与张苍所献，未必为孔子及邱明手书。即其文字，亦当为战国文字，而非孔子及邱明时之文字。何则？许君此语，实根据所见壁中诸经及《春秋左氏传》言之。

彼见其与《史籀》篇文字不类，遂以为即殷、周古文。不知壁中书与《史籀》篇文字之殊，乃战国时东、西二土文字之殊。许君既以壁中书为孔子所书，又以为即殷、周古文，盖两失之。故此二条所云“古文”，虽似谓殷、周古文，实皆据壁中古文以为说。惟《叙》末云：“其称《易》孟氏、《书》孔氏、《诗》毛氏、《礼》周官、《春秋》左氏、《论语》、《孝经》，皆古文也。”此“古文”二字，乃以学派言之，而不以文字言之，与《汉书·地理志》所用“古文”二字同意，谓说解中所称，多用孟、孔、毛、左诸家说，皆古文学家而非今文学家也。

《易》孟氏非古文学家，特牵率书之。其余所云古文者六，皆指先秦古文，其尤显明者，曰“古文者，孔子壁中书也”，曰“皆不合孔氏古文”，又申之曰“壁中书者，鲁恭王坏孔子宅而得《礼记》、《尚书》、《春秋》、《论语》、《孝经》”，又“北平侯张苍献《春秋左氏传》”，其示《说文》中所收古文之渊源最为明白矣。至其述山川鼎彝，又分别言之曰：“其铭即前代之古文，皆自相似。”云“前代古文”者，以别于孔壁之古文；云“皆自相似”者，以明与孔壁古文不甚相似也。汉代鼎彝所出无多，《说文》古文又自成一系，与殷、周古文截然有别，其全书中正字及重文中之古文，当无出壁中书及《春秋左氏传》以外者。即有数字不见于今经文，亦当在逸经中，或因古今经字有异同之故。学者苟持此说以读《说文》，

则无所凝滞矣。

周代金石文韵读序

自汉以后，学术之盛莫过于近三百年。此三百年中，经学、史学足以陵驾前代。然其尤卓绝者，则曰小学。小学之中，如高邮王氏、栖霞郝氏之于训故，歙县程氏之于名物，金坛段氏之于《说文》，皆足以上掩前哲。然其尤卓绝者，则为韵学。古韵之学，自昆山顾氏，而婺源江氏，而休宁戴氏，而金坛段氏，而曲阜孔氏，而高邮王氏，而歙县江氏，作者不过七人。然古音廿二部之目，遂令后世无可增损。故训故、名物、文字之学，有待于将来者甚多，至古韵之学，谓之“前无古之人，后无来者”可也。

原斯学所以能完密至此者，以其材料不过群经、诸子及汉魏有韵之文。其方法则皆因乎古人用韵之自然，而不容以后说私意参乎其间。其道至简，而其事有涯，以至简入有涯，故不数传而遂臻其极也。余读诸家韵书，窃叹言韵至王、江二氏已无遗憾。惟音分阴、阳二类，当从戴、孔，而阳类有平无上、去、入，段氏《六书音韵表》已微及之。前哲所言，既已包举靡遗，故不复有所论述。惟昔人于有周一代韵文，除群经、诸子、《楚辞》外，所见无多。余更搜其见于金石刻者，得四十余篇。其时代则自宗周以迄战国之初，其国别如杞、鄫、邾、莒、徐、许等，并出《国风》十五之外，然求其用韵，与《三百篇》无乎不合。故即王、江二家部目，谱而读之。非徒补诸家古韵书之所未详，亦以证国朝古韵之学之精确无以易也。

丁巳八月。

六朝人韵书分部说

魏晋六朝人所撰韵书，除李登《声类》、吕静《韵集》外，《隋志》所录，有周研《声韵》四十一卷、无名氏《韵集》十卷、张谅《四声韵林》二十八卷、段弘《韵集》八卷、无名氏《群玉典韵》五卷、阳休之《韵略》一卷、李概《修续音韵决疑》十四卷、又《音谱》四卷、无名氏《纂韵钞》十卷，刘善经《四声指归》一卷、沈约《四声》一卷，夏侯咏《韵略》十三卷、释静洪《韵英》一卷，而陆法言《切韵序》所举，除吕静、夏侯咏（宋本《广韵》作该，唐写切韵不误）、阳休之三家外，尚有李季节《音谱》，即李概之《音谱》四卷，周思言《音韵》，即周研之《声韵》四十一卷，惟杜台卿《韵略》一书，《隋志》所未著录。

凡此种韵书，分部概无可考，惟内府藏唐写本王仁昫《刊谬补缺切韵》，平声一目录冬下注云，无上声，阳与钟江同，吕、夏侯别，今依吕、夏侯。脂下注云，吕夏与微大乱杂，阳、李、杜别，今依阳、李。真下注云，吕与文同，夏侯、阳、杜别，今依夏、阳、杜。臻下注云，无上声，吕、阳、杜与真同，夏别，今依夏。案所云吕、夏侯、阳、李、杜，即陆氏《切韵序》所举之吕静、夏侯咏、阳休之、李季节、杜台卿五家之书也。著此五家与《切韵》异同，必陆法言切韵目录下原注，惜唐写长孙讷言本删此注，而王仁昫本平声二，首缺数叶，而上去入三声又有目无注，故此五家与陆韵部目之异同，遂无由全知矣。

案《颜氏家训·音辞篇》云，《韵集》以成仍宏登合成两韵，为奇益石分作四章，皆不可依信。今陆韵，成在清韵，仍在蒸韵，宏在耕韵，登自为韵。又为奇二字皆入支韵，益石二字皆入麦韵，盖用颜氏之说。《韵集》实合耕清为一，蒸登为一，而分支与麦各为二，今王目支下不云吕分为二，登下不云吕与蒸同，则五家与陆韵异同，目中亦未尽著。然知吕氏别冬于钟江，则东冬钟江之分为四可知矣。知吕氏脂与微韵大乱杂，则脂与微之分为二可知矣。知其真与文同、臻与真同，则真臻文之为一可知矣。又《尔雅音义》，蝗，华孟反，字林《音皇》，《声类》、《韵集》并以蝗协庚韵，则阳唐庚之为三，亦可知矣。以上专就《韵集》言之，至夏侯、阳、李、杜已当与陆韵相去不远。然则陆韵以前韵书，规模盖已大具，不过陆氏集诸家之大成，尤为完善耳。

书巴黎国民图书馆所藏唐写本《切韵》后☆

巴黎国民图书馆藏敦煌所出唐写本《切韵》凡三种。第一种存上声“海”至“铎”十一韵，四十五行。复有断烂，计存全行十有九，不全行二十有六。以第三种校之，韵字较少，注亦较简。如轸韵“轸”字注云：之忍反，八。第三种“八”作“九”，纽末增一“珍”字。“蠡”字注云：“尺尹反，二。”第三种以“蟠”字为纽首，注云：“尺尹反，三。”次“蠡”字末又增一“蟠”字。“引”字注云：“余轸反，二。”第三种“二”作“三”，末增一“蚓”字。混韵“剿”字注云慈损反，三。”彼本“三”作“四”，末增一“傳”字。“猜”字注云盆本反，二。”彼本“二”作“三”，末增一“体”字。旱韵“亶”字注云多旱反，一。”彼本“一”作“二”，末增一“瘦”字。“散”字注云苏旱反，二。”彼本“二”作“三”，末增一“讞”字。“罕”字下注：“呼旱反，二。”彼本“二”作“三”，末增一“罕”字。

潜韵“板”字下注云：“布绀反，一。”彼本“一”作“二”，下增一“版”字。“苒”字下注云：“胡板反，一。”彼本“一”作“二”，下增一“憊”字。又此韵末，彼本别增一纽云釭，五板反，一。”第三种，余考定为长孙讷言注节本。则此本韵字较少，当是法言原本。第二种存卷首至“九鱼”，凡九韵。

前有陆法言、长孙讷言二《序》陆《序》前有一行云伯加千一字。”长孙《序》云又加六百字，用补阙遗。”故韵中有新加字。如东韵蒙纽下云：“十一加二。”洪纽下云：“十一加一。”策纽下云：“二加一。”忿纽下云：“八加一。”夔纽云十二加一。”余韵仿此。又长孙《序》云：“其杂□并为训解，但“称案者俱非旧说。”（今《广韵》所载长孙《序》删此二条）是法言原书本自有注，故讷言称“案”以别之。今此九韵注中称“案”者八十二条，大抵据《说文》以正字形。又有引《说文》者数十条，虽无“案”字，而亦与称“案”者文例相同，与陆氏原书注例异。是亦长孙氏注，则长孙讷言《笺注》本也。第三种存平声上、下二卷，上声一卷，入声一卷，而平声首阙东、冬二韵，入声末阙廿八铎以下五韵，中间复稍有阙佚。有长孙讷言本所加字，而纽首下但著几字，不著“几加几”。然如平声下仙韵卷纽下“髻”字。豪韵高纽下“馨”字。青韵宁纽下“宁”字。监韵牀纽下激字。上声静韵静纽下“彭、靖、铮”三字。入声月韵伐纽下“駿”字。没韵末“散”字。薛韵列纽下鷺字。辍纽下“剽”字。锡韵的纽下原字。昔韵末“碧”字。合韵踏纽下馨字。盍韵末“罨”字。皆注云：“新加。”又注文亦间有称“案”者。如平声下仙韵“鲜”字注云：“案《文》作“羸”麻韵蚰”字注云：“案《文》作，蛇，。”阳韵，咍，字注云：“案《文》，碭，。”茺字注云：“案《文》羊桃。”“庄”注云案《文》作，庄，。”尤韵“枕”字注云：“案《说文》原无点。”“裘”字注云案《文》，求，无点。”“勲”字注云：案《文》病寒鼻塞。”侵韵“针”字注云案《文》作“鍼”。蒸韵“兴”字注云：案《文》作“兴”。上声旨韵“兕”字注云：“案《文》野牛而青。”语韵“所”字注云：“案《文》，户斤

，为正。姥韵“虎”字注云：案《文》山兽之君，足似人足。故足下安人，此，儿，即是古，人，字。”漕韵“版”字注云案《文》判”马韵“马”字注云：“案《文》有四点，象四足”感韵字注云：案《文》作，茼，。”养韵“两”字注云：案《文》廿四铢为两。”有韵“羨”字注云：“案《文》从久。”人声质韵“膝”字注云：“案《文》作，𠂔，。”黯韵“納”字注云：《说文》作，𠂔，。”屑韵“截”字注云：案《文》作，𠂔，。”作“膜”字注云：案《文》注云：“案《文》从圭作，作，契，。”薛韵“竭”字注云：&《说文》作，渴，。”“揲”字注云：“案《文》思颊反，阅持。

“剗”字注云案《文》刊。新加。”锡韵“枯”字注云：“案《文》百廿斤。”“役”字注云：“案《文》作，役”麦韵“麦”字注云：“案《文》从来，作，麦，陌韵、“戟”字注云案《文》作，戟，。”盍韵“𩚑”字注云案《文》作𩚑去。”叶韵“晔”字注云案《文》作此，𩚑，。”此三十二条皆称“案”字，又皆据《说文》为说，与长孙氏笺《注体》例正同。疑亦出长孙氏注本，而删去其案语者。上所举三十二条，乃删之未尽者，盖长孙讷言注节本也。又以书体言，则第一种为初唐写本，第二种、第三种并唐中叶写本。亦足证前者为陆氏原本，后者为孙氏《笺注》本若其节本也。

陆法言《切韵》五卷，《隋唐》及《旧唐书·经籍志》、《唐书·艺文志》均未著录。惟《新》、《旧》、《志》并有“陆慈《切韵》五卷”。日本源顺《倭名类聚》引“陆词《切韵》”五十四条，又日本僧瑞信《净土三部经音义》“引陆词《切韵》”十六条，颇见于此三种中，而未见者亦半。盖源顺、瑞信所据，或后人增注之本。此三种亦或有删节，不得谓非一书。《集韵》二冬“苳”字注引“陆词”曰：“苳苳，冬生。”此本冬韵有“苳”字，注云“草名”，而无“苳苳，冬生”四字。盖《集韵》所据亦增注本。日本狩谷望之《倭名钞笺》谓“陆词”即法言。案“词”与“法言”，名字相应。又以《唐写残韵》与彼土所引“陆词《切韵》”校之，半相符合，则狩谷之言殆信。两《唐志》之“陆慈”亦即“陆词”。隋唐间人多以字行，故字著而名隐耳。法言之书，自宋以后，公私书目均未著录。盖自《广韵》盛行，而隋唐诸韵书皆废。此书之佚，已千有余岁矣。

法言事迹，史不概见，前人亦无考之者。案《隋书·陆爽》传：“爽字开明，魏郡临漳人。”自齐入周。隋时为太子洗马。“开皇十一年，卒官，年五十三。”“子法言，敏学有家风，释褐承郎。”据此，则开皇初，法言与萧、颜诸公论韵时，年才弱冠。而诸公多显于梁、魏、齐、周、之世，于法言均为丈人行矣。其受成书之托，亦即以此。《隋书》又云：初，爽之为洗马，尝奏高祖云：“皇太子诸子未有嘉名，请依《春秋》之义更立名字。”上从之。及太子废，上追怒爽曰：“我孙制名，宁不自解，陆爽乃尔多事。扇惑于勇，亦由此人。其身虽故，子孙并宜废黜，终身不齿。”法言竟坐除名。”案太子勇之废，在开皇二十年九月，次年改元“仁寿”。法言除名，当在是冬。《切韵序》作于仁寿二年，云今反初服，私训诸弟。

凡有文藻，即须音韵。遂取诸家音韵、古今字书，定之为《切韵》五卷。”是法言撰此书，著手于开皇、仁寿间，而成于仁寿二年也。

先儒以《广韵》出于陆《韵》，遂谓陆韵部目及其次序与《广韵》不殊，此大误也。以余曩日所考，则《广韵》部目、次序并出李舟，而《切韵》、《唐韵》则自为一系。今见陆氏书，乃得证成前说。案陆氏书虽阙有间，然平、上、入三声分目具存。平声上廿六韵，其次为一东、二冬、三钟、四江、五支、六脂、七之、八微、九鱼、十虞、十一模、十二齐、十三佳、十四皆、十五灰、十六哈、十七真、十八藉、十九文、廿殷、廿一元、廿二魂、廿三痕、廿四寒、廿五删、廿六山。平声下廿八韵，一先、二仙、三萧、四宵、五肴、六豪、七歌、八麻、九覃、十谈、十一阳、十二唐、十三庚、十四耕、十五清、十六青、十七尤、十八侯、十九幽、廿侵、廿一监、廿二添、廿三蒸、廿四登、廿五咸、廿六衔、廿七严、廿八凡。觀广韵》无淳、寒、戈三韵，而次第亦异。

上声准之，凡五十一韵。视《广韵》无准、缓、果三韵，次序与平声同。

入声三十二韵，视《广韵》无术、何二韵，其次为一屋、二沃、三烛、四觉、五质、六物、七柿、八迄、九月、十没、十一末、十二黯、十三辖、十四屑、十五薛、十六锡、十七昔、十八麦、十九陌、廿合、廿一盍、廿二洽、廿三狎、廿四叶、廿五贴、廿六缉、廿七药、廿八铎、廿九职、册德、册一业、册二乏，与《广韵》次序固殊，即与本书平、上二声之次序亦不相应。自颜氏《干禄字书》至孙愐《唐韵》，皆用其次。事具后表。

李舟《切韵》考

唐诸家《切韵》中，不可不特记者，李舟《切韵》是也。李舟之名屡见于唐人说部，而新、旧《唐书》无传。《新书·宰相世系表》姑“臧房李承九世孙舟，字公受，虔州刺史，陇西县男。”案承之六世孙义琰，相高宗，八世孙揆，相肃宗。则其九世孙舟自当在孙恂之后。《旧书·梁从义传》建中元年，金部员外郎李舟奉使荆襄。”当即其人。又杜工部有《送李校书二十六韵》，云：“李舟名父子，清峻文章伯。十五富文史，十八足宾客。十九授校书，二十声辉赫。”又云：乾元二年春，万姓治安宅。舟也衣彩衣，告我欲远适。”是代宗（应作“肃宗”一编者按）乾元之初，舟年二十许。则《切韵》之作，当在代、德二宗之世。其书唐时不显，至宋初而始见重有宋一代韵书部次，皆自李舟出也。

唐人韵书，以部次观之，可分为二系：陆法言《切韵》、孙愐《唐韵》及小徐《说文解字篆韵谱》、夏英公《古文四声韵》所据韵书为一系，大徐改定《篆韵谱》与《广韵》所据者为一系。前系四种，其部次虽稍有出入，然大抵平声覃、谈在阳、唐之前，蒸、登居监、添之后。上、去二声准是。去声之泰又在霁前，或并酳于梵。入声则以屋、沃、烛、觉、质、术、物、栉、迄、月、没、何、末、黠、辖、屑、薛、锡、昔、麦、陌、合、何、洽、狎、叶、贴、缉、药、铎、职、德、业、乏为次，不与平、上、去三声部次相配。则韵书自隋至于有唐中叶，固未有条理秩然之部次如今所见之《广韵》者也。惟大徐改定《说文解字篆韵谱》，除增三宣一部外，其诸部次第与《广韵》全同。大徐于雍熙四年作《韵谱后序》云：“《韵谱》既成，广求余本，颇有刊正。今复承诏校定《说文》，更与诸儒精加研戡。又得李舟《切韵》，殊有补益。其间疑者，以李氏为正。”是大徐改定《韵谱》，多据李舟。今小徐原本与大徐定本二者具存，其间无大异同。惟小徐原本部次与《唐韵》同，大徐改本与《广韵》同，而大徐本所据为李舟《切韵》。

然则谓《切韵》部次即李舟《切韵》之部次，殆无可也。取唐人韵书与宋以后韵书比较观之，则李舟于韵学上有大功二：一，使各部皆以声类相从，二，四声之次相配不紊是也。前者如降覃、谈于侵后，升蒸、登于青后。覃、谈之降，于古韵及文字之偏旁、谐声，皆有依据，不独覃、谈二部唐时早与侵、盐诸部字俱变而已。蒸、登之升，则本于吕静《韵集》。《颜氏家训》谓：“《韵集》以成、仍、宏登台成雨韵。”则吕氏书蒸部字自与耕、清为类，而李舟从之，其次胜于陆、孙诸《韵》远甚。至于四声次序相配，观下《唐宋诸韵部次表》自明。其尤显者，在上、去二声末四韵。唐时韵书，平声或有严无凡（惟陆《韵》及《古文四声韵》有之。小徐所据《切韵》并凡于严。李舟《韵》，自其上、去、入三声观之，必有凡韵。而今大徐本无者，盖因严、凡二部字少，合之），而上、去则有范、梵而无俨、酸（惟《古文四声韵》有之）。李《韵》上声末四韵，以湛（即嫌）、檻、俨、范为次，去声以陷、鉴、酸、梵为次，入声以狎、洽、业、乏为次。是增改旧韵部目（小徐所据《切韵》上湛、檻、范，去陷、鉴、梵，无俨、酳二部。《唐韵》残本阙上

声、去声陷、鉴、梵，而梵韵末有“严”字。《古文四声韵》虽有俨、酸二部，上声亦以嫌、檻、俨、范为次。然去声仍以陷、鉴、《梵》、《鹵》为次，与平、上、入三声不相应），以配平声咸、衔、严、凡者，而《广韵》从之。

今传世《广韵》，上声以俨、嫌、檻、范，去声以酳、陷、鉴、梵为次，不与平入二声相配（宋本、元本皆同。惟曹棟亭所藏一宋本，去声以陷、鉴、酳、梵为次。上声琰韵下注“与忝同用”，不注“忝、俨同用”，与李舟《韵》合）。戴氏《声韵考》谓今《广韵》俨、酳二部在嫌、陷二部前者，乃后人据景祐《礼部：韵略》改之。”案《广韵》既用李舟部次，不应此处或异。戴说是也。又案陆《韵》“俨”字在琰韵中，小徐《篆韵》所据《切韵》同。即《广韵》“俨”字亦琰、俨两收，则景祐《韵略》改俨与琰、忝，酳与艳、捺同用，亦据旧韵。而《广韵》以俨、范、酳、梵同用，则据《唐韵》。《唐韵》梵韵有“严”字，殆“酳”字之伪，是梵、酳为一。而《广韵》酳韵四切，其“鱼欠”、“许欠”、“亡剑”三切，皆用梵韵字。可见《广韵》所据本，酳韵诸字皆在梵韵，与《唐韵》同。

《广韵》虽从李舟韵增改部目，然反切仍未及改也。要之，诸部以声类相近为次。又平、上、去、入四声相配秩然，乃李舟《切韵》之一特色。大徐改定《篆韵谱》既用其次，陈彭年亦江南旧人，又尝师事大徐，故修《广韵》亦用之。以后《韵略》、《集韵》诸书，虽升严、俨、酳、业四韵与《广韵》异，然四声之次，无不相配。故李舟《切韵》之为宋韵之祖，犹陆法言《切韵》之为唐人韵书之祖也。乃南宋以后，皆以《广韵》本于陆法言、孙愐，遂疑其次第亦本陆、孙，致使李舟整齐画一之功不显于世。使陆、孙二《韵》残本及二徐《篆韵谱》不存，此事将湮没终古矣。

书吴县蒋氏藏唐写本《唐韵》后

吴县蒋伯斧郎中藏唐写本《唐韵》，存去、入二声，去声首又阙一送、二宋、三用、四绛、五真、六至、七志及八未之半，中间又阙十九代之小半，廿废、廿一震、廿二椋、廿三问、廿四掀及廿五愿之大半。曩蒋君跋此书，以此为陆法言《切韵》原本，又以为长孙讷言初笺注之本。然余则以此为孙愐书，此有数证焉。蒋本廿三线“舰”字下注云陆无训义。”五十五证“瞪”字下注云：“陆本作，眙，。”廿麦“鐸”字下注云：“陆人格韵。”凡三引陆《韵》，则此本非陆《韵》也。世铎“强”字下注云开元十三年置扩骑。”案长孙《笺注》成于仪凤二年，而此有开元十三年事，则此本非长孙氏《笺注》也。其为孙愐书，亦有数证。隋唐韵书皆曰“切韵”，独孙愐取《周易》、《周礼》之义勒成一书，名曰《唐韵》，见于《自序》。此本卷五如题尚存，曰“《唐韵》卷第五”，与孙《序》合。是为孙书之证一也。孙《序》云：“州县名号亦据今时。”又云武德以来创置（及）[迄]开元三十年并列注中。”蒋君《跋》中举未韵之“暨”字，《广韵》注云诸暨县，在越州。”此本云“在会稽”。霁韵之“蓟”字，《广韵》注云：“县名，又州。”开元十八年以渔阳为蓟州。此本直云“县名”。代韵之“代”字，《广韵》注云：州名。”此本云郡名。”缉韵之“汲”字，《广韵》注云：“县名，在卫州。”此本云：“郡名，在卫。”谓郡县之沿用隋名者，即以此为法言书之证。

余谓此正孙书之证也。《旧唐书·玄宗纪》天宝元年二月，天下诸州改为郡，刺史改为太守。”唐时建置，以此及乾元元年复郡为州为最大。孙《序》所云“开元三十年”，即天宝元年（开元无三十年）。越州之为会稽郡，蓟州之改为渔阳郡而仅存蓟县，代州之为代郡，汲县之为汲郡，皆（开元三十）[天宝元]年事，与隋无涉。又此本注中说水、地所在凡五十余科，皆举郡名，不举州名，正《序》中所谓“州、县名号悉用今时”者。惟“歙”字下注云“县名，在歙州”，不云“新安郡”，“郑”字下注云“县名，在郑州”，不云“文安郡”，“鄆”字下注云“新息县，在豫州”，不云“汝南郡”；“邳”字下注云“县名，在襄（当作“相，州”，不云“邳郡”。然举郡名者五十余科，而举州名者仅四科，自系偶尔疏失。且“歙”字、“郑”字下均云县名，不云州名，尤为是时已无歙州、鄆州之证。此其为孙书之证二也。魏鹤山《唐韵后序》云：“今书升药、铎于麦、陌、昔之前，置职、德于锡、缉之间。”所谓“今书”，谓《礼部韵略》，是鹤山所见《唐韵》药、铎、职、德亦如此本之次。是此本为孙书之证三也。

孙《序》又云：“其有异闻、奇怪传说、姓氏原由，备载其间，皆引冯据。”又列其引据书目，关乎姓氏者有《姓苑》、《风俗通》、贾执《姓氏英贤传》、王僧孺《百家谱》等。是韵书中详注姓氏，始于孙愐。此本注中，姓氏虽不如《广韵》之详，然每字之为古姓氏者，已概举无遗。此其为孙书之证四也。《封氏闻见记》云：“陆法言《切韵》凡一万二千一百五十八字。尔后有孙愐之徒，以字书中闲字酿于《切韵》，殊不知为文之要，匪是陆之略也。”（稚雨堂刊本“要”、“匪”二

字误倒)今此本所增之字,皆注云“加”,又多云“出《说文》”、“出《字林》”、“出《音谱》”云云,即封《记》所谓“以字书中闲字酿于《切韵》”者。封氏虽云“孙愐之徒”,不专指一家,而此书正与之同。此其为孙书之证五也。《广韵》三钟“恭”字下注云:“陆以恭、嫩、纵等入冬韵,非也。”考之大徐《说文》,则“恭”,俱容切,“纵”,即容切;“嫌”,息恭切,皆在钟韵。

大徐《说文》用孙愐音,则孙愐始改此数字入钟韵。《广韵》此注必系《唐韵》旧文。今此本麦韵“鐸”字下注云“陆入格韵。”与《广韵》“恭”字下注例同。此其为孙书之证六也。《广韵》一书!兼采诸《切韵》,然首载陆法言、长孙讷言、孙愐三《序》,是以陆、孙二《韵》为蓝本之证。考《倭名类聚钞》引诸家《切韵》,中有孙愐《切韵》二十五条,《唐韵》三百八十四条。其字见于此残本者,多与此本合,与《广韵》合者亦十之八。其与此本异者,则《广韵》多合于此本,而异于《倭名钞》所据之本。此由《倭名钞》已经后人增改(见日本稻叶通邦《倭名类聚钞序》),故有此不合。此其为孙书之证七也。前蒋君跋此书,谓书中于太宗讳“世”字,睿宗讳“旦”字,皆阙笔,代宗以后之讳则否。玄、肃二宗之讳,皆在乎韵,不可考。余细检全书,见九御中“豫”字(代宗讳),四十杓“槎”字注中“豫”字,十三末中“括”字(德宗讳),均不阙笔。然三十一条“口”字下注中豫州之“豫”作“豫”,阙末二笔。则此书当是肃、代之间写本。当写第四卷时,肃宗未崩,比写至第五卷末,则已闻代宗更名及登极之诏(均在四月)。故不阙于前而阙于后,不阙于大字而阙于小注也。是岁距孙氏书成已十年,其所写者为孙氏书无疑。此八证也。此本既得证明为孙氏书,则《唐韵》种种疑问均可迎刃而解。惜蒋君墓已宿草,不能复起而与讨论此事也。

孙氏《唐韵》,唐、宋二志著录均云“五卷”。蒋氏所藏残本,入声首亦题“《唐韵》卷第五”。惟魏鹤山《唐韵后序》云:其《部叙》于一东下注云:“德红反。浊,满口声。自此至三十四乏皆然。于二十八删、二十九山之后,继之以三十先、三十一仙。上声、去声亦然”云云。则似魏氏所藏《唐韵》,平声不分上、下卷。余谓魏氏所谓“部叙”,盖于每卷首分目之外,别为一总目,其下分注清、浊,以明所以分析之故。其平声本是同类,故二十八删、二十九山之后,即继以三十先、三十一仙。至于本书,则分卷仍与陆《韵》同,自当云“一先、二仙”,不得云“三十先、三十一仙”也。今《大宋重修广韵》孙愐《序》后尚有“论曰”一段,凡一百五字,专论以五音清、浊分韵之理,此即孙氏《部叙》后之总论。有目,故云“部,有论,故云‘叙’”。《部叙》自为一篇,冠于书首,与分卷无涉。惜《广韵》删其目而存其论,致使孙氏所分之清、浊不可复考,而其论亦不能知为孙氏所作。微鹤山之言,无由知孙书之审于音理如是矣。孙愐既审于音理,故于陆《韵》部目颇有修正。魏鹤山《唐韵后序》曰:“此书别出,移,鬻二字为一部。”注云陆与齐同,今别。”又以残本去、人二韵求之,去声代十九、愿廿五,是中间阙五韵,当有[韵。而入声有术韵,是捧之去入也。去声有换韵,入声曷、末亦分为二,是桓之去、入也。去声箇后有过韵,是戈之去。则别淳于真,别桓于寒,别戈于歌,

皆始于孙氏。又韵中之纽，纽中之字，亦颇有移易。《广韵》惟齐、移不分，用陆氏本。其余皆从孙本，此外别无增损也。

唐人盛为诗赋，韵书当家置一部。故陆、孙二《韵》当时写本，当以万计。陆《韵》即巴黎所藏三本，已有异同。孙《韵》传之后世可考见者，除鹤山所藏外，如欧阳公见吴彩鸾书叶子本（《归田录》）。黄山谷所见凡六本（《山谷题跋》）。鲜于伯机藏一卷（《云烟过眼录》）。传写既多，故名称、部目不能尽同。《倭名钞》所引，有《唐韵》，有孙愐《切韵》。辽希麟《续一切经音义》又引孙愐《广韵》。而唐段公路《北户录》（卷一）引《广韵》一条（据明影宋钞本。陆氏刊本作《唐韵》），唐僧慧琳《一切经音义》卷八十引《广切韵》一条，并见于蒋氏所藏残本中。盖孙氏书本因法言《切韵》而广之，故亦名《广切韵》，略之则或称《切韵》或称“广韵”。而据其《自序》，则确名“唐韵”。是其书名已自不同。又《倭名钞》所引《唐韵》及孙愐《切韵》，与《净土三部经音义》所引孙愐说，以《唐韵》残本所有者校之，颇有不合。即大徐《说文》所用孙愐反切，亦与《唐韵》残本有异同。盖传写既多，写者往往以意自为增损，即部目之间亦不免小有分合。如夏英公《四声韵》所据之《唐切韵》，与《唐韵》相去尤近，即视为《唐韵》别本为后人增加者，亦无不可。学者苟一思《唐韵》写本之多，则不必疑其参池不合矣。

五声说

古音有五声，阳类一与阴类之平、上、去、入四是也。说以世俗之语，则平声有二（实则阳类自为一声，谓之平声，语不甚切），上、去、入各一，是为五声。自《三百篇》以至汉初，此五声者，大抵相通叶，罕有出入。汉中叶以后，阳类之声一部伪变而为上、去，于是有阳声三、阴声四，而古之五声增而七矣。然魏晋间撰韵书者，仍分为五声，盖犹并阳声之平、上、去为一，不敢以后世之音乱古音也。封演《闻见记》云：“魏时有李登者，撰《声类》十卷，凡一万一千五百二十字。以五声命字。”《魏书·江式传》云：“晋吕忱弟静，别放魏左校令李登之法，作《韵集》五卷，宫、商、角、徵、羽各为一篇。”李、吕二氏之分五声，虽不能确指其为何，然非如徐景安《乐书》之说：宫为上平、商为下平、角为入、徵为上、羽为去，则可决也。今韵，平声分上下者，徒以卷帙繁重而分之，别无他义。且唐时韵书犹有不分者（如魏鹤山所藏《唐韵目》，于二十八删、二十九山之后继以三十先、三十一仙，是平声不分上、下），不足以为宫、商之分明矣。然平声中自有二类，则自隋唐以来言今韵者，与近世言古韵者之所同。陆法言以降诸韵书，其平声中、冬、东、钟、江、真、淳、藉、文、殷、元、魂、痕、寒、桓、删、山、先、仙、阳、唐、庚、耕、清、青、蒸、登、侵、覃、谈、盐、添、咸、衔、严，凡三十五韵，为有人之平；而支、脂、之、微、鱼、虞、模、齐、佳、皆、灰、哈、萧、宵、肴、豪、歌、戈、麻、尤、侯、幽二十二韵，为无入之平。近世言古韵者说，说颇与之异。休宁戴氏从《广韵》区别此二类，而谓二者相配，异平而同入。曲阜孔氏本其说，而谓《广韵》有人者为阳声，无入者为阴声。阴”、“阳”之名亦出于戴氏）。阴、阳二声，各分九部，两两对转，而以入声为之枢纽。至高邮王氏、歙县江氏，更考之周秦人周韵及文字之偏旁谐声，而谓《广韵》有入之平，古本无入；无入之平，古本有入。其说正与陆法言以来言今韵者相反。然其分平声为二类，则所同也。金坛段氏及王、江二氏虽不用阳声、阴声之名，然其书于阳声之韵皆自相次。段氏谓此大类有平、入、无上去。王、江二氏则谓有平、上、去，而无入。余则谓阳声自为一类，有平而无上、去、入。今韵于此类之字读为上、去者，皆平声之音变，而此类之平声，又与阴类之平声性质绝异。如谓阴类之平为平声，则此类不可不别立一名。阳声一与阴声平、上、去、入四，乃三代、秦、汉间之五声。此说本诸音理，征诸周、秦、汉初人之用韵，求诸文字之形声，无不胥合。颇疑李登、吕静之五声，舍此无以当之。李、吕二氏撰韵书时，所以不用魏晋音而用古音者，犹许叔重撰《说文解字》不用隶而用篆，孙叔然、徐仙民等作诸经音，不从俗读而从师读（师读非必古音）也。故五声者，以古音言之也。宋、齐以后，四声说行而五声说微，然周顒、沈约等撰韵书者，非不知有五声。约《答陆厥书》曰：“宫、商之声有五，文字之别累万，以累万之繁配五声之约”云云。约知有五而作《四声谱》者，以《四声为》属文而作（如王阮亭《声调谱》专为律师而作），本非韵书（四声之说专主属文，不关音韵。读《宋书·范晔传》、《射灵运传》、《南齐书·陆厥传》，《梁书·王筠传》，《南史·沈约》、《庾肩吾》诸传自明）。且其时阳类已显分三声，与阴类三声及入声而七。用之诗文，则阴、阳可以互易

，而平、入不能相贸，故合阴、阳两类而为四声。四声者，就今音言之也。且五声专以声音，四声乃以声音之运用于诗文言。隋唐后编韵书者，亦本为诗则作（陆法言《切韵序》云：今反初服，私训诸弟子，凡有文藻，即须明声韵。”可知其书本为文而作），遂从沈《谱》并阴、阳为一类。然一有入，一无入，后世犹得由之以知其族类、性质之不同。然非三百年来古韵大明，亦无以知其别矣。

阴、阳二类，分于戴氏。其状此二声之别，亦惟戴氏言之最善。戴氏《答段若膺论韵书》曰：“大著六、（蒸、登）七、（侵、盐、添）八、（覃、谈、咸、衔、严、凡）九、（东、冬、钟、江）十、（阳、唐）十一、（庚、耕、清、青）十二、（真、臻、先）十三、（諄、文、欣、魂、痕）十四、（元、寒、桓、删、山、仙）凡九部，旧皆有入声。以金石音喻之，犹击金成声也。一、（之）二、（萧、宵、肴、豪）三、（尤、幽）四、（侯）五、（鱼、虞、模）十五、（脂、微、齐、皆、灰）十六、（支、佳）十七、（歌、戈、麻）凡八部，旧皆无入声。前七部以金石音喻之，犹击石成声也。惟十七部歌、戈与有入者近，麻与无入者近。旧皆失其入声，于是入声药、铎溷淆不分。仆审其音，有入者如气之阳，如物之雄，如衣之表；无入者，如气之阴，如物之雌，如衣之里。又平、上、去三声，近乎气之阳、物之雄、衣之表，入声近乎气之阴、物之雌、衣之里。故有入之与无入之去近。从此得其阴阳、表里之相配云云。自声音上论阴、阳二类之别，实自此始。其以金声比阳类，石声比阴类，尤为罕譬而喻。盖金声赠紘、清扬而常不易尽，故其类只有平声。若改读为上、去，则如击钟者以一手援桴击之，而即以他手案之，其近得之声决非钟声之自然也。阳声之上、去，亦决非阳声之自然。故既云阳声，即不容有上、去、入三声也。且阳声者，皆发声于其相配之阴声之入，而自以其声收之。故性质复于阴声。如戴氏所举八类（本九类。其第一类“阿”乃阴声，非阳声），“膺”发声于“亿”，“翁”发声于“屋”，“央”发声于“约”，“婴”发声于“t”，“殷”发声于“乙”，“安”发声于“遏”，“音”发声于“邑”，“腌”发声于“鍊”，即发声于其相配之阴声之入，而自以其固有之声收之。此阳声所固有及其所分有之收声，在我中国文字中实无字可以当之。“膺”者，，，亿”与此声之合，翁”者，，，屋”与此声之合，央”者，，，约”与此声之合；以至“婴”、“殷”、“安”、“音”、“腌”诸声无不然。其余一切阳声，又莫非某发声与此声合。而此一切阳声之收声，其性质常悠扬不尽，故其为平声，与阴类之平声绝不同，更不容有上、去。自汉以后，阳声有上、去者，乃因事物滋多，故稍促其音，以微别于本音。其在周秦以前，绝不见有上、去之迹也。

阳声无上、去、入，非徒可于音理上决之，求诸事实，则有三大证焉。一、群经、《楚辞》中今所谓阳声之上、去，多与平声通协。而阴声之上、去，虽偶与平声协，而仍多自相协。此事于段氏《诗经韵谱》、《群经韵谱》中最为了然。二、阳声诸部字，其于形声，以平声为声者之十之八九（如蒸、冬二部殆全以平声为声。东部以平声为声者，亦过于十之九）。而阴声诸部字，则以上、去、入为声者，乃多于平声。此事一披归安严氏《说文声类》，亦自了然。三、《广韵》阳声诸部之上

、去，多兼收于韵中。以东、冬、钟、江四韵字言之，上、去共二百五十八字，其中兼收于平韵者一百二十五字，几居其半。余谓其入平韵者，古之本音（盖自六朝韵书出），入仄韵者，后世之音变也。且此所谓上、去者，皆以今韵言之。今韵之上、去有而平声不兼收者，古音多与平声通叶，或与平声互相通假。段氏《六书音韵表》于第六部至第十四部，皆无上、去，盖实有见于此也。惟于第七、第八、第十二三部，平声外兼有入声，则又姑从今韵，而不能自充其说。至高邮王氏以质（段第十二部之入）与缉、（段第七部之入）叶，（段第八部之入）皆名自为一部。歙江氏以质承脂、缉、叶，各自为一部，则段氏表中此九部者，只存平声，无上、去、入。然二氏犹谓此九部者无入而有上、去，则亦姑从今韵，而不敢用段氏之说也。余之五声说及阳声无上、去、入说，不过错综戴、孔、段、王、江五家之说而得其会通，无丝毫独见参于其间。而证之事实则如彼，求之诸家之说又如此。阳声之无上、去、入，虽视为定论可也。

尝谓自明以来古韵学之发明有三：一为连江陈氏古本音不同今韵之说，二为戴氏阴、阳二声相配之说，三为段氏古四声不同今韵之说。而部目之分析，其小者也。陈氏之说，开顾、王以后言古韵之端。戴氏之说，孔氏取之以成《诗声类》，其规摹亦略具矣。段氏之说，歙县江氏作《唐韵四声正》，虽窃取其义，而于其说之根本及其由此说所作之第七至第十四部韵谱，却未之从，后人亦罕留意及此者。故论其大略如右。至上所举三大证，当自为一书以明之。然在好学深思、心知其意者，固亦无藉乎此也。

尔雅草木虫鱼鸟兽释例自序☆

甲寅岁莫余侨居日本，为上虞罗叔言参事作《殷虚书契考释后序》，略述三百年来小学盛衰。嘉兴沈子培方伯见之，以为可与言古音韵之学也。然余于此学殊无所得，惟窃怪自来治古音者，详于叠韵而忽于双声。夫三十六字母，乃唐宋间之字母，不足以律古音，犹二百六部乃隋唐间之韵，不可以律古韵。乃近世言古韵者十数家，而言古字母者，除嘉定钱氏论“古无轻唇舌上二音”及番禺陈氏考定《广韵》四十字母，此外无闻焉。因思由陆氏《释文》上溯诸徐邈、李轨、吕忱、孙炎，以求魏晋间之字母；更溯诸汉人“读为”、“读若”之字与经典异文，以求两汉之字母；更溯诸经传之转注、假借与篆文、古文之形声。以为如此，则三代之字母虽不可确知，殊可得而拟议也。然后类古字之同声同义者以为一书，古音之学至此乃始完具。

乙卯春，归国展墓，谒方伯于上海，以此愿质之。方伯莞然曰：“君为学乃善自命题，何不多命数题，为我辈遣日之资乎？”因相与大笑。余又请业曰：“近儒皆言古韵明而后诂训明，然古人假借、转注多取诸双声，段、王二君虽各自定古音部目，然其言诂训也，亦往往舍其所谓韵而用双声。其以叠韵说诂训者，往往扞格不得通。然则谓古韵明而后诂训明，毋宁谓古双声明而后诂训明欤？”方伯曰：“岂直如君言，古人转注、假借虽谓之全用双声可也，双声或同韵，或不同韵。古字之互相假借、转注者，有同声而不同韵者矣，未有同韵而不同声者也。君不读刘成国《释名》乎？每字必以其双声释之，其非双声者，大抵譌字也。”余因举首章“天顯也”三字以质之。方伯曰：“顯与濕（济潔之潔）俱从黑声。濕读它合反，则顯亦当读舌音，故成国曰，以舌腹言之。”余大惊，且自喜其亿而中也。是岁，复赴日本，长夏无事，稍就陆氏《释文》，以反切之第一字部分诸字，及五、六卷而中綴。

丙辰春，复来上海，寓所距方伯居颇近，暇辄诣方伯谈。一日方伯语余曰：“栖霞郝氏《尔雅义疏》于《诂》、《言》、《训》三篇皆以声音通之，善矣。然《草》、《木》、《虫》、《鱼》、《鸟》、《兽》诸篇以声为义者甚多，昔人于此似未能观其会通，君盍为部分条理之乎？”又曰：“文字有字原，有音原。字原之学，由许氏《说文》以上溯殷周古文止矣，自是以上，我辈不获见也。音原之学，自汉魏以溯诸群经《尔雅》止矣，自是以上，我辈尤不能知也。明乎此，则知文字之孰为本义，孰为引申假借之义，盖难言之。即以《尔雅》，权舆，二字言，《释诂》之，权舆，始也，，《释草》之，其萌護崙M【释虫】之，_舆父，守瓜，，三实一名，又《释草》之，权，黄华M【释木】之，权，黄英，，其义亦与此相关。故谓，权舆，为，蓮蒞，之引申可也，谓，護蒞，、，罐輿1口用，权舆，之义以名之可也。谓此五者同出于一不可知之音原，而皆非其本义，亦无不可也。要之，欲得其本义，非综合其后起诸义不可。而亦有可得，有不可得，此事之无可如何也。”

余感是言，乃思为《尔雅声类》，以观其会通。然部分之法，辄不得其衷，盖但以喉、舌、牙、齿、唇分类，则合于《尔雅》之义例，而同义之字，声音之关系读之苦不甚显。若以字母分之，声音之关系显矣，然古之字母有几？又某字当属何母，非由魏晋六朝之反切以溯请汉人“读为”、“读若”之字，及诸经传之异文，篆文、古文之形声，无由得之。即令假定古音为若干母，或即用休宁戴氏古二十字母之说，以部分《尔雅》，则又破《尔雅》之义例。盖古字之假借、转注，恒出入于同音诸母中，又疑“泥”、“来”、“日”、“明”诸母字，虽不同音亦互相出入。若此者《尔雅》既类而释之，今欲类之而反分之，颠倒孰甚。因悟此事之不易，乃略推方伯之说，为《尔雅草木虫鱼鸟兽释例》一篇。既以释例名，遂并其例之无关音声者，亦并释之。虽未必能尽方伯之意，然方伯老且多疾，未可强以著书。虽以不侯犬马之齿，弱于方伯者二十余载，然曩者研求古字母之志，任重道远，间以人事，亦未敢期以必偿，而方伯音学上之绝识，与余一得之见之合于方伯者，乃三百年来小学极盛之结果。他日音韵学之进步，必由此道。此曳戈小册者，其说诚无足观，然其指不可以不记也，故书以弁其首。

丙辰仲冬。海宁王国维。

书郭注《方言》后一☆

郭景纯于《尔雅》有注、有音，而注中之音则专为今语而作，前篇既详之矣。其于《方言》，则音即在注中，体例与音义为近。其音有为本文作者，有为己注作者，可一一分别之。盖所音之字，惟见注中而不见于本文者，此音为注作而不为本文作，固不待言。即其字并见本文及注中，而其音在注所引今语下，则其音实兼为注作，而不徒为本文作。盖注中所出之今语，本有音无字者也。景纯以其音及义拟之，而以当古之“𠂔”字，故必存其音；而古语之音亦可由此音推之，固与注《尔雅》之旨同也。如卷一好，自关而东，河、济之间谓之描。”注：“今关西人呼好为描，莫交反。”此莫交反之音，实音晋时关西之语，而汉时关东之语亦从可知矣。又虔、刘、惨、排，杀也。”注今关西人呼打为排，音廩，或洛感反。”此音关西呼打之排，而本文之排亦从可知矣。卷二：“遽，吴、扬曰茫。”注：“今北方通然也，莫光反。”此音晋时北方通语之茫，而汉时吴、扬之茫音亦可知矣。又猥，楚、郑曰奔或曰婚。”注言黯婚也，今建平人呼婚，胡削反。”此亦音晋建平人所呼之婚，而汉时楚、郑之婚音亦可知矣。又卷三苏，沅、湘之南谓之着。”注：“今长沙人呼野苏为着，音车辖。”又“握，拔也”。注：“今呼拔草心为握，乌拔反。”又：“菱，杜根也。”注：“今俗名韭根为菱，音陔。”又：“庸，谓之傲转语也。”注：“傲犹保傲，今陇右人名嫡为淞，相容反。”卷四：“袴，齐鲁之间或谓之枕。”注：“今俗呼袴踣为拢，音鲟鱼。”卷五騷，陈、楚、宋、魏之间或谓之櫬。”注今江东通呼勺为櫬，音羲。”又：“箸，自关以西谓之桶穗。”注：“今俗亦通呼小笼为桶穗，音笼冠。谓桶之音如笼。櫬，苏勇反。”又：“翩，陈、魏、宋、楚之间谓之题。”注：“今河北人呼小盆为题子，杜启反。”又：“所以注解，陈、楚、宋、魏之间谓之篙。”注：“今江东亦呼为篙，音巫覡。”又：“扇，自关而东谓之箒。”注今江东亦通名扇为箒，音簍。”又：“杷，宋、魏之间谓之渠拏。”注：“今江东名亦然，诺猪反。”又：“金，宋、魏之间或谓之度。”注：“今江东呼打为度，音量度也。”卷六擘，楚谓之纫。”注今亦以线贯针为纫，音刃。”卷七茹，食也，吴、越之间凡贪饮食者谓之茹。”注俗呼能粗食者为茹，音胜如。”又：“滕，儋也。”注：“今江东呼儋两头有物为滕，音邓。”卷八虎，江、淮、南楚之间或谓之于戲。”注：“今江南山夷呼虎为彪，音狗窠。”又貔，北燕、朝鲜之间谓之結。”注：“今江东呼为貂狸，音丕。”又：“桂林之中，守宫大者而能鸣，谓之蛤解。”注：“江东呼为蛤蜊，音颌颌，汝颍人直名为蛤解，音懈，误声也。”卷九：“车枸簏，宋、魏、陈楚之间谓之篲。”注今呼车子弓为篲，音巾帼。”又铍，谓之铍。”注：“今江东呼大矛为铍，音彼。”又小舫谓之𦨇。”注：今江东呼𦨇小底者也，音叉。”又：“短而深者谓之俯。”注：“今江东呼𦨇𦨇，音步。”又：“船后曰舳。”注：“今江东呼舵为舳，音轴。”卷十粃，不知也。”注今淮、楚间语呼声如非也。”又：“物生而长大又曰瘡。”注：“今俗呼小为瘡，音荠菜。”又：“𦨇，湘江之间谓之獅。”注：“今建平人呼额为獅，音旃裘。”又：“推，沅、涌廣幽之语或曰攬。”注今江东人亦名推为攬，音晃。”卷十一蟬，海岱之间谓之岐。”注齐人呼为巨岐，音技。”又：“蜻蛉，楚或谓之菴。”注：“梁国

呼菴音巩。”又：“姑蟹谓之强蚌。”注：“建平人呼蚌子音芊，芊即姓也。”卷十二：“筑婁，匹也。”注：“今关西兄弟妇相呼为筑婁，度六反。”又：“緣，倦也。”注：“今江东呼极为緣，音喙。”卷十三：“療，极也。”注：“江东呼极为瘰，倦声之转，巨畏反。”又本也。”注今之鸟羽本为：音侯。”又：“1岂，陪也。”注：“江南人呼梯为皐，所以皐物而登者也，音割切也。”又：“炀！炙也。”注：“今江东呼火炽盛为炀，音恙。”又：“笼，南楚、江、河之间谓之蒴。”注今零陵人呼笼为蒴，音彭。”又蒴，南楚谓之箬。”注今建平人呼箬，音鞭鞘。”又：“饴谓之塘。”注：“江东皆言塘，音唐。”此诸条，以《尔雅》注之例推之，固皆为注作音，而因以求《方言》之音者。至今语之音与古语相近而微有别，则亦著之。如卷三：“鹽”注：“旧音蜂，今江东音嵩，字作菰也。”又軫，戾也。”注谓了戾，江东音善。”卷八北燕、朝鲜洌水之间，爵子及鸡雏皆谓之穀。”注：“恪邁反，关西曰穀，音顾。”卷十荆之南鄙谓何为曾，又或谓之訾。”注今江东人语亦云訾，为声如斯。”又諫，不知也。”注：“音癡眩，江东曰咨。”此亦如声之转也。卷十一广蟬其小者谓之麦蛰。”注广今关西呼麦靈，音痈癰之癰。”是景纯注《方言》时，全以晋时方言为根据，故于子云书时有补正。读子云书可知汉时方言，读景纯注并可知晋时方言。张伯松谓《方言》为县之日月不刊之书，景纯之注亦略近之矣。乃景纯《尔雅》、《方言》二注，颇为后人所乱。《尔雅》注之音，为注疏本删剽殆尽。吾乡卢抱经学士校刊《方言》，世称善本，乃分别音与注为二，又乱其次第。嘉定钱氏笺疏从之，致令景纯以晋方言注汉方言之根据全不可见，亦可谓景纯之不幸也。

书郭注《方言》后二☆

景纯注《方言》，全以晋时方言为本。晋时方言，较子云时固已有变迁，故注中往往广子云之说，其例有广地，有广言。就广地言之，有子云时一方之言，至晋时为通语者，如卷一：“慧，楚或谓之橢。”注：“他和反，亦今通语。”又好，赵、魏、燕、代之间曰姝。”注昌朱反，亦四方通语。”卷二：“好，青、徐、海、岱之间曰钟，或谓之燎。”注：“今通呼小，姣洁喜好者为燎钟。”又遽，吴扬曰茫。”注：“今北方通然也，莫光反。”卷三凡草木刺人，江、湘之间谓之棘。”注《楚辞》曰：“曾枝剌棘，，亦通语耳，音己力反。”又凡饮药、傅药而毒东齐、海、岱之间谓之眠或谓之眩。”注：“眠、眩亦今通语耳。”又南楚物空尽者曰铤，铤赐也。”注：“亦中国之通语也。”卷五床其杠南楚之间谓之赵。”注赵当作桃，声之转也，中国亦呼杠为桃床，皆通语也。”卷六：“视，吴扬曰眊。”注：“今中国亦云目眊。”卷七：“涩，赵曰杜。”注：“今俗语通言涩如杜。”又：“舍车、东齐海岱之间谓之发。”注：“今通言：发，写也。”卷八：“貌，关西谓之狸。”注：“此通名”。又守宫，南楚谓之蛇医。”注今所在通名蛇医耳。”卷九车枸菱，南楚之外谓之篷。”注：“今亦通呼篷。”卷十：“沅澧之间，使之而不肯，答曰吉。”注：“音茫，今中国语亦然。”又：“荆、汝、江、湘之郊，凡贪而不施谓之𪔐。”注：“亦中国之通语。”又：“想，楚以南谓之琢。”注：“琢潜亦通语也”。又：“礲！晒干物也！扬楚通语也。”注：“礲音菲，亦皆北方常语耳。”又：“谨、极，吃也，楚语也。”注：“北方通语也。”又：“眠蛭、脉蜴、赐施、茭媿、壇漫、憎他，皆欺谩之语也，楚郢以南东扬之郊通语也。”注：“六者，中国相轻易蚩弄之言也。”又：“颌，南楚谓之颌。”注：“亦今通语尔，此皆汉时一方之语，景纯时见为通语者也。”又汉时此方之语，晋时或见于彼方，如卷一：“好，自关而东，河济之间谓之描。”注：“今关西人呼好为描，莫交反。”又：“平原谓啼极无声谓之晓眼。”注：“眼，音亮，今关西语亦然。”又：“跳，楚曰断。”注勅厉反，亦中州语。”又狻，楚、郑或曰婚。”注今建平人呼婚，胡削反。”卷三鸡头，北燕谓之倭。”注今江东亦呼倭耳。”又凡草木刺人，北燕朝鲜之间或谓之壮。”注：“今淮南人亦呼壮。”卷四：“裙，自关而东或谓之襜。”注：“音碑，今关西语然也。”卷五：“𪔐，陈、楚、宋、魏之间或谓之𪔐。”注今江东通呼勺为𪔐，音羲。”又罌灵、桂之郊谓之瓶。”注今江东通呼大瓮为𪔐。”又周魏之间谓之𪔐。”注：“今江东亦呼罌为𪔐子”。又：“所以注解，陈、魏、宋、楚之间谓之篙。”注：“今江东亦呼为篙，音巫覡。”又扇，自关而东谓之篲。”注今江东亦通名扇为篲，音签”。又：“杷，宋魏之间谓之渠挈。”注：“今江东语亦然，诺猪反。”又簞，宋魏之间谓之笙。”注：“今江东通言笙”。卷七：“东齐、海、岱、北燕之郊，跪谓之账管。”注：“今东郡人亦呼长跽为账管。”又：“儋，自关以西陇冀以往，谓之贺。”注今江东语亦然。”卷八貌，北燕、朝鲜之间谓之結。”注江东呼为貂狸，音丕。”又布谷，自关而西或谓之布谷。”注今江东呼为获谷。”又：桂林之中，守宫大者而能鸣，谓之蛤解。”注江东人呼为蛤蛞，音颌颌，汝颖人直名为蛤解，音懈，声误耳。”卷十：“

楚，凡挥弃物或谓之敲。”注：“恪校反，今汝、颍间语亦然。”又：“颍，湘江之间谓之獠。”注：“今建平人呼颍为颍，音旃裘。”又：“沅、涌、淹幽之语推或曰攬”注：“今江东人亦名推为攬，音晃。”卷十一：蟬，宋卫之间谓之蟬蜩。”注：“江南呼蟬姨。”又：“蜃輦，自关而西秦、晋之间谓之意螯。”注：“今江东呼蟬螯，音掇。”卷十三：篋，其小者，自关而西，秦晋之间谓之篋。”注：“今江南亦名篋为篋。”又：“麵，晋之故都曰哲。”注：“今江东人呼_为對。”凡此，皆汉时一方之语，景纯时见于他方者也。此广地之二例也。至于广语则亦有二例。一，今语虽与古语同，而其义广狭迥异。或与之相涉，则亦著之。如卷一排，杀也。”注：今关西人呼打为排。”又：“凡物盛多谓之寇。”注：“今江东有小兒，其多无数，俗谓之寇兒。”又：“相谒而餐秦晋之际，河阴之间曰德、t岂。”注：“今关西人呼食欲饱曰欠款岂。”又：“毳，燕之北郊，朝鲜洌水之间曰叶输。”注：“今名短度絹为叶输也。”卷二燕齐之间，养马者谓之娠。”注：今之温厚也，音振。”卷三：“庸谓之淞。”注：“淞犹保淞，即保庸。今陇右人名嫡为淞，相容反。”卷四：“袴，齐鲁之间或谓之枕。”注：“今俗呼袴踣为枕，音鲟鱼。”卷五：“箬笛，自关而西谓之桶櫛。”注：今俗亦通呼小笼为桶櫛，音笼冠。櫛，苏勇反。”又：盂，宋、魏之间或谓之度。”注：“今江东呼打为度，音量度也。”卷六擘，楚谓之纫。”注：今亦以线贯针为纫，音刃。”卷七：吴越之间，凡贪饮食者谓之茹。”注：“今俗呼能粗食者为茹，音胜如。”卷九：“车封，自关而东或谓之曲纶。”注：今江东通呼索为纶，音伦。”今本夺为字，从原本《玉篇》所引补。卷十三蔡析也。析竹谓之蔡。”注：今江东呼蔑竹里为築。”又：“皐，陪也。”注：“江南人呼梯为皐，所以皐物而登者也，音剡切也。”又：“炀，灸也。”注：“今江东呼火猛炽为炀，音恙。”此皆语同而义稍异者也。至义同而语异者，景纯亦随时记于注中。如卷二：“逞、苦、了，快也。”下注：“今江东人呼快为愴，相缘反。”卷三：“东齐之间，壻谓之倩。”注：“言可借倩也，今俗呼女壻为卒便原注一作平使，疑平使是。是也。”又苏，芥草也。”下注或言菜也”。又苏亦荏也。”注：“今江东人呼荏为菩，音鱼。”又：“璧、堯，芡菁也。”下注：“今江东名为温蔣。”又：“胶、橘·诈也。”下注：“汝南呼欺为i遗迪，他回反，亦曰诒，音殆。”又：“汜M、涧、注，滂也。”下注：“荆州呼横也。”卷四：“擔榆，自关以东谓之铕裾。”注：“俗名掘掖，音倔。”又：“杓鐘谓之禅。”注：“今又呼为凉衣也。”又：“绕衿谓之裙。”注：“俗人呼接下，江东又名下裳。”又：“掬橘谓之袖。”注：“江东呼椀，音婉。”卷五：“甌”下注：“凉州呼移炊。”“篋”下注：“江东呼浙签。”“甫”下注：江东又呼鏊刃为鏊，普蔑反。”“櫛”下注：“江东呼都。”又槌，其横关西曰柵。”注亦名校，音交。”又：“簞”下注：江东呼蓬籐为簞，音废。”“苻唐”下注：“江东呼筴，音靺。”“榻前几”下注：“江东谓之承。”卷八：“虎”下注：“俗曰伯都。”又：“北燕、朝鲜洌水之间谓伏鸡曰范。”注：“江东呼度，央富反。”又：“桑飞”下注：“今亦名为巧妇，江东呼布母。”又守宫”下注：“南阳人又呼蠃蜒。”卷九凡矛，骹细如雁胫者，谓之鹤膝。”注：“今江东呼为铃钉。”又：“鐸谓之钎。”注：“或名为鐸，音顿。”又：“方舟谓之满。”注：“扬州呼渡津舫为杭，荆州人呼树。”又：“所以隐棹谓之浆。”注：“

江南又称为胡人。”又：“船首谓之閤间。”注：“今江东呼船头屋谓之飞间是也。”卷十：“弃，淮、汝之间谓之投。”注：“江东又呼妖，音廩。”又吃或谓之澀。”注：“今江东又名吃为嘆，若叶反。”卷十：“蝮蚘”下注：“江东人呼蝶螳。”又：“蝟螳谓之蝟螳。”注：“江东呼为蝟螳也。”又螳螂谓之髦”注：“江东呼为石螳，又名齧肱。”又：“姑蟹谓之强虫芋。”注：“江东谓之蜚，音加。”又：“蜻蛉谓之螂蛉。”注：“江东名为狐黎。淮南人呼螭伊。螭音康，峤音伊。”又春黍谓之谨糟。”注又名蚣蝮，江东呼蛇蛭。”又：“𧈧𧈧谓之𧈧𧈧。”注：“又呼步屈。”又：“蜂”下注：“或呼笛师。”“蚍蜉”下注：“建平人呼蝻，音侈。”“𧈧𧈧”下注：“亦呼当齐，或呼地蚕，或呼𧈧蝗。”“蚰蜒”下注：“江东又呼蝻，音鞏。”“𧈧𧈧”下注：“齐人又呼社公，亦言罔工。”卷十三：“孟”下注：“江东名孟曰凯，亦曰瓶也。”又屋栢谓之椳。”注亦呼为连绵。”是皆今语之异于古者，亦记之以广异语。此广语之二例也。故景纯注《方言》，全以晋时方言为本，虽注而不域于注体焉。然则《方言》注中之音，实不能与注离，后人分而二之，可谓失景纯之旨矣。

书郭注《方言》后三☆

《方言》一书，经戴东原、卢抱经、刘瑞临三先生校订！又段懋堂先生《说文注》、王怀祖先生《广雅疏证》亦时订其讹化钟。丙辰冬，余读《方言》，复取诸古书，用戴氏《疏证》例校之，即书于戴本上。戊午冬，复检前校，见有足订正本文及注者，得十六事。聊书于后。其本文之显然误者，如卷一慎、济、愁、溼桓，忧也。自关而西，秦、晋之间，凡志而不得，欲而不获，高而有坠，得而中亡，谓之，溼，。”注溼者，失意、潜沮之名。”案《原本玉篇》、《荀子·修身篇》注，均引“溼”作“濕”。《玉篇》又引注“潜沮作，惨怛1。“濕”，古人皆读他合反。今人于“志而不得，欲而不获，高而有坠，得而中亡”时，犹皆读之如他合反之“濕”。以此一音，表彼四义，当是秦、晋旧语。自以作“濕”为长。卷三胶、谲，诈也。凉州西南之间曰，胶，。自关而东西或曰，谲%或曰，胶，。”案《原本玉篇》、《尔雅序》、《释文》、玄应《一切经音义》卷二，慧琳《音义》卷六、卷七、卷三十八并引“谲，诈也”。疑“胶”乃“谲”之伪。《说文》谲”字注益梁曰，谲，。欺天下曰，谲V，即本之《方言》。“益、梁”即所谓“凉州西南之间”，“天下”所谓“自关而东西”也。是《方言》本作“凉州西南之间曰，谲，。”又《原本玉篇》引“自关而引东西或曰，谲，。”是末“胶”字亦本作“谲”。《广雅》“谲、诈、胶，欺也”，上三字与《方言》次序同，当本之《方言》。“胶”字或取诸他书，或后人据伪本《方言》羈人也。卷六台既，失也。宋、鲁之间曰，台，。既、隐、据，定也。”今本分二节，上十字为一节，下五字为一节。案《广雅》“隐、据，定也。”无“既”字。是张稚让读“宋、鲁之间曰台、既”为句，义较今本分节为长。又“紕、绎、督、雉，理也。秦、晋之间曰，紕，。凡物曰，督之，，丝曰，绎之，。”《原本玉篇》引“紕，理也。秦、晋之间曰，雉，。宋、郑曰，紕1。是今本夺“曰雉宋郑”四字。于是宋、郑语误为秦、晋语。而“雉”之为何语亦不可知矣。又“攔、剿续也。秦、晋续折谓之，攔绳索谓之，剿，。擘楚谓之，纫，”。今本自“擘”以下五字自为一节。案《原本玉篇》引“集J.续也。楚谓之，纫，”。洪兴祖《楚辞补注》亦引“续楚谓之，纫1。是此二节本是一节，又衍“擘”字。王逸《楚辞注》纫，索也。”正本之《方言》。郭注云：“今亦以线贯针为，纫？，义亦与“擘”无涉，而与“续”及“绳索”之义相近。今本盖误。卷十三：“扶，护也。”注：“扶挟将护。”案《原本玉篇》引“扶，护也。郭璞曰：“挟持，护之也，。”玄应《音义》卷一、卷十并引“挟，护也”。《广雅》语同。是本文“扶”当作“挟”，涉注“扶”字而伪。又无升谓之，刁斗，。”戴云：“无升，二字应有讹舛。”案《淮南·齐俗训》“炮格生乎热升”，《北堂书钞》一三五、《太平御览》七一二并引“热升”作“热斗”。说者以为“尉斗”。汉尉斗之状，与刁斗同。今传世汉器其铭皆作“鏹斗”。“无升”、“热升”、“鏹斗”字形皆相近。当云“樵斗谓之，刁斗犹《尔雅》云“荏菹谓之，戎菹，矣”（“荏”、“戎”、“樵”、“刁”音均相近）。又“餌谓之，糕，”，《御览》八百六十引作“餌谓之，饅，”。下有注“音恙”二字。《原本玉篇·食部》“饅余障反”引《方言》“餌谓之，饅，。”《广韵》四十七：“漾、餌也。

”《集韵》则云恙。《方言》：餌也。”又《原本玉篇·食部》无“饒”字，大广益会本始有之。是六朝尚无饒字。《广雅》之“糕”字亦本作“饒与《方言》同。均后世所追改也。此皆本文之伪舛也。至注文亦有当订正者。卷一“慧秦谓之，谩，注”“言谩沱。音沱（二字疑衍）。大和反。谩莫钱又亡山反。”案《原本玉篇》引“秦、晋谓慧为，谩郭璞曰：“言佗谩也。是旧本作“沱谩”，故先音“沱”，后音“谩”。《楚辞》惜往日或沱谩。”而不疑其证也。又“烈、枵，余也”注：“谓烈余也。”戴云：“，烈余，当作，遗余，。”卢本从之。案《原本玉篇》引注作“谓残余也”。慧琳《音义》卷六十七引“藁（即“枵”字），谓，残余，也”。韦昭《齐语》注亦云裂，残也。”是注“烈余”当作“残余”。戴改“遗余”，非也。卷二“揄、铺、𦨇、輕、帔、缕、叶、输，毳也”注音脆。皆谓物之行蔽也。”《集韵》十“虞”引注同戴本，改“行蔽”作“杆蔽”，卢本从之。案《原本玉篇》引注作“谓物之行蔽者也”。是今本“蔽”字乃“敝”之讹。《周礼·司市》注云：“害，害于民，谓物行沽者。”“沽”之言“苦”，不攻致也。“行敝”犹“行沽”矣。今人犹呼货物之次劣者为“行货”，与“毳”义正合。下注言“今名短度絹为叶输”。絹之短度者，正物之行敝者也。卷九“车枸萎，或谓之，隆屈1。注：“尾屈。”卢据宋本改为“屈尾”（今传世李文授本作“尾屈”）。然“尾屈”二字是音，非义。高诱《淮南·原道训》注：屈读，秋鸡无尾屈，之，屈，。”是“尾屈”二字乃汉魏以来成语。故景纯取以为音，改为“屈尾”者非也。又“箭，其三镰长尺六者，谓之长，飞虻1。注：“此谓今射箭也。”又“内者，谓之，平题注：“今戏射箭。”案慧琳《音义》卷四十五引注云三镰，今笛射箭也。平题，今戏射箭也。”是戏射与笛射相对为文。《御览》三百四十九引《开元文字》亦有此二语。盖即本《方言》注。《大唐六典·兵部》“员外郎”职：“凡应举之人有谋略、才艺，平射、筒射。”

《唐韵》十一“没腋”字注云：“笛射。”（《广韵》同）是古弩射之外，别有笛射。矢长尺六，较诸矢为短，盖如后世袖箭矣。今注夺“笛”字。卷十“翥，举也”。注：“谓，轩翥，也。”案《广雅》卷一：“翥，举也。曹宪《音》曰：《方言》为，署，音。”又卷三：翥，飞也。曹曰：《方言》音，曙，。”是注谓“轩翥也”下旧有“音署”或“音曙”二字，今本夺。又泌、扰，推也。”秘下有“撞泌”二字注。戴改为“神祕”，卢改为“撞泌”。案《文选·西京赋》：“徒搏之所撞”是“祕”乃“撞祕”之伪。“捶”、“撞”一字也。卷十二：“抒、虑，解也。”“抒”下有“抒井”二字注。戴改“抒”为“抒”，卢复改“抒井”为“抒渫”。案《说文》“糴”字注云：“量物之是古有“抒井”语，“井”字不误，卢改非是。此注文及后世改字之当订正者也。校本虽戢叠丛杂，然可纪者止此，书之以谗世之读是书者。

与友人论《诗》《书》中成语书（一）☆

《诗》、《书》为人人诵习之书，然于六艺中最难读。以弟之愚闇！于《书》所不能解者，殆十之五，于《诗》亦十之一二。此非独弟所不能解也，汉魏以来诸大师未尝不强为之说，然其说终不可通。以是知先儒亦不能解也。其难解之故有三：伪阙，一也（此以《尚书》为甚）；古语与今语不同，二也；古人颇用成语，其成语之意义与其中单语分别之意义又不同，三也。唐宋之成语，吾得由汉魏六朝人书解之。汉魏之成语，吾得由周秦人书解之。至于《诗》、《书》，则书更无古于是者。其成语之数数见者，得比较之而求其相沿之意义，否则不能赞一辞。若但合其中之单语解之，未有不齟齬者。试举一二例言之。如“不淑”一语，其本意谓“不善”也。不善或以性行言，或以遭际言。而“不淑”古多用为遭际不善之专名。《杂记》记诸侯相吊辞，相者请事，“客曰：“寡人使某。如何不淑！”致命曰：“寡君闻君之丧，寡君使某，如何不淑！”《曲礼》注云：相传有吊辞云：“皇天降灾，子遭罹之，如何不淑！”“如何不淑者，谓遭此不幸，将如之何也。《左·庄十年传》天作淫雨，害于粢盛，若之何不吊。”古“吊”、“淑”同字。“若之何不吊”亦即“如何不淑”也。是“知如何不淑”者，古之成语，于吊死、唁生皆用之。

《诗·鄘风》“子之不淑，云如之何”，正用此语。意谓宣姜本宜与君子偕老，而宣公先卒，则“子之不淑，云如之何”矣。不斥宣姜之失德，而但言其遭际之不幸，诗人之厚也。《王风》遇人之不淑”，亦犹言遇人之艰难，不责其夫之见弃，而但言其遭际之不幸，亦诗人之厚也。诗人所用，皆当时成语，有相沿之意义。毛、郑胥以“不善”释之，失其旨矣。古又有“陟降”一语。古人言“陟降”，犹今人言“往来，不必兼“陟”与“降”二义。《周颂》念兹皇祖，陟降庭止”，“陟降厥土，日监在兹”。意以降为主，而兼言陟者也。《大雅》文王陟降，在帝左右。”此以陟为主，而兼言降者也。故“陟降”者，古之成语也。“陟降”亦作“陟各”。《左·昭七年传》叔父陟恪，在我先王之左右。”正用《大雅》语。“恪”者，“各”之借字。是“陟各”即“陟降”也。古“陟”、“登”声相近，“各”、“格”、“假”字又相通，故“陟各”又作“登假”。《曲礼》告丧，曰，天主登假，。《庄子·德充符》彼且择日而登假。”《大宗师》是知之能登假于道也。”若此“登假”，亦即“陟降”也。又作“登遐”。《墨子·节葬篇》秦之西有仪渠之国者，其亲戚死，聚柴薪而焚之，熏上，则谓之，登遐V，“登遐”亦即“陟降”也。“登假”、“登遐”，后世用为崩薨之专语。而通语之“陟降”，别以“登降”、“升降”二语代之。然四语所从出之源，尚历历可指。《书·文侯之命》言“昭登于上，今《书》作“昭升于上”。然《史记·晋世家》、《典引》蔡邕注皆引《书》“昭登于上”，盖今文如是），《诗·大雅》言“昭假于下”。“登”与“假”相对为文，是“登假”即“陟降”之证也。《左传》之“陟恪”，《曲礼》之“登假”，《墨子》之“登遐”，皆谓“登”，而不谓“降”。此又《大雅》之“陟降”。不当分释为上、下二义之证也。《诗》、《书》中语此类颇多，姑举其一二可知者。知字义之有转移，又知古代已有成语，则读古书者，可无以文害辞、以辞害志之失矣。

与友人论《诗》《书》中成语书（二）☆

古之成语，有可由《诗》、《书》本文比较知之者。如高邮王氏之释《书》“猷裕”、《诗》“靡盬”，瑞安孙氏之释《书》“裴忱”、“裴彝”、《诗》“不殄”、“不瑕”，皆是也。今尚有可说者，如《书·康诰》云“汝陈时臬司。”孔传读“司”字下属。案下文云“汝陈时臬事”，古“司”、“事”二字通用（《诗·小雅》“择三有事”，毛公鼎云“粤三有覲”），则“臬司”即“臬事”。孔读失之。又云“我时其惟殷先哲王德用康乂民作求。”传说未了。案《诗·大雅》王配于京，世德作求。”“求”者，“仇”之假借字。仇，匹也。“作求”，犹《书》言“作匹”、“作配”，《诗》言“作对”也。《康诰》言与殷先王之德能安治民者为仇匹，《大雅》言与先世之有德者为仇匹，故同用此语。郑笺训“求”为“终”者，亦失之。《酒诰》云：惟天降命，肇我民。”“天降命”正与下文“天降威”相对为文，《多方》云“天大降显休命于成汤”是也。传以为“天下教令”者失之。天降命于君，谓付以天下。君降命于民，则谓全其生命。《多士》云“昔朕来自奄，予大降尔四国民命”。《多方》云：“予惟大降尔命，尔罔不知。”又云：“我惟大降尔四国民命。”又云：“乃有不用我降尔命，我乃其大罚殛之。”盖四国之民与武庚为乱，成王不杀而迁之，是重予以性命也。传以“民命”为四国君，以“降”为杀，大失经旨矣。《酒诰》云：“汝劓毖殷献臣。”“劓毖”义不可通。案上文“厥诰毖庶邦、庶士”，“劓遂”殆“诰毖”之伪。又云：汝典听朕毖。”亦与上“其尔典听朕教”文例正同。贝r毖”与“诰”、“教”同义。传释“劓”为“固”，释“毖”为“慎”，亦大失经旨矣。《梓材》云：“庶邦享作，作兄弟方来。”“兄弟方”与《易》之“不宁方”、《诗》之“不庭方”，皆三字为句。“方”犹“国”也。《传》于“兄弟”句绝，又以“方”为万方，亦失经旨。此皆可由《诗》、《书》比较知之者也。其余《诗》、《书》中语，不经见于本书而旁见彝器者，亦得比较而定其意义，如《书·金縢》云：敷佑四方。”传云布其德教，以佑助四方。”案孟鼎云：匍有四方。”知“佑”为“有”之假借，非“佑助”之谓矣。《多方》云：“越惟有胥伯、小大多正，尔罔不克臬。”“胥伯”，《尚书大传》作“胥赋”。案毛公鼎云：“执小大楚赋。”“楚”、“胥”皆以疋为声，是《大传》作“胥赋”为长。而“小大多正”，当亦指布缕、粟米、力役诸征，非孔传“伯长、正官”之谓矣。《诗·郑风·羔裘》云：舍命不渝。”笺云：是子处命不变，谓守死善道，见危授命之等。”案克鼎云：“王使善夫克舍命于成周。”毛公鼎云：“厥非先告父厝，父厝舍命，母有敢蠹，夷命于外。”是“舍命”与“莠命”同意。“舍命不渝”谓如晋解扬之致其君命，非“处命”之谓也。《小雅·楚茨》云：先祖是皇，神保是飨。”又云：神保是格。”又云：“鼓钟送尸，神保聿归。”传、笺皆训“保”为“安”，不以“神保”为一语，朱子始引《楚辞》“灵保”以正之。今案克鼎云圣念厥圣保祖师梁父。”是“神保”、“圣保”皆祖考之异名。《诗》之“先祖是皇，神保是飨”、“皇尸载起，神保聿归”，皆相互为文，非“安飨”、“安归”之谓也。《大雅·文王》：永言配命，自求多福。”传云：“永，长。言，我也。我长配天命而行。”案毛公鼎皇天弘厌厥德，配我有周，膺受

大命。”又云：丕巩先王配命。”“配命”谓天所界之命，亦一成语。“永言配命”，犹言“永我界命”，非“我长配天命”之谓也。《思齐》云：“不显亦临，无射亦保。”传云：“以显临之，保安无厌也。”笺云临，视也。保，犹居也。文王之在辟雍也，有贤才之质而不明者，亦得观于礼。于六艺无射才者，亦得居于位。”说尤迂曲。案毛公鼎云肆皇天无射，临保我有周。”师敦云：“肆皇帝无敦，临保我有周。”贝r临”犹“保”也。《大明》云：上师临女。”《云汉》云：上帝不临。”

“上帝不临”，犹《书·多士》云“上帝不保”也。然则《诗·思齐》盖“临”、“保”互文。又知上云“難難在宫，肃肃在庙”亦“宫”“庙”互文，非辟雍宫之谓也。《卷阿》云：“俾尔弥尔性。”传云：“弥，终也。”案彪姑敦云：“用蕲眉寿，缉绰永命，弥厥生。”齐子仲姜簠云用求考命弥生。”是“弥性”即“弥生”，犹言永命矣。《韩奕》“幹不庭方”传云：庭，直也。”笺云当与不直违失法度之方作贞幹。”案毛公鼎云：“率怀不廷方。”《左·隐十年传》以王命讨不庭。”则“不庭方”谓不朝之国，非“不直”之谓也。《江汉》云“肇敏戎公”。传云戎，大也。公，事也。”笺云戎犹女也。”案不媒敦云女肇海于戎工。”虢季子白盘云：“庸武于戎工。”皆谓兵事，训“大”、训“汝”皆失之。《商颂·殷武》云：“天命降监，下民有严。”传云“严，敬也”。笺云天乃下视下民有严明之君。”案“有严”一语，古人多以之斥神祇、祖考。齐侯钟云：“虢虢成唐，有严在帝所。”宗周钟云：“先王其严在上，熊熊散散，降余多福。”虢叔旅钟云：“皇考严在上，翼在下。”番生敦云：“不显皇祖考严在上，广启厥孙子于下。”是“天命降临，下民有严”者，意谓天命有严，降监下民。句或倒者，以就韵耳。笺以为“下视下民有严明之君”者，失之。又如《书·君奭》云：在让后人于丕时。”《诗·大雅》云：“帝命不时。”《周颂》云：“裒时之对。”“丕时”、“不时”、“裒时”，当是一语。《洛诰》云：叙弗其绝厥若。”《立政》云：我其克灼知厥若。”《康王之诰》云：用奉恤厥若。”“厥若”亦当是成语。此等成语，无不有相沿之意义，在今日固无以知之，学者姑从盖阙可矣。

宋越州本《礼记正义》跋

南海潘氏藏《礼记正义》七十卷，每半叶八行，行大十五六字，小二十二字，卷末有绍熙壬子三山黄唐《跋》，并校正官衔名十二行。其黄唐结衔，为“朝请郎、提举两浙东路茶盐常平公事”，余亦多浙东官属，乃浙东漕司所刊，即岳倦翁所谓“越中旧本注疏”也。此书旧藏吴中吴企晋舍人家，惠定宇先生曾取以校汲古阁本，一时颇多传录，阮文达《校勘记》所据即是也。然惠氏校本未录黄唐《跋》及校正诸人衔名，日本人所撰《七经孟子考文》并《经籍访古志》虽载黄《跋》而未录衔名，故世无知为越本者。案黄《跋》云：“《六经疏义》，自京监、蜀本皆省正文及注，又篇章散乱，览者病焉。本司旧刊《易》、《书》、《周礼正（经）[义]》[二]，注、疏萃见一书。绍熙辛亥仲冬，唐备员司庾遂取《礼记》、《毛诗疏义》，如前三经编汇，精加雠校，用锓诸木”云云。

又庆元庚申，越帅沈作宾作《春秋正义后序》云：“诸经正义既刊于仓台，而此书复刊于郡治，合五为六，炳乎相辉。”余曩读黄、沈二《跋》，见沈《跋》“仓台”“五经”云云，与黄《跋》语合。又检《宝庆会稽续志》提举（提）[题]名，知黄唐以绍熙二年十一月任浙东提举，因定黄唐所刊书为越州本。今见此本校正衔名，足证余说之不谬矣。又据黄、沈二跋！则越本注疏首刊《易》、《书》、《周礼》三种！黄唐益以《毛诗》、《礼记》二《疏》，沈氏又益以《左传疏》！共得六种。而黄刊《礼记》与沈刊《左传》，行款全同。今传世宋刊注疏本，与此本同行款者，如常熟瞿氏所藏《周易注疏》十三卷，日本足利学校所藏《尚书注疏》二十卷，皆即越本。

余又见江安傅氏所藏《周礼注疏》，仅存《春官·大司乐》职一叶，行款亦与此同，其经文大字下接以释经之疏，小字双行，乃以一大“注”字间之，其下为注文，亦小字双行，注文后空一格，乃为释注之疏。其体例与他注疏异，亦与越本他经注疏异，而行款则同，盖亦越州本也（闻江右李氏有全书，惜未见）。京师图书馆藏《论语注疏解经》残卷；潘氏又藏《孟子注疏解经》残卷，存卷二、卷三，行款全与此本同。此又在六经之外，盖刊于庆元庚申以后，是越本殆具十三经矣。其书皆每半叶八行，用监中经注本行款，分卷则从单疏本，与建十行本绝不相同。目录家知有越本注疏，自今日始。然非此本题跋、衔名具存，亦无以推知之矣。又宋、元间别有一种注疏，与越本行款略同。如日本森立之《留真谱》所摹《周易兼义》、乌程张氏所藏《尚书注疏》、吾乡陈氏乡堂所藏《毛诗注疏》，皆半叶八行，行大十八字，小二十五字，板A大小亦同越本。然张氏《尚书疏》分卷与建本同，陈氏《毛诗疏》并附《释音》，疑用越本行款重刊建本者，不知刊于何时何地也。附记于此。

《汉书·艺文志》举例后序

丙辰春，余自日本归上海，卜居松江之湄，闭户读书，自病孤陋。所从论学者，除一二老辈外，同辈惟旧友钱唐张君孟劬，又从孟劬交元和孙君益庵。二君所居，距余居半里而近，故时相过从。二君为学皆得法于会稽章实斋先生，读书综大略，不为章句破碎之学。孟劬有《史微》，益庵有《诸子通考》，既藉甚学者间。丁巳秋，益庵复出所撰《汉书艺文志举例》，索予一言。余谓益庵之书，精矣，密矣，其示后人以史法者备矣。其书本为后之修史志、编目录者言，故所举各例，不憚纤悉。然如称出入，称省诸例，乃洞见刘略与班《志》之异同，自来读《汉志》者，均未讼言及此，窃叹世之善读书者，殆未有过于益庵者也。

顾曩读《汉志》有未达者数事，今略举之：班《志》全用《七略》，即以中秘书目为国史书目然中秘之书，亦有不入《汉志》者，如六艺类《尚书》有古文经四十六卷，《礼》有古经五十六卷，《春秋》有古经十二篇，《论语》有古二十一篇，《孝经》有古孔氏一篇，皆冠于诸家经之首，惟《易》无古文经。然《志》言刘向以中古文《易经》校施、孟、梁邱经，或脱去无咎悔亡，惟费氏经与古文同。是中书确有《易》古文经，而《志》仅录施、孟、梁邱三家经各十二篇，与《书》、《礼》、《春秋》异例，此未达者一也。又别录《七略》，颇有异同。《志》称刘向校书，每一书已，辄条其篇目，录而奏之。

今世所传《战国策》、《晏子》、《荀子》、《列子》、《管子》，皆有刘向所撰录各一篇，《山海经》有刘歆所撰录一篇（世所传《关尹子》、《子华子》、《于陵子》，皆有刘向所撰录，《邓析子》有刘歆所撰录，均伪），所谓《别录》是也。其略出之目，乃谓之略，是录与略本不应有异同，录、略与《汉志》亦不应有异同，乃《别录》称《礼记》四十九篇（《经典释文·叙录》及《乐记正义》引），又称古文记二百四篇（亦《经典释文·叙录》）而《志》但著录《记》百三十一篇。又《山海经》录称定为十八篇，而《志》仅有十三篇，是录、略篇数互异。又王逸《楚辞章句·序》云刘向典校经书，分《楚辞》为十六卷。”

旧本《楚辞》，亦题护左都水使者光禄大夫臣刘向集，校书郎中臣王逸章句。此当是王逸旧题。逸去刘向未远，语当可信。乃《汉》《志》无《楚辞》，并无景差、东方朔赋。《东方朔传》述刘向所录朔书，亦无《七谏》，此未达者二也。据此书所举出入及省二例，知班《志》于刘《略》稍有增损。于其所入者，如《司马法》、《蹴鞠》二书，不过出此入彼。至书家之刘向《稽疑》一篇，小学家之扬雄《杜林》三篇，儒家之扬雄所序三十八篇，赋家之扬雄八篇，皆班氏所新入也。然班氏所见《七略》未录之书，固不止此。如《律历志》之刘歆《钟律书》及《三统历》，《天文志》之《甘氏经》、《石氏经》、《夏氏日月传星传》，《五行志》之刘歆《洪范五行传》，皆班氏修书时所据者也。叔孙通《汉仪》十一篇，又班氏所上者也。既有新入之例，而此诸书独不入，此未达者三也。此三疑者，盖久蓄于余心

，求之此书所举例中，亦未得其说。既读此书，爰举以相质，以益庵之善于读书，必有以发千载之覆也。

丁巳八月。

聚珍本戴校《水经注》跋

壬戌春，余于乌程蒋氏传书堂见《永乐大典》四册，全载《水经注》河水至丹水二十卷之文，因思戴校聚珍板本出于大典，乃亟取以校戴本，颇怪戴本胜处，全出大典本外；而大典本胜处，戴校未能尽之。疑东原之言不实。思欲取全、赵二家本一校戴本，未暇也。既而嘉兴沈乙庵先生以明黄省曾刊本，属余录大典本异同，则又知大典本与黄本相近。

先生复劝余一校朱、王、孙本以备旧本异同，亦未暇也。癸亥入都，始得朱、王、孙本，复假江安傅氏所藏宋刊残本十一卷半，孙潜夫手校残本十五卷，校于朱本上；又校得吴琯《古今逸史》本，于是明以前旧本沿裾，得窥崖略。乃复取全、赵二家书，并取赵氏笺刊误所引诸家校本以校戴本，乃更恍然于三四百年诸家厘订之勤。盖《水经注》之有善本，非一人之力也；更正错简，则明有朱、王、孙，国朝有孙潜夫、黄子鸿、胡东樵，厘订经注，则明有冯开之，国朝有全谢山、赵东潜；摭补逸文，则有全、赵二氏；考证史事，则有朱、王、孙、何义门、沈绎旃；校定文字，则吴、朱、孙、沈、全、赵诸家，皆有不可没之功。戴东原氏成书最后，遂奄有诸家之胜，而其书又最先出，故谓酈书之有善本自戴氏始，可也。

戴氏自刊酈注经，始于乾隆三十七年（见孙荭谷序），而告成则在其身后，所校官本刊于乾隆三十九年，逮五十九年赵氏书出，戴氏弟子段懋堂氏讶其与戴书同也。于是有致梁曜北二书，疑梁氏兄弟校刊赵书时，乃戴改赵。道光甲辰，张石舟（穆）得谢山乡人王艘轩（梓材）所传钞全氏七校本，乃谓戴、赵皆袭全氏，而于戴书攻击尤力。至光绪中叶，薛叔耘刊全氏书于宁波，于是戴氏窃书之案，几成定讞。然全校本初刊时，校勘者已谓王梓材重录本，往往据戴改全，林晋霞（颐山）尤致不满，至诋为贗造。于是长沙王氏合校本，遂不取全本一字。

然薛氏所刊全本，实取诸卢氏、林氏所藏黏缀底本及殷氏所藏清本，非专据王梓材本，未可以其晚出而疑之也。余曩以大典本半部、校戴校聚珍本，始知戴校并不据大典本，足证石舟之说（惟石舟谓《提要》所云脱简有自数十字至四百余字，此又《大典》绝无之事。今案卷十八渭水注中脱简一叶四百余字，《大典》实有之。张氏此说未谛）。又以孙潜夫校本及全、赵二本校之，知戴氏得见全、赵二家书之说，盖不尽诬。何以知之？赵氏本书，即曰梁处素兄弟据戴改之矣，然其朱笺刊误中所引之全说，戴氏何以多与之合也？全氏之书，即曰王艘轩据戴改之矣。然全校本语及所引赵氏校语，戴氏又何以多与之合也？

夫书籍之据他书校改者，苟所据之原书同，即令十百人校之，亦无不同，未足以为袭之证据也。至据旧本校改，则非同见此本，不能同用此字，如柳大中本、孙潜夫本，谢山见于扬州马氏者，东潜则见谢山传校本，渭水注中脱简一叶，全、赵据柳、孙二本补之，戴氏自言据《大典》补之，今《大典》原本具在，戴氏所补，乃不

同于《大典》本而反同于全、赵本，谓非见全、赵之书不可矣。考全氏书未入四库馆，赵氏书之得著录《四库》，当在东原身后（戴校本屡云，此注内之小注与全氏说同，而赵书《题要》则驳此说，故知此篇非出东原手），而其书之入四库馆，则远在其前。案浙江采集《遗书总目》，成于乾隆三十九年，其凡例内载浙江进书凡十二次，前十次所进书目，通编为甲乙至壬癸十集，而第十一第十二次所进者则编为闰集。今考赵氏《水经注释》及沈释《旃水经注集释订讹》，其目均在戊集中，则必为第十次以前所进书，亦必前乎三十九年矣。而东原入馆在三十八年之秋，其校《水经注》成在三十九年之冬，当时必见赵书无疑。

然余疑东原见赵氏书，尚在乾隆戊子（三十五年）修《直隶河渠书》时，东原修此书，实承东潜之后，当时物力丰盛，赵氏《河渠书稿》百三十卷，戴氏《河渠书稿》百十卷，并有数写本。又赵校《水经注》，全氏双韭山房录有二部，则全氏校本，赵氏亦必有之。《水经注》为纂《河渠书》时第一要书，故全、赵二校本，局中必有写本无疑。东原见之，自必在此时矣；至厘定经注，戴氏是否本诸全、赵，殊不易定。据段氏所撰《东原年谱》，自定《水经》一卷系于乾隆三十年乙酉，段刊《东原文集·书水经注后》一篇，亦署乙酉秋八月。此篇虽不见于孔氏刊本，然段氏刊文集及年谱，均在乾隆壬子（五十七年）。其时赵书未出，赵、戴相袭之论未起也，则所署年月自尚可信，而东原撰官本《提要》，所举厘定经注条例三则，至简至赅，较之全、赵二家说尤为亲切（全说见《五校本题辞》，赵说谨附见于朱笺刊误卷末），则东原于此事，似非全出因袭。且金宇文虚中、蔡正甫、明冯开之已发此论，固不必见全、赵书而始为之也。余颇疑东原既发见此事，遂以酈书为己一家之学，后见全、赵书与己同，不以为助，而反以为仇，故于其校定酈书也，为得此书善本计，不能不尽采全、赵之说；而对于其人其书，必泯其迹而后快。于是尽以诸本之美归诸大典本，尽掠诸家厘定之功以为己功。

其弟子辈过尊其师，复以意气为之辩护，忿戾之气相召，遂来张石舟辈窃书之讥，亦有以自取之也。东原学问才力，固自横绝一世，然自视过高，骛名亦甚，其一生心力专注于声音训诂名物象数，而于六经大义所得颇浅，晚年欲夺朱子之席，乃撰《孟子字义疏证》等书，虽自谓欲以孔孟之说还之孔孟，宋儒之说还之宋儒，顾其书虽力与程朱异，而亦未尝与孔孟合。其著他书，亦往往述其所自得而不肯言其所自出，其平生学术出于江慎修，故其古韵之学根于等韵，象数之学根于西法，与江氏同；而不肯公言等韵、西法，与江氏异，其于江氏亦未尝笃在三之谊，但呼之曰婺源老儒江慎修而已。其治酈书也亦然。黄、胡、全、赵诸家之说，戴氏虽尽取之，而气矜之隆，雅不欲称述诸氏，是固官书体例宜然。然其自刊之本，亦同官本，则不可解也。又戴书简严，例不称引他说，然于序录中亦不著一语，则尤不可解也。以视东潜之祖述谢山，谢山之于东潜称道不绝口者，其雅量高致，固无间矣。

由此气矜之过，不独厚诬大典本，抹杀诸家本，如张石舟之所讥，且有私改《大典》，假托他本之迹。如蒋氏所藏大典本第一卷，有涂改四处；河水一“遐记绵邈”

，“遐邈”二字中惟二偏旁系大典原本，“段貌”二文皆系刮补，乃从朱、王、孙笺（今官本作经记绵褓，当是再改之本）。又“令河不道利”，“令”字大典作“今”，乃从全、赵二本改今字下半作令。“天魔波旬”，大典与诸本同，乃改“天”字首笔作“夭”，以实其校语中“夭”“妖”字通之说。河水二“自析支以西，滨于河首，左右居也”，大典与诸本同作“在右居也”，乃从全、赵二本改“在”字为“左”，（全、赵从孙潜夫校），盖戴校既托诸大典本，复虑后人据《大典》以驳之也，乃私改《大典》原本以实其说。其仅改卷首四处者，当以其不胜改而中止也，此汉人私改兰台漆书之故智，不谓东原乃复为之。又戴氏官本校语，除朱本及所谓近刻外，从未一引他本，独于卷三十一、卷三十二、卷四十中，五引归有光本。今核此五条，均与全赵本同，且归氏本久佚，惟赵清常、何义门见之，全氏曾见赵、何校本，于此五条并不著归本如此。孙潜夫传校赵本，其卷四十尚存，亦不言归本有此异同。

以东原之厚诬《大典》观之，则所引归本，疑亦伪托也。凡此等学问上可忌可耻之事，东原胥为之而不顾，则皆由气矜之一念误之。至于掩他人之书以为己有，则实非其本意，而其迹则与之相等。平生尚论古人，雅不欲因学问之事，伤及其人之品格，然东原此书方法之错误，实与其性格相关，故纵论及之，以为学者戒。当知学问之事，无往而不当用其忠实也。

甲子二月。

殷卜辞中所见先公先王考☆

甲寅岁莫，上虞罗叔言参事撰《殷墟书契考释》，始于卜辞中发现“王亥”之名。嗣余读《山海经》、《竹书纪年》，乃知王亥为殷之先公，并与《世本·作篇》之胲、《帝系篇》之核、《楚辞·天问》之该、《吕氏春秋》之王冰、《史记·殷本纪》及《三代世表》之振、《汉书·古今人表》之垓，实系一人。尝以此语参事及日本内藤博士（虎次郎）参事，复博搜甲骨中之纪王亥事者，得七八条，载之《殷墟书契后编》。博士亦采余说，旁加考证，作《王亥》一篇，载诸《艺文杂志》，并谓“自契以降诸先公之名，苟后此尚得于卜辞中发现之，则有裨于古史学者当尤巨”。余感博士言，乃复就卜辞有所攻究，复于王亥之外得“王恒”一人。

案《楚辞·天问》云“该秉季德，厥父是臧。”又云“恒秉季德。”王亥即该，则王恒即恒，而卜辞之季之即冥（罗参事说），至是始得其证矣。又观卜辞中数十见之田字，从甲在口中（十，古甲字），及通观诸卜辞而知田即上甲微。于是参事前疑卜辞之、屈（即乙、丙、丁三字之在[或]中者，与田字甲在口中同意即报乙、报丙、报丁者，至是亦得其证矣。又卜辞自上甲以降皆称曰“示”，则参事谓卜辞之示壬、示癸即主壬、主癸，亦信而有徵。

又观卜辞王恒之祀与王亥同，太丁之祀与太乙、太甲同，孝己之祀与祖庚同，知商人兄弟，无论长幼与已立未立，其名号典礼盖无差别。于是卜辞中人物，其名与礼皆类先王而史无其人者，

与夫“父甲”、“兄乙”等名称之浩繁求诸帝系而不可通者，至是亦理顺冰释。而《世本》、《史记》之为实录，且得于今日证之。

又卜辞人名中有_字，疑即帝喾之名。又有“土”字或亦相土之略。此二事虽未遽定，然容有可证明之日。由是有商一代先公先王之名，不见于卜辞者殆鲜。乃为此考，以质诸博士及参事，并使世人知殷墟遗物之有裨于经史二学者有如斯也。丁巳二月。

矣

卜辞有I字，其文曰“贞，灸（：古燎字：）于（《殷墟书契前编》卷六第十八叶h又曰“灸于誉，□牢，，（：同上h又曰“灸于参，六牛，，（：同上，卷七第二十叶：）。又曰“于彡，牛六”，又曰“贞，求年于令、，九牛，，（：两见，以上皆罗氏拓本：）。又曰“（：上阙：）又于I”（《殷墟书契后编》卷上第十四叶：）。案二形，象人首手足之形。《说文》戈部·，贪兽也。一曰母猴似人。从更·已、止、戈，其手足。”毛公鼎“我弗作先王羞”之羞作。克鼎“柔远能战”之柔作_，番生敦作f，而《博古图》、薛氏《款》盟和钟之“柔燮百邦”、晋姜鼎之“

用康柔绥怀远廷”，“柔”并作1，皆是字也。夔、羞、柔三字古音同部，故互相通借。此称“高祖夔”，案卜辞惟王亥称“高祖王亥”，《后编》卷上第廿二叶），或“高祖亥”，《戡寿堂所藏殷虚文字》第一叶），大乙称“高祖乙”，《后编》卷上第三叶），则夔必为殷先祖之最显赫者。以声类求之，盖即帝啻也。帝啻之名，已见《逸书》《书序》：“自契至于成汤八迁。汤始居亳，从先王居，作帝告。”《史记·殷本纪》“告”作“诰”，《索隐》曰“一作估”。案《史记·三代世表》、《封禅书》、《管子·侈靡篇》皆以“估”为“啻”，伪《孔传》亦云：“契父帝啻都亳，汤自商丘迁亳，散曰‘从先王居’。若《书序》之说可信，则帝啻之名已见商初之书矣。诸书作啻或估者，与夔字声相近，其或作矣者，则又夔字之讹也。

《史记·五帝本纪》《索隐》引皇甫谧曰“帝啻名矣”，《初学记》九引《帝王世纪》曰“帝啻生而神灵，自言其名曰矣”，《太平御览》八十引作“邃”，《史记正义》引作“岌”，邃为异文，岌则讹字也。《山海经》屡称“帝俊，凡十二见”。郭璞注于《大荒西经》“帝俊生后稷”下云“，俊，宜为，啻，。”余皆以为“帝舜”之假借。然《大荒东经》曰“帝俊生仲容”，《南经》曰“帝俊生季厘”，是即《左氏传》之“仲熊、季狸”，所谓“高辛氏之才子”也。《海内经》曰“帝俊有子八人，实始为歌舞”，即《左氏传》所谓“有才子八人”也。《大荒西经》“帝俊妻常羲生月十有二”，又传记所云“帝啻次妃啖訾氏女曰常仪，生帝摯者也”，案《诗·大雅·生民》疏引《大戴礼·帝系篇》曰：帝啻下妃啖訾之女曰常仪，生摯。《家语》、《世本》其文亦然，《檀弓正义》引同，而作“啖氏之女曰常宜”。然今本《大戴礼》及《艺文类聚》十五、《太子御览》一百三十五所引《世本》，但云“次妃曰啖訾氏，产帝摯”，无“日常仪”三字。以上文“有郤氏之女曰姜嫄”，“有娥氏之女曰简狄”例之，当有“日常仪”三字）。三占从二，知郭璞以帝俊为帝舜，不如皇甫以矣为帝啻名之当矣。《祭法》“殷人禘啻”，《论语》作“殷人禘舜”，舜亦当作矣。啻为契父，为商人所自出之帝，故商人禘之。卜辞称高祖夔，乃与王亥、大乙同称，疑非啻不足以当之矣。

相土

殷虚卜辞有立字，其文曰“贞，1于立，三小牢，卯一牛”（《书契前编》

卷一第二十四叶，又重见卷七第二十五叶：），又曰“贞，求年于立，九牛”（：《铁云藏龟》第二百十六叶：），又曰“贞4灸于立”（：同上，第二百二十八叶：），又曰“贞，于立求”（：《前编》卷五第一叶：）。立即“土”字。孟鼎“受民受疆土”之土作i，卜辞用刀契，不能作肥笔，故空其中作立，犹灸之作冬、-之作a矣。土疑即相土。《史记·殷本纪》契卒。子昭明立；昭明卒。子相土立。”相土之字，《诗·商颂》、《春秋左氏传》、《世本·帝系篇》皆作土，而《周礼·校人》注引《世本·作篇》相土作乘马”作“土，杨倝《荀子注》引《世本》此条作土），而《荀子·解蔽篇》曰“乘杜作乘马”，《吕览·勿躬篇》曰“乘雅作驾”，注：“雅，一作持。”持、杜声相近，贝r土”是“土”非。杨倝注《荀子》曰

：“以其作乘马，故谓之，乘杜，。”是“乘”本非名，相土或单名“土”，又假用“杜”也。然则卜辞之立，当即相土。曩以卜辞有盍立（《前编》卷四第十七叶）。字即“邦社”，假“土”为“社”，疑诸“土”字皆“社”之假借字。今观卜辞中殷之先公有季、有王亥、有王恒，又自上甲至于主癸，无一不见于卜辞，则此土亦当为相土，而非社矣。

季

卜辞人名中又有季，其文曰“辛亥卜口贞，季口求王，《前编》卷五第四十叶两见），又曰“癸巳卜之于季，同上，卷七第四十一叶），又曰“贞之于季，《后编》卷上第九叶）。季亦殷之先公，即冥是也。《楚辞：天问》曰“该秉季德，厥父是臧”，又曰“恒秉季德”，则该与恒皆季之子，该即王亥，恒即王恒，皆见于卜辞。则卜辞之季，亦当是王亥之父冥矣。

王亥

卜辞多记祭王亥事。《殷虚书契前编》有二事，曰“贞，i于王亥”（：卷一第四十九叶：），曰“贞，之于王亥，咍牛，辛亥用”（：卷四第八叶：）《后编》中又有七事，曰“贞，于王亥求年”（：卷上第一页：），曰“乙巳卜□贞之于王亥十”（：下阙。同上，第十二叶：）。曰“贞，i于王亥”（：同上，第十九页：），曰“

于王亥”（：同上，第二十三叶：）。曰“癸卯，□贞，□□高祖王亥□□□”（：同上，第二十一叶：）。曰“甲辰卜，□贞，来辛亥I于王亥，咍牛，十二月”（同上，第二十三叶）。曰“贞，登王亥羊”（同上，第二十六叶）。曰“贞，之于王亥，□三百牛”（同上，第二十八叶）。《龟甲兽骨文字》有一事，曰“贞，簋于王亥，五牛”（：卷一第九叶：）。观其祭日用辛亥，其牲用五牛、三十牛、四十牛、乃至三百牛，乃祭礼之最隆者，必为商之先王先公无疑。案《史记·殷本纪》及《三代世表》商先祖中无“王亥”，惟云：“冥卒，子振立。振卒，子微立。”《索隐》振，《系本》作核。”《汉书·古今人表》作垓。然则《史记》之振，当为“核”或为“垓”字之误也。《大荒东经》曰：“有困民国，句姓而食，有人曰王亥，两手操鸟，方食其头，王亥托于有易河伯仆牛，有易杀王亥，取仆牛。”郭璞注引《竹书》曰：“殷王子亥，宾于有易而淫焉，有易之君绵臣杀而放之。是故殷主甲微假师于河伯以伐有易，克之，遂杀其君绵臣也。”（此《竹书纪年》真本，郭氏隐括之如此）今本《竹书纪年》帝泄十二年，殷侯子亥宾于有易，有易杀而放之。十六年，殷侯微以河伯之师伐有易，杀其君绵臣。”是《山海经》之王亥，古本《纪年》作殷王子亥，今本作殷侯子亥。又前于上甲微者一世，则为殷之先祖冥之子、微之父无疑。卜辞作王亥，正与《山海经》同。又祭王亥皆以亥日，则亥乃其正字。

《世本》作“核”，《古今人表》作“垓”，皆其通假字。《史记》作振，则因与

核或垓二字形近而讹。夫《山海经》一书，其文不雅驯，其中人物，世亦以子虚乌有视之。《纪年》一书，亦非可尽信者，而王亥之名，竟于卜辞见之，其事虽未必尽然，而其人则确非虚构。可知古代传说存于周秦之间者，非绝无根据也。

按：“之”字原文作，乃祭名。旧释“之”字，误，下第二十八页一条同。

王亥之名及其事迹，非徒见于《山海经》、《竹书》，周秦间人著书多能道之。《吕览·勿躬篇》王冰作服牛。”案篆文冰作,与亥字相似.王亦王亥之讹。《世本·作篇》：“胲作服牛。”，《初学记》卷二十九引。又《御览》八百九十九引《世本》：“鯀作服牛。”鯀亦胲之讹。《路史》注引《世本》胲为黄帝马医，常医龙。”疑引宋衷注。《御览》引宋注曰“胲，黄帝臣也，能驾牛”，又云“少昊时人，始驾牛”，皆汉人说，不足据。实则《作篇》之胲，即《帝系篇》之核也）其证也。服牛者，即《大荒东经》之“仆牛”。古“服”、“仆”同音。《楚辞·天问》：“该秉季德，厥父是臧，胡终弊于有扈，牧夫牛羊。”又曰：恒秉季德，焉得夫朴牛。”“该”即“胲”，“有扈”即“有易”（说见下），“朴牛”亦即“服牛”，是《山海经》、《天问》、《吕览》、《世本》，皆以王亥为始作服牛之人。盖夏初奚仲作车，或尚以人挽之。至相土作乘马，王亥作服牛，而车之用益广。《管子·轻重戊》云：殷人之王，立帛牢，服牛马，以为民利，而天下化之。”盖古之有天下者，其先皆有大功德于天下。禹抑洪水，稷降嘉种，爰启夏、周。商之相土、王亥，盖亦其俦。然则王亥祀典之隆，亦以其为制作之圣人，非徒以其为先祖。周秦间王亥之传说，胥由是起也。

卜辞言王亥者九，其二有祭日，皆以辛亥，与祭大乙用乙日、祭大甲用甲日同例。是王亥确为殷人以辰为名之始，犹上甲微之为以日为名之始也。然观殷人之名，即不用日辰者，亦取于时为多。自契以下，若“昭明”、若“昌若”、若“冥”，皆含朝莫明晦之意，而王恒之名亦取象于月弦。是以时为名或号者，乃殷俗也。夏后氏以日为名者，有孔甲，有履癸。要在王亥及上甲之后矣。

王恒

卜辞人名，于王亥外，又有王。其文曰：“贞，之于王。”（《铁云藏龟》第一百九十九叶，及《书契后编》卷上第九叶：）又曰：“贞，之于王。”（《后编》卷下第七叶：）又作王，曰：“贞，王。”（：下阙。《前编》卷七第十一叶：）案字即恒字。《说文解字》二部：“愼，常也。从心，从舟，在二之间，上下心以舟施，恒也。还，古文很，从月。《诗》曰：“如月之恒，案许君既云古文慢从月，复引《诗》以释从月之意，而今本古文乃作还，从二，从古文外，盖传写之讹，字当作。又《说文》木部，“榧，竟也。从木，

十蚤声。夏，古文”。案古从月之字，后或变而从舟。殷虚卜辞“朝莫”之“朝

”作H（《后编》卷下第三页：），从日月在踰间，与莫字从日在踰间同意。而篆文作蘇，不从月而从舟。以此例之，2本当作逗。《曾鼎》有𠂔字，从心从逗，与篆文之慢从基者同，即愤之初字，可知互、(r)一字。卜辞I字从二从（J）（：卜辞月字或作D，或作0），其为基、至二字，或恒字之省无疑。其作者《诗·小雅》如月之恒。”毛传恒弦也。”弦本弓上物，故字又从弓。然则二字确为恒字。王恒之为殷先祖，惟见于《楚辞·天问》。《天问》自“简狄在台啻何宜”以下二十韵，皆述商事（前夏事，后周事）。其问王亥以下数世事曰：“该秉季德，厥父是臧，胡终弊于有扈，牧夫牛羊？干协时舞，何以怀之？平胁曼肤，何以肥之？有扈牧竖，云何而逢？击床先出，其命何从？恒秉季德，焉得夫朴牛？何往营班祿，不但还来？昏微遵迹，有狄不宁，何繁鸟萃棘，贞子肆情？眩弟并淫，危害厥兄，何变化以作诈，后嗣而逢长？”此十二韵以《大荒东经》及郭注所引《竹书》参证之，实纪王亥、王恒及上甲微三世之事。而《山海经》、《竹书》之“有易”，《天问》作“有扈”，乃字之误。盖后人多见有扈，少见有易，又同是夏时事，故改易为扈。下文又云：“昏微遵迹，有狄不宁”，昏微即上甲微，有狄亦即有易也。古狄、易二字同音，故互相通假。《说文解字·定部》“逖”之古文作“遡”。《书·牧誓》逖矣西土之人。”《尔雅》郭注引作“遡矣西土之人”。《书·多士》离逖尔土”。《诗·大雅》用遡蛮方。”《鲁颂》：“狄彼东南。”毕狄钟：“毕狄不龚。”此逖、遡、狄三字异文同义，《史记·殷本纪》之简狄，《索隐》曰：“旧本作，易，。”《汉书·古今人表》作“简遡”。《白虎通·礼乐篇》狄者，易也。”是古狄、易二字通，“有狄”即“有易”。上甲遵迹而有易不宁，是王亥弊于有易，非弊于有扈，故曰扈当为易字之误也。狄、易二字，不知孰正孰借，其国当在大河之北，或在易水左右（孙氏之騄说）。盖商之先，自冥治河，王亥迁殷（今本《竹书纪年》：帝芒三十三年，商侯迁于殷。其时商侯即王亥也。《山海经》注所引真本《竹书》亦称王亥为“殷王子亥”，称“殷”不称“商”，则今本《纪年》此条，古本想亦有之。殷在河北，非亳殷。见余撰《三代地理小纪》）。已由商邱越大河而北，故游牧于有易高爽之地，服牛之利，即发见于此。有易之人乃杀王亥，取服牛。所谓“胡终弊于有扈，牧夫牛羊”者也。其云“有扈牧竖，云何而逢，击床先出，其命何从”者，似记王亥被杀之事。其云“恒秉季德，焉得夫朴牛”者，恒盖该弟，与该同秉季德，复得该所失服牛也。所云“昏微遵迹，有狄不宁”者，谓上甲微能率循其先人之迹，有易与之有杀父之仇，故为之不宁也。“繁鸟萃棘”以下，当亦记上甲事，书阙有间，不敢妄为之说。然非如王逸《章句》所说解居父及象事，固自显然。要之，《天问》所说，当与《山海经》及《竹书纪年》同出一源。而《天问》就壁画发问，所记尤详。恒之一人，并为诸书所未载。卜辞之王恒与王亥，同以王称，其时代自当相接。而《天问》之该与恒，适与之相当。前后所陈，又皆商家故事，则中间十二韵自系述王亥、王恒、上甲微三世之事。然则王亥与上甲微之间，又当有王恒一世，以《世本》、《史记》所未载，《山海经》、《竹书》所不详，而今于卜辞得之。《天问》之辞，千古不能通其说者，而今由卜辞通之，此治史学与文学者所当同声称快者也。

上甲

《鲁语》：“上甲微能帅契者也，商人报焉。”是商人祭上甲微，而卜辞不见上甲。郭璞《大荒东经》注引《竹书》作“主甲微”，而卜辞亦不见主甲。余由卜辞有[！、屈、3]三人名，其乙、丙、丁三字皆在（或：：中，而悟卜辞中凡数十见之田（或作(c)：），即上甲也。卜辞中凡田狩之田字，其口中横直二笔皆与其四旁相接，而人名之田，则其中横直二笔或其直笔必与四旁不接，与田字区别较然。田中十字，即古甲字（卜辞与古金文皆同）。甲在口中，与之乙、丙、丁三字在（或）中同意，亦有口中横直二笔与四旁接而与田狩字无别者，则上加“一”作田，以别之。上加一者，古六书中指事之法，一在田上，与二字（古文上字）之一在一上同意，去上甲之义尤近。细观卜辞中记田或(c)者数十条，亦惟上甲微始足当之。卜辞中云“自田（或作函）至于多后衣”者五（：《书契前编》卷二第二十五叶三见，又卷三第二十七叶、《后编》卷上第二十叶各一见：），其断片云“自田至于多后”者三（《前编》卷二第二十五叶两见，又卷三第二十八叶一见），云“自田至于武乙衣”者一（《后编》卷上第二十叶：）。“衣”者，古殷祭之名。又卜辞曰“丁卯贞，来，乙亥告自田”（：《后编》卷上第二十八叶：），又曰“乙亥卜，宾贞，口大御自田”（：同上，卷下第六叶），又曰“（：上阙）贞：翌甲口舆自田”（：同上，第三十四叶：）。凡祭告皆曰“自田”，是田实居先公先王之首也。又曰“辛巳卜，大贞，之自田元示三牛，二示一牛，十三月”（：《前编》卷三第二十二叶：），又云“乙未贞，其求自田，十又三示牛，小示羊”（《后编》卷上第二十八叶）。是田为元示及十有三示之首。殷之先公称“示”“主壬”、“主癸”，卜辞称“示壬”、“示癸”，则田又居先公之首也。商之先人王亥，始以辰名，上甲以降，皆以日名，是商人数先公当自上甲始，且田之为上甲，又有可征证者。殷之祭先，率以其所名之日祭之。祭名甲者，用甲日；祭名乙者，用乙日，此卜辞之通例也。今卜辞中凡专祭田者皆用甲日，如曰“在三月甲子口祭苗”（：《前编》卷四第十八叶：），又曰“在十月又一（即十有一月：）甲申口彤祭田”（：《后编》卷下第二十叶：），又曰“癸卯卜，翌，甲辰之田牛，吉”（：同上，第二十七叶：），又曰“甲辰卜，贞，来，甲寅又伐田，羊五，卯牛一”（：同上，第二十一叶：）。此四事，祭田有日者，皆用甲日。又云“在正月□□（：此二字阙：）祭大甲、啻、(r)”（：同上，第二十一叶：），此条虽无祭日，然与大甲同日祭，则亦用甲日矣。即与诸先王先公合祭时，其有日可考者，亦用甲日。如曰“贞，翌甲口鬯自田”（：同上），又曰“癸巳卜，贞，彤彤日自(c)至于多后衣，亡它，自口，在四月，惟王二祀”（：《前编》卷三第二十七叶：），又曰“癸卯王卜，贞，彤翌日自(r)至多后衣，亡它，在口，在九月，惟王五祀，《后编》卷上第二十叶）。此二条以癸巳及癸卯卜，则其所云之“彤日”、“翌日”，皆甲日也。是故田之名甲，可以祭日用甲证之。田字为十（：古甲字：），在口中，可以三名乙、丙、丁在（中证之。而此甲之即上甲，又可以其居先公先王之首证之。此说虽若穿凿，然恐殷人复起，亦无易之矣。《鲁语》称商人“报上甲微”，《孔丛子》引《逸书》“惟高宗报上甲微”（此魏晋间伪书之未采人梅本者。今本《竹书纪年》武丁十二年报

祀上甲微，即本诸此），报者，盖非常祭。今卜辞于上甲有合祭、有专祭，皆常祭也。又商人于先公皆祭，非独上甲，可知周人言殷礼已多失实，此孔子所以有文献不足之叹与！

报丁报丙报乙

自上甲至汤，《史记·殷本纪》、《三代世表》、《汉书·古今人表》有报丁、报丙、报乙、主壬、主癸五世，盖皆出于《世本》。案卜辞有三人，其文曰“乙丑卜，口贞，王宾g祭”（：下阙，见《书契后编》卷上第八叶，又断片二：），又曰“丙申卜，旅贞，王宾屈口亡囙”（：同上：），又曰“丁亥卜，贞，王宾目彤日亡口”（：同上：）。其乙、丙、丁三字皆在（或：]中，又称之曰“王宾”，与他先王同。罗参事疑即报乙、报丙、报丁，而苦无以证之。余案参事说是也。卜辞又有一条曰“丁酉彤兹（中阙：）围三、3三、示（中阙：）大丁十、大”（下阙，见《后编》卷上第八叶），此文残缺，然“示”字下所阙，当为“壬”字，又自报丁经示壬。示癸、大乙而后及大丁、大甲，则其下又当阙“示癸”、“大乙”诸字。又所谓“画三、3三、大丁十”者，当谓牲牢之数。据此则H、3在大丁之前，又在示壬、示癸之前，非报丙、报丁奚属矣。囿、3既为报丙、报丁，则g亦当即报乙。惟卜辞翹、3之后即继以示字，盖谓示壬，殆以區、冎、3为次，与《史记》诸书不合。然何必《史记》诸书是而卜辞非乎？又报乙、报丙、报丁称报者，殆亦取“报上甲微”之报以为义，自是后世追号，非殷人本称。当时但称（！、画、3而已。上甲之甲字在口中，报乙、报丙、报丁之乙、丙、丁三字在（或II中，自是一例，意坛墀或郊宗石室之制，殷人已有行之者与？

主壬主癸

卜辞屡见示壬、示癸，罗参事谓即《史记》之主壬、主癸，其说至确，而证之至难。今既知田为上甲，则示壬、示癸之即主壬、主癸亦可证之。卜辞曰：“辛巳卜，大贞，之自田元示三牛，二示一牛”（《前编》卷三第二十二叶：），又曰“乙未贞，其求自田十又三示牛，小示羊”（：《后编》卷上第二十八叶）。是自上甲以降，均谓之“示”，则主壬、主癸宜称示壬、示癸。又卜辞有示丁（《殷虚书契菁华》第九叶），盖亦即报丁。报丁既作3.又作示丁.则自上甲至示癸，皆卜辞所谓元示也。又卜辞称自田十有三示，而《史记》诸书自上甲至主癸，历六世，而仅得六君，疑其问当有兄弟相及而史失其名者：如王亥与王恒疑亦兄弟相及，而《史记》诸书皆不载。盖商之先公，其世数虽传而君数已不可考。又商人于先王、先公之未立者，祀之与已立者同（见后），故多至十有三示也。

大乙

汤名天乙，见于《世本》（《书·汤誓》释文引）及《荀子·成相》篇，而《史记》

》仍之。卜辞有大乙，无天乙，罗参事谓天乙为大乙之讹。观于大戊，卜辞亦作天戊（《前编》卷四第二十六叶）。卜辞之“大邑商”，《周书·多士》作“天邑商”。盖天、大二字形近，故互讹也。且商初叶诸帝，如大丁，如大甲，如大庚，如大戊，皆冠以“大”字，则汤自当称“大乙”。又卜辞曰“癸巳贞，又于伊，其口大乙彤日”（：《后编》卷上第二十二叶：），又曰“癸酉卜，贞，大乙伊其，下阙，见同上），伊即伊尹，以大乙与伊尹并言，尤大乙即天乙之证矣。

唐

卜辞又屡见“唐”字，亦人名。其一条有唐、大丁、大甲三人相连，而下文不具（《铁云藏龟》第二百十四叶）。又一骨上有卜辞三：一曰“贞于唐，告晶方”，二曰“贞于大甲，告”，三曰“贞于大丁，告基”（：《书契后编》卷上第二十九叶）。三辞在一骨上，自系一时所卜。据此，则唐与大丁、大甲连文，而又居其首，疑即汤也。《说文》口部“嚶，古文唐，从口、易。”与湯字形相近。《博古图》所载齐侯匜钟铭曰名SL成唐，有严在帝所，享受天命。”又曰：“奄有九州，处禹之都。”夫受天命，有九州，非成汤其孰能当之？《太平御览》八十二及九百一十二引《归藏》曰：“昔者桀筮伐唐，而枚占荧惑，曰不吉。”《博物志》六亦云“案，唐，亦即汤也”。卜辞之唐，必汤之本字，后转作暘，遂通作汤。然卜辞于汤之专祭必曰“王宾大乙”，惟告祭等乃称“唐”，未知其故。

羊甲

卜辞有“羊甲”无“阳甲”，罗参事证以古“乐阳”作“乐羊”、“欧阳”作“欧羊”，谓“羊甲”即“阳甲”。今案卜辞有“曰南庚，曰羊甲”六字（《前编》卷上第四十二叶），羊甲在南庚之次，则其即阳甲审矣。

祖某父某兄某

有商一代二十九帝！，其未见卜辞者，仲壬、沃丁、雍己、河亶甲、沃甲、廩辛、帝乙、帝辛八帝也。而卜辞出于殷墟，乃自盘庚至帝乙时所刻辞。自当无帝乙、帝辛之名。则名不见于卜辞者，于二十七帝中实六帝耳。又卜辞中人名，若&甲（：《前编》卷一第十六叶，《后编》卷上第八叶：）、若祖丙（《前编》卷一第二十二叶：），若小丁（同上：）、若祖戊（同上，第二十三叶）、若祖己（同上）、若中己（《后编》卷上第八叶）、若南壬（《前编》卷一第四十五叶）、若小癸（《龟甲兽骨文字》卷二第廿五叶），其名号与祀之之礼皆与先王同，而史无其人。又卜辞所见父甲、兄乙等人名颇众，求之迁殷以后诸帝之父兄，或无其人。曩颇疑《世本》及《史记》于有商一代帝系不无遗漏。今由种种研究，知卜辞中所未见之诸帝，或名亡而实存。至卜辞所有，而史所无者，与夫父某、兄某等之史无其人以当之者，皆诸帝兄弟之未立而殂者，或诸帝之异名也。试详证之。

在《古史新证》中，已改为三十帝。

一事：商之继统法，以弟及为主，而以子继辅之，无弟然后传子。自汤至于帝辛二十九帝中，以弟继兄者凡十四帝（此据《史记·殷本纪》。若据《三代世表》及《汉书·古今人表》，则得十五帝），其传子者亦多传弟之子，而罕传兄之子，盖周时以嫡庶长幼为贵贱之制，商无有也。故兄弟之中有未立而死者，其祀之也与已立者同。王亥之弟王恒，其立否不可考，而亦在祀典。且卜辞于王亥、王恒外又有王矢（《前编》卷一第三十五叶两见，又卷四第三十三叶及《后编》卷下第四叶各一见），亦在祀典，疑亦王亥兄弟也。又自上甲至于示癸，《史记》仅有六君，而卜辞称自田十有三示，又或称九示、十示，盖亦并诸先公兄弟之立与未立者数之。逮有天下后亦然。《孟子》称大丁未立，今观其祀礼则与大乙、大甲同。卜辞有一节曰“癸酉卜，贞，王宾（此字原夺，以他文例之，此处当有宾字）父丁吁三牛。眾兄己一牛。兄庚□□（此二字残阙，疑亦是，一牛，二字）亡口”（《后编》卷上第十九叶），又曰“癸亥卜，贞，兄庚口眾兄己口，同上，第八叶），又曰“贞，兄庚口，眾兄己其牛，同上）。考商时诸帝中，凡丁之子，无己、庚二人相继在位者，惟武丁之子有孝己（《战国》秦、燕二《策》，《庄子·外物》篇，《荀子·性恶》、《大略》二篇，《汉书·古今人表》均有孝己。《家语·弟子解》云：高宗以后妻杀孝己。”则孝己，武丁子也），有祖庚，有祖甲，则此条乃祖甲时所卜，父丁即武丁，兄己、兄庚即孝己及祖庚也。孝己未立，故不见于《世本》及《史记》，而其祀典乃与祖庚同，然则上所举祖丙、小丁诸人名，与礼视先王无异者，非诸帝之异名，必诸帝兄弟之未立者矣。周初之制，犹与之同。《逸周书：克殷解》曰：“王烈祖太王、太伯、王季、虞公、文王、邑考以列升。”盖周公未制礼以前，殷礼固如斯矣。

二事：卜辞于诸先王本名之外，或称“帝某”，或称“祖某”，或称“父某”、“兄某”。罗参事曰：“有商一代帝王，以甲名者六，以乙名者五，以丁名者六，以庚、辛名者四，以壬名者二，惟以丙及戊、己名者各一。其称大甲、小甲、大乙、小乙、大丁、中丁者，殆后来加之以示别。然在嗣位之君，则径称其父为父甲、其兄为兄乙。当时已自了然。故疑所称父某、兄某者，即大乙以下诸帝矣。”余案参事说是也。非独父某、兄某为然，其云“帝”与“祖”者，亦诸帝之通称。卜辞曰“己卯卜，贞，帝甲□□（中阙二字），其眾祖丁”（《后编》卷上第四叶），案祖丁之前一帝为沃甲，则帝甲即沃甲，非《周语》帝甲乱之之帝甲也。又曰“祖辛一牛，祖甲一牛，祖丁一牛”（同上，第二十六叶），案祖辛、祖丁之间，惟有沃甲，则祖甲亦即沃甲，非武丁之子祖甲也。又曰“甲辰卜，贞，王宾求祖乙、祖丁、祖甲、康祖丁、武乙衣，亡口”（同上，第二十叶），案武乙以前四世为小乙、武丁、祖甲、庚丁（罗参事以庚丁为康丁之讹，是也），则祖乙即小乙，祖丁即武丁，非河亶甲之子祖乙，亦非祖辛之子祖丁也。又此五世中，名丁者有二，故于庚丁（实康丁）云“康祖丁”以别之，否则亦直云“祖”而已。然则商人自大父以上皆称曰“祖”，其不须区别而自明者，不必举其本号，但云“祖某”足矣。即须

加区别时，亦有不举其本号而但以数别之者，如云“口口于三祖庚，《前编》卷一第十九叶），案商诸帝以“庚”名者，大庚弟一，南庚弟二，盘庚弟三，祖庚弟四，则三祖庚即盘庚也。又有称“四祖丁”者（《后编》卷上第三叶，凡三见），案商诸帝以“丁”名者，大丁弟一，沃丁弟二，中丁弟三，祖丁弟四，则四祖丁即《史记》之祖丁也。以名庚者皆可称“祖庚”，名丁者皆可称“祖丁”，故加“三”、“四”等字以别之，否则赘矣。由是推之，则卜辞之祖丙或即外丙，祖戊或即大戊，祖己或即雍己、孝己（此祖己，非《书·高宗彤日》之祖己。卜辞称“卜贞，王宾祖己”，与先王同，而伊尹、巫咸皆无此称，固宜别是一人。且商时云祖某者，皆先王之名，非臣子可袭用，疑《尚书》误），故祖者，大父以上诸先王之通称也。其称“父某”者亦然。父者，父与诸父之通称。卜辞曰“父甲一牡，父庚一牡，父辛一牡，《后编》卷上第二十五叶）。此当为武丁时所卜，父甲、父庚、父辛，即阳甲、盘庚、小辛，皆小乙之兄，而武丁之诸父也（罗参事说）。又卜辞凡单称“父某”者，有父甲（《前编》卷一第二十四叶），有父乙（同上，第二十五及第二十六叶），有父丁（同上，第二十六叶），有父己（同上，第二十七叶及卷三第二十三叶，《后编》卷上第六、第七叶），有父庚（《前编》卷一第二十六及第二十七叶），有父辛（同上，第二十七叶）。今于盘庚以后诸帝之父及诸父中求之，则武丁之于阳甲，庚丁之于祖甲，皆得称父甲；武丁之于小乙，文丁之于武乙，帝辛之于帝乙，皆得称父乙；廪辛、庚丁之于孝己，皆得称父己。余如父庚当为盘庚或祖庚，父辛当为小辛或廪辛，他皆放此。其称“兄某”者亦然。案卜辞云“兄某”者，有兄甲（《前编》卷一第三十八叶），有兄丁（同上，卷一第三十九叶，又《后编》卷上第七叶），有兄戊（《前编》卷一第四十叶），有兄己（《前编》卷一第四十及第四十一叶，《后编》卷上第七叶），有兄庚（《前编》卷一第四十一叶，《后编》卷上第七叶及第十九叶），有兄辛（《后编》卷上第七叶），有兄壬（同上），有兄癸（同上）。今于盘庚以后诸帝之兄求之，则兄甲当为盘庚、小辛、小乙之称阳甲；兄己当为祖庚、祖甲之称孝己；兄庚当为小辛、小乙之称盘庚，或祖甲之称祖庚；兄辛当为小乙之称小辛，或庚丁之称廪辛；而丁、戊、壬、癸则盘庚以后诸帝之兄在位者，初无其人，自是未立而殂者，与孝己同矣。由是观之，则卜辞中所未见之雍己、沃甲、廪辛等，名虽亡而实或存。其史家所不载之祖丙、小丁（此疑即沃丁或武丁，对大丁或祖丁言，则沃丁与武丁自当称小丁，犹大甲之后有小甲，祖乙之后有小乙，祖辛之后有小辛矣）、祖戊、祖己、中己、南壬等，或为诸帝之异称，或为诸帝兄弟之未立者，于是卜辞与《世本》、《史记》间毫无抵牾之处矣。

附罗叔言参事一书

昨日下午，邮局送到大稿，灯下读一过，忻快无似。弟自去冬病胃，闷损已数月，披览来编，积痾若失。忆自卜辞初出洹阴，弟一见以为奇宝，而考释之事未敢自任。研究十年，始稍稍能贯通。往者写定考释，尚未能自谦，固知继我有作者，必在先生，不谓捷悟遂至此也。上甲之释，无可疑者。弟意田字即小篆中中字所从出。

卜辞田字十外加口，固以示别，与[！、围、3同例，然疑亦用以别于数名之十，周人尚用此字，兮伯吉父盘之“兮田”即“兮甲”也。小篆复改作𠂔者。初以十嫌于数名之十（古七字）而加口作田；既又嫌于田畴之田而稍变之。秦阳陵虎符“甲兵”之字作甲，变口为。𠂔，更讹C3为，讹十为T，如《说文》𠂔字，而初形全失，反不如隶书甲字，尚存古文面目也。弟因考卜辞，知今隶颇存古文，此亦其一矣。又田或作(r)者，弟以为即“上甲”二字合文。许书“帝”古文作𠂔，注古文诸上字皆从一。篆文皆从二。二。古文上字。”考之卜辞及古金文，帝、示诸文，或从二，或从一，知古文二亦省作一。苗者，上甲也。许君之注当改正为“古文诸上字。或从一。或从二。一与二皆古文上。”或汶长原文本如此，后人转写失之耳。尊稿当已写定，可不必改正。或以弟此书写附大著之后。奉读大稿，弟为忻快累日。此书寄到，公亦当揽纸首肯也。（第一札）

前书与公论S即上甲二字合书。想公必谓然。今日补拓以前未选人之龟甲兽骨。得一骨上有笛字。则竟作“上田”。为之狂喜。已而检《书契后编》，见卷下第四十二叶上甲字已有作甚者（英人明义士所摹《殷虚卜辞》第二十九叶并一百十八叶亦两见苗字：），又为之失笑，不独弟忽之，公亦忽之，何耶？卜辞“上”字多作𠂔， “下”字作下字无所嫌，二作o者，所以别于数名之二也。此笛字两见，皆作O。又上帝字作o紫，其为上字无疑。苗为(r)字之省，亦无可疑。不仅可为弟前说之证，亦足证尊说之精确。至今隶“甲”字全与田同。但长其直画。想公于此益信今隶源流之古矣。（第二札）

丁巳二月，参事闻余考卜辞中殷先公先王，索稿甚亟。既写定，即以草稿寄之。复书两通，为余证成“上甲”二字之释。第一札作于闰二月之望，第二札则二十日也。余适以展墓反浙，至沪读此二书，开缄狂喜，亟录附于后。越七日，国维记。

殷卜辞中所见先公先王续考☆

丁巳二月，余作《殷卜辞中所见先公先王考》，时所据者《铁云藏龟》及《殷虚书契》前后编诸书耳。逾月，得见英伦哈同氏《戡寿堂所藏殷虚文字拓本》凡八百纸。又逾月，上虞罗叔言参事以养痾来海上，行装中有新拓之书契文字约千纸。余尽得见之。二家拓本中足以补证余前说者颇多，乃复写一编，以质世之治古文及古史者。闰二月下旬，海宁王国维。

高祖矣

前考以卜辞之，及，为“矣”，即帝啻之名，但就字形定之，无他证也。今见罗氏拓本中有一条曰：“癸巳贞于高祖，。”（下阙：）案卜辞中惟王亥称高祖王亥（《书契后编》卷上第二十二叶）或高祖亥（哈氏拓本）大乙称高祖乙（《后编》卷上第三叶：），今，亦称高祖，斯为即矣之确证，亦为矣即帝啻之确证矣。

上甲报乙报丙报丁主壬主癸

前考据《书契后编》上第八叶一条，证u、另即报丙、报丁，又据此知卜辞以报丙、报丁为次，与《史记·殷本纪》及《三代世表》不同。比观哈氏拓本中有一片，有田、5、示癸等字，而彼片有画、3等字，疑本一骨折为二者，乃以二拓本合之，其断痕若合符节，文辞亦连续可诵，凡殷先公先王自上甲至于大甲，其名皆在焉。其文三行，左行其辞曰乙未，酒盍昔田十、当三、3三、3三、示壬三、示癸三、大丁十、大甲十。”（下阙）此中曰十曰三者，盖谓牲牢之数，上甲、大丁、大甲十而其余皆三者，以上甲为先公之首，大丁、大甲又先王而非先公，故殊其数也。示癸、大丁之间无大乙者，大乙为大祖，先公先王或均合食于大祖故也。据此一文之中，先公之名具在，不独田即上甲，即报乙、报丙、报丁，示壬、示癸即主壬、主癸，胥得确证，且足证上甲以后诸先公之次，当为报乙、报丙、报丁、主壬、主癸，而《史记》以报丁、报乙、报丙为次，乃违事实。又据此次序，则首甲、次乙、次丙、次丁，而终于壬、癸，与十日之次全同。疑商人以日为名号，乃成汤以后之事，其先世诸公生卒之日，至汤有天下后定祀典名号时，已不可知，乃即用十日之次序以追名之，故先公之次乃适与十日之次同，否则不应如此巧合也。兹摹二骨之形状及文字如左。

多后

卜辞屡云“自田至于多务衣”（见前考），曩疑“多和”亦先公或先王之名。今观《戡寿堂所藏殷虚文字》，乃知其不然。其辞曰乙丑卜，贞，王宾条祖乙口，亡片。”又曰：“乙卯卜，即贞，王宾蒞祖乙父丁吁，亡片。”又曰：“贞，备祖乙古十牛，四月。”（：以上出《戡寿堂所藏殷虚文字》：）又曰：“咸备祖乙。”（

《书契前编》卷五第五叶：）又曰：“甲口口贞，翌乙口酒彤日于&祖乙，亡它。”（《后编》卷上第二十叶：）则亦作卜辞又曰：“口丑之于五备。，，（：《前编》卷一第三十叶：）合此诸文观之，则“多务”殆非人名。案卜辞字异文颇多，或作狄（《前编》卷六第二十七叶：）、或作备（：同上卷二第二十五叶：）、或作务、作知、作&（：均同上：），或作&（：同上二十五叶：），或作&（：《后编》卷上第二十叶：），字皆从女从在，（：倒子：），或从母从在，，象产子之形。其从：

者，则象产子之有水液也。或从《

者.与从女从母同意.故以字形言.此字即《说文》“育”之或体“毓”字。“毓”从每从jfu（倒古文子：），与此正同。吕中仆尊曰：“吕中仆作子宝尊彝。子即毓子。毓.稚也。《书》今文《尧典》：“教育子。”《诗·豳风》鬻子之闵斯。”《书·康诰》兄亦不念鞠子哀。”《康王之诰》无遗鞠子羞。”育、鬻、鞠三字通。然卜辞假此为后字，古者育、胃、后声相近，谊亦相通。《说文解字》：“后，继体君也，象人之形，施令以告四方，故厂之，从一口。”是后从人，厂当即之讹变，一口亦在，之讹变也。后字之谊，本从毓义引申，其后毓字专用毓育二形，后字专用&，又i化为后，遂成二字。卜辞舞又作后编》卷下第二十二叶：>，与洛、诸形皆象倒子在人后.故先後之後古亦作后。盖毓、后、後三字实本一字也。商人称先王为后，《书·盘庚》曰：“古我前后。”又曰：女曷不念我古后之闻。”又曰：“予念我先神后之劳尔先。”又曰：“高后丕乃崇降罪疾。”又曰：“先后丕降与汝罪疾。”《诗·商颂》曰：“商之先后。”是商人称其先人为后。是故多后者，犹《书》言“多子”、“多士”、“多方”也。五后者，犹《诗》、《书》言“三后在天”、“三后成功”也。其与祖乙连言者.又假为後字。後祖乙.谓武乙也.卜辞以祖乙父丁连文。考殷诸帝中父名乙、子名丁者.盘庚以后.惟小乙武丁及武乙文丁.而小乙卜辞称小祖乙（《戡寿堂所藏殷虚文字》）.则备祖乙必武乙矣。商诸帝名乙者六.除帝乙外.皆有祖乙之称.而各加字以别之。是故高祖乙者谓大乙也.中宗祖乙者谓祖乙也.小祖乙者谓小乙也，武祖乙后祖乙者谓武乙也。卜辞君后之后与先後之後均

用或，知毓、后、後三字之古为一字矣。

中宗祖乙

《戡寿堂所藏殷虚文字》中，有断片，存字六，曰“中宗祖乙牛，吉”，称祖乙为中宗，全与古来《尚书》学家之说违异。惟《太平御览》（八十三）引《竹书纪年》曰：“祖乙滕即位，是为中宗，居庇。”（今本《纪年》注亦云“祖乙之世，商道复兴，号为中宗”即本此）今由此断片，知《纪年》是而古今《尚书》家说非也。《史记·殷本纪》以大甲为大宗，大戊为中宗，武丁为高宗，此本《尚书》今文

家说。今征之卜辞，则大甲、祖乙往往并祭，而大戊不与焉。卜辞曰：“口亥卜，贞，三示，御大乙、大甲、祖乙五牢。”（罗氏拓本）又曰：“癸丑卜，口贞，求年于大甲十牢，祖乙十牢。”（《后编》上第二十七叶：）又曰：“丁亥卜，口贞，昔乙酉服御（中阙：）大丁、大甲、祖乙百鬯、百羊、卯三百牛。”（下阙同上第二十八叶）大乙、大甲之后，独举祖乙，亦中宗是祖乙非大戊之一证（《晏子春秋·内篇谏上》“夫汤、大甲、武丁、祖乙，天下之盛君也”，亦以祖乙与大甲、武丁并称）。

大示二示三示四示

《戡寿堂所藏殷虚文字》中有一条，其文曰：“癸卯卜，求贞，乙巳自田甘示，一牛。二示，羊么I。三示，彘牢。四示，犬。”前考以示为先公之专称，故因卜辞十有三示一语，疑商先公之数不止如《史记》所纪。今此条称“自田甘示”，又与彼云“十有三示”不同。盖示者先公先王之通称。卜辞云：“口亥卜，贞，三示，御大乙、大甲、祖乙五牢。”（见前）以大乙、大甲、祖乙为三示，是先王亦称示矣。其有大示（亦云兀示）、二示、三示、四示之别者。盖商人祀其先自有差等，上甲之祀与报乙以下不同，大乙、大甲、祖乙之祀又与他先王不同。又诸臣亦称示，卜辞云：“癸酉卜，右伊五示。”（罗氏拓本）伊谓伊尹，故有大示、二示、三示、四示之名。卜辞又有小示，盖即谓二示以下。小者，对大示言之也。

商先王世数

《史记·殷本纪》、《三代世表》及《汉书·古今人表》所记殷君数同，而于世数则互相违异。据《殷本纪》则商三十一帝（除大丁为三十帝），共十七世。《三代世表》以小甲、雍己、大戊为大庚弟（《殷本纪》大庚子），则为十六世。《古今人表》以中丁、外壬、河亶甲为大戊弟（《殷本纪》大戊子），祖乙为河亶甲弟（《殷本纪》河亶甲子），小辛为盘庚子（《殷本纪》盘庚弟），则增一世，减二世，亦为十六世。今由卜辞证之，则以《殷本纪》所记为近。案殷人祭祀中，有特祭其所自出之先王，而非所自出之先王不与者。前考所举求祖乙（小乙）、祖丁（武丁）、祖甲、康祖丁（庚丁）、武乙衣，其一例也。今检卜辞中又有一断片，其文曰（上阙）大甲、大庚、（中阙）

丁、祖乙、祖（中阙）一羊一南。”（下阙。共三行，左读，见《后编》卷上第五叶）此片虽残缺，然于大甲、大庚之间不数沃丁，中丁（中字直笔尚存）、祖乙之间不数外壬、河亶甲，而一世之中仅举一帝，盖亦与前所举者同例。又其上下所阙，得以意补之如左。

由此观之，则此片当为盘庚、小辛、小乙三帝时之物，自大丁至祖丁皆其所自出之先王，以《殷本纪》世数次之，并以行款求之，其文当如是也。惟据《殷本纪》，

则祖乙乃河亶甲子，而非中丁子。今此片中有中丁而无河亶甲，则祖乙自当为中丁子，《史记》盖误也。且据此，则大甲之后有大庚，则大戊自当为大庚子，其兄小甲、雍己亦然，知《三代世表》以小甲、雍己、大戊为大庚弟者非矣。大戊之后有中丁，中丁之后有祖乙，则中丁、外壬、河亶甲自当为大戊子，祖乙自当为中丁子，知《人表》以中丁、外壬、河亶甲、祖乙皆为大戊弟者非矣。卜辞又云“父甲一牡”、“父庚一牡”、“父辛一牡”（《后编》卷上第六十五叶），甲为阳甲，庚则盘庚，辛则小辛，皆武丁之诸父，故曰父甲、父庚、父辛，则《人表》以小辛为盘庚子者非矣。凡此诸证，皆与《殷本纪》合，而与《世表》、《人表》不合，是故殷自小乙以上之世数，可由此二片证之，小乙以下之世数，可由祖乙、祖丁、祖甲、康祖丁、武乙一条证之。考古者得此，可以无遗憾矣。

殷周制度论

中国政治与文化之变革，莫剧于殷、周之际。都邑者，政治与文化之标征也。自古以来，帝王之都皆在东方。太皞之虚在陈，大庭氏之庠在鲁，黄帝邑于涿鹿之阿，少皞与颛顼之虚皆在鲁、卫，帝喾居亳。惟史言尧都平阳，舜都蒲坂，禹都安邑，俱僻在西北，与古帝宅京之处不同。然尧号陶唐氏，而冢在定陶之成阳；舜号有虞氏，而子孙封于梁国之虞县，孟子称舜生卒之地皆在东夷。盖洪水之灾，兖州当其下游，一时或有迁都之事，非定居于西土也。禹时都邑虽无可考，然夏自太康以后，以迄后桀，其都邑及他地名之见于经典者，率在东土，与商人错处河、济间，盖数百岁。商有天下，不常厥邑，而前后五迁，不出邦畿千里之内。故自五帝以来，政治文物所自出之都邑，皆在东方，惟周独崛起西土。武王克纣之后，立武庚，置三监而去，未能抚有东土也；逮武庚之乱，始以兵力平定东方，克商践奄，灭国五十。乃建康叔于卫，伯禽于鲁，太公望于齐，召公之子于燕。其于蔡、郕、郛、雍、曹、滕、凡、蒋、邢、茅诸国，碁置于殷之畿内及其侯甸；而齐、鲁、卫三国，以王室懿亲，并有勋伐，居蒲姑、商、奄故地，为诸侯长；又作雒邑为东都，以临东诸侯；而天子仍居丰、镐者凡十一世。自五帝以来，都邑之自东方而移于西方，盖自周始。故以族类言之，则虞、夏、皆颛顼后，殷、周皆帝喾后，宜殷、周为亲；以地理言之，则虞、夏、商皆居东土，周独起于西方，故夏、商二代文化略同。《洪范》“九畴”，帝之所以锡禹者，而箕子传之矣；夏之季世，若胤甲，若孔甲，若履癸，始以日为名，而殷人承之矣。文化既尔，政治亦然。周之克殷，灭国五十；又其遗民，或迁之雒邑，或分之鲁、卫诸国。而殷人所伐，不过韦、顾、昆吾；且豕韦之后仍为商伯，昆吾虽亡，而已姓之国仍存于商、周之世。《书·多士》曰：“夏迪简在王庭，有服在百僚”，当属事实。故夏、殷间政治与文物之变革，不似殷、周间之剧烈矣。殷、周间之大变革，自其表言之，不过一姓一家之兴亡与都邑之移转；自其里言之，则旧制度废而新制度兴，旧文化废而新文化兴。又自其表言之，则古圣人之所以取天下及所以守之者，若无以异于后世之帝王；而自其里言之，则其制度文物与其立制之本意，乃出于万世治安之大计，其心术与规摩，迥非后世帝王所能梦见也。

欲观周之所以定天下，必自其制度始矣。周人制度之大异于商者，一曰“立子立嫡”之制，由是而生宗法及丧服之制，并由是而有封建子弟之制，君天子臣诸侯之制；二曰庙数之制；三曰同姓不婚之制。此数者，皆周之所以纲纪天下。其旨则在纳上下于道德，而合天子、诸侯、卿、大夫、士、庶民以成一道德之团体。周公制作之本意，实在于此。此非穿凿附会之言也，兹篇所论，皆有事实为之根据，试略述之。

殷以前无嫡庶之制。黄帝之崩，其二子昌意、玄嚣之后，代有天下。颡顼者昌意之子，帝喾者玄嚣之子也；厥后虞、夏皆颡顼后，殷、周皆帝喾后。有天下者，但为黄帝之子孙，不必为黄帝之嫡。世动言尧、舜禅让，汤、武征诛，若其传天下与受天下有大不同者。然以帝系言之，尧、舜之禅天下，以舜、禹之功，然舜、禹皆颡顼后，本可以有天下者也；汤、武之代夏、商，固以其功与德，然汤、武皆帝喾后，亦本可以有天下者也。以颡顼以来诸朝相继之次言之，固已无嫡庶之别矣。一朝之中，其嗣位者亦然。特如商之继统法，以弟及为主，而以子继辅之，无弟然后传子。自成汤至于帝辛三十帝中，以弟继兄者凡十四帝（外丙、中壬、大庚、雍己、大戊、外壬、河亶甲、沃甲、南庚、盘庚、大辛、小乙、祖甲、庚丁）；其以子继父者，亦非兄之子，而多为弟之子（小甲、中丁、祖辛、武丁、祖庚、廩辛、武乙）。惟沃甲崩，祖辛之子祖丁立；祖丁崩，沃甲之子南庚立；南庚崩，祖丁之子阳甲立：此三事独与商人继统法不合。此盖《史记·殷本纪》所谓中丁以后九世之乱，其间当有争立之事，而不可考矣。故商人祀其先王，兄弟同礼；既先王兄弟之未立者，其礼亦同，是未尝有嫡庶之别也。此不独王朝之制，诸侯以下亦然。近保定南乡出句兵三，皆有铭：其一曰“大祖日己、祖日丁、祖日乙、祖日庚、祖日丁、祖日己、祖日己”；其二曰“祖日乙、大父日癸、大父日癸、中父日癸、父日癸、父日辛、父日己”；其三曰“大兄日己、兄日戊、兄日壬、兄日癸、兄日癸、兄日丙”。此当是殷时北方侯国勒祖父兄之名于兵器以纪功者；而三世兄弟之名先后并列，无上下贵贱之别。是故大王之立王季也，文王之舍伯邑考而立武王也，周公之继武王而摄政称王也，自殷制言之，皆正也（殷自武乙以后，四世传子，又孟子谓：“以纣为兄之子，且以为君，而有微子启、王子比干。”《吕氏春秋·当务篇》云：“纣之同母三人，其长子曰微子启，其次曰仲衍，其次曰受德。受德乃纣也，甚少矣。纣母之生微子启与仲衍也，尚为妾；已而为妻而生纣。纣之父，纣之母欲置微子启以为太子，大史据法而争之曰：‘有妻之子而不可置妾之子。’纣故为后”。《史记·殷本纪》则云：“帝乙长子为微子启，启母贱不得嗣；少子辛，辛母正后，故立辛为嗣。”此三说虽不同，似商末已有立嫡之制。然三说已自互异，恐即以周代之制拟之，未敢信为事实也）。舍弟传子之法，实自周始。当武王之崩，天下未定，国赖长君；周公即相武王克殷胜纣，勋劳最高，以德以长，以历代之制，则继武王而自立，固其所矣。而周公乃立成王而已摄之，后又反政焉。摄政者，所以济变也；立成王者，所以居正也。自是以后，子继之法遂为百王不易之制矣。

由传子之制而嫡庶之制生焉。夫舍弟而传子者，所以息争也。兄弟之亲本不如父子，而兄之尊又不如父，故兄弟间常不免有争位之事。特如传弟即尽之后，则嗣立者当为兄之子欤，弟之子欤？以理论言之，自当立兄之子；以事实言之，则所立者往往为弟之子。此商人所以有中丁以后九世之乱，而周人传子之制正为救此弊而设也。然使于诸子之中可以任择一人而立之，而此子又可任立其欲立者，则其争益甚，反不如商之兄弟以长幼相及者犹有次第矣。故有传子之法，而嫡庶之法亦与之俱生。其条例，则《春秋左氏传》之说曰：“太子死，有母弟则立之，无则立长。年钧择贤，义钧则卜。”公羊家之说曰：“礼，嫡夫人无子，立右媵；右媵无子，立左

媵；左媵无子，立嫡侄娣；嫡侄娣无子，立右媵侄娣；右媵侄娣无子，立左媵侄娣。质家亲亲，先立娣；文家尊尊，先立侄。嫡子有孙而死，质家亲亲，先立弟；文家尊尊，先立孙，其双生也，质家据现在，立先生，文家据本意，立后生。”此二说中，后说尤为详密，顾皆后儒充类之说；当立法之初，未必穷其变至此。然所谓立子以贵不以长，立适以长不以贤者，乃传子法之精髓，当时虽未必有此语，固已用此意矣。盖天下之大利莫如定，其大害莫如争。任天者定，任人者争；定之以天，争乃不生。故天子诸侯之传世也，继统法之立子与立嫡也，后世用人之以资格也，皆任天而不参以人，所以求定而息争也。古人非不知官天下之名美于家天下，立贤之利过于立嫡，人才之用优于资格，而终不以此易彼者，盖惧夫名之可藉而争之易生，其敝将不可胜穷，而民将无时或息也。故衡利而取重，絜害而取轻，而定为立子立嫡之法，以利天下后世；而此制实自周公定之。是周人改制之最大者，可由殷制比较得之。有周一代礼制，大抵由是出也。

是故由嫡庶之制而宗法与服术二者生焉。商人无嫡庶之制，故不能有宗法。藉曰有之，不过合一族之人奉其族之贵且贤者而宗之；其所宗之人，固非一定而不可易，如周之大宗、小宗也。周人嫡庶之制，本为天子诸侯继统法而设，复以此制通之大夫以下，则不为君统而为宗统，于是宗法生焉。周初宗法虽不可考，其见于七子后学所述者，则《丧服小记》曰：“别子为祖，继别为宗，继祢者为小宗。有五世而迁之宗，其继高祖者也。是故祖迁于上，宗易于下，敬宗所以尊祖祢也。”《大传》曰：“别子为祖，继别为宗，继祢者为小宗，有百世不迁之宗，有五世则迁之宗。百世不迁者，别子之后也；宗其继别子者，百世不迁者也；宗其继高祖者，五世则迁者也。尊祖故敬宗，敬宗尊祖之义也。是故有继别之大宗，有继高祖之宗，有继曾祖之宗，有继祖之宗，有继祢之宗，是为五宗。其所宗者皆嫡也，宗之者皆庶也。此制为大夫以下设，而不上及天子诸侯。”郑康成于《丧服小记》注曰：“别子，诸侯之庶子，别为后世为始祖者也；谓之别子者，公子不得祢先君也。”又于《大传》注曰：“公子不得宗君。”是天子诸侯虽本世嫡，于事实当统无数之大宗，然以尊故，无宗名。其庶子不得祢先君，又不得宗今君，故自为别子，而其子乃为继别之大宗。言礼者嫌别子之世近于无宗也，故《大传》说之曰：“有大宗而无小宗者，有小宗而无大宗者，有无宗亦莫之宗者，公子是也。公子有宗道，公子之公为其士大夫之庶者，宗其士大夫之适者。”《注》曰：“公子不得宗君，君命适昆弟为之宗，使之宗之，此传所谓有大宗而无小宗也。又若无适昆弟，则使庶昆弟一人之为宗，而诸庶兄弟事之如小宗，此传所谓有小宗而无大宗也。”《大传》此说，颇与《小记》及其自说违异。盖宗必有所继，我之所以宗之者，以其继别若继高祖以下故也，君之嫡昆弟、庶昆弟皆不得继先君，又何所据以为众兄弟之宗乎？或云：立此宗子者，所以合族也。若然，则所合者一公之子耳；至此公之子与先公之子若孙间，仍无合之之道。是大夫士以下皆有族；而天子诸侯之子，于其族曾祖父母、从祖祖父母、世父母、叔父母以下服之所及者，乃无缀属之法，是非先王教人亲亲之意也。故由尊之统言，则天子诸侯绝宗，王子公子无宗可也；由亲之统言，则天子诸侯之子，身为别子而其后世为大宗者，无不奉天子诸侯以为最大之大

宗，将以尊卑既殊，不敢加以宗名，而其实则仍在也。故《大传》曰：“君有合族之道。”其在《诗·小雅》之《常棣序》曰：“燕兄弟也。”其诗曰：“俎尔笾豆，饮酒之饫，兄弟既具，和乐且孺。”《大雅》之《行苇序》曰：“周家能内睦九族也。”其诗曰：“戚戚兄弟，莫通具尔，或肆之筵，或授之几。”是即《周礼·大宗伯》所谓以饮食之礼亲宗族兄弟者，是天子之收族也。《文王世子》曰：“公与族人燕则以齿。”又曰：“公与族人燕，则异姓为宾。”是诸侯之收族也。夫收族者，大宗之事也。又在《小雅》之《楚茨》曰：“诸父兄弟，备言燕私。”此言天子诸侯祭毕而与族人燕也。《尚书大传》曰：“宗室有事，族人皆侍终日。大宗已侍于宾奠，然后燕私。燕私者何也？祭已而与族人饮也。”是祭毕而燕族人者，亦大宗之事也。是故天子诸侯虽无大宗之名，而有大宗之实。《笃公刘》之诗曰：“食之饮之，君之宗之。”《传》曰：“为之君，为之大宗也。”《板》之诗曰：“大宗维翰。”《传》曰：“王者，天下之大宗。”又曰：“宗子维城。”《笺》曰：“王者之嫡子，谓之宗子。”是礼家之大宗限于大夫以下者，诗人直以称天子诸侯。惟在天子诸侯，则宗统与君统合，故不必以宗名。大夫、士以下皆以贤才进，不必是嫡子，故宗法乃成一独立之统系。是以丧服有为宗子及其母、妻之服皆齐衰三月，与庶人为国君、曾孙为曾祖父母之服同。适子、庶子祇事宗子，宗妇虽贵富，不敢以贵富入于宗子之家；子弟犹归器，祭则具二牲，献其贤者于宗子，夫妇皆齐而宗敬焉，终事而敢私祭，是故大夫以下，君统之外复戴宗统，此由嫡庶之制自然而生者也。

其次则为丧服之制。丧服之大纲四：曰“亲亲”，曰“尊尊”，曰“长长”，曰“男女有别”。无嫡庶，则有亲而无尊，有恩而无义，而丧服之统紊矣。故殷以前之服制，就令成一统系，其不能如周礼服之完密，则可断也。丧服中之自嫡庶之制出者：如父为长子，三年；为众子，期。庶子不得为长子三年。母为长子，三年；为众子，期。公为适子之长殇、中殇，大功；为庶子之长殇、中殇，无服。大夫为适子之长殇、中殇，大功；为庶子之长殇，小功。适妇，大功；庶妇，小功。适孙，期；庶孙，小功。大夫为嫡孙为士者，期；庶孙，小功。出妻之子为母，期。为父后者，则为出母，无服；为父后者，为其母，缌。大夫之适子为妻，期；庶子为妻，小功。大夫之庶子为适昆弟，期；为庶昆弟，大功；为适昆弟之长殇、中殇，大功；为庶昆弟之长殇，小功。为适昆弟之下殇，小功；为庶昆弟之下殇，无服。女子子适人者，为其昆弟之为父后者，期；为众昆弟，大功。凡此皆出于嫡庶之制。无嫡庶之世，其不适用此制明矣。又无嫡庶则无宗法，故为宗子与宗子之母妻之服无所施。无嫡庶，无宗法，则无为人后者，故为人后者为其所后及为其父母昆弟之服亦无所用。故《丧服》一篇，其条理至精密纤悉者，乃出于嫡庶之制即行以后，自殷以前，决不能有此制度也。

为人后者为之子，此亦由嫡庶之制生者也。商人诸帝，以弟继兄者，但后其父而不后其兄，故称其所继者仍曰兄甲、兄乙；既不为之子，斯亦不得云为之后矣。又商之诸帝，有专祭其所自出之帝，而不及非所自出者。《卜辞》有一条曰：“大丁、

大甲、大庚、大戊、中丁、祖乙、祖辛、祖丁，牛一，羊一。”（《殷虚书契后编》卷上第五页，及拙撰《殷卜辞中所见先公先王继考》）其于大甲、大庚之间不数沃丁，是大庚但后其父大甲，而不为其兄沃丁后也。中丁、祖乙之间不数外壬、河亶甲，是祖乙但后其父中丁，而不为其兄外壬、河亶甲后也。又一条曰：“口祖乙（小乙）、祖丁（武丁）、祖甲、康祖丁（庚丁）、武乙衣。”（《书契后编》卷上，第二十页，并拙撰《殷卜辞中所见先公先王考》。）于祖甲前不数祖庚，康祖丁前不数廪辛，是亦祖甲本不后其兄祖庚，庚丁不后其兄廪辛，故后世之帝，于合祭之一种中乃废其祀（其特祭仍不废）。是商无为后者为之子之制也。周则兄弟之相继者，非为其父后而实为所继之兄弟后。以春秋时之制言之，《春秋经》文二年书“八月丁卯，大事于大庙，跻僖公。”《公羊传》曰：“讥何？讥尔逆祀也。其逆祀奈何？先祢而后祖也。”夫僖本闵兄，而《传》乃为闵为祖，僖为祢，是僖公以兄为弟闵公后，即为闵公子也。又《经》于成十五年书“三月乙巳，仲婴齐卒。”《传》曰：“仲婴齐者，公孙婴齐也。公孙婴齐则曷为谓之仲婴齐？为兄后也。为兄后则曷为谓之仲婴齐？为人后者为之子也。为人后者为之子，则其称‘仲’何？孙以王父字为氏也。然则婴齐孰后？后归父也。”夫婴齐为归父弟，以为归父后，故祖其父仲遂而以其字为氏，是春秋时为人后者无不即为其子。此事于周初虽无可考，然由嫡庶之制推之，固当如是也。

又与嫡庶之制相辅者，分封子弟之制是也。商人兄弟相及，凡一帝之子，无嫡庶长幼，皆为未来之储贰，故自开国之初，已无封建之事，矧在后世，惟商末之微子、箕子。先儒以微、箕为二国名，然比干亦王子而无封，则微、箕之为国名，亦未可避定也。是以殷之亡，仅有一微子以存商祀；而中原除宋以外，更无一子姓之国。以商人兄弟相及之制推之，其效固应如是也。周人即立嫡长，则天位素定，其余嫡子庶子，皆视其贵贱贤否，畴以国邑。开国之初，建兄弟之国十五，姬姓之国四十，大抵在邦畿之外，后王之子弟亦皆使食畿内之邑。故殷之诸侯皆异姓，而周则同姓异姓各半，此与政治文物之施行甚有关系，而天子诸侯君臣之分亦由是而确定者也。

自殷以前，天子诸侯君臣之分未定也。故当夏后之世，而殷之王亥、王恒，累叶称王；汤未放桀之时，亦已称王；当商之末，而周之文、武亦称王。盖诸侯之于天子，犹后世诸侯之于盟主，未有君臣之分也。周初亦然，于《牧誓》、《大诰》，皆称诸侯曰“友邦君”，是君臣之分亦未全定也。逮克殷践奄，灭国数十，而新建之国皆其功臣、昆弟、甥舅，本周之臣子；而鲁、卫、晋、齐四国，又以王室至亲为东方大藩。夏、殷以来古国，方之蔑矣！由是天子之尊，非复诸侯之长而为诸侯之君。其在丧服，则诸侯为天子斩衰三年，与子为父、臣为君同。盖天子诸侯君臣之分始定于此。此周初大一统之规模，实与其大居正之制度相待而成者也。

嫡庶者，尊尊之统也，由是而有宗法，有服术，其效及于政治者，则为天位之前定，同姓诸侯之封建，天子之尊严。然周之制度，亦有用亲亲之统者，则祭法是已。

商人祭法，见于《卜辞》所纪者，至为繁复。自帝啻以下，至于先公先王先妣，皆有专祭；祭各以其名之日，无亲疏远迩之殊也。先公先王之昆弟，在位者与不在位者祀典略同，无尊卑之差也。其合祭也，则或是上甲至于大甲九世，或自上甲至于武乙二十世，或自大丁至于祖丁八世，或自大庚至于中丁三世，或自帝甲至于祖丁二世，或自小乙至于武乙五世，或自武丁至于武乙四世，又数言自上甲至于多后衣。此于卜辞屡见，必非周人三年一祫、五年一禘之大祭，是无毁庙之制也。虽《吕览》引《商书》言“五世之庙，可以观怪”，而卜辞所纪事实，乃全不与之合，是殷人祭其先无定制也。周人祭法，《诗》、《书》、《礼经》皆无明文。据礼家言，乃有七庙、四庙之说。此虽不可视为宗周旧制，然礼家所言庙制，必已萌芽于周初，固无可疑也。古人言周制尚文者，盖兼综数义而不专主一义之谓。商人继统之法，不合尊尊之义，其祭法又无远迩尊卑之分，则于亲亲、尊尊二义，皆无当也。周人以尊尊之义经亲亲之义而立嫡庶之制，又以亲亲之义经尊尊之义而立庙制，此其所以为文也。说庙制者，有七庙、四庙以殊，然其实不异。《王制》、《礼器》、《祭法》、《春秋谷梁传》皆言天子七庙、诸侯五；《曾子问》言“当七庙五庙无虚主”；《荀子·礼论》篇亦言“有天下者事七世，有一国者事五世”；惟《丧服小记》独言“王者禘其祖之所自出，以其祖配之，而立四庙”。郑注：“高祖以下也，与始祖而五也。”如郑说，是四庙实五庙也。《汉书·韦玄成传》：“玄成等奏：《祭义》曰：‘王者禘其祖之所自出，以其祖配之，而立四庙。’言始受命而王，祭天以其祖配，而不为立庙，亲尽也；立亲庙四，亲亲也；亲尽而迭毁，亲疏之杀，示有终。周之所以七庙者，以后稷始封，文王、武王受命而王，是以三庙不毁，与亲朝四而七。”《公羊宣六年传》何注云：“礼，天子诸侯立五庙。周家祖有功，宗有德，立后稷、文、武庙，至于子孙，自高祖以下而七庙。”《王制》郑注亦云：“七者，太祖及文、武之祧，与亲庙四。”则周之七庙，仍不外四庙之制。刘歆独引《王制》说之曰：“天子三昭、三穆，与太祖之庙而七。七者其正法，不可常数者也。宗不在此数中，宗变也。”是谓七庙之中，不数文、武，则有亲庙六。以礼意言之，刘说非也。盖礼有尊之统，有亲之统。以尊之统言之，祖愈远而愈尊，则如殷人之制，遍祀先公先王可也。庙之有制也，出于亲之统；由亲之统言之，则亲亲以三为五，以五为九，上杀、下杀、旁杀而亲毕矣。亲，上不过高祖，下不过玄孙，故宗法服术皆以五为节。丧服有曾祖父母服而无高祖父母服，曾祖父母之服不过齐衰三月。若夫玄孙之生，殆未有及见高祖父母之死者；就令有之，其服亦不过袒免而止，此亲亲之界也。过是，则亲属竭矣，故遂无服。服之所不及，祭亦不敢及。此礼家所以有天子四庙之说也。刘歆又云：“天子七日而殡，七月而葬；诸侯五日而殡，五月而葬，此丧事尊卑之序也，与庙数相应。”《春秋左氏传》曰：“名位不同，礼亦异数”，“自上以下，降杀以两，礼也。”虽然，言岂一端而已。礼有以多为贵者，有以少为贵者，有无贵贱一者。车服之节，殡葬之期，此有等衰者也。至于亲亲之事，则贵贱无以异。以三为五，大夫以下用之；以五为九，虽天子不能过也。既有不毁之庙以存尊统，复有四亲庙以存亲统，此周礼之至文者也。宗周之初，虽无四庙明文，然祭之一种限于四世，则有据矣。《逸周书·世俘解》：“王克殷，格于庙。王烈祖自大王、大伯、王季、虞公、文王、邑

考以列升。”此太伯、虞公、邕考与三王并升，犹用殷礼，然所祀者四世也。《中庸》言“周公成文、武之德，追王大王、王季，上祀先公以天子之礼。”于先公之中追王二代，与文、武而四，则成王、周公时庙数虽不必限于四王，然追王者与不追王者之祭，固当有别矣。《书·顾命》所设几筵，乃成王崩，召公摄成王册命康王时依神之席，（见拙撰《周书顾命考》及《顾命后考》）而其席则牖间、西序、东序与西夹凡四，此亦为大王、王季、文王、武王设。是周初所立，即令不止四庙，其于高祖以下，固与他先公不同。其后遂为四亲庙之制，又加以后稷、文、武，遂为七庙。是故遍祀先公先王者，殷制也。七庙、四庙者，七十子后学之说也；周初制度，自当在此二者间。虽不敢以七十子后学之说上拟宗周制度，然其不如殷人之遍祀其先，固可由其他制度知之矣。

以上诸制，皆由尊尊、亲亲二义出。然尊尊、亲亲、贤贤，此三者治天下之通义也。周人以尊尊、亲亲二义，上治祖祢，下治子孙，旁治昆弟；而以贤贤之义治官。故天子诸侯世，而天子诸侯之卿大夫士皆不世。盖天子诸侯者，有土之君也；有土之君，不传子，不立嫡，则无以弭天下之争；卿大夫士者，图事之臣也，不任贤，无以治天下之事。以事实证之，周初三公，惟周公为武王母弟，召公则疏远之族兄弟，而太公又异姓也。成、康之际，其六卿为召公、芮伯、彤伯、毕公、卫侯、毛公，而召、毕、毛三公又经卿兼三公，周公、太公之子不与焉！王朝如是，侯国亦然，故《春秋》讥世卿。世卿者，后世之乱制也。礼有大夫为宗子之服，若如春秋以后世卿之制，则宗子世为大夫，而支子不得与，又何大夫为宗子服之有矣！此卿、大夫、士不世之制，当自殷已然，非必周制，虑后人疑传子立嫡之制通乎大夫以下，故附著之。

男女之别，周亦较前代为严。男子称氏，女子称姓，此周之通制也。上古女无称姓者。有之，惟一姜嫄。姜嫄者，周之妣，而其名出于周人之口者也。传说黄帝之子为十二姓，祝融之后为八姓；又言虞为姚姓，夏为姒姓，商为子姓。凡此纪录，皆出周世。据殷人文字，则帝王之妣与母，皆以日名，与先王同；诸侯以下之妣亦然（传世商人彝器多有妣甲、妣乙诸文）。虽不敢谓殷以前无女姓之制，然女子不以姓称，固事实也（《晋语》殷辛伐有苏氏，有苏氏以妣己女焉。案苏国，己姓，其女称妣己，似己为女子之称姓之始，然恐亦周人追名之）。而周则大姜、大任、大妣、邑姜，皆以姓著。自是迄于春秋之末，无不称姓之女子。《大传》曰：“四世而缌，服之穷也；五世袒免，杀同姓也；六世亲属竭矣；其庶姓别于上而戚单于下，婚姻可以通乎！”又曰：“系之以姓而弗别，缀之以食而弗殊，虽百世而婚姻不通者，周道然也。”然则，商人六世以后，或可通婚；而同姓不婚之制，实自周始；女子称姓，亦自周人始矣。

是故有立子之制，而君位定；有封建子弟之制，而异姓之势弱，天子之位尊；有嫡庶之制，于是有宗法、有服术，而自国以至天下合为一家；有卿、大夫不世之制，则贤才得以进；有同姓不婚之制，而男女之别严。且异姓之国，非宗法之所能统者

，以婚媾甥舅之谊通之。于是天下之国，大都王之兄弟甥舅；而诸国之间，亦皆有兄弟甥舅之亲；周人一统之策实存于是。此种制度，固亦由时势之所趋；然手定此者，实惟周公。原周公所以能定此制者，以公于旧制本有可以为天子之道，其时又躬握天下之权，而顾不嗣位而居摄，又由居摄而致政，其无利天下之心，昭昭然为天下所共见。故其所设施，人人知为安国家、定民人之大计，一切制度遂推行而无所阻矣。

由是制度，乃生典礼，则经礼三百、曲礼三千是也。凡制度典礼所及者，除家法、丧服数大端外，上自天子诸侯，下至大夫士止，民无与焉，所谓“礼不下庶人”是也。若然，则周之政治，但为天子、诸侯、卿、大夫、士设，而不为民设乎？曰，非也。凡有天子、诸侯、卿、大夫、士者，以为民也，有制度典礼以治。天子、诸侯、卿、大夫、士，使有恩以相洽，有义以相分，而国家之基定，争夺之祸泯焉。民之所求者，莫先于此矣。且古之所谓国家者，非徒政治之枢机，亦道德之枢机也。使天子、诸侯、大夫、士各奉其制度典礼，以亲亲、尊尊、贤贤，明男女之别于上，而民风化于下，此之谓“治”；反是，则谓之“乱”。是故天子、诸侯、卿、大夫、士者，民之表也；制度典礼者，道德之器也。周人为政之精髓实存于经。此非无征之说也，以经证之，礼经言治之迹者，但言天子、诸侯、卿、大夫、士，而《尚书》言治之意者，则惟言庶民。《康诰》以下九篇，周之经纶天下之道胥在焉，其书皆以民为言。《召诰》一篇，言之尤为反覆详尽，曰“命”，曰“天”，曰“民”，曰“德”，四者一以贯之。其言曰：“天亦哀于四方民，其眷命用懋。王其疾敬德！”又曰：“今天其命哲，命吉凶，命历年。知今我初服，宅新邑，肆惟王其疾敬德。王其德之用，祈天永命。”又曰：“欲王以小民受天永命。”且其所谓德者，又非徒仁民之谓，必天子自纳于德而使民则之，故曰：“其惟王勿以小民淫用非彝。”又曰：“其惟王位在德元，小民乃惟刑用于天下，越王显。”充此言以治天下，可云至治之极轨，自来言政治者未能有高焉者也。古之圣人亦岂无一姓福祚之念存于其心，然深知夫一姓之福祚与万姓之福祚是一非二，又知一姓万姓之福祚与其道德是一非二，故其所以祈天永命者，乃在德与民二字。此篇乃召公之言，则史佚书之以诰天下，（《洛诰》云：“作册逸诰”，是史佚所作《召诰》与《洛诰》日月相承，乃一篇分为二者，故亦史佚作也。）文、武、周公所以治天下之精义大法胥在于此。故知周之制度典礼，实指为道德而设；而制度典礼之专及大夫、士以上者，亦未始不为民而设也。

周之制度典礼，乃道德之器械，而尊尊、亲亲、贤贤、男女有别四者之结体也，此之谓民彝。其有不由此者，谓之非彝，《康诰》曰：“勿用非谋非彝。”《召诰》曰：“其惟王勿以小民淫用非彝。”非彝者，礼之所去，刑之所加也。《康诰》曰：“凡民自得罪，寇攘奸宄，杀越人于货，愍不畏死，罔不愍。”又曰：“元恶大憝，矧惟不孝不友：子弗祗服厥父事，大伤厥考心；于父不能字厥子，乃疾厥子；于弟弗念天显，乃弗克恭厥兄；兄亦不念鞠子哀，大不友于弟。惟吊兹，不于我政人得罪。天惟与我民彝大泯乱，曰：乃其速由。文王作罚，刑兹无赦。”此周公诰

康叔治殷民之道，殷人之刑惟寇攘奸灾，而周人之刑则并及不孝不友，故曰“惟吊兹，不于我政人得罪”，又曰“乃其速由文王作罚”，其重民彝也如此！是周制刑之意，亦本于德治、礼治之大经；其所以致太平与刑措者，盖可睹矣。

夫商之季世，纪纲之废、道德之隳极矣。周人数商之罪，于《牧誓》曰：“今商王受，惟妇言是用；昏弃厥肆祀弗答，昏弃厥遗王父母弟，弗迪。乃惟四方之多罪逋逃，是崇是长，是信是使；是以为大夫卿士，以暴虐于百姓，以奸宄于商邑。”于《多士》曰：“在今后嗣王，……诞淫厥佚，罔顾于天，显民祗。”于《多方》曰：“乃惟尔辟，以尔多方，大淫图天之命，屑有辞。”于《酒诰》曰：“在今后嗣王酣身，厥命罔显于民祗，保越怨不易。诞惟厥纵淫佚于非彝，用燕丧威仪，民罔不蠹伤心。惟荒腆于酒，不惟自息乃逸。厥心疾很，不克畏死。辜在商邑，越殷国灭无罹。弗惟德馨香，祀登闻于天，诞惟民怨。庶群自酒，腥闻在上。故无降丧于殷，罔爱于殷，惟逸。天非虐，惟民自速辜。”由前三者之说，则失德在一；由后之说，殷之臣民，其渐于亡国之俗久矣。此非敌国诬谤之言也，殷人亦屡言之。

《西伯戡黎》曰：“惟王淫戏用自绝。”《微子》曰：“我用沉酗于酒，用乱败厥德于下。殷罔不小大，好草窃奸宄。卿士师师非度，凡有辜罪，乃罔恒获。小民方兴，相为敌仇。”又曰：“无毒降灾荒殷邦，方兴沉酗于酒。乃罔畏畏，咈其耄长，旧有位人。今殷民乃攘窃神祇之牺牲，用以容，将食，无灾。”夫商道尚鬼，乃至窃神祇之牺牲，卿士浊乱于上，而法令隳废于下，举国上下，惟奸宄敌仇之是务；固不待孟津之会、牧野之誓，而其亡已决矣。而周自大王以后，世载其德，自西土邦君，御事小子，皆克用文王教，至于庶民，亦聪听祖考之彝训。是殷、周之兴亡，乃有德与无德之兴亡；故克殷之后，尤兢兢以德治为务。《召诰》曰：“我不可不监于有夏，亦不可不监于有殷。我不敢知，曰：有夏受天命，惟有历年。我不敢知，曰：不其延，惟不敬厥德，乃早坠厥命。我不敢知，曰：有殷受天命，惟有历年。我不敢知，曰：不其延，惟不敬厥德，乃早坠厥命。今王嗣受厥命，我亦惟兹二国命，嗣若功，王乃初服。”周之君臣，于其嗣服之初反覆教戒也如是，则知所以驱草窃奸宄相为敌仇之民而跻之仁寿之域者，其经纶固大有在。欲知周公之圣，与周之所以王，必于是乎观之矣！√

殷墟书契考释跋

安阳所出龟甲兽骨，皆刻商代卜辞，文字奇古，比彝器古文尤为难读。光绪季年，丹徒刘氏拓印所藏甲骨为《铁云藏龟》，于是世始知有此物，瑞安孙仲容徵君诒让为之《札记》。宣统元年，上虞罗叔言参事作《殷商贞卜文字考》，卜辞文字始有条理可寻。参事东渡后，复拓印所藏甲骨为《殷虚书契前编》八卷、《殷虚书契菁华》一卷。去年岁杪，其《殷虚书契考释》始成，于是卜辞文字可读者，十得五六。盖近世之言古文者，以此书为最善矣。

参事《自序》曰：宣统壬子冬，余既编印《殷虚书契》，欲继是而为考释。人事乖午，因循不克就者，岁将再周，感庄生“吾生有涯”之言，乃发愤键户者四十余日，遂成《考释》六万余言。既竟，爰书其端曰：予读《诗》《书》及周秦之间诸子、太史公书，其记述殷事者，盖寥寥焉。孔子学二代之礼，而曰“杞宋不足徵”，殷商文献之无徵，二千余年前则已然矣。吾侪生三千年后，乃欲根据遗文补苴往籍，譬若观海，茫无津涯。从事稍久，乃知此事实有三难：史公最录商事，本诸《诗》《书》，旁揽《系本》。顾考父所校，仅存五篇；书序所录，亡者逾半。《系本》一书，今又久佚。欲稽前古，津逮莫由。其难一也。卜辞文至简质，篇恒十余言，短者半之。又字多假借，谊益难知。其难二也。古文因物赋形，繁简任意，一字异文，每至数十，书写之法，时有凌猎。或数语之中，倒写者一二；两字之名，合书者七八。体例未明，易生炫惑。其难三也。今欲祛此三难，勉希一得，乃先考索文字以为之阶。由小篆以溯金文，由金文以窥书契，穷其蕃变，渐得指归，可识之文，遂几五百。循是考求典制，稽证旧闻，途径渐启，局鎔为开，稽其所得，则有六端：

一曰帝系。商自武汤，逮于受辛，史公所录，为世三十。见于卜辞者，二十有三。史称“大丁未立”，而卜辞所载祀礼，俨同于帝王。又大乙、羊甲、卜丙、卜壬，较以前史，并与此异。而庚丁之作康祖丁，武乙之称武祖乙，文丁之称文武丁，则言商系者所未知。此足资考订者一也。

二曰京邑。商之迁都，前八后五。盘庚以前，具见《书序》。而小辛以降，众说多违。洹水故墟，旧称亶甲，今证之卜辞，则是徙于武乙，去于帝乙。又史称盘庚以后，商改称殷，而遍搜卜辞，既不见“殷”字，又屡言“入商”。田游所至，曰往曰出，商独言入。可知文丁、帝乙之世，国尚号商。《书》曰“戎殷”，乃称邑而非称国。此可资考订者二也。

三曰祀典。商之祀礼，复异周京，名称实繁，义多难晓。人鬼之祭，亦用崇雩。牢鬯之数，亦依卜定。王宾之语，为《洛诰》所基；辟刚之荐，非镐京所瓶。此可资考订者三也。

四曰卜法。商人卜祀，十干之日，各依祖名。其有爽者，则依爽名。又大事贞龟，小事骨卜。凡斯异例，先儒未闻。此可资考订者四也。

五曰官制。卿事之名，同于雅颂。大史之职，亦具《春官》。爰及近臣，并符周制。乃知姬旦六典，多本殷商。此可资考订者五也。

六曰文字。召公之名，是爽非𠂔。鸟鸣之字，从鸡非鸟。佳、鸟不分，子殊用。“牝”“牡”等字，牛羊任安。“牢”“牧”诸文，亦同斯例。又藉知大小二篆，多同古文。古文之真，间存今隶。此可资考证者六也。

予爰始操翰，讫于观成，或一日而辨数文，或数夕而通半义，譬如冥行长夜，乍睹晨曦，既得微行，又蹈荆棘。积思若瘁，雷霆不闻，操觚在手，寝馈或废。以兹下学之资，勉几上达之业。而既竭吾才，时亦弋获，意或天启其衷，初非吾力能至。但探赜索隐，疑蕴尚多。覆篲为山，前修莫竟，继是有作，不敢告劳，有生之年，期毕此志。订讹补阙，俟诸后贤。他山攻错，跂予望之。

海宁王静安国维跋其后曰：余为商遗先生书《殷墟书契考释》竟作而叹曰：三代以后言古文者，未尝有是书也。夫先生之于书契文字，其蒐集流通之功，盖不在考释下。即以考释言，其有功于经史诸学者，颇不让于小学。以小学言，其有功于篆文者，亦不让于古文。然考释之根柢在文字，书契之文字为古文，故姑就古文言之。我朝学术所超绝前代者，小学而已。顺康之间，昆山顾先生实创为说文、音韵之学。说文之学，至金坛段氏而洞其奥；古韵之学，经江、戴诸氏，至高邮王氏、栖霞郝氏而穷其用。使世无所谓古文者，谓小学至此观止可矣。古文之学，萌芽于乾嘉之际，其时大师宿儒，或殁谢，或笃老，未遑从事斯业。仪征之书，亦第祖述宋人，略加Z次而已。而俗儒鄙夫，不通字例，未习旧艺，辄以古文所托者高，知之者寡，利荆棘之未开，谓鬼魅之易画，遂乃肆其私臆，无所忌憚。

至庄述祖、龚自珍、陈庆镛之徒，而古文之厄极矣！近惟瑞安孙氏，颇守矩矱；吴县吴氏，独具悬解。顾未有创通条例，开拓阡奥，如段君之于说文，戴、段、王、郝诸君之于声音训诂者。余尝以段君之邃于说字而不及多见古文，以吴君之才识不后于段君，而累于一官，不获如段君之优游寿考，以竟其学，遂使我朝古文之学，不能与说文古韵方驾，岂不惜哉！先生早岁即传治文字故训，继乃博综群籍，多识古器，其才与识，固段吴二君之俦。至于从容问学，厌饫坟典，则吴君之所有志而未逮者也。而此书契文字，又段吴二君所不及见也。物既需人，人亦需物，书契之出，适当先生之世。天其欲昌我朝古文之学，使与说文、古韵正，抑又可知也！

余从先生游久，时时得闻绪论；比草此书，又承写官之乏，颇得窥知大体，扬榷细目。窃叹先生此书，铨释文字，恒得之于天人之表，而根源脉络一一可寻，其择思也至审，而收效也至宏。盖于此事，自有神诣。至于分别部目，创主义例，使后之

治古文者，于此得其指归，而治说文之学者，亦不能不探源于此。窃谓我朝三百年小学，开之者顾先生，而成之者先生也。昔顾先生音学书成，山阳张力臣为之校写。余今者亦得写先生之书，作字拙劣，何足方力臣，而先生之书足以弥缝旧阙，津逮来学者，固不在顾书下也云云。

当书未成，嘉兴沈子培方伯曾植寄以诗云：“二酉山深是首阳，千秋孤索炯心光。十繇郑说文能补，六太殷官府有藏。梦里倘逢师挚告，书成不借广微商。残年识字心犹在，海水天风跼一望。”胶州柯凤孙京卿亦寄一诗云老作东瀛客，无人记姓名。衣冠非夙昔，风义自平生。学已攀三古，书还拥百城。名山留纯业，未觉此身轻。”二首皆书于卷首。

殷墟书契考释序

商遗先生《殷墟书契考释》成，余读而叹曰：自三代以后，言古文字者，未尝有是书也。炎汉以来，古文间出，孔壁汲冢，与今之殷墟而三。壁中所得，简策殊多，《尚书》礼经，颇增篇数。而淹中五十六卷，同于后氏者十七；孔氏四十五篇，见于今文者廿九。因所已知，通彼未见，事有可藉，功非至难。而太常所肄，不出曲台之书；临淮所传，亦同济南之数。虽师说之重，在汉殊然，将通读之方，自古不易。至于误“廚”作“序”，以“軫”为“构”，“文人”之作“宁人”，“大邑”之书“天邑”，古今异文而同缪，伏、孔殊师而沿讹。言乎释文，盖未尽善。晋世《中经》，定于荀、束。

今世所存，《穆传》而已。读其写定之书，间存隶古之字，偏旁缔搆，颇异古文。随疑分释，徒成虚语。校之汉人，又其次矣。其余郡国山川颇出彝器，始自天水，迄于本朝。吕、薛編集于前，阮、吴考释于后。恒轩晚出，尤称绝伦。顾于创通条例，开拓阡奥，概乎其未有闻也。夫以壁经、冢史，皆先秦之文；姬、嬴、汉、晋，非绝远之世。彝器多出两周，考释已更数代。而校其所得，不过如此。况乎宣圣之所无徵，史佚之所未见，去古滋远，为助滋寡者哉。

殷墟书契者，殷王室命龟之辞，而太卜之所典守也。其辞或契于龟，或刻诸骨，大自祭祀征伐，次则行幸畋渔，下至牢鬯之数、风雨之占，莫不眇于鬼神，比其书命。爰自光绪之季，出于洹水之虚。先生既网罗以入秘藏，摹印以公天下，复于暇日撰为斯编。余受而读之，观其学足以指实，识足以洞微。发軫南阁之书，假途苍姬之器；会合偏旁之文，剖析孳乳之字。参伍以穷其变，比较以发其凡。悟一形繁简之殊，起两字并书之例。上池既饮，遂洞垣之一方；高矩攸陈，斯举隅而三反。颜黄门所谓“隐括有条例，剖析穷根源”者，斯书之谓矣。

由是大乙、卜丙，正传写之讹文，入商宅殷，辨国邑之殊号。至于諏日卜牲之典，王宾有奭之名，禋燎藕沈之用，牛羊犬豕之数，损益之事，羌难问于周京；文献之传，夙无徵于商邑。凡诸放逸，尽在敷陈，馭烛龙而照幽都，拊彗星而扫荒鬻。以视安国之所隶定、广微之所撰次者，事之难易，功之多寡，区以别矣。是知效灵者地，复开宛委之藏；弘道惟人，终佇召陵之说。后有作者，视此知津。

甲寅冬十有二月。

《宋代金文著录表》序

古器之出，盖无代而蔑有。隋唐以前，其出于郡国山川者，虽颇见于史，然以识之者寡而记之者复不详，故其文之略存于今者，惟美阳、仲山父二鼎与秦权、莽量而已。赵宋以后，古器愈出。秘阁、太常既多藏器，士大夫如刘原父、欧阳永叔辈，亦复搜罗古器、征求墨本，复有杨南仲辈为之考释，古文之学勃焉中兴。伯时、与叔复图而释之。政、宣之间，流风益煽，籀史所载，著录金文之书至三十余家，南渡后诸家之书犹多不与焉，可谓盛矣。今就诸书之存者论之，其别有三。与叔《考古》之图、宣和《博古》之录，既写其形，复摹其款，此一类也。啸堂《集录》、薛氏《法帖》，但以录文为主，不以图谱为名，此二类也。

欧、赵金石之目，才甫古器之评，长睿东观之论，彦远广川之跋，虽无关图谱，而颇存名目，此三类也。国朝乾嘉以后，古文之学复兴，辄鄙薄宋人之书，以为不屑道。窃谓《考古》、《博古》二图，摹写形制，考订名物，用力颇巨，所得亦多。乃至出土之地，藏器之家，苟有所知，无不毕记。后世著录家当奉为准则。

至于考释文字，宋人亦有凿空之功，国朝阮、吴诸家不能出其范围。若其穿凿纰缪，诚若有可讥者，然亦国朝诸老之所不能免也。今错综诸书，列为一表，器以类聚，名从主人。其有异同，分条于下。诸书所录古器之有文字者，胥具于是。惟《博古》所图钱、镜，《啸堂》所集古印，较近世所出，厥数甚鲜，姑阙焉，以供省览之便云尔。至于厘订名称、是正文字，则非此表之所有事矣。

甲寅五月。

《国朝金文著录表》序

古器物及古文字之学，一盛于宋，而中衰于元、明。我朝开国百年之时，海内承平，文化溥洽。乾隆初，始命儒臣录内府藏器，放《宣和博古图》，为《西清古鉴》。海内士夫闻风承流，相与购致古器，搜集拓本。其集诸家器为专书者，则始于阮文达之《集古斋钟鼎彝器款识》，而莫富于吴子宥阁学之《捃古录金文》。其著录一家藏器者，则始于钱献之别驾之《十六长乐堂古器款识》，而讫于端忠敏之《陶斋吉金录》。著录之器，殆四倍于宋人焉。数十年来，古器滋出。其新出土者，与以前散在人间未经著录者，又略得著录者之半。

光绪间，宗室伯羲祭酒广搜墨本，拟续阮、吴诸家之书。时郁华阁金文拓本之富，号海内第一。然仅排比拓本，未及成书也。稍后，罗叔言参事亦从事于此。其所搜集者，又较祭酒为多。辛亥国变后，祭酒遗书散出，所谓郁华阁金文者，亦归于参事。合两家之藏，其富过于阮、吴诸家远甚。汰其重复，犹得二千通，可谓盛矣。国维东渡后，时从参事问古文字之学，因得尽阅所藏拓本。参事属分别其已著录者与未著录者，将以次编类印行。又属通诸家之书，列为一表。自甲寅孟夏，讫于仲秋，经涉五月，乃始毕事。书成，都六卷。

长夏酷暑，墨本堆案。或一器而数名，或一文而数器。其间比勘一器，往往检书至十余种，阅拓本至若干册。穷日之力，不过尽数十器而已。既具稿，复质之参事，略加检定。然著录之器，既以千计，拓本之数，亦复准之。文字同异，不过豪厘之间；摹、拓先后，有工拙之别。虽再三覆勘，期于无误，然复重、遗漏，固自不免。庶竺古君子董而教之。

甲寅八月。

生霸死霸考

《说文》：“霸，月始生魄然也。承大月二日，小月三日。从月，声。《周书》曰‘哉生霸’。”此所引者，乃壁中古文。《汉书·律历志》引古文《尚书·武成》亦作“霸”。其由孔安国写定者，则从今文作“魄”。马融注古文《尚书·康诰》云：“魄，朏也。谓月三日始生兆朏，名曰魄。”此皆古文《尚书》说也。《法言·五百》篇：“月未望，则载魄于西；既望，则终魄于东。”《汉书·王莽传》：太保王舜奏：“公以八月载生魄庚子奉使朝，用书。”此平帝元始四年事。据《太初术》，是年八月己亥朔，二日得庚子，则以二日为载生魄。《白虎通·日月》篇：“月三日成魄。”本《礼·乡饮酒义》及《孝经援神契》。此皆今文家说，与许、马古文说同。是汉儒于生霸、死霸无异辞也。《汉志》载刘歆《三统历》，独为异说曰：“死霸，朔也。生霸，望也。”孟康申之曰：“月二日以往，明生魄死，故言死魄。魄，月质也。”歆之说《顾命》曰：“成王三十年四月庚戌朔，十五日甲子哉生霸。”则孟康之言，洵可谓得歆意者矣。

伪古文《尚书》用其说，故于《武成》篇造“哉生明”一语，以配哉生魄。伪《孔传》用其说，故以旁死魄为月二日，以魄生明死为在十五日以后，以哉生魄为十六日。相承二千年，未有觉其谬者。近德清俞氏樾。作《生霸死霸考》，援许、马诸儒之说，以正刘歆，其论笃矣。然于诸日名，除哉生魄外，尚用歆说。如以既死魄为一日，旁死魄为二日，既生魄为十五日，旁生魄为十六日，既旁生魄为十七日。此皆与名义不能相符。余谓《说文》“霸，月始生魄然也”，“朏，月未盛之明也”，此二字同义，声亦相近。故马融曰：“魄，朏也。”霸为月始生，为月未盛之明，则月之一日，霸死久矣。二日若承大月，则霸方生，谓之旁死霸，可乎？十五日以降，霸生已久，至是始谓之既生霸，不已晚乎？且朔与望，古自有初吉、既望二名。又召鼎铭先言“六月既望”，复云“四月既生霸”，一器之中，不容用两种记日法，则既生霸之非望，决矣。以既生霸之非望，可知既死霸之决非朔，而旁死霸之非二日，旁生霸之非十六日，又可决矣。余览古器物铭，而得古之所以名日者凡四：曰初吉，曰既生霸，曰既望，曰既死霸。因悟古者盖分一月之日为四分：一曰初吉，谓自一日至七、八日也；二曰既生霸，谓自八、九日以降至十四、五日也；三曰既望，谓十五、六日以后至二十二、三日；四曰既死霸，谓自二十三日以后至于晦也。八、九日以降，月虽未满，而未盛之明则生已久。二十三日以降，月虽未晦，然始生之明固已死矣。

盖月受日光之处，虽同此一面，然自地观之，则二十三日以后月无光之处，正八日以前月有光之处，此即后世上弦、下弦之由分。以始生之明既死，故谓之既死霸。此生霸、死霸之确解，亦即古代一月四分之术也。若更欲明定其日，于是有哉生魄、《书·康诰》及《顾命》。旁生霸、《汉书·律历志》引古文《尚书·武成》、《逸周书·世俘解》，均作“既旁生霸”，“既”字疑衍。旁死霸古文《尚书·武成》及《周书·世俘解》。诸名。哉生魄之为二日或三日，自汉已有定说。旁者，

溥也，义进于既。以古文《武成》差之，如既生霸为八日，则旁生霸为十日；既死霸为二十三日，则旁死霸为二十五日。事与义会，此其证矣。凡初吉、既生霸、既望、既死霸各有七日或八日。哉生魄、旁生霸、旁死霸各有五日若六日。而第一日亦得专其名。书器于上诸名，有作公名用者，如《顾命》：“惟四月哉生魄，王不恡。甲子，王乃洮颍水。”哉生魄不日，至甲子乃日者，明甲子乃哉生魄中之一日。而王之不恡，固前乎甲子也。静敦云：“惟六月初吉，王在京。丁卯，王命静司射。”彝云：“惟六月初吉，王在郑。丁亥，王格大室。”敦云：“惟二年正月初吉，王在周邵宫。丁亥，王格于宣榭。”初吉皆不日，至丁卯、丁亥乃日者，明丁卯、丁亥皆初吉中之一日。至王在、在郑、在周邵宫，固前乎丁卯、丁亥也。更证之他器，则虢季子白盘云“惟王十有二年正月初吉丁亥”，案：宣王十二年正月乙酉朔，丁亥乃月三日。吴尊云“惟二月初吉丁亥”，末云“惟王二祀”，案：宣王二年二月癸未朔，则丁亥乃月五日。

师兑敦云“惟三年二月初吉丁亥”，案：幽王三年二月庚辰朔，丁亥乃月之八日。是一日至八日均可谓之初吉也。师虎敦云“惟元年六月既望甲戌”，案：宣王元年六月丁巳朔，十八日得甲戌，是十八日可谓之既望也。兮伯吉父盘亦称兮盘。云“唯五年三月既死霸庚寅”，此器有伯吉父之名，有伐玃之事，当即《诗·六月》之文武吉甫所作，必宣王时器，而宣王五年三月乙丑朔，二十六日得庚寅。又如颂鼎、颂敦、颂壶诸器皆云“惟三年五月既死霸甲戌”，此诸器，自其文字辞命观之，皆厉、宣以降之器，而宣王三年六月乙亥朔，三十日得甲戌，是二十六日、三十日皆得谓之既死霸也。此为用公名者也。其用为专名者，如古文《武成》云：“惟一月壬辰旁死霸，若翌日癸巳。”又云：“粤若来二月既死霸，粤五日甲子。”又云：“惟四月既旁生霸，粤五日庚戌。”《召诰》云：“惟二月既望，越六日乙未。”此皆以旁死霸、既死霸、既旁生霸、既望等专属弟一日，然皆不日。惟《武成》之旁死霸独日，顾不云“旁死霸壬辰”，而云“惟一月壬辰旁死霸”者，亦谓旁死霸自壬辰始，而非壬辰所得而专有也。故欲精纪其日，则先纪诸名之弟一日，而又云“粤几日某某”以定之，如《武成》、《召诰》是也。否则，但举初吉、既生霸诸名，以使人得知是日在是月之弟几分，如《顾命》及诸古器铭是也。苟由此说以考书器所纪月日，皆四达而不悖。何以证之？古文《武成》云：“惟一月壬辰旁死霸，若翌日癸巳，武王朝步自周，于征伐纣。”又云：“粤若来二月既死霸，粤五日甲子，咸刘商王纣。”又云：“惟四月既旁生霸，粤五日庚戌，武王燎于周庙。”由旧说推之，既以一月二日为壬辰，二月五日为甲子，则四月中不得有庚戌。史迁盖不得其说，于是移武王伐纣于十二月，移甲子诛纣于正月。今《史记·周本纪》作“二月甲子昧爽”。徐广曰：“二月一作正。”

刘歆不得其说，于是于二月后置闰。然商时置闰皆在岁末，故殷虚卜辞屡云“十三月”。武王伐纣之时，不容遽改闰法，此于制度上不可通者，不独以既死霸为朔，旁死霸为二日，既旁生霸为十七日，为名之不正而已。若用今说，则一月戊辰朔，二十五日壬辰旁死霸，次日得癸巳，此武王伐纣兴师之日也。二月戊戌朔，二十三

日庚申既死霸，越五日至二十七日得甲子，是咸刘商王纣之日也。三月丁卯朔，四月丁酉朔，十日丙午既旁生霸，十四日得庚戌，是武王燎于周庙之日也。于是《武成》诸日月，不待改月置闰而可通。此旁生霸为十日、既死霸为二十三日、既旁死霸为二十五日之证也。或曰：如子说，则戊午为二月二十一日，一月无戊午。而《太誓序》言“一月戊午师渡盟津”，然则《书序》非欤？曰：史迁、刘歆之失，正由牵合《武成》与《太誓序》之故。《太誓序》言戊午在一月，于是不得不以《武成》之“二月既死霸”为“二月朔”。二月朔为庚申，则四月无庚戌。于是或改月、或置闰以通之。然史迁于《太誓》本有二说：《周本纪》以为武王十一年伐纣时作，《齐太公世家》以为九年观兵时作。

今以前说就《武成》本文考之，一一符合。不当以系年不定之序乱经，是可决矣。又，召鼎纪事凡三节。第一节云“惟王元年六月既望乙亥”，下纪王命召司卜事，召因作牛鼎之事。次三两节皆书约剂。次节云“惟王四月既生霸辰在丁酉”，则记小子讼事。三节则追纪匡人寇召禾后偿召之事。第三节之首，明纪“昔僖岁”，则首次两节必为一岁中事。今以六月既望乙亥推之，假令既望为十七日，则是月己未朔，五月己丑朔，四月庚申朔，无丁酉，中间当有闰月。此器乃宗周中叶物。周置闰不在岁终，由《召诰》、《洛诰》三月十二日为乙卯，十二月有戊辰知之。若《武成》在武王伐商时固不得改闰法也。则四月当为庚寅朔，八日得丁酉，此既生霸为八日之证也。要之，古书残阙，古器之兼载数千支而又冠以生霸、死霸诸名者，又仅有召鼎一器。然据是器，已足破既生霸为望、既死霸为朔之说。既生霸非望，自当在朔望之间。既死霸非朔，自当在望后朔前。此皆不待证明者。而由是以考古书古器之存者，又无乎不合，故特著之。后之学者，可无惑于刘、孟之说矣。√

《毛公鼎考释》序

三代重器存于今日者，器以盂鼎、克鼎为最巨；文以毛公鼎为最多。此三器皆出道光、咸丰间，而毛公鼎首归潍县陈氏，其打本、摹本亦最先出。一时学者竞相考订。嘉兴徐寿臧明经（同柏）、海丰吴子宓阁学（式芬）、瑞安孙仲颂比部（诒让）、吴县吴清卿中丞（大澂）先后有作。明经首释是器，有凿空之功。阁学矜慎，比部闳通，中丞于古文字尤有县解。于是此器文字可读者，十且八九。

顾自周初迄今垂三千年，其迄秦汉亦且千年。此千年中，文学之变化脉络，不尽可寻，故古器文字有不可尽识者，势也。古代文字假借至多，自周至汉，音亦屡变。假借之字，不能一一求其本字。故古器文义有不可强通者，亦势也。自来释古器者，欲求无一字之不识，无一义之不通，而穿凿附会之说以生。穿凿附会者，非也，谓其字之不可识、义之不可通而遂置之者，亦非也。文无古今，未有不文从字顺者。

今日通行文字，人人能读之、能解之。《诗》、《书》彝器亦古之通行文字。今日所以难读者，由今人之知古代不如知现代之深故也。苟考之史事与制度、文物，以知其时代之情状；本之《诗》、《书》求其文之义例，考之古音，以通其义之假借，参之彝器，以验其文字之变化：由此而之彼，即甲以推乙，则于字之不释、义之不可通者，必间有获焉。

然后阙其不可知者，以俟后之君子，则庶乎其近之矣。孙、吴诸家之释此器，亦大都本此方法。惟用之有疏密，故得失亦准之。今为此释，于前人之是者证之，未备者补之，其有所疑，则姑阙焉。虽于诸家外所得无多，然可知古代文字自有其可识者与可通者，亦有其不可识与不可强通者，而非如世俗之所云云也。

丙辰四月。

说觥

凡传世古礼器之名，皆宋人所定也。曰钟、曰鼎、曰鬲、曰甗、曰敦、曰簋、曰簠、曰尊、曰壶、曰盃、曰盘、曰匱、曰奩，皆古器自载其名，而宋人因以名之者也。曰爵、曰觚、曰觶、曰角、曰斚，古器铭辞中均无明文，宋人但以大小之差定之。然至今日，仍无以易其说。知宋代古器之学，其说虽疏，其识则不可及也。若国朝人所命名，则颇有可议者。如阮文达元。所藏器有子兕觥，其器今在吴县潘氏，不可得见。据文达所记则云：“器制似爵而高大，盖作牺首形，有两角。”文达名之曰“兕觥”，又为之说曰：“《毛诗·卷耳》‘我姑酌彼兕觥’，传云‘角爵也’。毛说盖以兕觥为似角之爵，其制无双柱、无流，同于角；有三足，同于爵。诂训甚明，非谓以兕角为之也”云云。案：阮释毛传非是。然由其所说，足知此器无双柱而有三足，又比爵为高大，与宋以来所名为角者无一不合，惟盖作牛首形，与他角盖异。余谓此亦角也，其盖作牛首者，亦由浚阳端氏所藏飞燕角，其盖作燕张两翅形，皆古人随意象物，未足为兕觥之明证也。《擘经室四集》（七）《赋得周兕觥诗》注云：觥高七寸，下器皆如爵，上有盖，盖作牺首。其诗云：兕觥高似爵，有盖制特强。盖流作牺首，斛然额角长。盖叶亦如叶，相合诚相当，左右各有缺，双柱居其旁。则又有流有柱，与《积古斋款识跋》中所记互异。去岁，见贝子溥伦延鸿阁所藏父丙角盖，亦作牺首形，有流无柱。端氏飞燕角则并无流，不知阮氏器究何如也。又潍县陈氏有妇关兕觥，未见原器及全形拓本，其制或与阮氏器同。然则传世古器中无兕觥乎？曰：有。

兕觥之为物，自宋以来冒他器之名，而国朝以后，又以他器冒兕觥之名，故知真兕觥者寡矣。案：自宋以来，所谓匱者有二种：其一器浅而巨，有足而无盖，其流狭而长；其一器稍小而深，或有足，惟《博古图》之文姬匱有之，他器则否。或无足，而皆有盖，其无盖者，乃出土时失之。其流侈而短，盖皆作牛首形。估人谓之虎头匱，实则牛首也。《博古图》十四匱中之启匱、凤匱、三夔匱、父癸匱、文姬匱、遍地雷纹匱、风夔匱七器，《西清古鉴》三十匱中之司寇匱、祖匱、伯和匱、女匱、山匱、般匱、利匱、举匱、二牺匱、饕餮匱十一器，及端氏所藏诸女匱、弘匱、甫人匱三器，皆属此种。

余如《积古斋》著录之父辛匱、父癸匱盖，《筠清馆》著录之奉册匱、父辛匱、册父乙匱，《攷古录》著录之亚匱盖、匱、文父丁匱、诸女匱，并予所见拓本中之析子孙父乙匱、父戊匱、作父乙匱，虽未见原器，然观其铭文，属乙类无疑。中有二匱盖，尤其证也。余以为此非匱也，何以明之？甲类之匱，其铭皆云“某作宝匱”，或云“作旅匱”，或云“作媵匱”，皆有匱字；而乙类三十余器中绝无匱字。惟端氏之甫人匱铭云“甫人父作旅匱其万人用”。然其铭后刻，乃摹吴县曹氏之甫人匱为之者。曹匱有图，乃甲类，非乙类也。此一证也。匱乃燕器，非以施之鬼神，而乙类之器，其铭多云“作父某宝尊彝”，如父辛匱，乃与吴县曹氏、诸城刘氏之父辛（尊）同文。诸女匱亦与浚阳端氏之诸女方爵同文，皆祭器之证。其为孝享之

器，而非沃盥之器可知。此二证也。古者盥水盛于盘，洗匜惟于沃盥时一用之，无须有盖，而乙类皆有之。此三证也。

然则既非匜矣，果何物乎？曰：所谓兕觥者是已。何以明之？曰：此乙类二十余器中，其有盖者居五分之四，其盖端皆作牛首，绝无他形，非如阮氏兕觥仅有一器也。其证一。《诗·小雅》、《周颂》皆云“兕觥其觶”，毛于觶字无训，郑惟云“觶然陈设”而已。案：觶，《说文》作觥，当与杓木今《诗》作樛木。之杓音义同。觥者，曲也，从卩得声之字，如句、之、纠等皆有曲意。今《诗》作觶，又假借作掬，以《诗》证之，则《大东》云“有掬棘匕”，又云“有掬天毕”，《良耜》云“有掬其角”，《泮水》云“角弓其觶”，凡匕与角、与弓，其形无不曲者。毕之首有歧，亦作曲形，则兕觥形制亦可知矣。今乙类匜器盖皆前昂后低，当流处必高于当柄处若干，此由使饮酒时酒不外溢而设，故器、盖二者均觶然有曲意，与《小雅》、《周颂》合。其证二。《诗》疏引《五经异义》述毛说并礼图，皆云觥大七升，是于饮器中为最大，今乙类匜比受五升，韩《诗》说。若六升《说文》引或说。之罍尤大，其为觥无疑。罍者，假也。觥者，光也，充也，廓也，皆大之意。其证三。觥有至大者，所容与尊壶同。《诗·卷耳》“我姑酌彼兕觥”与上章“我姑酌彼金罍”，文例正同。金罍为尊，则兕觥亦尊也。《七月》“称彼兕觥”，则为饮器。盖觥兼盛酒与饮酒二用，与罍同也。立此六证，乙类匜之为兕觥甚明。然此说虽定于余，亦自宋人发之，宋无名氏《续考古图》有兕觥二，其器皆属匜之乙类，此书伪器错出，定名亦多误，独名乙类匜为兕觥，乃至当不可易，今特为疏通证明之。然则古礼器之名，虽谓之全定自宋人，无不可也。√

说环玦

《尔雅·释器》：“肉倍好谓之璧，好倍肉谓之瑗，肉、好若一谓之环。”环与璧、瑗之异，但以肉之大小别之，意其制度殆与璧同。顾余读《春秋左氏传》：“宣子有环，其一在郑商。”知环非一玉所成。岁在己未，见上虞罗氏所藏古玉一，共三片，每片上侈下敛，合三而成规。片之两边各有一孔，古盖以物系之。余谓此即古之环也。环者，完也，对玦而言。阙其一则为玦。玦者，缺也。

古者城缺其南方谓之。环缺其一，故谓之玦矣。以此读《左氏》，乃得其解。后世日趋简易，环与玦皆以一玉为之，遂失其制。而又知古环之非一玉，于是有连环。《庄子·天下篇》：“连环可解也。”《齐策》：“秦始皇遗君王后玉连环，曰：‘齐多知，而解此环者不？’君王后引椎椎破之，谢秦使曰：‘谨以解矣。’”不知古之环制，如罗氏所藏者，固无不可解也。√

魏石经考一

汉、魏石经同立于太学，其时相接，其地又同。昔人所记，往往互误。故欲考魏石经之经数、石数，必自汉石经始矣。汉石经经数，据《后汉书·灵帝记》、《卢植传》、《儒林传序》、《宦者传》，皆云“五经”，《蔡邕传》、《儒林传》“张驯下”则云“六经”，《隋书·经籍志》云“七经”。其目，则《洛阳记》（《后汉书·蔡邕传》注引）举《尚书》、《周易》、《公羊传》、《礼记》、《论语》五种，《洛阳伽蓝记》举《周易》、《尚书》、《公羊》、《礼记》四种，《隋志》则有《周易》、《尚书》、《鲁诗》、《仪礼》、《春秋》、《公羊传》、《论语》七种（据拓本）。宋时存《诗》、《书》、《仪礼》、《公羊传》、《论语》五种（据残石X此先儒所谓五、六、七经之不同，不可得而详者也。其石数，则《西征记》（《太平御览》卷五百八十九引）云“四十枚”，《洛阳记》云“四十六枚”，《洛阳伽蓝记》云“四十八碑”，《水经注·谷水篇》复以四十八碑为魏三字石经，《北齐书·文宣帝纪》云“五十二枚”。此亦先儒所谓不可得而详者也。余谓欲知汉石经之经数、石数，当以二者参伍定之。今用此法互相参校，则经数莫确于《隋志》，石数莫确于《洛阳记》。《记》云：“太学在洛城南开阳门外，讲堂长十丈，广二丈。堂前石经四部，本碑四十六枚。西行，《尚书》、《周易》、《公羊传》十六碑存，十二碑毁，南行，《礼记》十五碑悉崩坏；东行，《论语》三碑，二碑毁。”《后汉书·蔡邕传》注引此，但云《洛阳记》，而《光武纪》注引首三语，云“陆机《洛阳记》”，则全文亦当为机语。然陆机时汉石经当未崩毁（《魏志·王肃传》注引《魏略》：“黄初后，扫除太学之灰炭，补旧石经之缺坏。”是汉石经虽经董卓之乱，已修补完具。

自是讫晋初，洛阳初无兵火，自无崩坏之理），则所引疑非机书（考《隋志》载《洛阳记》四卷，无撰人姓名；《洛阳记》一卷，陆机撰；《洛阳图》一卷，晋怀州刺史杨佺期撰。佺期曾为龙骧将军，《后汉书·儒林传》注引杨龙骧《洛阳记》，是佺期《图》亦有《记》称。《元和郡县图志》又引华延雋《洛阳记》，新、旧两《唐书·志》皆有戴延之《洛阳记》一卷。是《洛阳记》共有四五种），然其记碑之方位、存毁，较《水经注》、《洛阳伽蓝记》为详，固当在酈道元、杨街之二书前矣。惟所记经数，则不无舛误。《记》于西行二十八碑中，失记《鲁诗》及《春秋》二经；又南行十五碑之《礼记》，实指《仪礼》言；皆得以诸经字数证之。汉石经，据传世宋拓本，《尚书》、《论语》大率每行七十三四字（因古本、今本字数不同，故不能决其每行若干字），他经当准之。又据《洛阳记》载《朱超石与兄书》，石经高丈许，广四尺，则纵得七十余字者，横当得三十余字。今以一碑册五行、行七十五字计，则每碑得二千六百二十五字。又汉、魏石经皆表里刻字，则每碑得五千二百五十字，二十八碑当得十有（五万四千）[四万七千]字，而《洛阳记》谓“西行，《尚书》、《周易》、《公羊传》十六碑存，十二碑毁”，似此二十八碑止书三经。今据唐石经字数，则《周易》二万四千四百三十七字，《尚书》二万七千一百三十四字；而汉石经无伪古文二十五篇并孔安国序，仅得一万（千八）[

八千]六百五十字。又唐石经《公羊传》四万四千七百四十八字，汉石经《公羊传》无经文并何休序，仅得二万七千五百八十三字。三经共七万六千七百七十字，则十（四）[五]碑已足容之，无须二十八碑。惟加以《诗》四万八千四百八十八字（据唐石经《毛诗》字数）。

《鲁诗》字数未必与毛同，然当不甚相远。他经放此），《春秋经》一万六千五百七十二字（据宋李焘《春秋古经后序》所计），共十有二万八千又九十字，约需二十有五碑。而据《隶释》所载汉石经残字！则《鲁诗》每章之首与《公羊传》每年之首！皆空一格！又经后各有校记题名！恐正需二十八碑。此西行二十八碑于《易》、《书》、《公羊传》外，当有《诗》、《春秋》二经之证也。《记》又云：“南行，《礼记》十五碑。”魏晋以前，亦以今之《仪礼》为《礼记》（郑君《诗·采芣》笺引《少牢馈食礼》，郭璞《尔雅·释诂》注引《士相见礼》，《释言》注引《有司彻》，《释草》注引《丧服传》，皆云《礼记》，非指《小戴礼》之四十九篇。以经字证之，《礼记》九万八千九百九十九字（据唐石经），非汉石十五碑所能容（以汉石经每碑字数计，须十有九碑），惟《仪礼》五万七千一百一十一字，则需十一碑，其余当为校记、题名。

此南行十五碑之《礼记》实为《仪礼》之证也。其所云“东行，《论语》三碑，原作“二碑”，顾氏《石经考》引改为“三碑”。以（都）[碑]数计之，顾改是也），与《论语》字数正合。然则以碑数与经文字数互校，汉石经经数当为《易》、《书》、《诗》、《礼》（《仪礼》）、《春秋》五经并《公羊》、《论语》二传，故汉时谓之五经，或谓之六经，《隋志》谓之七经。除《论语》为专经者所兼习，不特置博士外，其余皆当时博士之所教授也。其石数，当为四十六碑，而《洛阳伽蓝记》所举之《礼记》（后魏时专谓四十九篇者为《礼记》）《隋志》注之梁时郑氏《尚书》八卷、《毛诗》二卷，既非博士所业，又增此三种，则与石数不能相符，此皆可决其必无者。汉石经之经数、石数既明，然后魏石经之经数、石数，可得而考矣。

魏石经考二

魏石经所刊经数，据《西征记》《洛阳伽蓝记》，为《尚书》、《春秋》二部。《隋书·经籍志》所载，亦仅有三字石经《尚书》九卷（梁有十三卷）、三字石经《尚书》五卷、三字石经《春秋》三卷（梁有十二卷）惟《旧唐书·经籍志》乃有三字石经《尚书》古篆三卷、三字石经《左传》古篆书十三卷。《唐书·艺文志》同。惟《左传》十三卷作十二卷。是于《尚书》、《春秋》二经外，又有《左氏传》。《隶续》录洛阳苏望所刊魏石经遗字，除《尚书》、《春秋》外，亦有《左氏·桓七年传》九字、《桓十七年传》二十六字。然以古书所记魏石经石数参证之，则疑窦不一而足。

案魏石经石数，据《水经注·穀水篇》，则四十八碑据《西征记》（《御览》卷五百八十九引）则三十五碑；据《洛阳伽蓝记》，则二十五碑。而无论二十五碑、三十五碑、四十八碑，均不足以容《尚书》、《春秋》、《左传》三书字数。考唐石经，《尚书》二万七千一百三十四字，《春秋》、《左氏传》十九万八千九百四十五字，共得二十二万六千又七十九字。除伪古文二十五篇并孔安国序八千四百八十四字、杜预序一千六百又七字，共一万又九十一字，计得二十一万五千九百八十八字。每字三体，当得六十四万七千九百六十四字。

而魏石经每石字数仅四千有奇，余就黄县丁氏所藏魏石经残石（此石光绪间出洛阳，潍县估人范某得之洛阳某村路旁茶肆，其面已遭椎击。范估见其似有字迹而不存笔画！摸索石背，则字迹显然，乃以五千钱购归，售诸费县丁氏。此范估亲为罗叔言参事言者），以经文排比之，则每行得六十字，更以此行款排比《隶续》所录魏石经《尚书》、《春秋》残字，亦无一不合，知每石皆每行六十字。又量其字之长短，则每八字当汉建初尺一尺弱，六十字当得建初尺七尺有半。碑之上下当有余地，则与《西征记》及《水经注》所云“石长八尺”者合矣。《水经注》复云：“石长八尺，广四尺。”八尺之长，除上下余地，得六十字，则四尺之广不止容三十字（以各石相接，故左右不须有空处），当得三十四五字。今以每碑三十五行、行六十字计之，则每碑得二千一百字、加以表里刻字（《洛阳伽蓝记》所云如是。今丁氏残石虽仅存一面，然其他面尚隐隐有字迹），则得四千二百字。故《尚书》、《春秋》、《左传》三经字数，须一百五十五石乃能容之。此不独与古书所记石数无一相合，亦恐非正始数年中所能办。

且考之隋以前纪载，未尝及《左传》，核之石数，又不能容三经，疑当时所刊《左传》，实未得全书十之二三。《隶续》所录《左传》文，乃桓公末年事。案《左氏》隐、桓二公《传》，共九千三百三十九字，加以《尚书》一万八千六百五十字、《春秋》一万六千五百七十二字（篇题字未计），共四万四千五百六十一字。每字三体，得十有三万三千六百八十三字。

今依《西征记》三十五碑字数计之，得十有四万七千字，盖所刊《左氏传》当至在庄公中叶而止。若如《洛阳伽蓝记》所云二十五碑，则尚不足容《尚书》、《春秋》二经字数（如上所计，以二十五碑字数校二经字数之三倍，尚不足六百六十六字），而《水经注》之四十八碑，实为汉石经石数。故魏石经石数，当以《西征纪》为最确也。其经数，则《尚书》、《春秋》外，《左传》本未刊成，故六朝及唐初人纪载均未之及。唐宋以后，搜求残石及遗拓始及之，而新、旧二《志》十二卷或十三卷之数，殆兼《春秋》经言之，且未必遽为全卷，固非可据以难上文所论述也。

魏石经考三

汉一字石经，为《周易》、《尚书》、《诗》、《仪礼》、《春秋》、《公羊传》、《论语》七种，除《论语》不在经数、不立博士外，余皆立于学官之经，博士之所讲授者也。且汉石经后各有校记，盖尽列学官所立诸家异同。《隶释》谓《石经》有一段二十余字，零落不成文，惟有“叔于田一章”及“女曰鸡”八字可读，其间有“齐”、“韩”字，盖叙二家异同之说。是汉石经用《鲁诗》本，而兼存齐、韩二家异字也。又《隶释》所录《公羊·哀十四年传》，后有三行，皆有“颜”氏有、“无”语，是汉石经《公羊》用严氏本，而兼存颜氏异字也。《论语》后有“包”、“周”及“恣、毛、包、周”字，是《论语》亦用某本，而兼存盍、毛、包、周诸本异字也。以上《诗》之鲁、齐、韩、《公羊》之严、颜，皆立于学官之书。石经以一本为主，而复著他本异同于后，则当时学官所立诸家经本，已悉具于碑。是蔡邕等是正六经文字之本旨，而后儒所以咸取正于是者也。

由是推之，汉石经《易》、《书》、《礼》三经，其校记虽不存一字，然后汉博士，《易》有施、孟、梁邱、京氏四家，《书》有欧阳、大小夏侯三家，《礼》有大小戴二家，石经本亦必以一家为主，而于后著诸家之异同，如《鲁诗》、《公羊传》例，盖可断也。盖汉自石渠、虎观二议，已立讲五经同异之帜。嗣是章帝令贾逵撰欧阳、大小夏侯《尚书》与古文同异，又撰齐、鲁、韩《诗》与毛氏异同，马融亦著三传异同。郑玄注《周官》，存古书字，又著“杜子春读为某，郑大夫、郑司农读为某”，是亦著杜、郑二家之异同；注《礼经》，则著古今之异同；注《论语》，则存鲁读。当时学风，已可概见。况石经之刊，为万世定本，既不能书刊诸家，又不可专据一家，则用一家之本，而于后复列学官所立诸家之异同，固其所也。然汉学官所立皆今文，无古文，故石经但列今文诸经异同，至今文与古文之异同，则未及也。而自后汉以来，民间古文学渐盛，至与官学抗行。逮魏初复立太学，暨于正始，古文诸经盖已尽立于学官。

此事史传虽无明文，然可得而（微）[徵]证也。考《魏略》言：“黄初中，太学初立，有博士十余人。”，《后汉书·儒林传》注及《魏志·杜畿传》注引）《魏志·文帝纪》言：“黄初五年夏四月，立太学，制五经课试之法，置《春秋谷梁》博士。”似魏初博士之数与后汉略同，但增置《春秋谷梁》一家。然考其实际，则魏学官所立诸经，乃与后汉绝异。《齐王芳纪》：“正始六年十二月辛亥，诏故司徒王朗所作《易传》，今学者得以课试。”（即博士课试五经所用）《王肃传》：“肃为《尚书》、《诗》、《论语》、三《礼》、《左氏》解及撰定父朗所作《易传》，皆立于学官。”又《高贵乡公纪》载其幸太学之问，所问之《易》，则郑玄注也；所讲之《书》，则马融、郑玄、王肃之注也；所讲之《礼》，则小戴记，盖亦郑玄、王肃注也。是魏时学官所立诸经，已为贾、马、郑、王之学，其时博士可考者，亦多古文家，且或为郑氏弟子也（详见余《汉魏博士考》）。

当时学官所立者既为古学，而太学旧立石经，犹是汉代今文之学，故刊古文经传以补之。《隋志》载梁有三字石经《尚书》十三卷、三字石经《春秋》十二卷、此盖魏石经二经足本。十三卷者，后来伪孔传之卷数，与马融、王肃注本之十一卷、郑玄注本之九卷，分卷略同；而与欧阳、大小夏侯之二十九卷或三十一卷，及壁中书之五十八篇为四十六卷者绝异，乃汉魏间分卷之法。其《春秋》十二卷，则犹是《汉志·春秋古经》之篇数，亦即贾逵三家经本训诂之卷数（贾以《左氏经》为底本），与《汉志公》、《谷》二家经各十一卷者不同。盖汉魏以前，《左氏》所传《春秋经》皆如是也。魏时学官所立《尚书》既为马、王、郑三家，则石经亦当用三家之本。三家虽同为古文《尚书》，然其本已改今字。陆氏《释文》所引马、郑本经文！绝非壁中书，王肃本亦然。敦煌本未改字！《尚书释文》云：“此篇既是王注，应作今文，相承以续孔传，故亦为古字。”（今本为宋时陈鄂辈删去）是王肃本亦作今字。而此具古、篆、隶三体者：壁中本古文《尚书》，后汉时尚在秘府，许慎见之，郑玄亦见之。中更董卓之乱，虽未必存，然当时未必无传写之本。《隋志》谓：“晋世秘府所存，有古文《尚书》经文。”《尚书正义》引束皙云：“盘庚序”，将治亳殷，，孔子壁中书作，将始宅殷，。”皙所据壁中书，盖即晋秘府之古文《尚书》，虽未必为壁中原书，亦当自壁中本出矣。且汉魏间除秘府本外，尚有民间传写之本。卫恒《四体书势》谓其祖“敬侯（即卫觐）尝写邯鄲淳《尚书》以示淳，而淳不别”。案淳虽以传古文书法名，然书法与书体亦不能彊别。

且《魏略》言“淳于黄初中为博士”，是淳盖亦传古文《尚书》而为《书》博士者，其本宜有所受之。是魏时《尚书》古文固有秘府本及民间本矣。至古文《春秋经》及《左氏传》，至魏时尚存否虽不可考，然《周礼·小宗伯》注引古文《春秋经》“公即位”为“公即立”，是郑君犹及见之。正始距郑君之卒，不过数十年，或当时尚有传写之本矣。且汉魏之间，字指之学大兴，魏时博士如邯鄲淳，如苏林，如张揖，皆通古今字指者也（《王粲传》注引《魏略》：“邯鄲淳，善《苍》、《雅》、虫篆、许氏字指。”又《刘劭传》注引《魏略》：“苏林通古今字指。”《隋志》张揖有《古今字诂》三卷。字指，《旧唐志》作“字旨”，或谓“字义之学”。然《隋志》有《杂字指》一卷，后汉太子中庶子郭显卿撰。又《字指》二卷，晋朝议大夫李彤撰。《汗简》多引郭显卿《字指》、李彤《集字》，其字皆古文。是《字指》殆谓古今字之学，其体例当如《汉志》之《八体六技》及卫宏《古文官书》也）又《魏略·儒宗传序》谓“太和、青龙中，太学课试，台阁举格太高，加不念统其大义，而问字指、墨法、点注之间”，是课试诸生亦用字指。

魏之石经古文，果壁中本若其子本，抑用当时字指学家自定之本，均不可知。然即令出于字指学家之手，而字指学家之所据，亦不外壁中古文，因汉时除壁中书及张苍所传《春秋左氏传》外，别无古文故也（《说文序》虽言“郡国山川所出彝器，与古文相似”，然实未引一字）今就魏石经遗字中古文观之，多与《说文》所载壁中古文及篆文合（《说文》篆文中本多古文），且有与殷周古文（谓殷虚书契文字及古金文。至壁中书，则多先秦文字也）合而为许书所未载者。然则谓魏石经古文

出于壁中本，或其三写、四写之本，当无大误。即谓出于当时字指学家之手，然虽非壁中之本，犹当用壁中之字，固不能以杜撰讥之矣。

至其与壁中本相异者，亦可得而言。壁中《尚书》五十八篇，为四十六卷，而魏石经据《隋志》注仅十三卷，且壁中本尚有逸《书》十六篇（建武时亡《武成》一篇，为十五篇），而魏石经若数逸篇，则三十五碑不能刊至《左传》桓、庄间。是其篇数当与马、郑本同，是卷数、篇数均异于壁中本也。又石经《尚书》十二卷，虽若与梅赜本卷数同，然无梅本所增之二十五篇，此亦可以石数、字数证之。又梅本《书序》分冠各篇之首，而石经残字中，《吕刑》与《文侯之命》相接处，除《文侯之命》篇题外，无容《书序》之余地。故知石经《书序》亦自为一卷，与马、郑本同，而与梅本绝异也。要之，汉、魏石经皆取立于学官者刊之。汉博士所授者皆今文，故刊今文经。

魏学官所立《尚书》为马、郑、王三家，故但刊三家所注之三十四篇。其逸篇绝无师说，又不立学官，且当时亦未必存，故不复刊。亦犹《尚书》、《逸礼》、《春秋左氏传》同为古文，逸《礼》绝无师说，又不立学官，故仅刊古文《尚书》及《春秋左氏传》也。其刊此三经者，以汉世所未刊；其不刊逸《书》及逸《礼》者，以学官所不立。至《费氏易》、《毛诗》、《周官》、《礼记》、《谷梁春秋》，魏时亦已立学官，而石经无之者，盖《礼记》、《谷梁传》均为今学，《费易》、《毛诗》虽为古学，或已无古文之本，而魏石经必具三体，故未之及；或欲刊而未果，与《左传》之未毕工者同（《隋志》“一字石经《鲁诗》六卷”下注：“梁有《毛诗》二卷，亡。”案汉时《毛诗》未立学官，绝无刊《毛诗》之理。如果有《毛诗》，或出魏时所刊。后人以用一字，与汉石经同，遂附之《鲁诗》下耳）。然则汉、魏石经皆刊当时立于学官之经，为最显著之事实矣。

魏石经考四

拓本之事，未识始于何时，然拓本之始见于纪载者，实自石经始。《后汉书·蔡邕传》碑始立，其观视及摹写者，车乘日千余两。”《晋书·赵至传》至游太学，遇嵇康于学写石经。”《石季龙载记》遣国子博士诣洛阳写《石经》。”是自汉至晋之中叶，尚无拓墨之法。《隋志》注载“梁有一字石经”、“三字石经”，其为拓本或写本，盖无可考。惟《隋志》著录之二种石经，确为拓本，《志》与《封氏闻见记》均明言之。观其所存卷数，梁时所有魏石经《尚书》、《春秋》，均系完帙，当是后魏初年之物。唐初所藏，则为迁邺前后之物矣。《隋志》所录魏石经拓本，为《尚书》九卷，又五卷（即九卷中之复本），《春秋》三卷。《旧唐书·经籍志》又有三字石经《尚书》古篆三卷，三字石经《左传》古篆书十三卷（《新志》作十二卷）。既云“三字石经”，复云“古篆书”，疑唐人就三字石经拓本中专录其古、篆二体，未必即是拓本。

且《左传》有十三卷之多，非六朝人所记魏石经碑数所能容，其中当有《春秋》而误视为《左传》者。犹宋苏望所刊《尚书》、《春秋》残字，自臧氏琳以前均谓之《左传》遗字也。又唐初《春秋》拓本仅存三卷，不应中叶以后并《春秋》、《左传》反得十三卷。然则《唐志》所录，殆不能视为拓本也（《大唐六典》国子监书学博士掌教国子，以石经、《说文》、《字林》为业。石经三体，三年业成；《说文》二年，《字林》一年。”石经业成年限多于《说文》、《字林》，则存字当必不少。然六朝旧拓，唐中叶后盖已无存，偶有残拓，珍重与钟、王真迹等，则书学博士所用以教授者，亦当为写本而非拓本）。且唐初修《隋志》时现存之拓本，至中、睿以后颇已散佚（徐浩《古迹》记载：中宗时，以内府真迹赐安乐公主、太平公主，下至宰相、附马等。自此内库真迹散入诸家。”《隋志》所录石经拓本之散佚，亦当在此时），至开元时仅得十三纸。

郭忠恕《汗简·略叙目录》云：“开元时得三字石经《春秋》，臣仪缝（案缝上当有押字）石经面题云：“臣钟绍京一十三纸。又有开元字印、翰林院印，后有许公苏颋、梁公姚崇、昭文学士马怀素、崇文学士褚无量、左金吾长史魏哲、左骁卫兵曹陆元悌、左司御录事刘怀信、直秘书监王昭远、陪戒副尉张善装（《墨池编》卷（十）四卢元卿《跋尾记》载齐高帝书一卷，后有开元五年十一月五日诸臣列名，与此同，惟多宋璟一人。其诸臣列名次第，首张善，终宋璟，与此适相反。又“张善”作“张善庆”，“王昭远”作“王知逸”，“魏哲”作“魏皙”。魏、陆、刘、王四人名下皆有“监”字）。至建中二年，知书楼直官贺幽奇、刘逸己等检校，内侍伯宋游环、掖庭令茹兰芳跋状尾焉。其真本即太子宾客致仕马胤孙家藏之周显德中，嗣太子借其本传写在焉。句中正《三字孝经序》（见《墨池编》）所记略同。窦臬《述书赋》注云今见三字石经打本四纸，石既寻毁，其本最希。”唐中叶后，魏石经拓本见于纪载者，惟此而已。宋皇祐癸巳，洛阳苏望得拓本于故相王文康家，刊以行世。欧阳斐《集古录目》谓其“莫辨真伪”，余疑其即开元内府之十三

纸。何则？《隶续》所录苏氏刊本，今详加分析，则《尚书》六段、《春秋》七段、《左传》一段，共十四段，与开元之十三纸止差一纸，其中当有两段在一纸上者。

且开元十三纸，后周时尚在马胤孙家，至宋初尚存，郭忠恕见之，句中正亦见之（中正《三字孝经》序云：“永泰中相国马胤孙藏得搨本数纸。今所书文字，悉准之。”王文康家之本，当即马本，苏氏刊之而遗其跋尾，遂使人昧其所出耳。厥后胡宗愈复据苏本刊之锦官西楼，洪适于会稽蓬莱阁亦刊数十字。今苏、胡、洪三刻皆不可见，惟《隶续》所录者尚无恙。然则魏石经拓本，自开元以后，讫于有宋之初，除窦臬所见四纸外，只此十三纸。

郭忠恕《汗简》引魏石经一百二十二字，其见于苏刻者七十四字，夏竦《古文四声韵》引一百十四字，其见于苏刻者六十三字，余皆出《汗简》，其在苏刻及《汗简》外者仅十二字。而郭、夏二书中苏刻所无之字，颇有苏刻所遗者（苏跋谓“取其完者刻之”，则十三纸中，磨泐及不完之字，苏未尝刊。郭、夏二氏或能辨而录之也），亦有《尚书》、《春秋》、《左传》三书中本无此字者，则亦未必尽出石经。郭、夏所见，未必遽多于此矣。宋以后苏、胡诸刻尽亡，魏石经一线之传惟存于《隶续》，若存若亡者又六百年。今幸《周书》残石出于洛阳，我辈始得见正始原刻，固足傲欧、洪诸君于千载之上矣。

魏石经考五

孔壁、汲冢文之书法，吾不得而见之矣。《说文》中古文，其作法皆本壁中书。其书法，在唐代写本，与篆文体势无别；雍、熙刊板，则古、篆迥异。案宋初校刊《说文》，篆文当出徐铉手，古、籀二体当出句中正与王惟恭二人之手（《宋史·（儒林）[文苑]传》“句中正与徐铉重校定《说文》。”摹印《说文》后附进书表，亦并列王惟恭、葛湍、句中正、徐铉四人名。中正有《三字孝经》，惟恭有《黄庭经》，亦以古文书之。

夏竦《进古文四声韵表》云：“翰林少府监丞王惟恭，写读古文，笔力尤善。”是句、王皆以古文名。《说文》中古、籀二体，必句、王二人所书明矣。此种书体，在唐以前不能征之。自宋以后，则郭忠恕之《汗简》，夏竦之《古文四声韵》，吕大临、王楚、王俅、薛尚功辈所摹之三代彝器，皆其一系。洎近世古器大出，拓本流行，然后知三代文字决无此体（惟吴县潘氏藏不知名古铜器一，笔意近之，而结体复异，乃六国时物也）。

今溯此体之源，当自三字石经始矣。卫恒《四体书势》，谓“魏初传古文者，出于邯郸淳。至正始中，立三字石经，转失淳法。因科斗之名，遂效其形”。然则魏石经残字之丰中锐末或丰上锐下者，乃依傍“科斗”之名而为之，前无此也。自此以后，所谓古文者，殆专用此体。郭忠恕辈之所集，决非其所自创，而当为六朝以来相传之旧本也。自宋以后，句中正辈用以书《说文》古文，吕大临辈用以摹古彝器；至国朝《西清古鉴》等书所摹古款识，犹用是体，盖行于世者几二千年。源其体势，不得不以魏石经为滥觞矣。

隋铜虎符跋☆

兵符之制，古者皆右在内而左在外！又左右之数各同。三代不可考。《曲礼》曰：“献粟者执右契。”郑注契，券要也。右为尊。”契以右为尊，符节可知；尊者在内，卑者在外，亦可知也。秦虎符右在皇帝，左在阳陵，盖用古制。汉则文帝二年，“初与郡国守相为铜虎符、竹使符”。师古曰：“与郡守为符，右留京师，左以与之。”则右内左外，与秦制同。颜注又引应劭曰：“铜虎符第一至第五，国家当发兵，遣使者至郡合符，乃听受之。”此藏于内者也。《文选》潘元茂《册魏公九锡文》云：“授君金虎符第一至第五。”此颁于外者。是内外之数同也。

今传世汉以后诸符，如汉魏郡太守虎符（嘉定瞿氏藏）、东莱太守虎符（潍县陈氏藏）玄菟太守虎符（海丰吴氏藏）、渔阳太守虎符（吴县吴氏藏）、长沙太守虎符（吴县吴氏藏）及王莽压戎、敦德二符，胁文皆云“左二，汉常山太守虎符（潍县陈氏藏）则云“左三”。晋上党太守二符，一云“右二”，一云“左二”，是左右数同之证也（左右各五）隋兵符亦然。吴县蒋氏藏隋虎符八，吴氏藏隋符二，又有一符不知藏谁氏，共十一枚。其中右符六：曰“右御卫相原四”，曰“右御卫永昌二”，曰“右御卫美政五”，曰“右翊卫天井一”，曰“右翊卫石桥二”，左符五：曰“右御卫安昌四”；曰“右武卫白松二”；曰“右屯卫温阳一”；曰“右屯卫清湖四”；曰“左屯卫赤城五”。左右孰内孰外，虽不可考，然左右二符各有第四、第五，则左右之数亦当相等，如秦汉以来制也。兵符之制，至唐始大变。

《大唐六典》载：“铜鱼符，王畿之内左三右一，王畿之外左五右一。左者进内，右者在外。”不独左内右外，左右之数亦各不同。宋符兼用古制与唐制二者，《玉海》（八十（二）[五]）载：“康定元年八月二十四日，端明殿学士李淑等言，参酌古制，定铜符形制，上刻篆文曰，某处发兵符下铸虎豹饰，而中分之。右符五，左旁作虎豹头四；左符一，右旁为四窍，令可契合。又以篆文相向侧刻十干字为号。右符留京师枢密院，左符付诸处。庆历元年罢。”然则宋符右内左外，与秦汉同；而内五外一，则用唐制。自来兵符之制度，即此可睹矣。

《齐鲁封泥集存》序

自宋人始为金石之学，欧、赵、黄、洪各据以古代遗文以证经考史，咸有创获。然涂术虽启而流派未宏，近二百年始益光大。于是三古遗物，应世而出，金石之出于邱陇窟穴者，既数十倍于往昔。此外如洹阴之甲骨、燕齐之陶器、西域之简牋、巴蜀齐鲁之封泥，皆出于近数十年间，而金石之名乃不足以该之矣。之数者，其数量之多，年代之古，与金石同；其足以考经证史，亦与金石同。皆古人所不及见也。癸丑之岁，上虞罗叔言参事既印行敦煌古佚书及所藏洹阴甲骨文字，复以所藏古封泥拓本，足补潍县陈氏、海丰吴氏《封泥考略》之缺者甚多，因属国维就《考略》所无者，据《汉书·表》志为之编次，得四百余种，付诸精印，以行于世。窃谓封泥与古玺印相表里，而官印之种类，则较古玺印为尤多，其足以考正古代官制、地理者，为用至大。姑就此编所录，举其荦荦大者。

以官制言之，则汉诸侯王官属与汉朝无异也。《汉书·诸侯王表》谓“藩国宫室百官同制京师”，《百官公卿表》谓“诸侯王群大夫都官如汉朝”，贾谊《书》亦谓“天子之于诸侯，臣同、御同、宫墙门衙同”。初疑其为充类之说，非尽实录。乃此编所载齐国属官，除丞相、御史大夫外，则大匠当汉之将作大匠，长秋当汉之大长秋。下至九卿所属令丞，如大祝、祠祀、园寝诸官为奉常之属，郎中为郎中令之属，中厩丞为太仆之属，内官丞为宗正之属，太仓、大官、乐府、居室、谒者、御府、宦者诸官为少府之属，武库丞为中尉之属，食官为詹事之属，钟官为水衡之属。属官既备，长史可知。始知贾生《等齐》之篇、孟坚“同制”之说，信而有征。此其关于官制者一也。若夫扶风列《表》、司马《续志》，成书较后，颇有缺遗。此篇所录，则汉朝官如洛阳宫丞、官司空、私官丞、中私官丞（《汉书·张安世传》虽有“私官”，然《百官表》有“私府”无“私官”，王侯属官，如齐武士丞、齐昌守丞、齐中右马、齐中左马、齐司空长、齐司宫丞、齐左工丞、菑川郎丞、载国大行，郡县属官如水丞、平丞、陶丞，余官如司空、祠官、橘监、发弩、兵府、冶府，皆班《表》、马《志》所未载。余如“桐马五丞”中之有农丞、乐府之有钟官（此乐府铸钟傅之官，非水衡掌铸钱之钟官也），钟官之有火丞，班《表》亦仅列官府之目，未详分职之名。此关于官制者二也。

至于考证地理，所裨尤多。以建置言之，则此编中郡守封泥，有临菑、济北二郡；太守封泥，有河间、即墨二郡；都尉封泥，有城阳一郡，皆《汉志》所无。案《汉书·高帝纪》以胶东、胶西、临淄、济北、博阳、城阳郡七十三县，立子肥为齐王。”《史记·齐悼惠世家》以齐之城阳郡立朱虚侯为城阳王，以齐济北郡立东牟侯为济北王。”则汉初及全齐之时，有临淄、城阳、济北三郡也。《楚元王世家》取赵之河间郡，立赵王遂弟辟疆为河间王。”是赵国有河间郡也。且济北建国，自兴居国除之后、安都侯未封之前，中为汉郡者十一年。城阳，则共王徙淮南后，中为汉郡者四年，皆在孝景改郡守为太守、郡尉为都尉之前。则济北、城阳守尉二印，固所宜有也。惟临菑守一印，则齐国既建立后，当称“内史，国除之后，又当称“

齐郡太守”。

此印云“临菑守”，必在高帝初叶，悼惠未封之时，且“临菑”二字，犹为秦郡之名也。夫始皇既灭六国，所置诸郡，无即以其国名之者，东郡不云“卫郡”，颍川不云“韩郡”，邯郸不云“赵郡”，何独临淄乃称“齐郡”？然则汉之初，郡必袭秦名，则班固以齐郡为秦郡，而不云“故秦临淄郡”者，非也。河间、即墨二太守封泥，皆孝景中二年以后物。即墨乃胶东国属县，而河间、胶东二国，自孝景以至孝平，未有绝世。光武中兴，乃并河间于信都，以胶东封贾复。然则此二郡太守之印，当在亡新之后、建武之初，与《封泥考略》之胶东太守、胶西太守二印，均足补《汉志》之缺者也。此外，县邑封泥，如庐邱丞、梧里丞、稷丞等，前后二《志》均无此县。

此关于地理之建置者一也。《汉表》称列侯所食县曰“国”，皇太后、皇后、公主所食曰“邑”。今此编中，邑丞封泥二十有八，除琅邪为鲁元公主所食邑外，余皆列侯食邑，惟“载国大行”一封泥乃称“国”耳。此关于地理之称号者二也。又县邑之名，往往歧误。如齐悼惠王子罢军所封侯国，《史》、《汉》均作“管”，今封泥有“管侯相印”。管属济南，时为齐县王子所封，当在境内。则“管侯”乃“管侯”之讹也。齐哀王舅驷钧所封国，《史记·孝文纪》作“清郭”，《汉书·文帝纪》作“靖郭”，《史表》作“清都”，《汉表》作“郛”，徐广注《史表》又云“一作臬”。今封泥有“请郭邑丞”、“请郭丞”，则知前五名皆“请郭”之伪也。华毋害所封国，《史表》作“绛阳”，《汉表》作“终陵”。今有“绛陵邑丞”封泥，则《史记》“阳”字误，《汉书》“终”字误也。秘，彭祖之国，《史》、《汉》二《表》并作“戴”，《索隐》音再。今有“载国大行”封泥，则音不误而字误也。余如“临淄”之为“临菑”，“剧”之为“勵”，“莱芜”之为“来无”，“不其”之为“第其”，“临辕”之为“临袁”，均字有通假，形有增损，非有实物，孰能知之？此关于地理者三也。至于二书违异，无所适从，如《汉表》“狡夷侯周舍”，《史表》“汶”作郊；“郁根侯骄”，《史表》“郁根”作“郁狼”。

今封泥有“郊侯邑丞”及“郁狼乡印”，《左传隐元年》注亦云“高平方与县东南有郁郎亭”，与此封泥字异音同，则《史》是而《汉》非也。“济南著县”，前后二《志》均为“著”字，韦昭读为“蓍龟”之“蓍”，师古非之。然后魏济南尚有蓍县，今封泥又有“蓍丞之印”，则韦是而颜非也。“东莱掖县”，二《志》皆从手旁，《齐策》两云“夜邑”，今封泥有“夜丞之印”及“夜印”，则《齐策》是也。古地名有“历”字者，字均作“磨”。如《秦策》及《史记·春申君列传》之“濮磨”，《史记·侯表》之“磨侯”，《乐毅列传》之“磨室”，今本皆转讹作“磨”。

今封泥有“磨城丞印”，足证上三“磨”字皆“磨”之讹。此关于地理者四也。凡

此数端，皆足以存一代之故，发千载之覆，决聚讼之疑。正沿袭之误，其于史学裨补非鲜。若夫书迹之妙，冶铸之精，千里之润，施及艺苑，则又此书之余事，而无待赘言者也。至封泥之由来与其运用，详余《简牍检署考》。其出土源流，则参事序中详之，并不赘云。

书《齐鲁封泥集存》后

《齐鲁封泥集存》中，有清河太守、河间太守、即墨太守三印，文字精绝。自其形制观之，当为汉初之物，与中叶后印绝不同。余前序此书，以改郡守为太守在景帝中二年七月，《汉书·景帝纪》及《百官公卿表》具有明文。而河间国封于孝景前二年四月；胶东国治即墨，封于孝景中二年三月。自是迄于王莽之篡，未尝为汉郡，是前汉不得有此二郡太守，故定为光武初年之物。然细观之，其形制、文字终不类东京。又考之后汉之初，亦无置即墨郡之理。即墨在前汉为胶东国都，至王莽废胶东国为郡，改为郁秩，以其属县之郁秩莽曰“郁秩序”为名，则莽时郁秩郡，当治郁秩而不治即墨。光武但复胶东之名，而郡治仍之，故建武十三年封贾复为胶东侯，食郁秩、壮武、下密、即墨、挺胡、观阳六县，以郁秩为首。

至肃宗时，复孙敏有罪，国除，更封复小子邯为胶东侯，邯弟宗为即墨侯，各食一县，以胶东与即墨为二县。胶东前无此县，盖即郁秩。此又后汉之胶东不治即墨而治郁秩之一证也。故光武初年决无置即墨郡之理。而景帝中二年后，迄于孝平，胶东国又未尝为汉郡，则此印非汉初之物而何？盖即墨自战国时已为重地，与临淄并，故张仪说齐王曰：“临淄、即墨，非王之有。”田肯说汉高帝，亦曰“齐东有琅琊、即墨之饶”。田市之王胶东！实都即墨。及高帝以胶东等郡立子肥为齐王，文帝分齐别郡置胶东国，亦仍其故治。而中间胶东郡之称，或为即墨，犹莆川郡之或称剧郡，东海郡之或称郯郡，淮阳郡之或称陈郡，各以所治之县名之也。故即墨为汉初之郡，殆无可疑。

《汉书·高五王传》“谓齐悼惠王得自置二千石”，此印犹当为悼惠王所铸也。河间太守、清河太守二印，形制相同，亦可因此而决其为汉初之物。至太守之称，战国时已有之，亦非自景帝中二年始。《墨子·号令》篇云“操太守之节而使者”，又云“勇士父母亲戚妻子之舍，必近太守”，又云“望气者舍，必近太守”，凡言太守者三。《赵策》：“请以三万户之都封太守，千户封县令。”

《史记·赵世家》亦引其文，则战国时已有太守矣。即云《墨子·号令》诸篇多秦汉间制度，或系汉时墨者所作，《战国策》之文，亦有后人增益，然上所述地理沿革上之证据既明白如彼，则转可由此封泥而证汉初郡守已名太守。至景帝中二年更名郡守为太守，不过以七国既平，大启郡县，其时领郡之官或称郡守，或称太守，故整齐画一之耳。同时又改郡尉为都尉，都尉之称，汉初亦有之，均非至是创作也。

此编又有“齐昌守丞”封泥，殆亦齐悼惠王时物。案《汉志》无昌郡，则不得有守丞。惟琅琊郡有昌县，又千乘郡博昌县下注引应劭曰：“昌水出东莱昌阳。”皆在齐地。此当与即墨郡皆为悼惠王所置，此“昌守丞”上冠以“齐”字，尤明示此事实矣。

桐乡徐氏《印谱》序

自许叔重序《说文》，以刻符、摹印、署书、殳书与大、小篆、虫书、隶书，并为秦之八体，于是后世颇疑秦时刻符、摹印等各自为体，并大、小篆、虫书、隶书而八。然大篆、小篆、虫书、隶书者，以言乎其体也；刻符、摹印、署书、殳书者，以言乎其用也。秦之署书不可考，而新郢、阳陵二虎符，字在大、小篆之间；相邦吕不韦戈与秦公私诸玺，文字皆同小篆，知刻符、摹印、殳书，皆以其用言而不以其体言，犹《周官》太师之六诗，赋比兴与风雅颂相错综。保氏之六书，指事、象形诸字皆足以供转注、假借之用者也。秦书如是，秦以前书亦何独不然！三代文字，殷商有甲骨及彝器，宗周及春秋诸国并有彝器传世，独战国以后，彝器传世者，唯有田齐二敦一簠及大梁上官诸鼎，寥寥不过数器。

幸而任器之流传，乃比殷周为富。近世所出，如六国兵器，数几逾百；其余若货币、若玺印、若陶器，其数乃以千计；而魏石经及《说文解字》所出之壁中古文，亦为当时齐鲁间书。此数种文字皆自相似，然并讹别简率，上不合殷周古文，下不合小篆，不能以六书求之，而同时秦之文字则颇与之异。传世秦器作于此时者，若大良造鞅铜量（秦孝公十八年作）、若大良造鞅戟、若新郢虎符（秦昭王五十四年以后所作）、若相邦吕不韦戈（秦始皇五年作）；石刻若诅楚文（宋王厚之考为秦惠王后十二年作），皆秦未并天下时所作。其文字之什九与篆文同，其什一与籀文同；其去殷周古文，较之六国文字为近。余曩作《史籀篇疏证序》，谓战国时秦用籀文，六国用古文，即以此也。世人见六国文字，上与殷周古文，中与秦文、下与小篆不合，遂疑近世所出兵器、陶器、玺印、货币诸文字并自为一体，与六国通行文字不同；又疑魏石经、《说文》所出之壁中古文为汉人伪作，此则惑之甚者也。

夫兵器、陶器、玺印、货币，当时通行之器也；壁中书者，当时儒家通行之书也。通行之器与通行之书，因当以通行文字书之；且同时所作大梁、上官诸鼎，字体亦复如是，而此外更不见他体。舍是数者而别求六国之通行文字，多见其纷纷也。况秦之刻符、摹印、殳书，并用通行文字，则何独于六国而疑之。其上不合殷周古文，下不合秦篆者，时不同也；中不合秦文者，地不同也。其讹别草率亦如北朝文字，上与魏晋、下与隋唐、中与江左不同；其中玺印、陶器，可比北朝碑碣；兵器货币，则几与魏、齐小铜造象之凿款矣。若是者，谓其书体之讹别也可，谓其非当时通行文字则不可；若谓之为伪，则尤不可也。

余谓欲治壁中古文，不当绳以殷周古文；而当于同时之兵器、陶器、玺印、货币求之。惜此数种文字，世尚未有专攻之者。以余不敏，又所见实物、谱录至为狭隘，然就所见者言之，已足知此四种文字自为一系，又与昔人所传之壁中书为一系。姑以壁中古文之同于四者言之，如其小异大同者，如以上所举诸例，类不合于殷周古文及小篆，而与六国遗器文字则血脉相通。汉人传写之文，与今日出土之器，校若剖符之复合，谓非当日通行此种文字，其谁信之。虽陶器、玺印、货币文字止纪

人地名，兵器文字亦有一定之文例，故不能以尽证壁中之书；而壁中简策，当时亦不无磨灭断折。

今之所存，亦不无汉人臆造之字，故不能尽合，然其合者固已如斯矣。

然则兵器、陶器、玺印、货币四者，正今日研究六国文字之惟一材料，其为重要，实与甲骨、彝器同。而玺印一类，其文字、制度尤为精整，其数亦较富。然今世谱录，不过上虞罗氏、皖江黄氏、钱唐陈氏数家。

罗氏所藏，屡聚屡散；黄氏物亡于肱篋；而陈氏之藏则归于桐乡徐君斋。斋复汰而益之，丙寅秋日，出其所为新谱，索序于余。余读而叹其精善，如上所举证容履碣诸古文并出此谱。斋之于古器物、古文字之学，可谓知所务矣。余近于六国文字及玺印之学颇有所论，因书以弁其首，世之治文字学者以鉴观焉。√

简牋检署考（节选）

书契之用，自刻画始。金石也，甲骨也，竹木也，三者不知孰为後先，而以竹木之用为最广。竹木之用亦未识始於何时，以见於载籍者言之，则用竹者曰“册”，《书·金縢》“史乃册祝”，《洛诰》“王命作册逸祝册”，《顾命》“命作册度”。“册”字或假鞭策之“策”字为之，《聘礼》“百名以上书於策”，《既夕礼》“书遣於策”，《周礼·内史》“凡命诸侯及公卿大夫，皆策命之”，《左传》“灭不告败，克不告胜，不书於策”，又“名藏在诸侯之策”是也。曰“简”，《诗·小雅》“畏此简书”，《左传》“执简以往”，《王制》“太史执简记”是也。

用木书者曰“方”，《聘礼》“不及百名书於方”，《既夕礼》“书琯於方”，《周礼·内史》“以方出之”，《哲簇氏》“以方书十日之号”是也。曰“版”，《周礼》“小宰听闾里以版”，“司书掌邦人之版”，“大胥掌学士之版”，“司士掌群臣之版”，“司民掌民之数，自生齿以上皆书於版”是也。曰“牋”，《韩诗外传·七》“周舍见赵简子云：墨笔操牋”是也。

竹木通谓之“牒”，亦谓之“札”，司马贞《史记索隐》“牒，小木札也”。颜师古《汉书注》“札，木简之薄小者也，此谓木牒木札也”。《说文》“简，牒也”。又，“牒，札也”。《论衡·量知篇》“截竹为简，破以为牒”。《文心雕龙》“短简编牒，此谓竹牒也”。《左传疏》“单执一札，谓之为简，此谓竹札也”。

殷周制度虽不可得而详，然战国以降则可略述焉。

上古简策书体，自用篆书。至汉晋以降，策命之书亦无不用篆者。《独断》云：“策书篆书。三公以罪免亦赐策，文如上策而隶书，以尺一木，两行。惟此为异。”《通典》五十五晋博士孙毓议曰：“今封建诸王裂土树藩，为册告庙，篆书竹册，执册以祝，讫藏於庙……四时享祀，祝文事讫不藏，故但《礼》称：祝文尺一白简，隶书而已。”然则事大者用策，篆书，事小者用木，隶书，殆为通例。《隋志》言“北齐封拜册用篆字”，盖亦用汉晋之制也。孔安国《尚书序》云：“以所闻伏生之书，考论文义，定其可知者为隶古定，更以竹简写之。”则汉时六经之策，似用隶书。然孔传贗作不足信。又汉经籍虽有古今文之分，然所谓今文，对古籀言之，亦不能定其为篆为隶；唯汉时宫籍犹辞，亦书以简，则容有用隶书之事。

又书传所载，似简策亦有用草书者，则殊不然。《史记·三王世家》褚先生曰：“臣幸得以文学为侍郎，好览观太史公之列传，列传中称三王世家文辞可观，求其世家终不能得。窃从长老好故事者，取其封策书，编列其事而传之……谨论次其真草诏书，编於左方。”顾氏炎武《日知录》二十一据此遂谓“褚先生亲见简策之文，而孝武时诏已用草书”。然褚先生所谓真草诏书，盖指草稿而言。封拜之策，诸王必携以就国；则长老好故事者所藏，必其草稿无疑，未足为草书策之证也。宋黄伯

思《东观馀论》上《汉简辨》云：“近岁关右人发地得古瓮，中有东汉时竹简甚多，往往散乱不可考，独永初二年讨羌符，文字尚完，皆章草书，书迹古雅可喜，其词云云。”则汉时似真有草书之简。然据赵彦卫《云麓漫钞》七所纪，则不云竹简，而云木简，且谓吴思道亲见之于梁师成所，其言较为可据。则以章草书简，均无确证，或竟专用篆隶矣。

简牍之用，始于何时，讫于何代，则无界限可言。殷人龟卜文字及金文中，已见“册”字，则简策之制古矣。“方版”二字，始见《周礼》，然古代必已有此物。又世或有以缣帛之始，为竹木之终者，则又不然。帛书之古，见于载籍者，亦不甚后于简牍。《周礼·大司马》“王载太常……各书其事与其号焉”，又《司勋》“凡有功者，铭书于王之太常”，《士丧礼》“为铭各以其物（注：杂帛为物），亡则以缁，曰某氏某之柩”，皆书帛之证。《墨子·明鬼篇》“古者圣王，必以鬼神为其务，又恐后世子孙不能知也，故书之竹帛，传遗后世。子孙咸恐其腐蠹绝灭，后世子孙不得而纪，故琢之盘盂，镂之金石以章之，又恐后世子孙不能敬威以取祥，故先王之书，圣人之言，一尺之帛，一篇之书，语数鬼神之有也，重又重之”。《墨子》之书，虽作于周季，然以书竹帛称先王，则其来远矣。《晏子春秋》七“昔吾先君桓公予管仲狐与谷，其县十七，著之于帛，申之于策，通之诸侯”。《论语》“子张书诸绅”，《越绝书》三十“越王以丹书帛”《韩非子·安危篇》亦云：“先王致理于竹帛”，则以帛写书，至迟亦当在周季。然至汉中叶，而简策之用尚盛，《汉书·公孙贺传》“朱安世曰：南山之竹，不足尽我辞”，是犹辞犹用简也。刘向序录诸书皆云“定以杀青”，是书籍多用简也。《汉书·艺文志》所录各书，以卷计者，不及以篇计者之半，至言事通问之文，则全用版奏，少竹之处，亦或用以写书，虽蔡伦造纸后犹然。晋时户口黄籍，尚用一尺二寸札，至晋末始废。《初学记》二十一引《桓玄伪事》曰：“古无纸，故用简，非敬也。今诸用简者，皆以黄纸代之。”至版牍之废，则尚在其后。晋人承制拜官，则曰“版授”，抗章言事则曰“露版”。《南史·张兴世传》：“宋明帝即位，四方反叛，时台军据赭圻，朝廷遣吏部尚书褚彦回就赭圻行选。是役也，皆先战授位，檄板不供，由是有黄纸札”。盖简牍时代，肇于缣素之先，而尚延于谷网等纸之后，至南北朝之终，始全废矣。√

《流沙坠简》序

光绪戊申，英人斯坦因博士访古于我新疆、甘肃，得汉、晋木简千余以归，法国沙畹博士为之考释。越五年，癸丑岁暮，乃印行于伦敦。未出版，沙氏即以手校之本寄上虞罗叔言参事，参事复与余重行考订。握槊逾月，粗具条理，乃略考简牍出土之地，弁诸篇首，以谕读是书者。案古简所出，厥地凡三：一为敦煌迤北之长城，二为罗布淖尔北之古城，其三则和阗东北之尼雅城及马咱托拉、拔拉滑史德三地也。敦煌所出，皆两汉之物。出罗布淖尔北者，其物大抵出自魏末，讫于前凉。其出和阗旁三地者，都不过二十余简，又皆无年代可考，然其最古者犹当为后汉遗物，其近者亦当在隋唐之际也。今略考诸地古代之情状，而阙其不可知者，世之君子以览观焉。

汉代简牍出于敦煌之北，其地当北纬四十度，自东经（据英国固林威治经度）九十三度十分至九十五度二十分之间。出土之地，东西绵亘一度有余，斯氏以此为汉之长城，其说是也。案秦之长城，西迄临洮。及汉武帝时，匈奴浑邪王降汉，以其地为武威、酒泉郡（元狩三年），后又分置张掖、敦煌郡（元鼎六年），始筑令居，以西列四郡，据两关焉。此汉代筑城事之见于史者！不言其讫于何地也。其见于后人纪载者，则法显《佛国记》云敦煌有塞，东西可八十里，南北四十里。”《晋书·凉武昭王传》云玄盛乃修敦煌旧塞东西二围（东西，疑东北之讹），以防北虏之患；筑敦煌旧塞西南二围，以威南虏。”

案唐《沙州图经》，则沙州有古塞城、古长城二址：“塞城周迴州境，东在城东四十五里，西在城西十五里，南在州城南七里，北在州城北五里”；“古长城则在州北六十（六）里，东至阶亭烽一百八十里，入瓜州常乐县界，西至曲泽烽二百一十二里，正西入磧，接石城界”云云。李嵩所修，有东、西、南、北四围，当即《图经》之古塞城。法显所见仅有纵横二围，其东西行者，或即《图经》之古长城，而里数颇短，盖城在晋末当已颓废，而《图经》所纪东西三百里者，则穷其废址者也。此城遗址，《图经》谓在州北六十三里。今木简出土之地，正直其所，实唐《沙州图经》所谓古长城也。前汉时，敦煌郡所置三都尉，皆治其所。都尉之下，又各置候官。由西而东，则首玉门都尉下之大煎都候官、玉门候官（皆在汉龙勒县境），次则中部都尉所属平望候官、步广候官（汉敦煌县境）又东则宜禾都尉所属各候官（汉效谷、广至二县境。以上说均见本书《屯戍丛残》“缝燧类考释”中及附录《缝燧图表》）。又东入酒泉郡，则有酒泉西部都尉所治之西部障、北部都尉所治之偃泉障；又东北入张掖郡，则有张掖都尉所治之遮虏障，疑皆沿长城置之。今日酒泉、张掖以北，长城遗址之有无虽不可知，然以当日之建置言之，固宜如是也。今斯氏所探得者，敦煌迤北之长城，当《汉志》敦煌、龙勒二县之北境，尚未东及广至界，汉时简牍即出于此，实汉时屯戍之所，又由中原通西域之孔道也。长城之说既定，玉门关之方位亦可由此决。玉门一关，《汉志》系于敦煌郡龙勒县境下。

嗣是《续汉书·郡国志》、《括地志》、《元和郡县志》、两《唐书·地理志》、《太平寰宇记》、《舆地广记》，以至近代官私著述，亦皆谓汉之玉门关在今敦煌西北。惟《史记·大宛列传》云：太初二年，威师将军李广利伐大宛，还至敦煌，请罢兵，益发而复往。天子闻之，大怒，而使使遮玉门，曰：“军有敢入者，辄斩之。贰师恐，因留敦煌。”沙畹博士据此以为，太初二年前之玉门关尚在敦煌之东，其徙敦煌西北则为后日之事。其说是也。案《汉志》酒泉郡有玉门县，颜师古注引阚骃《十三州志》，谓“汉罢玉门关屯，徙其人于此”。余疑玉门一县正当酒泉出敦煌之孔道，太初以前之玉门关当置于此，阚骃“徙屯”之说未必确也。嗣后关城虽徙，而县名尚仍其故，虽中更废置，迄于今日，尚名“玉门”，故古人有误以玉门县为玉门关者。后晋高居海《使于阗记》云：“至肃州后渡金河，西百里出天门关，又西百里出玉门关。”高氏所谓玉门关，实即自汉迄今之玉门县也（唐之玉门军亦置于此，而玉门关则移于瓜州境）。

《元和郡县志》云玉门关在瓜州晋昌县西二里，而以在寿昌县西北者为玉门故关，则唐之玉门关复徙而东矣。汉时西徙之关，则《括地志》始记其距龙勒之方向道里曰“玉门关在县（汉之龙勒，在唐为寿昌县）西北一百十八里”（《史记·大宛传》正义引），《旧唐书·地理志》、《元和志》、《寰宇记》、《舆地广记》均袭其文。近秀水陶氏《辛卯侍行记》记汉玉门、阳关道路，谓“自敦煌西北行六十里之大方盘城，为汉玉门关故地”，又谓“西七十里有地名西湖，有边墙遗址及烽墩数十所”。斯氏亦于此发见关城二所：一在东经九十四度以西小盐湖，一在东经九十三度三十分，相距二十余分，与大方盘城及西湖相去七十里之说相近。然则当九十四度稍西者，殆即陶《记》之大方盘城；当九十三度三十分者，殆即陶氏所谓西湖耶？沙畹博士疑九十四度稍西之废址为太初以前之玉门关，而在其西者，乃其后徙之处。

余谓太初以前玉门关，当在酒泉郡玉门县。如在东经九十四度、北纬四十度间，则仍在敦煌西北，与《史记·大宛传》文不合。而太初以后之玉门关，以《括地志》所记方位道里言之，则在唐寿昌县西北百一十八里。今自敦煌西南行一百四十里，有巴彦布喇泛，陶氏以为唐寿昌县故址。自此西北百一十八里，迄于故塞，则适在东经九十四度、北纬四十度之交。则当九十四度稍西之废址，实为太初以后之玉门关，而当九十三度三十分者，当为玉门以西之他障塞。盖汉武伐大宛后，西至盐泽，往往起亭。又据《沙州图经》，则古长城遗址且西入大碛中，则玉门以西亦当为汉时屯戍之所，未足据以为关城之证也。故博士二说之中，余取其一，但其地为《汉志》龙勒县之玉门关，而非《史记·大宛传》之玉门，则可信也。其西徙之年，史书不纪。今据斯氏所得木简，则有武帝太始三年玉门都尉护众文书（《屯戍丛残》第一页），其时关城当已西徙于此，上距太初二年不过十载，是其西徙必在李广利克大宛之后（太初四年），西起亭至盐泽之时也。又汉及新莽时玉门都尉所有版籍皆出于此，可为《汉志》玉门关之铁证，不独与古书所记一一吻合而已。

至魏晋木简残纸，则出于罗布淖尔涸泽北之古城稍西，于东经九十度当北纬四十度，当北纬四十度三十一分之地。光绪庚子，俄人希亭始至此地，颇获古书。后德人喀尔亨利及孔拉第二氏据其所得遗书，定此城为古楼兰之虚。沙畹博士考证斯坦因博士所得遗物，亦从此说。余由斯氏所得简牍，及日本橘瑞超氏于此所得之西域长史李柏二书，知此地决非古楼兰。其地当前凉之世，实名“海头”，而《汉书·西域传》及《魏略·西戎传》之“居庐仓”、《水经·河水注》之“龙城”，皆是地也。何以知其非古楼兰也？曰：斯氏所得简牍中，其中言楼兰者凡三：一曰：“帐下督薛明言，谨按文书，前至楼兰□还守堤兵，本书《屯戍丛残》第三叶），此为本地部将奉使至楼兰后所上之文书，盖不待言；其二曰“八月廿八日，楼兰白疏，恇惶恐白”（本书《简牍遗文》第四叶）。其三曰“楼兰口白”（同上）。而细观他书疏之例，则或云“十月四日具书焉耆元顿首，同上），或云“敦煌具书，畔毗再拜”（同上第五叶），皆于姓名前著具书之地。以此推之，则所云“楼兰白疏，恇惶恐白”者，必为自楼兰所致之疏。其书既自楼兰来，则所抵之地不得为楼兰矣。此遗物中之一确证也。更求之地理上之证据，亦正不乏。

《水经·河水注》云：“河水东径墨山国南，又东径注宾城南，又东径楼兰城而东注，河水又东径于拗泽，即《经》所谓蒲昌海也”云云。案“河水”者，今之宽车河或塔里木河；“拗泽”与“蒲昌海”者，今之罗布淖尔也。则楼兰一城，当在塔里木河入罗布淖尔处之西北，亦即在淖尔西北隅。此城则在淖尔东北隅。此其不合者一也。古楼兰国自昭帝元凤四年徙居罗布淖尔西南之鄯善后，国号虽改，而城名尚存。《后汉书·班勇传》议遣西域长史将五百人屯楼兰，西当焉耆、龟兹径路，南强鄯善、于阗心胆，北扞匈奴，东近敦煌。《杨终传》亦言“远屯伊吾、楼兰、车师、戊己”，《魏略》言“过龙堆到故楼兰”，皆谓罗布淖尔西北之楼兰城。故东方人之呼淖尔也，曰“拗泽”、曰“盐泽”、曰“蒲昌海”，而自西方来者，则呼曰“牢兰海”。

《水经·河水注》引释氏《西域记》南河自于阗于东北三千里，至鄯善入牢兰海”是也。古牢、楼同音，《士丧礼》“牢中”郑注：“牢，读为楼。”盖自西方来，必先经楼兰城而后至罗布淖尔，故名此淖尔曰“牢兰海”（《史记正义》引《括地志》作“穿兰海”，字之误也）。此又楼兰在淖尔西北之一证。此其不合二也。故曰希、斯二氏所发见淖尔东北之古城，决非古楼兰也。然则其名可得而言之欤？曰：由橘氏所得李柏二书观之，此地当前凉之世实名“海头”。李书二纸，其中所言之事同，所署之月日同，所遣之使者同，实一书之二草稿，可决其为此城中所书，而非来自他处者也。其一书曰“今奉台使来西，月二日到此”，“此”字旁注“海头”二字；其二曰“诏家见遣使来慰劳诸国，月二日来到海头”。或云“此”，或云“海头”，则此地在前凉时固名“海头”。海头之名，诸史未见，当以居蒲昌海东头得名，未必古有此称也。求古籍中与此城相当之地，惟《水经》之“龙城”足当之。

《水经·河水注》蒲昌海，水积鄯善之西北，龙城之东南。龙城，故姜赖之墟，胡之大国也。蒲昌海溢，荡覆其国。城基尚存而至大，晨发西门，莫达东门”云云，其言颇夸大难信，然其所记龙城方位，正与此城相合。又据其所云“姜赖之墟，（酈注此事，本《凉州异物志》。《太平御览》八百六十五引《异物志》云：“姜赖之墟，今称龙城。恒溪无道，以感天廷，上帝震怒，溢海荡倾，纲齿千里，疾黎之形，其下有盐，累棋而生。”原注姜赖，胡国名也。”酈注藥括其事），可以知此城汉时之名焉。案各史《西域传》绝不闻有姜赖国，惟汉魏时，由玉门出蒲昌海孔道以达楼兰、龟兹，中间有“居庐仓”一地。姜、居，赖、庐，皆一声之转。准以地望，亦无不合。何以言之？《汉书·西域传》“乌孙乌就屠袭杀狂王，自立为昆弥。汉遣破羌将军辛武贤将兵万五千人至敦煌，遣使者按行表，穿卑鞞侯井以西，欲通渠转谷，积居庐仓以讨之。”孟康曰：“卑鞞侯井，大井六通渠也，下流涌出，在白龙堆东土山下。”夫井之下流在白龙堆东，而居庐仓则在井西，其地望正与此城合。《魏略·西戎传》（《魏志·乌丸传》注引）云从玉门关西出，发都护井，回三陇沙北头，经居庐仓，从沙西井转西北，过龙堆，到故楼兰，转西诣龟兹，为西域中道。”

案今敦煌塞外大沙碛，古人或总称之曰“白龙堆”（《汉书·地理志》敦煌郡”下云“正西关外有白龙堆沙”，《西域传》云“楼兰当白龙堆”，孟康言“卑鞞侯井，在白龙堆东土山下”，是敦煌以西、楼兰以东之沙碛，皆谓之“白龙堆”也），或总名之曰“三陇沙”（《广志》：“流沙在玉门关外，东西二千里，南北数百里，有断石，曰三陇。”则似以“三陇沙”为沙碛总名也），而《魏略》之文殊为分晓，其在东南者，谓之曰“三陇沙”，而在西北者，则专有“白龙堆”之名。今此城适在大沙碛之中间，又当玉门、楼兰间之孔道，与《魏略》之“居庐仓”地望正合，则其为汉之居庐仓无疑。又观《魏略》、《水经注》所纪，蒲昌海北岸之地仅有二城，其在西者，二书均谓之“楼兰，则在东者，舍“居庐”、“姜赖”奚属矣？然则此城之称，曰“居庐”、曰“姜赖”，乃汉时之旧名。曰“海头”，则魏晋以后之新名；而“龙城”，则又西域人所呼之异名也（《水经注》所纪，出《凉州异物志》，疑亦用释氏《西域记》。观“晨发西门，莫达东门”二语，可知为西方人所记。即令为《异物志》语，恐亦本之西域贾胡也）。此地自魏晋以后为西域长史治所，亦有数证。橘氏所得李柏二书，既明示此事；斯氏于此所得简牍中，有书函之检署，曰：“因王督致西域长史张君坐前，元言疏。”（《简牍遗文》第一叶）又有出纳簿书，上署□西域长史文书事，□中阕□（《屯戍丛残》第十一叶）。一为抵长史之书，一则著长史之属，则西域长史曾驻此地，盖无可疑。此二简皆无年月，不能定其为魏晋及前凉之物，然参伍考之，则魏晋间已置西域长史于此，不自前凉始矣。

案《后汉书·西域传》，西域长史实屯柳中，以行都护之事（后汉之初，亦放西京之制，以都护统西域，未几而罢。后班超以将兵长史平定西域，遂为都护，未几复罢。嗣是索班以行敦煌长史出屯伊吾。索班没后，班勇建议遣西域长史屯楼兰。延

光三年，卒以勇为西域长史，出屯柳中，不复置都护，自是长史遂摄行都护事矣），故《汉书》纪西域诸国道里，以都护治所乌皇城为据；而《后汉书》所纪，则以长史所治柳中为据。逮汉末，中原多事，不遑远略，敦煌旷无太守且二十载（《魏志·仓慈传》），则柳中之屯与长史之官，必废于是时矣。魏皇初元年，始置凉州刺史（《张既传》），并以尹奉为敦煌太守（《阎温传》）。

三年，鄯善、龟兹、于阗各遣使贡献，西域遂通，置戊己校尉（《文帝纪》），以行敦煌长史张恭为之（《阎温传》）。而西域长史之置，不见于纪传，惟《仓慈传》言：“慈太和中迁敦煌太守，数年卒官。西域诸胡闻慈死，其会聚于戊己校尉及长吏治下发哀。”“长吏”二字，语颇含混。后汉以来，西域除西域长史、戊己校尉外，别无他长吏，魏当仍之，则“长吏”二字必“长史”之讹也。又据斯氏所得一简，云西域长史承移：今初除，月廿三日当上道，从上却至天水。”以简中所记地名考之，实为自魏至晋太康七年间之物（见《屯戍丛残考释》）。恐西域长史一官，自黄初以来即与戊己校尉同置，惟其所治之地，不远屯柳中，而近据海头，盖魏晋间中国威力已不如两汉盛时，故近治海头，与边郡相倚，此又时势所必然者矣。

至前凉时，西域长史之官始见于史（《晋书·张骏传》），而《魏书·张骏传》则又称为“西域都护”。《传》言：骏分敦煌、晋昌、高昌三郡，西域都护、戊己校尉、玉门大护军三营为沙州，以西胡校尉杨宣为刺史。，《晋书·地理志》亦引此文，错乱不可读）案张骏时，西域有长史无都护，“都护”二字必“长史”之误，或以其职掌相同而互称之。斯氏于此地所得一简，云“今遣大侯究犁与牛诣营下受试，《屯戍丛残》第三叶），称长史所居为“营下”，又斯氏于尼雅北古城所得木简，有“西域长史营写鸿胪书”语（本书《补遗》）。此又《魏书·张骏传》之三营，其一当为西域长史之证也。

此三营者，戊己校尉屯高昌（《晋书·张骏（书）[传]》：“初，戊己校尉赵贞不附于骏，至是，骏击禽之，以其地为高昌郡”），玉门大护军屯玉门，而西域长史则屯海头，以成鼎足之势。则自魏晋迄凉，海头为西域重地，盖不待言。张氏以后，吕光、李嵩及沮渠蒙逊父子迭有其地。后魏真君之际，沮渠无讳兄弟南并鄯善，北取高昌，此城居二国之间，犹当为一重镇。逮魏灭鄯善、蠕蠕，据高昌，沮渠氏亡，此城当由是荒废。作《凉州异物志》者，乃有“海水荡覆”之说，而酈氏注《水经》用之。顾周隋以前，磧道未闭，往来西域者尚取道于此，故酈氏犹能言其大略。然非希、斯诸氏之探索，殆不能知为古代西域之重地矣。

其余木简，出于和阗所属尼雅城北及马咱托拉、拔拉滑史德三地者，其数颇少。尼雅废墟，斯氏以为古之精绝国。案今官书，尼雅距和阗七百里，与《汉书·西域传》、《水经·河水注》所纪精绝去于阗道里数合，而与所纪他国去于阗之方向、道里皆不合，则斯氏说是也。《后汉书·西域传》言光武时，莎车王贤诛灭诸国，

贤死（明帝永平四年）之后，遂更相攻伐。小宛、精绝、戎卢、且末为鄯善所并”，故范《书》无精绝国传。今尼雅所出木简十余，隶书精妙，似汉末人书迹，必在永平以后。所署之人，曰“王”、曰“大王”、曰“且末夫人，盖且末王女为精绝土夫人者），盖后汉中叶以后，且末、精绝仍离鄯善而自立也。考释既竟，爰序其出土之地，并其关于史事之荦荦大者如右，其戎役情状与言制度名物者，并具考释中，兹不赘云。

甲寅正月。

《流沙坠简》后序

余与罗叔言参事考释流沙坠简，属稿于癸丑岁杪，及甲寅正月，粗具梗概。二月以后，从事写定，始得读斯坦因博士纪行之书，乃知沙氏书中每简首所加符号，皆纪其出土之地，其次自西而东，自敦一、敦二迄于敦三十四，大抵具斯氏图中。思欲加入考释中，而写定已过半矣。乃为图一、表一，列缝隧之次及其所出诸简，附于书后，并举其要如次。前序考定汉简出土之地，仅举汉长城至玉门关二事；又考释中所定候官、缝隧次第，全据简文。今据其所出之地，知前由文字所考定者虽十得七八，今由各地所出之简以定其地之名，有可补正前考者若干事。

一、《汉志》效谷县及鱼泽障之故址也。效谷故城，自来无考。《大清一统志》云：“效谷、龙勒故城，俱在沙州卫西。”《西域图志》亦云：今日敦煌县西逾党河，旧城基址，不一而足。效谷、龙勒诸城遗址，疑于是乎在。近宜都杨氏《汉书地理志图》，亦图效谷于敦煌之西、龙勒之东。惟唐写本《沙州图经》载“古效谷城在州（唐沙州即今敦煌县）东北三十里，是汉时效谷县”云云。案《汉志》，效谷县本鱼泽障（今本此上有“师古曰”三字，然下引“桑钦记”实系班氏自注，胡础明已驳正之，是也）。今木简中虽不见效谷县，然“鱼泽”之名凡两见。其一云：“入西蒲书一：吏马行。鱼泽尉印，十三日起诣府。永平十八年正月十四日日下脯时，扬威卒□□受□□卒赵□。”（卷二“簿书”类第六十一简）此简出于敦二十八，其地在前汉为步广候官，在新莽及后汉为万岁扬威隧。简中所谓“府”者，谓敦煌太守或都尉府（前汉敦煌郡置宜禾、中部、玉门、阳关四都尉。后汉惟置敦煌都尉。故鱼泽障在前汉本属宜禾都尉，至后汉则属敦煌都尉也），太守、都尉，皆治敦煌，自鱼泽诣敦煌之书；经过敦二十八，而曰“入西蒲书”，则鱼泽必在敦二十八（即步广）之东。又一简云宜禾郡（简中都尉所治，亦谓之郡），隧第：广汉第一，美稷第二，昆仑第三，鱼泽第四，宜禾第五。”（卷二“缝隧”类第七简）此自东而西之次第（见考释）。他简云“万岁扬威隧长许玄受宜禾临介卒张均”（同上第十简），又云“万岁扬威隧长石伋受宜禾临介卒赵时”（同上第十一简），此皆记受书簿录。而宜禾临介卒之书，传至万岁扬威隧，则万岁之东必为宜禾，宜禾之东乃为鱼泽。今据斯氏图，则敦二十八一地（即前汉步广，后汉万岁），已远在敦煌东北。如效谷县即鱼泽障，当在敦煌东北百里余，则《一统志》诸说固非，即《沙州图经》以沙州东北三十里之古城为效谷城，亦未为得也。今据诸简及《汉志》，知中部都尉所辖障塞在汉敦煌县境。其东则效谷县境，其障塞为宜禾、为鱼泽；又东则广至县境，其障塞为昆仑、为美稷、为广汉，皆宜禾都尉所辖。此敦煌以东诸地之可考者也。

二、汉敦煌郡中部、玉门二都尉及四候官之治所也。前考言敦煌中部都尉下二候官，东为万岁，西为步广。今知“莫宿步广，（[缝隧]类第二简）与“步广缝”（同上第八简）两简均出于敦二十八；而“万岁候造史”（同上第一简）一简则出于敦二十七，二地相距至近，乃知“步广”、“万岁”乃一候官之异名。而“万岁候造

史”一简中有“间田”二字，乃王莽时物，则改步广候官为万岁，当属王莽时事也。至中部都尉下之弟二候官，实为平望。据“器物”类第一及第二十二两简，则平望青堆缝即敦二十二乙，平望朱爵缝即敦十九，则敦二十二乙与敦十九之间自为平望辖境。而敦二十二甲所出一简有“候官谨口亭”等语（“缝燧”类第六简）。又“簿书”类第五十九简亦出于敦二十二乙，其文曰“入西书二封”，其一中部司马□平望候官。”“官”字，前不能确定为何字，后更审谛，确系“官”字。此二简皆平望本有候官之证。又“中部司马抵平望候官”之书，经过敦二十二乙，而谓之“入西书”，则侯官治所自在敦二十二乙之西，或即敦二十二甲（斯氏书中有此名，而图中无此地）矣。此中部都尉下二候官之可考者也。至玉门都尉下二候官，初疑玉门候官当与都尉同治，然都尉治敦十四，而其旁敦十五甲一地，所出木简颇多，自系当时重地。沙氏释文第四百五十八简（此简沙氏书中未景印）亦出于此，其文曰“玉门候官”，则其地为玉门候官治所无疑。至都尉所属大煎都候官，则据“簿书”类第六简，云“敦煌玉门都尉子光丞□年谓大煎都候”云云，此都尉告候官之书，出于敦六乙，即凌胡燧，则大煎都候官当治凌胡燧矣。此玉门都尉下二候官之可考者也。

三、各缝燧之次第也。顾由各缝燧所出之简以定其地之名，有当审慎者二：异地致书，自署地名，一也；记事之中，偶涉他地，二也。惟器物之揭所署之地，则以本地之物署本地之名，更无疑义。今以此求之，则自东徂西，首利汉缝，为斯氏图中敦三十四之地；次万岁显武燧，即敦二十六之地，而万岁扬威燧之即敦二十七，吞胡燧之即敦二十八（中部都尉治此），可由是决之矣，次平望青堆燧，即敦二十二乙之地；次平望朱爵燧，即敦十九之地；次玉门，即敦十四；次玉门候官下所属诸燧：当谷即敦十三，广新即敦十二，显明即敦八；又次则大煎都候官下属诸燧：凌胡燧即敦六乙，厌胡燧即敦六丙（以上均缘“器物”类诸简所出地），而广武之为敦五，步昌之为敦六甲，广昌之为敦六丁，亦可由是决之矣。由是沙漠中之废址，骤得而呼其名，断简上之空名，亦得而指其地。较前此凭空文考定者，依据灼然。故已著其事于表，复会其要最于编首，览者详焉。

甲寅三月。

敦煌汉简跋一☆

制诏酒泉太守：敦煌郡到戍卒二千人，发酒泉郡。其假口如品！司马以下将卒长吏将屯要害处，属太守。察地刑，依阻险，坚辟垒，远候望，毋（第一简）

（上阙）陈却适者，赐黄金十斤。□□元年五月辛未下。（第二简）

右二简书法相似。又自其木理观之，乃一简裂为二者。第二简“斤”字之半尚在第一简末，可证也。此宣帝神爵元年所赐酒泉太守制书。《独断》云制书“其文曰制诏”三公、刺史、太守、相，又云：“凡制书，有印，使符，下远近皆玺封，尚书令重封。”故汉人亦谓之“玺书”。《汉书·武五子传》元康二年，遣使者赐山阳太守玺书，曰，制诏山阳太守，。”《陈遵传》：宣帝赐陈遂玺书，曰“制诏太原太守”，《赵充国传》：“上赐书曰，制诏后将军，。”下文目为进兵玺书。则玺书之首，例云“制诏某官”。此简云“制诏酒泉太守”，则赐酒泉太守书也。案《赵充国传》神爵元年，先零羌反。遣后将军赵充国击之（《宣帝纪》在四月）。酒泉太守辛武贤奏言：“屯兵在武威、酒泉、张掖万骑以上，皆羸瘦。可益马食，以七月上旬赍三十日粮，并出张掖、酒泉，合击罕、罕在鲜水上者，于是即拜武贤为破羌将军（《宣帝纪》在六月），而以书敕让充国曰：“今诏破羌将军武贤将兵六千一百人，敦煌太守快将二千人，长水校尉富昌、酒泉侯奉世将嫫、月氏兵四千，亡虑二千人。赍三十日粮，以七月二十二日击罕羌，入鲜水北句廉上1云云。后从充国计，兵不果出。均与此诏情事合。但此诏下于五月辛未（二十一日），尚在武贤拜破羌将军之前，此时酒泉太守即系武贤。又其时敦煌戍卒已至酒泉，武贤奏言屯“兵在武威、张掖、酒泉万骑以上”可证也。后从武贤大举之议，故敦煌戍卒二千人别以敦煌太守快领之。此时太守未行，故令司马以下与将卒长吏将屯要害处，受酒泉太守节度也。司马与将卒长吏皆统兵之官，将卒长吏即将兵长史。古“史”、“吏”二字通用。

《汉书·百官公卿表》郡守有丞，边郡又有长史，掌兵马，秩皆六百石。”《续汉书·百官志》郡当边戍者，应为长史。”是边郡有长史，又称将兵长史。《后汉书·和帝纪》永元十四年五月丁未，初置象郡将兵长史官。，《班超传》：“建初八年，拜超为将兵长史。”（《章帝纪》称为“西域长史，《班勇传》元初六年，敦煌太守曹宗遣长史索班将千余人屯伊吾。”盖皆敦煌郡之将兵长史也。

后延光二年，以班勇为西域长史，自是迄于汉末，常置此官以领西域各国，如都护故事。实则本敦煌郡吏，后乃独立，不属敦煌，然长史之名，犹郡吏之故号也。此诏乃神爵元年物，已有将卒长史。后汉谓“卒”为“兵”，故改称“将兵长史”，其实则一也。云“神爵元年五月辛未下”者，亦制诏旧式。《隶释·中常侍樊敏碑》所载诏书，末署“延熹元年八月廿四日丁酉下，魏下豫州刺史修老子庙诏，末署“黄初三年十月十五日□子下，木简有新莽诏，末署“始建国三年五月己丑下”，

皆是也。此诏本下酒泉太守，其出于敦煌塞上者，盖由酒泉传写至此也。

敦煌汉简跋二☆

四月庚子，丞吉下中（二）二（二）千郡太守、诸侯相，承书从事下当用者。

右简亦诏书后行下之辞而失其前诏者，且语多伪阙，盖传写者之失也。以文例言之，当云“丞吉下中二千石，中二千石下郡太守、诸侯相”。《史记·三王世家》太仆臣贺请三王所立国名。制曰：“立皇子闾为齐王，旦为燕王，胥为广陵王。四月丁酉，奏未央宫。六年四月戊寅朔，癸卯，御史大夫汤下丞相，丞相下中二千石，二千石下郡太守、诸侯相，丞当作“承”。书从事下当用者。如律令。”以此例之，则此“中”字下之小“二”字当在“千”字之下，而其下又脱“石（二）”二字也。又“丞吉”二字间，疑脱一“相”字。

考汉时行下诏书之例，如高帝十二年二月诏，则由御史大夫昌下相国，相国郅侯下诸侯王，御史中执法下郡守；上所引元狩六年诏书，则由御史大夫下丞相，丞相下中二千石，二千石下郡太守、诸侯相；孔庙置百石卒史碑载元嘉三年壬寅诏书，则由司徒、司空下鲁相；无极山碑载光和四年八月丁丑诏书，则由尚书令下太常，太常耽、丞敏下常山相。此简但云“丞吉”，不著何官之丞，汉代文书初无是例，则“丞”字下脱“相”字无疑也。汉丞相名吉者，惟有丙吉。丙吉为相在神爵三年四月戊戌，而卒于五凤三年正月癸卯，中间凡四年。此四年中，神爵四年，五凤元、二年四月，皆有庚子。此简即此三年中物也。“承书从事下当用者”，乃汉时公文常用语。《三王世家》、孔庙置百石卒史碑、无极山碑并有此文，犹后世所谓“主者施行”也。

敦煌汉简跋三☆

三月癸酉，大煎都侯婴□下厌胡守土吏方，承书从事下当用者，如诏书。令史偃（第一简）

□□丙寅，大煎都守候丞□□□□□□土吏异，承从书事下当用，如诏书。令史尊第（二简）

右二简亦诏书后行下之辞，而脱其前简者。“大煎都”者，玉门都尉所属候官之名，厌胡”者，燧名，土吏”者，“土吏”之或作，汉碑“士”皆作“土”。土吏，主兵之官。《汉书·王莽传》莽下书曰：“予之皇初祖考黄帝定天下，土吏四十五万人，士千三百五十万人。。”其余所举，悉汉官名，则“土吏”亦汉官也。《汉书·匈奴传》注引《汉律》：“近塞郡皆置尉，百里一人，土史、尉史各二人。”古“史”、“吏”二字通用，“土史”即“土吏”也。“守土吏”，则摄行土吏事者。“令史”者，主书之官，故署名于简末。此二简，令史之上均以笔作斜画，下简亦然，不知何义。或如后世押字欤？

敦煌汉简跋四☆

二月庚午，敦煌玉门都尉子光丞□年谓大煎都候写移书到气郡口。言到日，如律令。卒史山书佐遂已

右简乃玉门都尉下大煎都候官之书。玉门都尉见《汉书·地理志》。都尉有丞，秩六百石，见《百官公卿表》。“言到日”者，犹《史记·三王世家》及汉碑诏书后所谓“书到言”也。汉时行下公文，必令报受书之日，或云“书到言”，或云“言到日”，其义一也。“律令”者，《史记·酷吏传》云：“前主所是著为律，后主所是疏为令”，《汉书·朱博传》云“三尺律令”是也。汉时行下诏书，或曰“如诏书”，或曰“如律令”。苟一事为律令所未具而以诏书定之者，则曰“如诏书”，如孔庙置百石卒史碑、无极山碑及前二简是也；苟为律令所已定而但以诏书督促之者，则曰如律令，《三王世家》所载元狩六年诏书是也。如者，谓如诏令行事也。“如律令”一语，不独诏书，凡上告下之文皆得用之，《朱博传》博告姑蔑令丞永初讨羌檄及此简皆是。其后民间契约、道家符咒亦皆用之，唐李匡父《资暇录》遂以律令为雷边捷鬼，不经甚矣。卒史、书佐，亦主文书之官，故列名于简末。

敦煌汉简跋五☆

十一月壬子，玉门都尉丞□敢言之，谨写移敢言之。掾安、守属贺、书佐通成

右简为玉门都尉言事之书。“敢言之”者，下白上之辞。《汉书·王莽传》：莽进号宰衡，位上公，“三公言事称，敢言之”。《论衡·谢短篇》：“郡言事二府，称，敢言之。”孔庙置百石卒史碑：“鲁相平行长史事下守长擅叩头死罪，敢言之司徒、司空府。”此简不云“叩头死罪”，而但云“敢言之”，或系都尉与敦煌太守之书而出于都尉治所者，盖具书之草稿也。掾安守属贺、书佐通成，皆主文书之官。樊毅复华下民租口算碑表后，置“掾臣条、属臣淮、书佐臣谋”。此简末亦署掾、属、书佐三人名，与彼碑同。《汉书音义》云：“正曰掾，副曰属。”守属则摄行属事者也。

敦煌汉简跋六☆

上阙。尉融使告部从事移上阙。更主踵故以（以上简面）

上阙。从事□事令史"（以上简背）

右简盖窦融所下书也。案《后汉书·窦融传》：融出为张掖属国都尉，酒泉太守梁统等推融行河西五郡大将军事，融居属国，行都尉职如故，置从事监察五郡。此简上半折去，其下尚存“尉融使告部从事移”八字。案汉制，都尉下无部从事，此简必出窦融，其全文必云“某月日，行河西五郡大将军事、张掖属国都尉融，使告部从事”云云。而所告之“部从事”，即融所置监察五郡之从事也。

《续汉书·百官志》：“司隶校尉、刺史下有部郡国从事，主督促文书，察举非法。皆州自辟除，故通为百石，每郡各一人。”窦融领河西五郡，与刺史体制略同，故亦置从事。此所告之“部从事”，盖即部敦煌郡从事也。凡汉时文书云“告”者，皆上告下之辞。

若他都尉对刺史属官，非其所属，不得云“告”。此为窦融书无疑。

敦煌汉简跋七☆

本始六年三月（癸亥朔，丁丑逮辛卯十五日。乙酉到官）

右简云“本始六年”，案宣帝本始之号仅有四年，无六年。本始六年，即地节二年。据《太初术》推之，则地节二年三月正得癸亥朔，与此简合。考武帝建元、元光、元朔、元鼎、元封六号，皆六年而改；太初、天汉、大始、征和四号，皆四年而改；昭帝始元、元凤二号，亦六年而改。疑宣帝本始之元，初亦因昭帝之制六年而改，后更用四年递改之制，遂以“地节”元年为三年，而迫减“本始”为四年。否则敦煌距京师仅一月程，不应改元二年后尚用“本始”旧号，而月朔干支又恰与地节二年密合也。

是月癸亥朔，则“丁丑”者，月之十五日；“辛卯”者，月之二十九日（是月小尽），“乙酉”则二十三日。“丁丑逮辛卯”，盖所定到官之程限。“乙酉到官”，则在限内矣。

敦煌汉简跋八☆

广昌候史、敦煌富贵里孙无恣，未得二月尽五月，积四月奉钱二千四百。

案简云“积四月奉钱二千四百”，则月奉六百。考候史秩在候长下，据下简候长秩百石，则候史之秩当在百石以下，汉律所谓“斗食”也。

《续汉书·百官志》：“百石月奉十六斛，斗食月奉十一斛。凡受奉，皆半钱半谷。”刘昭注引《晋百官志》载汉延平中制“百石月钱八百，谷四斛八斗”，而《汉书·宣帝纪》注引如淳曰：“律，百石月奉六百”二说不同。如淳所引汉律，不知何时制。此简乃前汉物，而候史之秩不满百石者月奉六百，与延平中制为近矣。

敦煌汉简跋九☆

敦德步广尉曲、平望塞有秩候长、敦德亭闲田东武里五士王参秩庶士，（以上第一列）

新始建国地皇上戊元年十月乙未起，尽二年九月晦，积三百六十日，除月小五日，定三百五十五。以令二日当三日，增劳百黍十黍日半日为五月二十黍日半日。（以上第二列）

右简乃计资劳之书。“敦德”者，王莽所改敦煌郡名。“步广尉”，即《汉志》之敦煌中部都尉。《志》云“中部都尉治步广候官”是也。“曲”者，部曲。《续汉志》领军皆有部曲。大将军营五部，部校尉一人，比二千石。部下有曲，曲有军候一人，比六百石。曲下有屯。”汉制，都尉秩视校尉，其下有二候官，盖视军候。则候官即校尉下之曲矣。“平望”者，步广尉所辖塞名。“有秩候长”者，候长之秩百石者也。《汉书·百官公卿表》乡有三老、有秩、嗇夫。”《续汉志》有“乡有秩”，秩百石。李翕《西狭颂》有“衡官”、“有秩”。此简有“有秩候长”。汉制计秩自百石始，不及百石者谓之“斗食”，百石则称“有秩矣”。以上十三字乃官名，而“敦德亭闲田东武里”，乃其县里之名。“敦德亭”即汉之敦煌县。

莽时县以亭名三百六十九，凡县与郡同名者，亦皆加“亭”字以别之。《汉志》于“敦煌郡”下注“莽曰敦德”，于“敦煌县”下亦注“莽曰敦德”。不曰“敦德亭”，则夺“亭”字也。“闲田”者，《莽传》云“诸侯国闲田，为黜陟增减”，乃用《王制》语，凡郡县未封之地，皆闲田也。“五士”，即汉之“士伍”。汉人有爵者称爵，如云“公乘某”、“五大夫某”是；无爵者称士伍，如《淮南厉王传》之“士伍开章，《丙吉传》之“士伍尊”是汉时“五”、“伍”通用），莽改汉制，又喜颠倒反易其名，故士伍为“五士”矣。“王参”，人姓名。“秩庶士”者，百石之秩，《莽传》云“更名秩百石国为庶士”是也。年号“始建国、地皇”之下复云“上戊”者，莽自谓以土德维王，故即位用戊辰日，又以戊子代甲子为首，故曰“上戊”。《莽传》称“地皇坎三十年，其王光上戊之六年”（莽作新历，六岁一改元。王光者，其所豫定之年号）；宋韩缜家藏莽铜科铭云“始建国天凤上戊六年，见《避暑录话》），《候钲铭》（见《隶续》）及潍县陈氏藏常乐卫士上元士铜饭帨，皆云“始建国地皇上戊二年”是也。此简乃计边吏资劳之书，云“令二日当三日”者，即边郡增劳之制，疑汉制已如斯矣。

敦煌汉简跋十☆

建武十九年四月一日甲寅，玉门障尉戍告候长晏到任。

右简乃玉门障尉令候长到官之檄。案前汉时有玉门关都尉。《续汉志》：“建武六年，省诸郡都尉及关都尉，惟边郡往往置都尉。”此建武十九年事，故玉门关但有障尉，无都尉。《续志》云“边县有障塞尉”，又云“诸边障塞尉、诸陵校尉长，皆二百石”，盖微官也。《后汉书·西域传》及刘宽碑阴皆有“玉门关候”（此“候官”之“候”，非“候长”、“候史”之“候”）。盖永平复通西域后，以敦煌都尉下之一候官移驻于此，此时则惟有障尉，盖光武闭玉门以谢西域之质，其设官亦俭于前后矣。

敦煌汉简跋十一☆

入西书二封（一封中部司马□平望候官，一封中部司马□阳关都尉府），十二月丙辰日下铺时，受放故卒张永，日下铺时□□燧长张”。（第一简）

入西蒲书二封，其一封文德大尹章，诣大使五威将莫府；一封文德长史印，诣大使五威将莫府。始建国元年十月辛未日食时，关嗇夫受□□卒赵彭。（第二简）

入西蒲书一，吏马行。鱼泽尉印，十三日起诣府。永平十八年正月十四日白中时，杨威卒□□受□□卒赵仲。（第三简）

右三简皆记邮书之簿。“中部司马”者，敦煌中部都尉属官。“文德”，地名，不见《汉志》。据上简，文德有大尹、有长史，则为边郡矣。《续汉志》郡当边戍者，丞为长史。”他简举西北边郡，有文德、酒泉、张掖、武威、天水、陇西、西海、北地八郡，举文德而无敦煌。故沙畹氏释彼简“文德”为王莽所改敦煌郡之初名，以此简证之，沙说是也。此简称“文德”，为始建国元年事，至地皇二年一简，则称“敦德”，与《汉志》合。然则《汉志》所载，乃其再改之名也。据《莽传》：“始建国元年秋，遣五威将王奇等十二人颁，符命，四十二篇于天下，外及匈奴、西域。三年，又遣大使五威将王骏出西域。此乃始建国元年事，则，大使五威将者，乃王奇等十二人之一。其出匈奴者为王骏，出西域者其人无可考。

据上简，十月辛未，文德大尹、长史之书自塞上送五威将莫府，其时当已出塞矣。”“鱼泽尉”，亦障塞尉之类。诸简所云“某官诣某官”者，皆据封泥及检署之文录之。“中部司马”、“文德大尹章”、“文德长史印”、“鱼泽尉印”诸字，皆封泥上文；而“平望候官”、“阳关都尉府”、“大使五威将莫府”诸字，则检上所署之字也。余曩作《简牍检署考》，据《王莽传》哀章所作铜匱之检及刘熙《释名》，谓古人封书既用玺印，故但须署受书之人，不须自署官位、姓名。此数简所记足以证之。

又第三简云“十三日起诣府”，则并署发书之日矣。此种邮书，皆自东向西之书，故曰“入西蒲书”。“蒲”者，“簿”之或作也。又诸简皆记受书日时，曰“日下铺时”、曰“日食时”、曰“日中时”，又皆燧卒致之燧长，或燧卒受之，以次传送至他燧。可见汉时邮递之制即寓于亭燧中，而书到日时与吏卒姓名，均有记录。可见当时邮书制度之精密矣。

敦煌汉简跋十二☆

宜禾郡蠡第：广汉第一，美稷第二，昆仑第三，鱼泽第四，宜禾第五。（第一简）

上缺。望步广羹（第二简）

大威关蓬（第三简）

右三简所记凡七赛，而或作“蠡”，或作“養”、或作“蓬”，皆“棄”之别字也。《说文》賚，隧，候表也。边有警，则举火。从火，逢声。”又“𡿨，塞上亭守喪火者。从𡿨，遂声”。则隧以其地言，而賽以其物言，其实一也。然析言之，则“棄”与“隧”又自不同。《史记·司马相如传》闻烽举燧燔。”《集解》引《汉书音义》曰：“烽，如覆米篋，县著桔槔头，有寇则举之。燧，积薪，有寇则燔然之。”《汉书·贾谊传》斥候望烽燧不得卧。”注引文颖曰：“边方备胡寇，作高土橧，橧上作桔槔，桔槔头悬兜零，以薪草置其中，常低之。有寇则火然，举之相告，曰烽。又积薪，寇至即然之，以望其烟，曰燧。”二说略同。则烽用火，燧用烟；夜宜用火，昼宜用烟，他简云“昼不见烟，夜不见火”是也。乃张揖（《文选·谕巴蜀檄》李善注引）、张宴（《汉书·贾谊传注》）、司马贞（《史记·周本纪》索隐）、张守节（《史记·司马相如传》正义）皆以为烽主昼，燧主夜。颜师古独于《贾谊传》注破张宴之说，曰“昼则燔燧，夜乃举烽”，其识卓矣。据本简所记，则举烽燧之地，或曰賽，或曰燧，而燧之名多至数十，賽则仅上三简所记而已。以理度之，则夜中之火视昼中之烟所及者远。

盖古者设戍必据高地，又烽台之高至五丈余（《太白阴经》、《通典》及本简皆云），烽干之高亦至三丈（沙畹书第六百九十简），二者合计，得八丈有奇，夜中火光自可及数十里。若昼中之烟，较不易辨，故置燧之数宜密于置烽，此自然之理。简中诸燧，以燧数及里数差之，大率相去十里许。而養之相距，自右简观之，则昆仑在广至县境，鱼泽在效谷县境，宜禾在效谷西界，与敦煌中部都尉之步广候官相接，则诸烽间相去颇远矣。以后世事证之，则庾闳《扬都赋》注云烽火以置于高山头，缘江相望，或百里，或五十里，或三十里。（《太平御览》卷三百三十五引）

《唐六典·兵部》“职方郎中职云，“凡烽候所置，大率相去三十里。”而唐《沙州图经》纪白亭烽与长亭烽相去四十里，长亭烽与阶亭烽相去五十里。盖塞外广衍，无林麓之蔽，幕中干燥，无掌雾之虞，则置烽自不必如内地三十里之密。后世如此，汉亦宜然。然则简中所记棄少而燧多，虽棄、燧本可互言，而多少殆为事实矣。“宜禾郡”者，汉无此郡名，殆指宜禾都尉辖境。以太守、都尉官秩略同，故其所治亦谓之郡。《汉志》“敦煌郡广至县”下，“宜禾都尉治昆仑障”。此出乎帝元始时版籍，其先当治鱼泽，故孝武时有鱼泽者都尉。《汉志》“效谷县”下，注引桑钦说“孝武元封六年，济南崔不意为鱼泽尉”，唐《沙州图经》引作“鱼泽都

尉”。

其后盖徙治宜禾，故又称宜禾都尉。后徙治昆仑障，仍用宜禾之号。此简中五弃，其次自东而西。广汉、美稷、昆仑三烽皆在广至县境，鱼泽、宜禾皆在效谷县境。

《汉志》云“效谷县，本鱼泽障也”，宜禾一戍又在效谷之西，西与敦煌之步广候官接界（详见《流沙坠简后序》），然则此五戍绵亘广至、效谷二县北界。其地不下二三百里，而仅有此五弃，可见弃燧疏数之比矣。步广一，赛，则属中部都尉，又在宜禾之西。至“大威关弃”一简，疑尚有阙字，当为玉门关之弃矣。

敦煌汉简跋十三☆

县承塞亭各谨候，北塞燧即举表皆和，尽南端亭。以札署，表到日时。（第一简）

七月乙丑日出二千时，表一通至。其夜食时，苣火一通从东方来。杜充见。（第二简）

右二简皆记举烽之事。“承塞亭”者，亭之最近塞者也。汉敦煌北塞，自西而东，所有亭燧皆沿塞上置之。此简乃云“承塞亭”及“南端亭”者，盖非塞上各亭燧，而谓自塞上南至郡治之亭燧也。汉制：内地十里一亭。其当孔道者，即为传烽之所矣。表，即《说文》所谓“丧燧，候表也”。然不云“举燧”而云“举表”者，意汉时塞上告警，透、燧之外，尚有不然之表。晋灼《汉书音义》云：“烽，如覆米箕县著桔槔头，有寇则举之。”但言举而不言然。盖浑言之，则烽、表为一物；析言之，则然而举之谓之烽，不然而举之谓之表。夜则举烽，昼则举表。烽台五丈，上著烽干，举之足以代燔燧矣。《墨子·号令》篇之“垂”，与《杂守篇》之“烽”，实皆谓是物也。

《号令篇》云：“望见寇，举一垂（孙氏诂让《间诂》以“垂”为“表”字之伪，是也入境，举二垂；狎郭，举三垂；入郭，举四垂；狎城，举五垂。夜以火，亦如此。”《杂守篇》云望见寇，举一烽，入境，举二烽；射妻，举三烽；郭会，举四烽；城会，举五烽。夜以火，如此数。”或云垂，或云烽，又别烽与火为二物，明烽即表也。“表到”、“表至”者，谓见表之时。“苣”者，“炬”之本字。《说文》苣，束苇烧也。”“一通”者，古者传烽以多少为识，如《墨子·号令》、《杂守》二篇所言，皆以烽之多少示敌之远近者也。唐《兵部烽式》（《白氏六帖》引。则云：“寇贼不满五百，放烽一炬；得蕃界事宜，知欲南入，放二炬，蕃贼五百骑以上，放三炬，千人，放四炬；余寇万人，亦四炬。”《御览》引《李卫公兵法》，语亦略同。此以烽之多少，示敌之多寡者也。

惟李筌《太白阴经》及《通典》则云：“每晨及夜半，安、举一火；闻警，因举二火；见烟尘，举三火；见敌，烧柴笼。”则又以一火为报平安之烽。汉人举烽，不知用何法。然沙氏书中别录一简释文（原简沙书未印）云：“六月丁巳，丁亥第二百一十，苣火一通从东方来。”所谓“丁亥第二百一十”者，盖谓自丁亥岁首至六月丁巳所见之烽数。一百七十八日间，而烽火之数至二百一十，恐汉时每夜亦有报平安之烽，如李、杜二书所云也。此简出玉门大煎都候官所治凌胡燧，“苣火一通从东方来”，则来自玉门方面也。

敦煌汉简跋十四☆

出粟一斗二升，以食使莎车续相如上书良家子二人，八月癸卯（下阙）。（第一简）

出粟五石二斗二升，以食使车师□君卒八十七人（下阙）。（第二简）

右二简，均记禀给行客之事。《汉书·功臣侯表》承父侯续相如以使西域，发外王子弟，诛斩扶乐王首，虏二千五百人，侯，千百五十户。大始三年五月封。”此事不见《西域传》。使莎车与斩扶乐，殆一时事，则此简乃大始二年以前物也。“良家子二人”，乃相如所遣上书者，时过塞下，故出粟食之。汉时禀食，率曰六升。

《匈奴传》严尤谏王莽曰：“计一人三百日食，用糒十八斛。1”则百日得六斛，一日得六升。故右“一斗二升”者，二人一日食，五石二斗二升”者，八十七人六日食也。此二简出玉门，而往反南北道之使皆过此者。

案《西域传》言：“自玉门、阳关出西域有二道。从鄯善傍南山北，波河西行至莎车，为南道；自车师前王庭随北山，波河西行至疏勒，为北道。”《后书》语亦略同。《魏略·西戎传》言：“从玉门关入西域，前有二道，今有三道。从玉门关西出蜡羌，转西越葱岭，经县度入大月氏，为南道；从玉门关西出，发都护井，回三陇沙北头，经居庐仓，从沙西井转西北，过龙堆到故楼兰，转西诣龟兹，至葱岭，为中道；从玉门关西北经横坑，避三陇沙及龙堆，出五船北，到车师界戊己校尉所治高昌，转西与中道合，至龟兹，为新道。”

《北史·西域传》所记二道，其一当《魏略》之新道，其一当其中道，而皆云“出玉门”。《隋书·裴矩传》所言三道，亦皆与《魏略》同，而不言所从出。《元和郡县志》则言：“阳关谓之南道，西趣鄯善、莎车；玉门谓之北道，西趣车师前庭及疏勒。”综上诸说观之，《汉书》记西域二道之所从出，但浑言玉门、阳关；《魏略》、《北史》专言玉门，《元和志》言南道出阳关，北道出玉门。今案汉时南北二道分歧，不在玉门、阳关，而当自楼兰故城始。自此以南，则从鄯善傍南山北，波河西行至莎车；北则东趣车师前王庭，或西趣都护治所，皆随北山，波河西行至疏勒。故二道皆出玉门。若阳关道路止于蜡羌，往鄯善者绝不取此，故《西域传》言“蜡羌僻在东南，不当孔道”。《汉书》纪北道自车师前王庭始，纪南道自鄯善始，当得其实。然则楼兰以东，实未分南北二道也。右简出玉门塞上，而自南道莎车还者乃经其地，益知南北二道之分歧不在玉门、阳关，而当自故楼兰城始矣。

唐写本残《职官书》跋

唐写本残《职官书》，英国伦敦博物馆所藏！日本狩野博士（直喜）所录。共二十八行，前后阙，存亲王国、三师、三公府、亲王府、上柱国以下带文武职事府官属，其体盖唐时所谓“令”。《六典》云：“令以设范立制。”而此残卷则职官令之一也。所以知非隋制者，隋有上开府仪同三司、开府仪同三司、上仪同三司、仪同三司四级，而此卷惟开府仪同三司一级，与唐制合。又隋时上柱国、柱国，不问带文武职事与否，均置府属，而此则带职事者始得置之；又隋制上柱国在三师、三公上，此则在三师、三公下，与隋制不合故也。然犹当为唐初之制，故与《六典》及《新》、《旧》两书《志》又大不同。

《六典》谓“三师为赠官，其或亲王拜者，但存其名”，又谓“自隋文帝罢三公府，皇朝因之”。《通典》亦云“大唐三师、三公府并无官属”，而此有三师、三公府官属。盖《六典》、《通典》以事实言，则唐初除亲王外，无拜三师、三公者，亲王自有王府官属，故不别开府。此以立制者，容亲王外有拜三师、三公者，故为之制府属（唐中叶后，多有以庶姓拜三师、三公者，然多为他职事官崇阶，亦不开府）犹此卷及《六典》皆有王国官属，实则唐世亲王均未就国，则亦未尝置此种官也。

至开府仪同三司上柱国以下带文武职事官属，亦《六典》及两《唐志》所未载。而亲王府官属亦有异同。《六典》：王府官属尚有录事、仓曹、户曹、骑曹、士曹、参军各一人，亲事府及帐内府典军各一人，副典军二人。此皆无之。又记室参军，此一人，《六典》二人；亲事，此三十九人，彼三十六人；帐内，此六十人，彼六百六十七人。

盖《六典》为开元二十四年制，此则开元以前制也。案《六典》，唐令自武德、贞观、麟德、凤仪、垂拱、神龙、太极凡七修，开元初两修。《旧唐书·经籍志》又有《永徽令》，别出九者之外，此卷当即其一。观其开府仪同三司官属准三师、三公，而上柱国以下带文武职事者，皆得开府，大与隋制近，则此残卷或犹是《武德令》断片欤？

己未七月。

唐写本《食疗本草》（残卷）跋

唐写本《本草》，英伦博物馆藏，狩野博士所录，存药名二十四，惟“木瓜”、“胡桃”下有注，余未录。其“木瓜”、“胡桃”二注，以《政和本草》所引《食疗本草》校之皆合，惟语有详略耳。案《唐书·艺文志》有孟洗《食疗本草》三卷。嘉祐《补注本草》所引书传有《食疗本草》，云“唐同州刺史孟洗撰，张鼎又补其不足者八十九种，并旧为二百二十七条，凡三卷”云云。今存二十四条，则仅得十之一矣。

其药名皆朱书，余所见唐写本《周易释文》之卦名、《唐韵》之部首皆然，但用以与余文识别，更无他义。其药性冷热，皆用小字旁注。案唐写本陶慧居《本草集注序录》云：“有毒、无毒易知，惟冷、热须明。今以朱点为热，墨点为冷，无点是平。”而《证类本草》所引陶氏《序录》，则云“惟冷、热须明，今依本经别录，注于本条之下”。是唐慎微所见陶《本草》已与原本异，盖后人缘朱、墨点与其有无，易于舛错，故以“冷”、“热”、“平”等字旁注之；而又恐与《序录》抵牾，遂并改《序录》原文。此卷药名朱书，而冷、热用旁注，知陶《本草》于药性易朱、墨点而为旁注，亦自唐已来然矣。

唐写本《灵棋经》（残卷）跋

此残卷亦狩野博士所录。存卦象三，其卦作“上（下、下上、下上、下）、下（上下、上下）”其辞作四言韵语，即《灵棋经》“鬼灾”、“空亡”、“不谐”三卦辞也。今本《灵棋经》卦作一上四下、二上一下、二上二下，不同古本。

又第一卦象云：“家有恶鬼，两两对坐，天地高卑，莫（下阙）。”今本作家有恶鬼，两相对坐。伺候过失，断水绝火。天神地祇，专察人过。”

又第三卦象云：“两女无夫，斗争别居。入异路分，别宅处庐。”今本作：“两女无夫，斗争各居。出入异路，分别室庐。”象下各有“注曰”云云，今本所无。其“颜渊曰”云云，则与今本所载晋驾部郎中颜幼明注大同。古本作“颜渊曰”，则又因其同为颜氏而依托也。

唐写本失名残书跋

失名残书，亦狩野博士所录，前后阙，存开元九年至天宝十三载，纪每年大事。然每年下纪甲子名及所属五行，盖占家所用历以验祸福者，非史家编年书也。其所纪甲子，亦较史家先一年。如开元九年本辛酉，而此云壬戌，十年壬戌，而此云癸亥，以下仿此。故其中纪事，亦与史家参错。如新、旧两《唐书》皆云“十二年，废王皇后为庶人”，而此云“十一年，《旧书·玄宗纪》“开元十三年五月庚寅，妖贼刘定高率其党夜犯通洛门，尽擒斩之”，而此则云“十四年五月十五日，刘五郎反，据《长术》：十三年五月十五日为丁酉，十四年是日为壬辰，十三日为庚寅。疑此书“十五日”乃“十三日”之讹，系年则是也）。

两《书》皆言“十四年四月丁卯，岐王范薨”，而此则云“五月十九日，岐王卒，据《长术》，则十四年五月十九日为丙午。彼系月误，此系年误也）。《新书》言“二十四年五月丙午，刘志诚反”，《旧书》言“六月丙午”，此则云“廿三年五月四日，刘志成反”。两书皆言“天宝三载正月丙辰朔，改年为载”，而此则系之“二载”。大抵彼是此非。术数之家于国故甚疏，固自不足怪也。

唐写本《大云经疏》跋☆

此卷亦狩野博士所录，前后阙。以文义观之，盖武后载初元年所作《大云经疏》也。卷中所引“经曰”及“经记曰”云云，均见后凉昙无讖所译《大方等无想经》。此经又有竺法念译本，名《大云无想经》（此本已佚。上虞罗氏藏六朝人所书一卷，系第九卷，亦阙前半）。昙公译本中亦屡见“大云”字，故知此为《大云经疏》也。案《旧唐书·则天皇后本纪》载初元年，有沙门十人伪撰《大云经》，表上之，盛言神皇受命之事。制颁于天下，令诸州各置大云寺，总度僧千人。”又《薛怀义传》：“怀义与法明等造《大云经》，陈符命，言则天是弥勒下生，作阎浮提主，唐氏合微，故则天革命称周。”“其伪《大云经》颁于天下，寺各藏一本，令升高坐讲说。”

《新唐书·后妃传》所纪略同。宋次道《长安志》记大云经寺亦云：武太后初，光明寺沙门宣政进《大云经》，经中有女主之符，因改为大云寺。”皆以此经为武后时伪造。然后凉译本之末，固详说黑河女主之事，故赞宁《僧史略》谓“此经晋代已译，旧本便曰，女王，，于时岂有天后”云云，颇以《唐书》之说为非。志磐《佛祖统纪》从之，故于武后载初元年书“敕沙门法朗九人重译《大云经》，，不云“伪造”。

今观此卷所引经文，皆与凉译无甚差池！岂符命之说皆在疏中！经文但稍加缘饰，不尽伪托欤？又此疏之成！盖与伪经同颁天下，故敦煌寺中尚藏此残卷。第一段中历释《广武铭》，其文完具，盖亦《洛水宝图》之类。中有“千秋不移宗”语，案《唐书·宗楚客传》载中宗时右补阙赵延禧陈符命，引讖曰“百代不移宗”，《宣室志》言“上元初，郾城县民得寇谦之铭，曰，李代代不可移宗”，，盖即指此。第二段云神皇临驭天下，频得舍利，前开祥于光宅。”

案《长安志》云：“光宅坊横街之北光宅寺，仪凤二年，望气者言：“此坊有兴气。敕令掘得石函，函中有佛舍利骨万余粒，遂立光宅寺。”所谓“开祥光宅”者指此。第三段引《孔子讖》及《卫元嵩讖》。案《周书·艺术传》：“有蜀郡卫元嵩者，天和中著诗，预论周、隋兴废及皇家受命，并有征验。”此所引八句即是也。通观此卷，附会穿凿，无所不至，怀义等所修自应如此。赞宁于法朗辈尚有恕词，盖未见伪经及此卷欤？嘉兴沈乙庵先生初见此卷，告余内典中自有黑河女主之事，因赞宁之言，遂检得之，并论次如此。

唐写本《老子化胡经》（残卷）跋

巴黎国民图书馆藏《老子化胡经》卷一、卷十两卷，卷一首残阙数行。此英伦博物馆所藏《化胡经》卷一，较彼本多十一行，而首行《老子化胡经序》下纪撰人姓名处尚存一“魏”字。

案赵希弁《郡斋读书后志》载“《老子化胡经》十卷，魏明帝为之序”。此卷《序》题下尚存一“魏”字，则下所阙当是“明帝”二字，即希弁所见本矣。《序》作四言韵语，为他书序所未见。巴黎本卷首有阙佚，得此本校补，序文略可读矣。

唐写本韦庄《秦妇吟》跋

此诗前后残缺，无篇题及撰人姓名，亦英伦博物馆所藏，狩野博士所录。案《北梦琐言》蜀相韦庄应举时，遇黄寇犯阙，著《秦妇吟》一篇，云：“内库烧为锦绣灰，天街踏尽公卿骨。”此诗中二语，则为韦庄《秦妇吟》审矣。《琐言》又云尔后公卿颇多垂讶，庄乃讳之。时人号为，《秦妇吟》秀才，。他日撰家诫，内不许垂《秦妇吟》障子，以此止谤，亦无及也”云云。是庄贵后，讳言此诗，故弟蔼编《浣花集》，不以入集，遂不传于世。然此诗当时制为障子，则风行一时可知。伯希和教授《巴黎国民图书馆敦煌书目》亦有《秦妇吟》，下署名“右补阙韦庄”。彼本有前题，殆较此为完善欤？

又跋

余曩考日本狩野博士所录伦敦博物馆残本！据《北梦琐言》定为韦庄《秦妇吟》。后阅《巴黎国民图书馆敦煌书目》，有《秦妇吟》一卷，署“右补阙韦庄撰”，因移书伯希和教授，属为写寄。甲子正月，教授手录巴黎所藏天复五年张龟写本以至，复以伦敦别藏梁贞明五年安友盛写本校之。二本并首尾完具，凡千三百八十六字。其首云：“中和癸卯春三月”，则此诗乃中和三年所作。其末云“适闻有客金陵至，见说江南风景异，又云“愿君举棹东复东，咏此长歌献相公”，则此诗乃上江南某帅者。考是时，周宝以镇海军节度使同平章事镇润州，则相公盖谓周宝也。庄遇黄寇之乱，初居洛中，旋客江南，《浣花集》四有《江上逢使馆李学士》诗云：“关河自此为征皇，城阙于今陷战鼙。”自注云：时巢寇未平。则中和三年三月，庄已由洛渡江。其后有《陪金陵府相中堂夜宴》诗、《观浙西府相畋游》诗，又有《官庄》诗，自注云：江南富民悉以犯酒没家产，因以此诗讽之，浙帅遂改酒法，不入财产。

是庄曾为周宝客。此诗当即其初至江南贻宝之作矣。此时庄尚未第，其署“右补阙”者，乃庄在唐所终之官。考庄自巢乱后，自洛而吴、而越、而赣、而楚，至景福二年癸丑，始还京应举。其投寄旧知诗，所谓“万里有家留百越，十年无路到三秦”者也。是年下第，至次年乾宁改元，始成进士。其入蜀之岁，则弟葡作《浣花集序》云：庚申（光化三年）夏，以中谏□□□□。辛酉（天复元年）春，应聘为蜀奏记。而《浣花集》（十）有“过樊川旧居”诗，自注云：时在华州驾前奉使入蜀作。

考昭宗以乾宁三年丙辰七月幸华州，至光化元年戊午八月始还京师，则庄奉使入蜀，当在丙、丁、戊三年中。而《唐书·隐逸·陆龟蒙传》云：光化中，韦庄表龟蒙及孟郊等十人皆赠右补阙（《北梦琐言》记此事在光化元年。《容斋三笔》卷七谓在光化三年十二月），则庄使蜀后仍自还朝，至庚申乃复入蜀，辛酉始委质王氏。则庚申之中谏（唐人呼拾遗、补阙二官为中谏，见《北梦琐言》八），乃其在唐所

终之官也。《琐言》载右补阙韦庄为陆龟蒙诔文，与此诗结衔，均以其在唐最后一官称之。

而此诗书于天复五年，尤宜书此官也。

甲子二月。

敦煌发见唐朝之通俗诗及通俗小说

敦煌唐写本书籍，为英国斯坦因博士携归伦敦者，有韦庄《秦妇吟》一卷，前后残缺，尚近千字。此诗，韦庄《浣花集》十卷中不载，唐写本亦无书题及撰人姓名。然孙光宪《北梦琐言》，谓蜀相韦庄应举时，遇黄“寇”犯阙，著《秦妇吟》一篇，云“内库烧为锦绣灰，天街踏尽公卿骨”，今敦煌残卷中有此二句，其为韦诗审矣。诗为长庆体，叙述黄巢“焚掠”，借陷“贼”妇人口中述之，语极沉痛详尽，其词复明浅易解，故当时人人喜诵之，至制为障子。《北梦琐言》谓庄贵后讳此诗为己作，至撰家戒，不许垂《秦妇吟》障子，则其风行一时可知矣。其诗曰：

(上阙) 南邻走入北邻藏，东邻走向西邻避。北邻诸妇咸相凑，户外奔腾如走兽。轰轰焜焜乾坤动，万马雷声从地涌；火迸金星上九天，十二官街烟烘炯。日轮西下寒光白，上帝无言空脉脉。阴云晕气若重围，□者流星如血色。紫气潜随帝座移，妖光暗射口星析。家家流血如泉沸，处处冤声声动地。舞伎歌姬尽黯然，婴儿稚女皆生弃。东邻有女眉新画，倾国倾城不知价；长戈拥得上戎车，回首香闺泪盈把。旋抽金线学缝旗，才上雕鞍教走马；有时马上见良人，不敢回眸空泪下。西邻有女真仙子，一寸横波剪秋水，妆成只对镜中春，年幼不知门外事；一夫跳跃上金阶，斜袒半臂欲相耻；牵衣不肯出朱门，红粉香脂刀下死。南邻有女不记姓，昨日良媒新纳聘，琉璃阶上不闻声，翡翠帘前空见影；忽惊庭际刀刃鸣，身首分离在俄顷；仰天掩面哭一声，女弟女兄同入井。北邻少妇行相促，旋拆云鬟拭眉绿，已闻击托坏高门，不觉攀缘上重屋，须臾四门火光来，欲下危梯梯又摧，烟中大声犹求救，梁上悬尸已作灰。妾身幸得全刀锯，不敢踟蹰久回顾，旋梳云鬓逐军行，强展蛾眉出门去。旧里从兹不得归，六亲自此无寻处。一从陷贼经三载，终日忧惊心肝碎；夜卧千重剑戟围，朝餐一味人肝脍。鸳帏纵入岂成欢，宝货虽多非所爱。蓬头面垢眉犹赤，几转横波看不得。衣裳颠倒语言异，面上夸功雕作字。柏台多士尽狐精，兰省诸郎皆鬼魅。还将短发戴华簪，不脱朝衣缠绣被。翻持象笏作三公，倒佩金鱼为两制。朝闻奏对入朝堂，暮见喧呼来酒市。一声五鼓人惊起，声嘶喧争如窃议。夜来探马入黄城，昨日官军收赤水。赤水去城一百里，朝若发兮暮应至。凶徒马上暗吞声，女伴闺中潜生喜；皆言冤情此日销，必谓妖徒今日死。逡巡走马传声急，又道军前全阵入；大台小台相顾忧，三郎四郎抱鞍泣。泛泛数日无消息，必谓军前已衔璧，鏖旗掉剑却来归，又道官军屡败绩。四面从兹多厄束，一斗黄金一斗粟；尚让厨中食木皮，黄巢机上到人肉。东南断绝无粮道，沟壑渐平人渐少；六军门外倚僵尸，七架营中填饿莩。长安寂寂今何有，废市荒街麦苗秀；采樵斫尽杏园花，修寨诛残御沟柳，华轩绣毂皆消散，甲第朱门无一半；含元殿上狐兔行，花萼楼前荆棘满。昔时繁盛皆埋没，举目凄凉无故物；内库烧为锦绣灰，天街踏尽公卿骨。来时晓出城东陌，城上风烟如塞色。路旁时见游奕车，坡下绝无迎送客。霸陵东望人烟绝，树锁鹑山金翠灭。大道俱成棘子林，行人夜宿长口月。明朝晓至三峰路，百万人家无一户；破落田园但有蒿，摧残竹树皆无主。路旁试问金天神，金天无语愁于人；庙前古柏有残折，殿上金炉生暗尘。一从狂寇陷中国，天地晦盲风雨黑；案

前神水呪不成，壁上阴兵驱不得。闲日徒歆□獐思，危时不助神通力；我今愧恐拙为神，且向山中深壁匿。囊中箫管不曾闻，筵上牺牲无处觅。旋教魇（下阙）

此诗前后皆阙，尚存九百六十余字，当为晚唐诗中最长者。又才气俊发，自非才人不能作，惟语取易解，有类俳优，故其弟葛编《浣花集》时，不以入集。不谓千百年后，乃于荒徼中发见之。当时敦煌写有数本，此藏于英伦者如此。巴黎国民图书馆书目有“《秦妇吟》一卷，右补阙韦庄撰”，既有书名及撰人姓名，当较此为完好，他日当访求之也。

伦敦博物馆有《季布歌》，前后皆阙，尚存三千余字，纪汉季布亡命事，以七言韵语述之，语更浅俗，似后世七字唱本。又有孝子《董永传》，亦系七言，其词略曰：

人生在世审思量，暂□□□有何妨。大众志心须静听，先须孝顺阿爷娘。好事恶事皆钞录，善恶童子每抄将。孝感先贤说董永，年登十五二亲亡；自叹福薄无兄弟，夜中流泪每千行。为缘多生□姊妹，亦无知识及亲房。家里贫穷无钱物，所买当身殡葬爷娘。

云云：实当时所作劝善诗之一种，江右某氏所藏敦煌书中，有目连救母、李陵降虏二种，则纯粹七字唱本云。

伦敦博物馆又藏唐人小说一种，全用俗语，为宋以后通俗小说之祖。其书亦前后皆阙，仅存中间一段云：

判官慄恶，不敢道名字。帝曰：“卿近前来，轻道，姓崔名子玉，朕当识。”言讫，使人引皇帝至院门。使人奏曰：“伏维陛下，且立在此，容臣入报判官速来。”言讫，使者到厅前拜了，启判官：“奉大王处太宗是生魂到领，判官推勘，见在门外，未敢引。”判官闻言，惊忙起立。（下阙）

此小说记唐太宗入冥事，今传世《西游演义》中有之。《太平广记》引唐张鷟《朝野僉载》，已有此事，但未著判官姓名云：

唐太宗极康豫，太史令李淳风见上，流泪无言。上问之。对曰：“陛下夕当晏驾。”太宗曰：“人生有命，亦何忧也。”留淳风宿，太宗至夜半奄然入定，见一人云：“陛下盍合来还，即去也。”帝问：“君是何人？”对曰：“臣是生人判冥事。”太宗入见判官，问六月四日事（即太宗杀太子建成齐王元吉之日），即令还。向见者又迎送引导出。淳风即观乾象，不许哭泣。须臾乃寤，至曙，求昨所见者，令所司与一官，遂注蜀道一丞。

近代郑烺撰《崔府君祠录》，引《滏阳神异录》一事，与《金载》同，且以冥判为崔府君。曰：

一曰，府君忽奉东岳圣帝旨，敕断隐巢等狱。府君令二青衣引太宗至。时魏征已卒，迎太宗属曰：隐巢等冤诉，不可与辨，帝功大，但称述，神必祐也。”帝颌之，及对质，帝惟以功上陈，不与辨。府君判曰：帝治世安民之功甚伟。（中略）敕二青衣送帝回，隐巢等惶恐去。帝行，复与府君别。府君曰：毋泄也。”后帝令传府君像，与判狱神无异云云。

今观唐人所撰小说，已云冥判姓崔名子玉。故宋仁宗景祐二年，加崔府君封号诏，有“惠存滏邑，恩结蒲人，生著令猷，没司幽府”等语。可见传世杂说，其所由来远矣。又伦敦所藏尚有伍员入吴小说，亦用俗语，与太宗入冥小说同。

唐代不独有俗体诗文，即所著书籍，亦有平浅易解者，如《太公家教》是也。《太公家教》一书，见于李习之文集，至与文中子《中说》并称。宋王明清《玉照新志》亦称其书。顾世久无传本，近世敦煌所出凡数本，英法图书馆皆有之。上虞罗氏亦藏一本。观其书多用俗语，而文极芜杂无次序，盖唐时乡学究之所作也。其首数行，自叙作书缘起云云“代长值危时，望（亡之讹）乡失土，波迸流离。只欲隐山居住，不能忍冻受饥；只欲扬名后代，复无晏婴之机。才轻德薄，不堪人师，徒消人食，浪费人衣。随缘信业，且逐时之随。辄以讨其坟典，简择诗书，依经傍史，约礼时宜，为书一卷，助幼童儿”云云。则其作书之人与作书之旨，均可知矣。书全用韵语，多集当时俗谚格言，有至今尚在人口者。辄举其要者如左：

得人一牛，还人一马，往而不来，非成礼也。知恩报恩，风流儒雅。

一日为师，终身为父；一日为君，终身为主。

他篱莫越，他事莫知，他贫莫笑，他病莫欺，他财莫取，他色莫侵，他彊莫触，他弱莫欺，他弓莫挽，他马莫骑；弓折马死，偿他无疑。

罹网之鸟，悔不高飞；吞钩之鱼，悔不忍饥。

男年长大，莫听好酒；女年长大，莫听游走。

含血羹人，先污其口；十言九中，不语者胜。

款客不贫，古今实语。

近朱者赤，近墨者黑；蓬生麻中，不扶自直。

凡人不可貌相，海水不可斗量。

勤是无价之宝，学是明月之珠。积财千万，不如明解一经；良田千顷，不如薄艺随躯。

香饵之下，必有悬钩之鱼；重赏之家，必有勇夫。

以上诸条，或见古书，或尚存于今日俗语中。张溥《云谷杂记》谓杜荀鹤《唐风集》中诗极低下，如“要知前路事，不及在家时”，“不觉里头成大汉，初看骑马作儿童”，前辈方之《太公家教》。是唐人用此种文体，惟有《太公家教》一书，故独举此以比杜荀鹤诗，当时亦甚轻视之，观其所就，决不能与唐人他种文学比矣。

敦煌所出《春秋后语》，卷纸背有唐人词三首，其二为《西江月》。其词云：

天上月，遥望似一团银；夜久更阑风渐紧；为（原作以）奴吹散月边云，照见负（原作附）心人。

五梁台上月，一片玉无瑕（原作暇）；迤迤（原作以里）看归西海去，横云出来不敢遮，暖碛绕天涯。

又有《菩萨蛮》一首云：

自从宇内光戈戟，狼烟处处熏天黑；早晚竖金鸡，休磨战马蹄。森森三江水，半是离人泪；老尚逐今财，问龙门何日开。

又伦敦博物馆藏唐人书写云谣集杂曲子共三十首，中有《凤归云》二首。

其一云：

征夫数岁，萍寄他邦。去便无消息，累换星霜。月听砧杵，疑塞雁行。孤眠鸾帐里，枉劳魂梦，夜夜飞扬。想君薄行，更不思量。谁为传书与妾表衷肠？倚牖无言垂血泪，暗祝三光。万般无那处，一炉香尽，又更添香。

其二云：

怨绿窗独坐，修得为君书。征衣裁缝了，远寄边塞；想得为君贪苦战，不憚崎岖。终朝沙里口，凭三尺勇战奸愚。岂知红粉泪如珠？枉把金钗卜，卦口皆虚。魂梦天涯无暂歇，枕上虚待公卿，回日容颜憔悴，彼此何如。

又有《天仙子》一首云：

燕语莺啼三月半，烟蘸柳条金线乱。五陵原上有仙娥，携歌扇，香烂漫，留住九华云一片。犀玉满头花满面，负妾一双偷泪眼。泪珠若得似真珠，拈不散，知何限，串向红丝应百万。

此一首，情词宛转深刻，不让温飞卿、韦端己，当是文人之笔。其余诸章，语颇质俚，殆皆当时歌唱脚本也。

唐写本《云谣集杂曲子》跋

此卷首题《云谣集杂曲子》，共三十首。其目为《凤归云》四首，《天仙子》二首，《竹枝子》、《洞仙歌》、《破阵子》、《换沙溪》、《柳青娘》、《倾盃乐》则不著首数。其词为狩野博士录出者！《凤归云》二首、《天仙子》一首而已。案此八调名，均见崔令钦《教坊记》所载曲名中。《唐书·宰相世系表》有“国子司业崔令钦”，为隋弘农太守宣度之五世孙，则其人当生玄、肃二宗时。

《教坊记》记事讫于开元，亦足推其时代。则此八曲固开元教坊旧物矣。郭茂倩《乐府诗集·近代曲辞》中有滕潜《凤归云》二首，皆七言绝句，此则为长短句。此犹唐人乐府见于各家文集、《乐府诗集》者多近体诗，而同调之见于《花间》、《尊前》者则多为长短句。盖诗家务尊其体，而乐家只倚其声，故不同也。

《天仙子》，唐人皇甫松所作者不叠，此则有二叠；《凤归云》二首，句法与用韵各自不同，然大体相似，可见唐人词律之宽。《天仙子》词特深峭隐秀，堪与飞卿、端己抗行，惜其余二十余篇不可见也。

唐写本《敦煌县户籍》跋

此狩野博士所录英伦博物馆所藏“唐大历四年沙州敦煌县户籍”也。《唐六典》“户部尚书职”：“每一岁一造计帐，三年一造户籍。凡定户以仲年（子、卯、午、酉），造籍以季年（丑、辰、未、戌）。”大历四年，岁在己酉，正定户之年也。云“户主”者，《通典》引开元二十五年户令，云“凡户主，皆以家长为之”是也。云“户主索思礼，年六十五岁，老男”者，《六典》凡男女始生为黄，四岁为小，十六为中，二十有一为丁，六十为老。”《唐志》：“天宝三载，更民十八以上为中，二十三以上成丁。广德元年，诏男子二十五为成丁，五十五为老。”又《六典》凡给田之制，丁男、中男以一顷，老男、笃疾、废疾以四十亩，寡妻妾以三十亩，若为户者（户主）则减丁之半。”此索思礼年六十五，故云“老男”。必书此者，以与授田之事相关故也。此下或书“寡”，或书“小男”，或书“废疾”，或书“小女”、“中女”，皆放此。云“昭武校尉、前行右金吾卫、灵州武略府别将、上柱国”者，“昭武都尉”，武散官，正六品上；“别将”，则唐制：上府别将职事官，正七品下；中府，从七品上；下府，从七品下。云“前行”者，《六典》：“凡任官，阶高而拟卑曰行。”此以六品散官任七品职事官，故曰“行”；又时已罢职，故曰“前行”也。“上柱国”者，勋官第十二转。云“甲头某某”者，唐制：授官有团甲、过甲之制，授散官与勋亦然；言“甲头某某”者，犹唐以来言“某某下及第”、“某某榜下进士”矣。云“下中户”者，《六典》：“天下之户，量其资产，分为九等。”下中，则第八等也。云“不课户”者，《通典》户内有课口者为课户，无课口者为不课户。诸视流内九品以上官，皆为不课户”是也。云“母汜氏上元二年帐后死”者，谓上元二年计帐上有其名，其后即死。已死而犹列于籍者，造籍者之失也。云“男游鸾，丹州通化府折冲”者，案《唐志》，丹州府名有“同化”，无“通化”。

然唐《袁秀严墓志》云“迁左威卫丹州通化府折冲”，正与此合。“折冲”者，“折冲都尉”之略。唐制：上府折冲都尉职事官，正四品上；中府，正四品下；下府，从四品上。不知通化府居何等矣。上“索思礼”名下，具散官、职事官、勋官三种，此仅具职事官、勋官而不著散官者，因勋官自上柱国以下授田各有差，而散官则与授田无涉故也。云“鸾男齐岳，年一十二岁，大历二年帐后编附”者，谓至大历计帐后，其名始编入也。云“沙州敦煌县悬泉乡宜禾里大历四年口口手实”者，《唐会要》（八十五）：“开元十八年，敕诸户籍三年一造，起正月上旬，县司责手实计帐，赴州依式勘造，乡别为卷，总写三通，其缝皆注某州某县某年籍。州名用州印，县名用县印，三月三十日纳讫。”此行连用四印即是也。“手实”者，《文献通考》载宋熙宁七年吕惠卿议，引户令云：“手实者，令人户具其丁口、田宅之实也。”

《宋史·吕惠卿传》亦云“自供手实”。是前后所具丁口、田宅，皆出人户自供矣。云“乾元三年籍”者，乾元三年，岁在庚子，亦定户籍之年。《六典》注诸造籍

起正月，毕三月。”故户籍以定籍之年名之，不以造籍之年名之也。云“合应受田陆拾壹顷伍拾叁亩”者，唐制：上柱国受田三十顷。思礼父子二人，勋皆上柱国，合受田六十顷；又思礼以老男为户主，合受田五十亩；游鸾为丁，合受百亩；又园宅地三亩，故合受田六十一顷五十三亩。下“安游璟户”，云“应受田三十一顷一亩”，亦上柱国勋田三十顷，丁田一顷，园宅一亩，与此同例也。云“威佰肆拾亩已受：廿廿亩永业，一十九亩勋田，一十四亩买田，一百六十七亩口分。三亩居住园宅，五十九顷十一亩未受”者，案从上应受田数中除去勋田六十顷、园宅三亩外，只余百五十亩为永业、口分之田，其中亩为永业，百一十一亩为口分（《唐志》：“丁、中人一顷，其八十亩为口分，二十亩为永业；老及笃疾、废疾、寡妻妾皆以二十亩为永业，余为口分，，而此口分得六十七亩者，此亦有说。盖思礼已老，游鸾又为他州四品职事官，均未必能躬耕。为之耕者，二奴也。二奴之年正在丁中，例得受田百亩。意其初以二奴之名受田二顷，然唐制奴婢无受田之文，于是即以思礼、游鸾之名受田百五十亩，然实际已受二百七亩。有司以其家勋田未受者尚多，又以游鸾官稍高，遂不复致诘，即据以定籍，故有参池也。

勋田六十顷仅受一十九亩，盖唐时职事官田与勋官田皆有名无实。下“安游璟”勋亦上柱国，而勋田未受半亩，亦其证也。田亩皆注所在地及四至者，为授受田也。“瓜渠，地在城东十五里”，疑即唐《沙州图经》之“北府渠”，“孟授渠”亦见《图经》，云“长二十里”。《西凉录》云：“敦煌太守赵郡孟敏，于州西南十八里甘泉乡斗门上开渠溉田，百姓蒙赖，因以为号。”今城东一里，尚有此渠，知此渠自城西南迤至城东矣。

又：“安游璟，年伍拾叁岁，上柱国，开元二十五年九月五日授甲头王斛斯。”考《旧书·玄宗纪》开元二十九年，北州刺史王斛斯为幽州节度使”，当即其人。游璟于大历四年年五十三岁，上溯至开元二十五年，仅二十岁。上柱国，勋官第一，自白丁十二转乃得之，游璟此时似无遽得上柱国之理。疑游璟是岁代叔承户，其叔本有上柱国勋，游璟因而书之。唐制勋无袭法，又职事官田及勋官田未请受而身亡者，子孙不得追请（《六典》注）。游璟不知国故，因旧籍书之，有司以当时勋田本是虚名，亦不复致诘。可知唐时帐籍，固未能核实也。

宋初写本《敦煌县户籍》跋

右雍熙二年、至道元年户籍残卷，当沙州曹延禄之世，雍熙二年籍。“邓永兴”户下，尚注妻与弟姓名，而不注年岁；至道元年籍则但有户主姓名。盖沙州此时纯就田课税，不就丁课税矣。所请之田，亦无定制。邓永兴受二十亩，何石住受一顷十亩，高安三受七十五亩，盖视力之所能耕者受之。至是而后，周、隋、唐以来之旧制，并其名而亦亡之矣。

说商

商之国号，本于地名。《史记·殷本纪》云契封于商。”郑玄、皇甫谧以为上洛之商，盖非也。古之宋国，实名商邱。邱者，虚也（《说文解字》：“虚，大上也。昆仑丘谓之昆仑虚。”又云：“丘谓之虚，从丘，虍声，。”宋之称商邱，犹洹水南之称殷墟，是商在宋地。《左传·昭元年》：后帝不臧，迁伯于商丘，主辰。商人是在，故辰为商星。”又《襄九年传》：陶唐氏之火正阍伯居商邱，祀大火，而火纪时焉。相土因之，故商主大火。”又《昭十七年传》：宋，大辰之虚也。”大火谓之大辰，则宋之国都，确为昭明、相土故地。杜预《春秋释地》以商邱为梁国睢阳（今河南归德府商邱县），又云：“宋、商、商邱，三名一地。”其说是也。始以地名为国号，继以为有天下之号。其后虽不常厥居，而王都所在，仍称大邑商，讫于失天下而不改。

罗参事《殷虚书契考释序》云：史称盘庚以后，商改称殷。而遍搜卜辞，既不见殷字，又屡言，入商，。田游所至，曰，往，、曰，出，，商独言，入，。可知文丁、帝乙之世，虽居河北，国尚号商。”其说是也。且《周书·多士》云：肆予敢求尔于天邑商。”是帝辛、武庚之居，犹称商也。至微子之封，国号未改，且处之商邱，又复其先世之地，故国谓之宋，亦谓之商。

顾氏《日知录》引《左氏传》“孝、惠娶于商，哀二十四年）、“天之弃商久矣，《僖二十二年》）、“利以伐姜，不利于商，《哀九年》）、以证宋之得为商。阎百诗《潜邱札记》驳之，其说甚辩，然不悟周时多谓“宋”为“商”。《左氏·襄九年传》：士弱曰“商人阅其祸败之衅，必始于火”，此答晋侯“宋知天道”之问。“商人”，谓宋人也。《昭八年传》大搜于红，自根牟至于商卫，革车千乘。”“商、卫”，谓宋、卫也。《吴语》“阙为深沟，通于商、鲁之间”，谓宋、鲁之间也。《乐记》：师乙谓子贡：商者，五帝之遗音也，商人识之，故谓之商；齐者，三王之遗音也，齐人识之，故谓之齐。子贡之时，有齐人，无商人。商人，即宋人也。

余疑“宋”与“商”声相近，初本名“商”，后人欲以别于有天下之“商”，故谓之“宋”耳。然则“商”之名起于昭明，讫于宋国，盖于宋地终始矣。

说殷

殷之为洹水南之殷虚，盖不待言。然自《史记》以降，皆以殷为亳，其误始于今文《尚书·书序》讹字，而太史公仍之。《书序》盘庚五迁，将治亳殷。”（马、郑本古文同）束皙谓：孔子壁中《尚书》，作，将始宅殷，孔疏谓：“，亳，字磨灭，容或为，宅，。壁内之书，安国先得，，治，皆作，乱，其字与，始，不类，无缘误作，始，字。”段氏《古文尚书撰异》谓：“，治，之作，乱，，乃伪古文。”束广微当晋初，未经永嘉之乱，或孔壁原文尚存秘府，所说殆不虚。《隋书·经籍志》：“晋世秘府所存，有古文《尚书》经文。”束皙所见，自当不诬。且“亳、殷”二字，未见古籍。《商颂》言“宅殷土茫茫”，《周书·召诰》言“宅新邑”，“宅殷”连言，于义为长。

且殷之于亳，截然二地。《书疏》引汲冢古文云：盘庚自奄迁于殷，在邲南三十里，《史记索隐》汲冢古文：盘庚自奄迁于北蒙，曰殷虚，去邲三十里。”《今本纪年》作“自奄迁于北蒙，曰殷”，无“在邲南三十里”六字）束皙以《汉书·项羽传》之“洹水南殷虚”释之（见《书》孔疏）今龟甲、兽骨出土皆在此地，盖即盘庚以来殷之旧都。《楚语》白公子张曰“昔殷武丁，能耸其德，至于神明，以入于河。自河阻亳”，盖用逸书说命之文（今伪古文《说命》袭其语）。《书·无逸》称高宗“旧劳于外”，当指此事。然则小乙之时，必都河北之殷，故武丁徂亳，必先入河，此其证也。

《史记》既以盘庚所迁为亳殷，在河南，而受辛之亡，又都河北，乃不得不以去亳徙河北归之武乙，《今本纪年》袭之。然《史记正义》引《古本竹书纪年》云：“自盘庚徙殷，至纣之亡，七百七十三年更不迁都。”虽不似《竹书》原文，必隐托本书为之，较得事实。乃《今本纪年》于武乙三年书“自殷迁于河北”，又于十五年书“自河北迁于沫”，则又勦《史记》及《帝王世纪》之说，必非汲冢本文也。

要之，盘庚迁殷，经无“亳”字；武丁阻亳，先入于河；洹水之虚，存于秦世。此三事已足正《书序》及《史记》之误。而殷虚卜辞中所祀帝王，讫于康祖丁、武祖乙、文祖丁。罗参事以康祖丁为庚丁，武祖乙为武乙，文祖丁为文丁，其说至不可易（见《殷虚书契考释》）。则帝乙之世，尚宅殷虚，《史记正义》所引《竹书》独得其实。如是，则商居殷最久，故亦称殷。《诗》、《书》之文，皆“殷”、“商”互言，或兼称“殷商”。然其名起于地名之殷，而殷地之在河北，不在河南，则可断也。

明堂庙寝通考

宫室恶乎始乎？《易传》曰：“上古穴居而野处，后世圣人易之以宫室。”穴居者，穿土而居其中；野处则复土于地而居之。《诗》所谓“陶复陶穴”是者也（《说文》覆，地室也。）。当是之时，唯有室而已，而堂与房无有也。初为宫室时亦然。故室者，宫室之始也。后世弥文，而扩其外而为堂，扩其旁而为房，或更扩堂之左右而为箱、为夹、为个（三者异名同实）。然堂后及左右房间之正室，必名之曰“室”，此名之不可易者也。故通言之，则宫谓之“室”，室谓之“宫”，析言之，则所谓“室”者，必指堂后之正室。而堂也，房也，箱也，均不得蒙此名也。《说文》室，实也。”以堂非人所常处，而室则无不实也。昼居于是（《玉藻》：“君子之居恒当户。”户，谓室户也），夜息于是，宾客于是（《曲礼》将入户，视必下。”又户外有二屨，言闻则入。”皆谓室户）。其在庶人之祭于寝者，则诏祝于是，筵尸于是。其用如斯其重也。后庭、前堂，左右有房；有户、牖以达于堂，有侧户以达于房，有向以启于庭。东北隅谓之“宦”，东南隅谓之“变”，西南隅谓之“奥”，西北隅谓之“屋漏”。其名如斯其备也。故室者，又宫室之主也。明乎室为宫室之始及宫室之主，而古宫室之制，始可得而言焉。

我国家族之制，古矣。一家之中有父子，有兄弟，而父子、兄弟又各有其匹偶焉。即就一男子言，而其贵者有一妻焉，有若干妾焉。一家之人，断非一室所能容，而堂与房，又非可居之地也。故穴居野处时，其情状余不敢知。其既为宫室也，必使一家之人所居之室相距至近，而后情足以相亲焉，功足以相助焉。然欲诸室相接，非四阿之屋不可。四阿者，四栋也。为四栋之屋，使其堂各向东西南北，于外则四堂。后之四室，亦自向东西南北而凑于中庭矣。此置室最近之法，最利于用，而亦足以为观美。明堂、辟雍、宗庙、大小寝之制，皆不外由此扩大之、缘饰之者也。

古制中之聚讼不决者，未有如明堂之甚者也。《考工记》言“五室”、言“堂”，而不言堂之数。《吕氏春秋·十二纪》、《小戴记·月令》均言一太室、四堂、八个（《尚书大传》略同。惟改四大庙为正室），《大戴记·盛德篇》则言“九室”。此三者之说，已不相合。今试由上章所言考之，则《吕氏春秋》之四堂、一太室，实为古制。《考工记》中“世室”、“五室”、“四旁”、“两夹”、“四阿”、“重屋”等语，均与古宫室之制度合。唯“五室，凡室二筵”之文，则显与自说相抵牾。至《大戴》“九室”之说，实为秦制（《隋书·宇文恺传》引《礼图》，并见聂崇义《三礼图》），恐秦时据《考工记》“五室”、《吕览》“四室”之文，昧古代堂与室之分，而以“室”之名概之（《尚书大传》以四堂为四正室。是秦汉间人不知堂与室之分之证也），并四与五则为九矣。说《明堂》、《月令》者，又云明堂“九室、十二堂，见《玉藻》、《明堂位》疏引郑玄《驳五经异义》，后人误羈入《大戴记·感德篇》中），则又恐据古之四堂八个、秦之九室而兼数之。所谓歧路之中又有歧者也。自汉以后，或主五室说，或主九室说。主五室说者，多主一堂之说，而其位置此五室也各不同：或置诸堂之中央及四正（《艺文类聚·礼

部》引《古三礼图说》），或置诸中央及四隅（郑玄《考工记注》并《玉藻》、《明堂位》疏引郑《驳五经异义》），或置诸堂、个之后（汪中《明堂通释》。孔广森《明堂亿说》与汪略同）。其主四隅说者，或谓四室接太室之四角为之（聂崇义《三礼图》如此，戴震《考工记图》、张惠言《仪礼图》从之，而又参以《月令》之“四堂”、“八个”），或谓四室不与太室相属，而远在堂之四隅（汪中《明堂通释》所图郑说如此）。即同主一说者，其殊固已如此矣。其主九室说者，则或接太室之四角为四室，又接四室之四角为四室（聂氏《三礼图》谓为秦制，任启运《朝庙宫室考》从之），或三三相重，房间通街（后魏李冲所造如此，见《隋书》牛弘传及宇文恺《传》）。又主调停说者，则有若贾思伯于太室四角为四室，以一室充二个之用，以当《考工记》之五室，《月令》之四堂、八个者矣（《魏书·贾思伯传》）有若焦循于太室之角接以四室，而又两分四室为勾股形者八，以充五室及四堂、八个者矣（《群经宫室图》）有若唐仲友于一堂中画东、西、南、北以为四堂、八个，而置五室于四堂之间者矣（《帝王经世图谱》）有若阮元以《考工记》虽言一堂而实有四堂，故为广九筵、修七筵之堂四于外，而于其中央方九筵之地置方二筵之室五，则又合唐氏之说以《考工记》之度矣（《挈经室续集》卷一）。然太室二筵，褊陋已甚，四隅、四室取义云何？魏李谧、隋牛弘之所诤者不可夺也。

又据阮氏之说，则中央之地，修广九筵。今五室所占，纵横仅得六筵，则所余三筵之地如何？于是有若陈澧以三筵之地当五室之壁之厚，而谓壁厚半筵者矣。此外，如《白虎通》、蔡簋《明堂论》、牛弘《明堂议》、李觐《明堂定制图》等，但务剿说而不能以图明之者，其数尚多。盖斯途之荆棘久矣。自余说言之，则明堂之制，本有四屋；四堂相背于外，其左右各有个，故亦可谓之十二堂。堂后四室相对于内，中央有太室，是为五室。太室之上，为圆屋以覆之，而出于四屋之上，是为重屋。其中除太室为明堂、宗庙特制外，余皆与寻常宫室无异。其五室、四堂、四旁、两夹、四阿、重屋，皆出于其制度之自然，不然，则虽使巧匠为之，或烦碎而失宜，或宏侈而无当，而其堂与室终不免穷于位置矣。

明堂之制，外有四堂，东、西、南、北，两两相背，每堂又各有左右二个。其名则《月令》诸书谓之青阳太庙、青阳左个，青阳右个，明堂太庙、明堂左个、明堂右个，总章太庙、总章左个、总章右个，玄堂太庙、玄堂左个、玄堂右个。此四堂之名，除“明堂”外，“青阳”之名仅见于《尔雅》，“总章”之名一见于《尸子》，而“玄堂”则无闻焉。其名或出后人之缘饰，然其制则古矣。盖四堂、八个，实与听朔、布政之事相关。听朔之为古制，亦可由文字上旁证之。于文，“王”居“门”中为“闰”。《周礼·春官·太史》闰月诏王居门终月。”《玉藻》闰月则阖门左扉，立于其中。”先郑注《周礼》云：“《月令》十二月，分在青阳、明堂、总章、玄堂、左右之位，惟闰月无所居，居于门。故于文，王，在，门，中为，闰，。”《说文》亦云：“告朔之礼，天子居宗庙。闰月，居门中。闰，从王在门中。”《周礼》、《玉藻》之说，虽有可存疑之处，然文字之证据不可诬也。要之，明堂为古宫室之通制，未必为听朔、布政而设，而其四堂、八个，适符十二月之

数。先王因之而月异其居，以听朔、布政焉。此自然之数也。然则古者听朔之事，可以“闰”字证之，而四堂、八个之制，又可由听朔证之。《月令》之说，固非全无依据矣。且《考工记》之记明堂，世所视为与《月令》绝异者也。《记》但言堂之修广而不言堂数，故自汉以来多以一堂解之。然其所言“世室”、“五室”、“四旁”、“两夹”、“四阿”、“重屋”，无不可见四堂之制。古者，室在堂后，有室斯有堂。又一堂止一室，故房有东、西也，夹有东、西也，个有左、右也，而从不闻有二室。

今既有五室，则除中央太室外，他室之前必有一堂。有四室，斯有四堂矣。“四旁两夹”亦然（古“夹”、“个”两字，音义皆同。《书·顾命》及《考工记》之“夹”，，，即《月令》之“个”也。《考工记》此句，自汉以来皆读“四旁两夹窗”为句，孔广森《礼学卮言》始读“四旁两夹”为句而以“窗”字属下，读“窗白盛”为句。证以《大戴礼》之“赤，缀户也；白，缀牖也”，其读确不可易）。每堂各有两夹，而四堂分居四旁，此所谓“四旁两夹”也。若“四阿”之释，则或以为四注屋（郑氏《考工记》“四阿重屋”注），或以“阿”为屋翼（唐仲友《帝王经世图谱》），或以“阿”为楣（程瑶田《释宫小记》）。然郑氏于《考工记·匠人》“王宫门阿之制五雉”注及《士昏礼》“当阿”注皆云：“阿，栋也。”盖屋当栋处最高，计屋之高，必自其最高处计之。“门阿之制五雉”，谓自屋之最高处至地凡五雉，自不能以屋翼及楣当之矣。郑以明堂止有一堂，一堂不能有四栋，故于“四阿”下解为“四注屋”。然此“四阿”与“王宫门阿”同在“匠人”一职，不容前后异义，自当从郑君后说。既有四栋，则为四堂无疑。故《考工记》所言明堂之制而非一堂，自其本文证之而有余。明堂合四堂而为一，故又有“合宫”之称。《尸子》曰：“黄帝合宫，（殷人）总章，殷人阳馆，周人明堂。”益知四堂之说不可易也。

四堂之后，各有一，室。古者宫室之制，堂后有室，室与堂间在一，屋中。未有舍此不数而别求之于他处者也。则明堂五室中，除太室外，他四室必为四堂后之正室。乃主一堂之说者，以为在堂上之四正，或以为在其四隅。其主四堂说者，财以在中庭之四隅。其说诡僻，不合于古宫室之制。且古之宫室，未有堂而无室者。有之，则惟习射之榭为然。明堂非习射之所，故其五室中之四，必为堂后之正室，与太室而五焉。四堂、四室，制度宜然。不是之求，而以堂上、庭中之四正、四隅当之，可谓舍康庄而行溪径者也。

四堂、四室，两两对峙，则其中有广庭焉。庭之形正方，其广袤实与一堂之广相等。《左氏传》所谓“埋璧于太室之庭”，《史记·封禅书》载申公之言曰：“黄帝接万灵明庭。”盖均谓此庭也。此庭之上，有圆屋以覆之，故谓之“太室”。太室者，以居四室之中，又比四室绝大，故得此名。太者、大也。其在《月令》则谓之“太庙太室”。此“太庙”者，非中央别有一庙，即青阳、明堂、总章、玄堂之四太庙也。太庙之“太”，对左右个而言。太室之“太”，对四室而言。又谓之“世

室”。世，亦大也。古者“太”、“大”同字，“世”、“太”为通用字。故《春秋经》之“世子”，《传》作“太子”。《论语》之“世叔”，《左氏传》作“太叔”。又如伯父之称“世父”，皆以“大”为义。故《书·洛诰》、《礼·月令》、《春秋左氏》、《谷梁传》之“太室”、《考工记》、《明堂位》、《公羊传》并称“世室”。又太室居四堂、四室之中，故他物之在中央者或用以为名也。嵩高在五岳之中，故古谓之“太室”，即以名堂“太室”之名名之也。然则“太室”者，以居中央及绝大为名。即此一语之中，而明堂之制已略具矣。

明堂之制既为古代宫室之通制，故宗庙之宫室亦如之。古宗庙之有太室，即足证其制与明堂无异。殷商卜文中两见“太室”（《殷虚书契》卷一第三十六叶，又卷二第三十六叶），此殷宗庙中之太室也。周则各庙皆有之。《书·洛诰》王入太室，裸。”王肃曰：“太室，清庙中央之室。”此东都文王庙之太室也。《明堂位》又言“文世室”、“武世室”。吴彝盖云：“王在周成太室。”君夫敦盖云王在周康宫太室。”鬲攸从鼎云王在周康宫辟太室。”咎鼎云王在周穆王太□。”（此字磨灭，疑是“室”字）伊敦云王格穆太室。”则成王、康王、穆王诸庙皆有太室，不独文、武庙矣。至太室四面各有一庙，亦得于古金文字中证之。克钟云：“王在周康刺宫”（“刺宫”即“烈宫”，古金文皆假“刺”为“烈”。颂鼎（颂敦、颂壶、颂盘文同）云王在周康邵宫。”（“邵”字从召、从卩。“卩”即古“人”字。《说文》作“𠂔”，经、传通用“昭”字）寰盘云王在周康穆宫。”望敦云王在周康宫新宫。”同在宗周之中，又同为康王之庙，而有昭、穆、烈、新四宫。则虽欲不视为一庙中之四堂，不可得也。康宫如此，他亦宜然。此由太室之制度言之，固当如此。若从先儒所说古宗庙之制，则更无太室之可言矣。

明堂之制，太室之外，四堂各有一室，故为五室。宗庙之制亦然。古者寝、庙之分，盖不甚严。庙之四宫后，王亦寝处焉，则其有室也必矣。请举其证。望敦云：“唯王十有三年六月初吉戊戌，王在周康宫新宫。旦，王格太室。”寰盘云：“唯廿有八年五月既望庚寅，王在周康穆宫。旦，王格太室。”颂鼎云唯三年五月既死霸甲戌，王在周康邵宫。旦，王格太室。”此三器之文皆云：“旦，王格太室”，则上所云“王在某宫”者，必谓未旦以前王所寝处之地也。且此事不独见于古金文，虽经、传亦多言之。《左传·昭二十二年》：“单子逆悼王于庄宫以归，王子还夜取王以如庄宫。”《三十三年》：“王子朝入于王城”，“寻罗纳诸庄宫”。案庄宫，庄王之庙。而《传》文曰“逆”，曰“如”，曰“纳”，皆示居处之意。《礼运》天子适诸侯，必舍其祖庙。”《周语》：“襄王使太宰文公及内史兴赐晋文公命。上卿逆于境，晋侯郊劳，馆诸宗庙。”《聘礼》“记”：“卿馆于大夫，大夫馆于士，士馆于工商。”郑注馆者必于庙。不于敌者之庙，为太尊也。”以此观之，祖庙可以舍国宾，亦可以自处矣。既为居息之地，自不能无室。又所居不恒在一宫，故每宫皆当有之。四宫四室，并太室为五，与明堂同。而明堂五室，其四当分属于四堂，又可于此得其确证矣。

庙中太室之为四宫中之广延，又可由古代册命之礼证之。古天子、诸侯之命群臣也，必于庙中。《周礼·春官·司几筵》凡封国、命诸侯，王位设黼依，依前南乡设莞筵，左右玉几。”又《大宗伯》：“王命诸侯，则摈。”郑注王将出命，假祖庙，立依前，南乡。摈者进，当命者延之，命使登。内史由王右以策命之。降，再拜稽首，登，受策以出。”《祭统》：“祭之日，一献。君降，立于阼阶之南，南乡。所命北面。史由君右执策命之。”前者为天子命诸侯之礼，后者为诸侯命诸臣之礼。然古金文所纪册命之礼，颇与此殊。颂鼎云唯三年五月既死霸甲戌，王在周康邵宫。旦，王格太室，即位。宰弘右颂入门，立中庭。尹氏受王命书。王呼史虢生册命颂（中略）。颂拜稽首，受命册，佩以出。反入觐章。”寰盘：唯廿有八年五月既望庚寅，王在周康穆宫。旦，王格太室，即位。宰颉右寰入门，立中廷，北乡。史蕆受王命书，王呼史滅册锡寰。”他器文类此者颇多。

凡上言“王格太室”者，下均言所命者“立中廷，北乡”。就所谓中廷之地，颇有寻绎者焉。案《礼经》中言“庭”，皆谓自堂下至门之庭。其言“中庭”者，则谓此庭南北之中。然则上诸器文系“中廷”于入门后，自当为门内之廷。又云“立中廷，北乡”，则又当为南乡屋之廷也。然有大不可解者。如上诸器所言，臣“立中廷，北乡”，而王即位于太室，则王必于太室之北设黼依、几筵而立焉。假使依《考工记》所，记堂修七筵、广九筵，而正方形之太室，其修当如堂九筵之广，则王位与中廷间有太室之修九筵、堂修七筵，又加以庭修之半（前人谓庭修当堂修之三倍），则王与所命者之间相距在二十六筵以上（即二百二十二尺）。即令堂室之修大减于《考工》所记，亦必在十筵以上。况以室之南北墉与庭北之碑三重隔之，面不得相覩，语不得相闻，决非天子命臣之意也。余谓此“中廷”当谓太室之廷，但器文于所命者入门后略去升堂、入室诸节耳。盖太室之地，在寻常宫室本为广廷。太室虽上有重屋，然太室屋与四宫屋之间，四旁通明，汉时犹谓之“通天屋”（《隋书·牛弘传》引蔡邕《明堂论》），故可谓之“廷”。而此廷南北之中，亦谓之“中廷”。此中廷，与《礼经》所谓“中庭”指前廷南北之中者绝异。太室之修九筵，则所命者立于中廷，距王位不过四筵。

故史得受命书于王！所命者得佩命册以出！而册命之礼乃得行焉。且古人于太室本有“廷”称。《左传》楚共王“与巴姬密埋璧于太室之廷”，亦指此地。否则，太室居四屋之中，何缘有廷？若指四屋之前廷，则不得系之太室。所谓“太室之廷”，犹班固言承明、金马著作之“廷”云尔。故余断言诸器中之“中廷”，即太室南北之中也。凡此册命之礼，皆与古宫室之制相关，故不得不详辨之也。然则宗庙之制，有太室、有四宫，而每宫又各有一室。四宫五室，与明堂之制无异。且明堂五室之四分属四堂，亦于宗庙中始得其最确之证明。而明堂为古宫室之通制，亦至是而益明矣。

明堂之制，既为古宫室之通制，故宗庙同之。然则路寝如何？郑玄于《毛诗笺》、《考工记》及《玉藻注》，均谓“明堂”、宗庙、路寝同制，而于《顾命》所纪路

寝之制不得其解，遂谓成王崩时在西都，文王迁丰、镐，作灵台、辟雍而已，其余犹诸侯制度焉。盖视《顾命》所纪路寝之制与明堂异也。以余观之，路寝无太室，自与明堂、宗庙异。至于四屋相对，则为一切宫室之通制。《顾命》所纪，乃康王即位受册之礼，于路寝正屋行之，自无从纪东、西、北三屋。即就正屋言之，但纪西夹而不纪东夹。然则谓无东夹可乎？因所不纪而遂疑其无，此可谓目论者矣。余意，宁从明堂、宗庙、燕寝之制以推定路寝之制，亦有东、西、南、北四屋，似较妥也。

至燕寝之四屋相对，则有可言者焉。古之燕寝，有东宫，有西宫，有南宫，有北宫，其南宫之室谓之“适室，士以下无正寝，以燕寝之南宫为正寝），北宫之室谓之“下室”，东、西宫之室则谓之“侧室”。四宫相背于外，四室相对于内，与明堂、宗庙同制。其制所异者，唯无太室耳。何以言之？《公羊·僖二十年传》：“西宫灾。西宫者，小寝也。小寝则曷谓之西宫？有西宫，则有东宫矣。鲁子曰：“以有西宫，亦知诸侯之有三宫也。”何休注：“礼，夫人居中宫，少在前；右媵居西宫，左媵居东宫，少在后。”然《丧服传》言大夫、士、庶人之通制，乃有四宫。《传》曰：“昆弟之义无分，故有东宫，有西宫，有南宫，有北宫，异居而同财。”

诸侯三宫，每宫当有相对四屋。至士、庶人四宫，当即此相对之四屋之名。《内则》所谓“自命士以上，父子皆异宫”，殆谓是也。《士丧礼》云死于适室。”又云：“朔月若荐新，则不馈于下室。”《丧大记》大夫世妇卒于适寝。内子未命则死于下室，迁尸于寝。”此“适室”、“下室”两两对举，则适室、下室为南、北相对之室矣。适室、下室苟为南、北相对之室，则侧室当为东、西相对之室。《内则》：“妻将生子，及月辰，居侧室”是也。又云：庶人无侧室者，及月辰，夫出居群室。”（群室当谓门塾之室）则或以东、西宫之室为昆弟所居，或以仅有南乡一屋而已。

然则燕寝南、北、东、西四宫，何以知其非各为一宫，而必为相对之四屋乎？曰：以古宫室之中溜知之也。“中溜”一语，自来注家皆失其解。释名：“室中央曰中溜。古者穴，后室之溜，当今之栋下直室之中。”郑注《月令》亦曰：“中溜，犹中室也。古複穴，是以名室为溜云。”《正义》引庾蔚之云：“穴穴皆开其上取明，故雨溜之，是以后因名室为中溜。”郑又云：“祀中溜之礼，主设于牖下。（《正义》以此为郑引逸《中溜礼》文）《正义》申之曰：“开牖象溜，故设主于牖下也。”余谓复穴雨溜，其理难通；开牖象溜，义尤迂曲。其实中溜者，对东、西、南、北四溜言之，而非四屋相对之宫室，不能兼有东、西、南、北四溜及中溜也。案《燕礼》：“设洗，当东溜。”（郑注：“当东溜者，人君为殿室也。”《正义》云：“汉时殿屋，四向注水。故引汉以况周。”）《乡饮酒礼》：“磬阶间缩溜，北面鼓之。”此南溜也。凡四注屋有东、西、南、北四溜，两下屋有南、北二溜，而皆不能有中溜。今若四屋相对如明堂之制，则无论其为四注屋或两下屋，凡在

东者，皆可谓之“东溜”，在西者，均可谓之“西溜”，南北放此。若夫南屋之“北溜”，北屋之“南溜”，东屋之“西溜”，西屋之“东溜”，将何以名之哉？虽欲不谓之“中溜”，不可得也。

其地在宫室之中，为一家之要地，故曰“家主中溜而国主社”。然则此说于古有征乎？曰：有。《檀弓》曰：掘中溜而浴，毁灶以缀足，殷道也。学者行之。”案《士丧礼》：浴时，“甸人掘坎于阶间，少西”，“巾、衾、髻蚤埋于坎”。周人所掘既在阶间，则殷人所掘之“中溜”，必在室外而不在室内矣。《说文·广部》：廂，中庭也。”案古人但有“廷”字，后世加“广”作“庭”，义则无异。由《说文》之例，“庭”字当为“廷”下重文。然《说文》收“廷”字于《廌部》，“庭”字于《广部》，而释之曰：“廷，中朝也。”“庭，宫中也。”则许君之疏也。然“廷”、“庭”二字之释，辞虽微异而义则无殊。段氏《说文注》乃谓：“无屋曰廷，有屋曰庭。”并援郑君“中溜犹中室”之言，乱许君“廂，中廷”之古义。不知许君释“庭”为宫中，正指无屋之处。证之本书闾，宫中之门也，“壺，宫中也”。皆指无屋之处言。若在屋下，则有户无门，又恶得有道乎？故“廷，中朝也”，“庭，宫中也”。其义一也。然则许君所云“廂，中庭也”，亦指中央无屋之处，与上文所言中溜之地位合，固非余之创说矣。故“中庭”者，对东、西、南、北四屋之前庭言之，中溜”者，对东、西、南、北四溜言之。中庭之四旁，以中溜为之界，故曰“廂，中庭也”。然非发见古宫室之通制，亦无以定中溜之地位。而由中溜之地位，又足以证四屋相对之为古宫室之通制矣。

太史公行年考

公姓司马氏，名迁，字子长（案子长之字，《史记·自序》与《汉书》皆未载。扬子《法言·寡见篇》：“或问司马子长有言，《五经》不如《老子》之约也。”又《君子篇》：“多爱不忍，子长也。仲尼多爱，爱义也；子长多爱，爱奇也。”子长二字之见于先汉人著述者始此，嗣是王充论衡的《超奇》《变动》《须颂》《案书》诸篇，张衡《应间》，皆称司马子长，或单称子长。是子长之字，两汉人已多道之，正不必以不见《史》《汉》为疑矣），左冯翊夏阳人也（案《自序》，司马氏入少梁，在晋随会奔秦之岁，即鲁文公七年，周襄王之三十二年。越二百九十一年至秦惠文王八年，而魏入少梁河西地于秦。十一年，改少梁曰夏阳。自司马氏入少梁迄史公之生，凡四百七十五）。《自序》云：“昔在颛顼，命南正重以司天，北正黎以司地。唐虞之际，绍重黎之后，使复典之，命南正重于司天，北正黎以司地。唐虞之际，绍重黎之后，使复典之，至于夏、商，故重黎氏世序天地。其在周，程伯休父，其后也。当周宣王时，失其守而为司马氏。司马氏世典周史。惠、襄之间，司马氏去周适晋。晋中军随会奔秦，而司马氏入少梁。”自司马氏去周适晋，分散，或在卫，或在赵，或在秦。在秦者名错，与张仪争论，于是惠王使错将伐蜀，遂拔，因而守之。错孙靳，事武安君白起，与武安君共阬赵长平军；还而与之俱赐死杜邮，葬于华池（《集解》引晋灼曰：地名，在郿县。《索隐》云：晋灼非也，案司马迁碑在夏阳西北四里。

国维案：《水经注·河水注》：陶渠水又东南，迳华池南，池方三百六十步，在阳夏城西北四里许，故司马迁碑文云高门华池，在兹夏阳城西北，汉阳太守殷济精舍四里所，此《索隐》所本也）。靳孙昌，昌为秦主铁官。……昌生无泽（《汉书》作毋泽），无泽为汉市长。无泽生喜，喜为五大夫。卒，皆葬高门（《集解》引苏林曰：“长安北门。”瓚曰：“长安城无高门。”《索隐》云：“苏说非也。案迁碑，高门在夏阳西北，去华池三里。”国维案：《水经·河水注》：“陶渠水又南迳高门原，盖层峦隳缺故流高门之称矣。”又云：“高门原东去华池三里。”《太平寰宇记》：同州韩城县下，引《水经注》高门原南有层阜秀出云表，俗名马门原。《正义》引《括地志》亦云：“高门原俗名马门原。”盖亦本古本《水经注》，马门原或以司马氏冢地名矣）。喜生谈，谈为太史公（说见后）。太史公学天官于唐都（《历书》：“今上即位，招致方士唐都，分其天部；而巴落下闳运算转历，然后日辰之度与夏正同。《天官书》：“自汉之为天文者，星则唐都，气则王朔。”《汉书·律历志》：“元封七年造汉历，方士唐都、巴郡落下闳与焉。”

又《公孙弘传》论：“治历则唐都、落下闳。”是唐都实与于太初改历之役。考司马谈卒于元封元年，而其所师之唐都至七年尚存，则都亦寿考人矣）。受《易》于杨何（《儒林列传》：《易》，汉兴，田何传东武人王同子仲，子仲传菑川人杨何。何以《易》，元光元年征，官至中大夫。《汉书·儒林传》：“何字叔元。”）。习道论于黄子（《集解》：徐广曰：《儒林传》曰：“黄生好黄老之术。”案《

传》云：“轅固生，孝景时为博士，与黄生争论。”是黄生与司马谈时代略相当，徐说殆是也。谈既习道论，故论六家要指，颇右道家，与史公无与。乃扬雄云：“司马子长有言，《五经》不如《老子》之约。”班彪讥公“先黄老而后《六经》”，是认司马谈之说为史公之说矣。仕于建元、元封之间。”有子曰迁，即公是也。

汉景帝中五年，丙申，公生，一岁。

案《自序·索隐》引《博物志》：“太史令、茂陵显武里大夫司马（此下夺“迁”字），年二十八，三年六月乙卯除六百石也。”（今本《博物志》无此文，当在逸篇中。又茂先此条当本先汉记录，非魏、晋人语，说见后）。案：三年者，武帝之元封三年。苟元封三年史公年二十八，则当生于建元六年。然张守节《正义》于《自序》“为大史令五年而当太初元年”下云：“案迁年四十二岁。”与《索隐》所引《博物志》差十岁。《正义》所云亦当本《博物志》，疑今本《索隐》所引《博物志》“年二十八”，张守节所见本作“年三十八”。三讹为二，乃事之常；三讹为四，则于理为远。以此观之，则史公生年，当为孝景中五年，而非孝武建元六年矣。

又案《自序》：“迁生龙门。”龙门在夏阳北。《正义》引《括地志》云：“龙门山在同州韩城县北五十里。”而华池则在韩城县西南十七里，相去七十里，似当司马谈时，公家已徙而向东北。然公自云生龙门者，以龙门之名见于《夏书》，较少梁、夏阳为古，故乐用之。未必专指龙门山。下又云：“耕牧河山之阳。”则所谓龙门，固指山南河曲数十里间矣。

武帝建元元年，辛丑，六岁。

五年，乙巳，十岁。

案《自序》：“年十岁则诵古文。”《索隐》引刘伯庄说，谓即《左传》、《国语》、《世本》等书是也。考司马谈仕于建元、元封间，是时，当已入官。公或随父在京师，故得诵古文矣。自是以前，必已就闾里书师受小学书，故十岁而能诵古文。

元光元年，丁未，十二岁。

二年，戊申，十三岁。

案《汉旧仪》（《太平御览》卷二百三十五引）：

“司马迁父谈世为太史，迁年十三，使乘传行天下，求古诸侯之史记。”（《西京杂记》卷六文略同）考《自序》云：“二十而南游江、淮。”则卫宏说非也。或本作二十，误倒为十二，又讹二为三欤？

元朔元年，癸丑，十八岁。

三年，乙卯，二十岁。

案《自序》：“二十而南游江、淮，上会稽，探禹穴，窥九疑，浮于沅、湘，北涉汶、泗；讲业齐鲁之都，观孔子之遗风；乡射邹、峄，厄困鄱、薛、彭城，过梁、楚以归。”考《自序》所纪，亦不尽以游之先后为次。其次当先浮沅、湘，窥九疑；然后上会稽；自是北涉汶、泗，过楚及梁而归。否则既东复西，又折而之东北，殆无是理。史公此行，据卫宏说，以为奉使乘传行天下，求古诸侯之史记也。然公此时尚未服官，下文云：“于是迁仕为郎中。”明此时尚未仕。则此行殆为宦学而非奉使矣。

又案：史公游踪见于《史记》者，《五帝本纪》曰：“余尝西至空桐，北过涿鹿，东渐于海，南浮江、淮矣。”《封禅书》曰：“余从巡祭天地诸神名山川而封禅焉。”《河渠书》曰：“余南登庐山，观禹疏九江，遂至于会稽大湟，上姑苏，望五湖；东窥洛汭、大邳，迎河行淮、泗、济、漯、洛渠；西瞻蜀之岷山及离碓；北自龙门，至于朔方。”《齐太公世家》曰：“吾适齐，自泰山属之琅邪，北被于海，膏壤二千里。”《魏世家》曰：“吾适故大梁之墟。”《孔子世家》曰：“吾适鲁，观仲尼庙堂、车服、礼器；诸生以时习礼其家。余祇徊留之，不能去云。”《伯夷列传》曰：“余登箕山，其上盖有许由冢云。”《孟尝君列传》曰：“吾尝过薛，其俗閭里率多暴桀子弟，与邹、鲁殊。”《信陵君列传》曰：“吾过大梁之墟，求问其所谓夷门。夷门者，城之东门也。”《春申君列传》曰：“吾适楚，观春申君故城，宫室盛矣哉。”《屈原贾生列传》曰：“余适长沙，观屈原所自沈渊。”《蒙恬列传》曰：“吾适北边，自直道归，行观蒙恬所为秦筑长城亭障，堑山堙谷，通直道，固已轻百姓力矣。”《淮阴侯列传》曰：“吾如淮阴，淮阴人为言，韩信虽为布衣时，其志与众异；其母死，贫无以葬，然乃行营高敞地，令其旁可置万家。余视其母冢，良然。”《樊哙滕灌列传》曰：“吾适丰、沛，问其遗老，观故萧、曹、樊哙、滕公之冢。”《自序》曰：“奉使西征巴蜀以南，南略邛、笮、昆明。”是史公足迹，殆遍宇内；所未至者，朝鲜、河西、岭南诸初郡耳。此上所引，其有年可考者，仍各系之于其年下；余大抵是岁事也，是岁所历各地，以先后次之如左：

适长沙，观屈原所自沈渊（《屈原贾生列传》）。浮于沅、湘（《自序》）。窥九疑（同上）。南登庐山，观禹疏九江，遂至于会稽大湟（《河渠书》）。上会稽，探禹穴（《自序》）。上姑苏，望五湖（《河渠书》）。适楚，观春申君故城宫室

（《春申君列传》。据《越绝书》，则春申君故城宫室在吴）。适淮阴（《淮阴侯列传》），行淮、泗、济、漯（《河渠书》）。北涉汶、泗，讲业齐、鲁之都，观孔子之遗风，乡射邹、峄（《自序》）。适鲁，观仲尼庙堂、车服、礼器，诸生以时习礼其家（《孔子世家》）。厄困鄆、薛、彭城（《自序》）。过薛（《孟尝君列传》）。适丰、沛（《樊酈滕灌列传》）。过梁、楚以归（《自序》）。适大梁之墟（《魏世家》及《信陵君列传》）。

又案《汉书·儒林传》：“司马迁亦从孔安国问故。迁书载《饶典》、《禹贡》、《洪范》、《微子》、《金縢》诸篇，多古文说。”公从安国问古文尚书，其年无考。《孔子世家》但云：“安国为今皇帝博士，至临淮太守，蚤卒。安国生印，印生鹵。”既云早卒，而又及纪其孙，则安国之卒，当在武帝初叶。以《汉书·兒宽传》考之，则兒宽为博士弟子时，安国正为博士；而宽自博士弟子补廷尉文学卒史，则当张汤为廷尉时。汤以元朔三年为廷尉，至元狩三年迁御史大夫，在职凡六年。宽为廷尉史，至北地视畜，数年，始为汤所知；则其自博士弟子为廷尉卒史，当在张汤初任廷尉时也。以此推之，则安国为博士，当在元光、元朔间。考褚大亦以此时为博士，至元狩六年犹在职。然安国既云早卒，则其出为临淮太守，亦当在此数年中。时史公年二十左右，其从安国问《古文尚书》当在此时也。又史公于《自序》中述董生语，董生虽至元狩、元鼎间尚存，然已家居不在京师。则史公见董生，亦当在十七八以前。以此二事证之，知《博物志》之“年二十八”为太史令，“二”确为“三”之讹字也。

元狩元年，己未，二十四岁。

元鼎元年，乙丑，三十岁。

案《自序》云：“于是迁仕为郎中。”其年无考，大抵在元朔、元鼎间。其何自为郎，亦不可考。

四年，戊辰，三十三岁。

案《封禅书》：“明年冬，天子郊雍，议曰：‘今上帝朕亲郊，而后土无祀，则礼不答也。’有司与太史公、祠官宽舒议：‘天地牲角茧栗。今陛下亲祠后土，后土宜于泽中圜丘为五坛，坛一黄犍大牢具，已祠尽瘞，而从祠衣上黄。’于是天子遂东，始立后土祠汾阴脽丘，如宽舒等议。”考《汉书·武帝纪》，是岁“冬十月，行幸雍，祠五畤。……行自夏阳，东幸汾阴。十一月甲子，立后土祠于汾阴脽丘上。”则司马谈等议立后土乃十月事也。谈为太史令始见此。

五年，己巳，三十四岁。

案《五帝本纪》：“余尝西至空同。”考《汉书·武帝纪》，是岁冬十月，行幸雍，祠五畎。“遂逾陇，登空同，西临祖厉河而还。”公西至空同，当是是岁十月扈从时事。

又案《封禅书》：“公卿言皇帝始郊，见太一云阳，有司奉瑱玉、嘉牲。是夜有美光，及昼，黄气上属天。太史公、祠官宽舒等曰，‘神灵之休，祐福兆祥，宜因此地光域，立太畎坛以明应。令太祝领，秋及腊间祠。三岁一郊见。’”案《汉书·武帝纪》：是岁十一月，立太畎于甘泉，天子亲郊见。则太史谈等议泰畎典礼，当在是月。

元封元年，辛未，三十六岁。

案《自序》：“奉使西征巴蜀以南，南略邛、笮、昆明，还报命。是岁天子始建汉家之封，而太史公留滞周南，不得与从事，故发愤且卒，而子迁适使反，见父于河洛之间”云云。考《汉书·武帝纪》，元鼎六年定西南夷，以为武都、牂柯、越巂、沈黎、文山郡。史公奉使西南，当在置郡之后。其明年（元封元年）春正月，行幸缙氏，登崇高，遂东巡海上。夏四月，癸卯，还登封泰山；复东巡海上，自碣石至辽西，历北边九原，归于甘泉。盖史公自西南还报命，当在春间；时帝已东行，故自长安赴行在；其父谈当亦扈驾至缙氏、崇高间，或因病不得从，故留滞周南，适史公使反，遂遇父于河洛之间也。史公见父后，复从封泰山，故《封禅书》曰：“余从巡祭天地诸神名山川而封禅焉。”后复从帝海上，自碣石至辽西。故《齐太公世家》曰：“吾适齐，自泰山属之琅邪，北被于海。”又历北边九原，归于甘泉，故《蒙恬传》曰：“吾适北边，自直道归。”直道者，自九原抵云阳（即甘泉）之道，《秦始皇本纪》所谓“除道，道九原抵云阳，堑山堙谷，直通之”者也。父谈之卒，当在是秋，或在史公扈驾之日矣。

二年，壬申，三十七岁。

案《河渠书》：“余从负薪塞宣房。”考《汉书·武帝纪》，是岁春幸缙氏，遂至东莱；夏四月，还祠泰山。至瓠子临决河，命从臣将军以下皆负薪塞河堤，作《瓠子之歌》。史公既从塞宣房，则亦从至缙氏、东莱、泰山矣。

三年，癸酉，三十八岁。

案《自序》，太史公卒三岁而迁为太史令，䌷史记石室金匱之书。《索隐》引《博物志》：“太史令茂陵显武里大夫司马迁年二十八（当作三十八，说见上），三年六月乙卯除六百石也。”考史公本夏阳人，而云茂陵显武里者，父谈以事武帝故，迁茂陵也。大夫者，汉爵第五级也。汉人履历，辄具县里及爵。《扁鹊仓公列传》有“安陵阪里公乘项处”，敦煌所出新莽时木简，有“敦德亭间田东武里士

伍王参”是也。或并记其年。敦煌汉简有“新望兴盛里公乘□杀之，年卅八”，又有“□□中阳里大夫吕年年廿八”。此云茂陵显武里大夫司马迁年三十八，与彼二简正同。乙卯者，以颛项历及殷历推之，均为六月二日。由此数证，知《博物志》此条乃本于汉时簿书，为最可信之史料矣。

又案公官为太史公，《自序》具有明文。然全书中自称及称其父谈皆曰“太史公”。其称父为公者，颜师古及司马贞均谓迁自尊其父，称之曰公。其自称公者，桓谭《新论》谓太史公造书成，示东方朔，朔为平定，因署其下；“太史公”者，皆东方朔所加之也（见《孝武本纪》及《自序索隐》引）。韦昭则以为外孙杨恽所称（见《孝武本纪集解》）。张守节《正义》则以为迁所自称。案东方朔卒年虽无可考，要当在《史记》成书之前。且朔与公友也，藉令有平定之事，不得称之为“公”。又秦汉间人著书，虽有以公名者，——如《汉书·艺文志》“易家”有《蔡公》二篇，“阴阳家”有《南公》三十一篇，“名家”有《黄公》四篇、《毛公》九篇——然此或后人所加，未必其所自称。则桓谭、张守节二说，均有所不可通。惟公书传自杨恽，公与恽为外王父；父谈，又其外曾祖父也。称之为“公”，于理为宜。

韦昭一说最为近之矣。自易“令”为“公”，遂滋异说。《汉仪注》谓：“太史公，武帝置，位在丞相上，天下计书先上太史公，副上丞相，序事如古春秋。迁死后，宣帝以其官为令，行太史公文书而已。”（《太史公自序·集解》、《汉书·本传注》如淳说，皆引此文。《西京杂记》卷六语略同，亦吴均用《汉仪注》文也）又云：“太史公秩二千石，卒史皆秩二百石。”（《自序-正义》引《汉旧仪》。案《汉旧仪》与《汉仪注》本一书，皆《汉旧仪注》之略称，卫宏所撰也）臣瓚驳之曰：“《百官表》无太史公。”《茂陵中书》：“司马谈以太史丞为太史令。”（《集解》引）晋灼驳之曰：“《百官表》无太史公在丞相上，且卫宏所说多不实，未可以为正。”（《汉书·本传注》引）虞喜《志林》又为调停之说曰：“古者主天官者，皆上公。自周至汉，其职转卑，然朝会坐位犹居公上。尊天之道，其官属犹以旧名，尊而称公也。”（《自序·索隐》引）

国维案：汉官皆承秦制，以丞相、大尉、御史大夫为三公，以奉常、郎中令等为九卿。中间名有更易，员有增省，而其制不变，终先汉之世，惟未置三师在丞相上，他无所闻。且太史令一官本属奉常，与大乐、太祝、太宰、太卜、大医五令丞联事，无独升置丞相上之理。且汉之三公，官名上均无公字，何独于太史称太史公？史公《报任安书》云：“仆之先人，非有剖符丹书之功。文史星历，近乎卜祝之间。固主上所戏弄，倡优畜之，流俗之所轻也。”宋祁援此语以破卫宏，其论笃矣。且汉太史令之职，掌天时星历（《续汉志》），不掌纪事。则卫宏序事如古春秋之说，亦属不根。既不序事，自无受天下计书之理。晋灼谓卫宏所说多不实，其说是也。窃谓司马谈以太史丞为太史令，见《茂陵中书》；公为太史令，见于《自序》。较之卫宏所记，自可依据。至太史令之秩，《汉书·百官公卿表》无文，或以为千

石，《报任安书》：“乡者仆尝厕下大夫之列。”臣瓚曰：“汉太史令秩千石，故比下大夫。”或以为八百石，《汉书·律历志》：太史令张寿王上书言历，“有言劾寿王：‘吏八百石，古之大夫，服儒衣，诵不祥之辞，作妖言，欲乱制度，不道：’”据此，则太史令秩八百石。或以为六百石，则《汉旧仪》（《北堂书钞》卷三十五引）、《续汉书·百官志》皆同。又据《索隐》所引《博物志》，则史公时秩亦六百石。案史公自称“仆尝厕下大夫之列”，而《自序》又称壶遂为上大夫（太初元年事）。

据《汉书·律历志》，壶遂此时为大中大夫，而大中大夫秩千石。千石为上大夫，则八百石为中大夫，六百石为下大夫矣。汉时官秩，以古制差之，则丞相、太尉、御史大夫当古三公，中二千石、二千石、比二千石当古上中下三卿，千石、八百石、六百石当古上中下三大夫，五百石以下至二百石当古上中下士。《续汉志》引《汉旧注》（即《汉旧仪注》）：三公东西曹掾比四百石，余掾比三百石，属比二百石，故曰公府掾比古元士三命者也。元士四百石，则下大夫六百石审矣。又《汉书·百官表》：凡吏秩比二千石以上皆银印青绶，比六百石以上皆铜印墨绶，比二百石以上皆铜印黄绶。是亦隐以比二千石以上当古之卿，比六百石以当古大夫，比二百石以上当古之士。则下大夫之为秩六百石，盖昭昭矣。臣瓚千石之说，别无他据。元凤中，太史公张寿王之秩八百石，或以他事增秩。据史公所自述，自以六百石之说为最长矣。

四年，甲戌，三十九岁。

案《五帝本纪》：“余北过涿鹿。”考《汉书·武帝纪》，是年冬十月，行幸雍，祠五畤，通回中道，遂北出萧关，历独鹿、鸣泽，自代而还。服虔曰：“独鹿，山名，在涿郡迺县北界。”今案《汉书·地理志》，涿鹿县在上谷，不在涿郡。然《五帝本纪·集解》引服虔云：涿鹿在涿郡。是服虔固以独鹿、涿鹿为一地。史公北过涿鹿，盖是年扈跸时所经。

太初元年，丁丑，四十二岁。

案《汉书·律历志》：“武帝元封七年，汉兴百二岁矣。大中大夫公孙卿、壶遂、太史令司马迁等，言历纪废坏，宜改正朔。……于是乃诏御史曰：‘乃者有司言历未定，广延宣问，以考星度，未能讎也。盖闻古者黄帝合而不死，名察发敛，定清浊，起五部，建气物分数；然则上矣。书缺乐弛，朕甚难之。依违以惟，未能修明。其以七年为元年。’遂诏卿、遂、迁与侍郎尊、大典星射姓等议造《汉历》。乃定东西，立晷仪，下漏刻，以追二十八宿相距于四方。举终以定朔晦、分至、躔离、弦望。乃以前历上元泰初四千六百一十七岁，至于元封七年，复得阙逢摄提格之岁；中冬十一月甲子朔旦冬至，日月在建星，太岁在子，已得太初本星度新正。姓等奏，不能为算，愿募治历者，更造密度，各自增减，以造汉《太初历》。乃选治

历邓平及长乐司马可、酒泉侯宜君、侍郎尊及与民间治历者，凡二十余人，方士唐都、巴郡落下闳与焉。都分天部，而闳运算转历。其法以律起历，曰：‘律容一龠，积八十一寸，则一日之分也。与长相终。律长九寸，百七十一分而终复。三复而得甲子。夫律阴阳九六，爻象所从出也。故黄钟纪元气之谓律。律，法也，莫不取法焉。’与邓平所治同。于是皆观新星度、日月行，更以算推，如闳、平法。法，一月之日二十九日八十一分日之四十三。先藉半日，名曰阳历；不藉，名曰阴历。所谓阳历者，先朔月生；阴历者，朔而后月乃生。平曰：‘阳历朔皆先旦月生，以朝诸侯王群臣便。’乃诏迁用邓平所造八十一分律历，罢废尤疏远者十七家，复使校历律昏明。宦者淳于陵渠复覆《太初历》晦朔弦望，皆最密，日月如合璧，五星如连珠。陵渠奏状，遂用邓平历，以平为太史丞”云云。如是，则太初改历之议发于公，而始终总其事者亦公也。故《韩长孺列传》言：“余与壶遂定律历。”《汉书》言：“乃诏迁用邓平所造八十一分律历。”盖公为太史令，星历乃其专职；公孙卿、壶遂虽与此事，不过虚领而已。孔子言：“行夏之时”，五百年后卒行于公之手。后虽历术屡变，除魏明帝、伪周武氏外，无敢复用亥、子、丑三正者。此亦公之一大事业也。

又案《自序》：“五年而当太初元年，十一月甲子朔旦冬至，天历始改，建于明堂，诸神受纪。太史公曰：‘先人有言：自周公卒五百岁而有孔子。孔子卒后至于今五百岁，有能绍明世，正《易传》，继《春秋》，本《诗》《书》《礼》《乐》之际？意在斯乎！意在斯乎！小子何敢让焉。’”云云。于是论次其文。是史公作《史记》，虽受父谈遗命，然其经始则在是年。盖造历事毕，述作之功乃始也。

天汉元年，辛巳，四十六岁。

三年，癸未，四十八岁。

案《自序》：“七年而太史公遭李陵之祸，幽于圜墙。”徐广曰：“天汉三年。”《正义》亦云：“案：从太初元年至天汉三年，乃七年也。”然据《李将军列传》、《匈奴列传》及《汉书·武帝纪》、《李陵传》，陵降匈奴在天汉二年。盖史公以二年下吏，至三年尚在圜墙，其受腐刑亦当在三年，而不在二年也。

太始元年，乙酉，五十岁。

案《汉书》本传，“迁既被刑之后，为中书令，尊宠任职”，事当在此数年中。《盐铁论·周秦篇》：“今无行之人，一旦下蚕室，创未愈，宿卫入主，出入宫殿；得由受奉禄，食太官享赐，身以尊荣，妻子获其饶”云云，是当时下蚕室者，刑竟即任以事。史公父子素以文学登用，奉使扈从，光宠有加。一旦以言获罪，帝未尝不惜其才。中书令一官，设于武帝，或竟自公始任此官，未可知也。

又案《汉书·百官公卿表》，少府属有中书谒者、黄门、钩盾、尚方、御史、永巷、内者、宦者八官令丞。中书令即中书谒者令之略也。《汉旧仪》（《大唐六典》卷九引）：“中书令领赞尚书，出入奏事，秩千石。”《汉书·佞幸传》：“萧望之建白：以为尚书百官之本，国家枢机，宜以通明公正处之。武帝游宴后庭，始用宦者，非古制也。宜罢中书宦者。元帝不听。”《成帝纪》：“建始四年春，罢中书宦者，置尚书员五人。”《续汉书·百官志》：“尚书令一人，承秦所置，武帝用宦者，更为中书谒者令。成帝用士人，复故。”据此，似武帝改尚书为中书，复改士人用宦者；成帝复故。然《汉书·张安世传》：“安世，武帝末为尚书令。《霍光传》：“尚书令读奏。”《诸葛丰传》有尚书令尧。《京房传》：“中书。令石显专权，显友人五鹿充宗为尚书令。”事皆在武帝之后，成帝建始之前。是武帝虽置中书，不废尚书；特于尚书外增一中书令，使之出受尚书事，入奏之于帝耳。故《盖宽饶传》与《佞幸传》亦谓之中尚书。盖谓中官之干尚书事者，以别于尚书令以下士人也。《汉旧仪》（《北堂书钞》卷五十七引）：“尚书令并掌诏奏，既置中书，掌诏诰答表，皆机密之事。”盖武帝亲揽大政，丞相自公孙弘以后，如李蔡、庄青翟、赵周、石庆、公孙贺等，皆以中材备员，而政事一归尚书。霍光以后，凡秉政者莫不领尚书事。尚书为国政枢机，中书令又为尚书之枢机。本传所谓“尊宠任职”者，由是故也。

太始四年，戊子，五十三岁。

案公报益州刺史任安书在是岁十一月。《汉书·武帝纪》：是岁春三月，行幸大山；夏四月，幸不其；五月，还，幸建章宫。《书》所云“会从上东来”者也。又冬十二月，行幸雍，祠五畤，《书》所云“今少卿抱不测之罪，涉旬月，迫季冬，仆又薄从上上雍”者也。是报安书作于是冬十一月无疑。或以任安下狱坐受卫太子节，当在征和二年，然是年无东巡事。又行幸雍在次年正月，均与报书不合。《田叔列传》后载褚先生所述武帝语曰：任安有当死之罪甚众，吾常活之。是安于征和二年前曾坐他事，公报安书自在太始末审矣。

征和元年，己丑，五十四岁。

后元元年，癸巳，五十八岁。

昭帝始元元年，乙未，六十岁。

案史公卒年，绝不可考。惟《汉书·宣帝纪》载：后元二年，武帝疾，往来长杨、五柞宫。望气者言长安狱中有天子气。上遣使者分条中都官狱系者，轻重皆杀之。内谒者令郭穰夜至郡邸狱，丙吉拒闭使者不得入。此内谒者令，师古注云：“内者署属少府，不云内谒者。”二刘《汉书刊误》因以“谒”为衍字。又按《刘屈氂传》有内者令郭穰，在征和三年，似可为刘说之证。然《丙吉传》亦称内谒者令郭穰

，与《宣纪》同，然则果《宣帝纪》与《丙吉传》衍“谒”字，抑《刘屈氂传》夺“谒”字，或郭穰于征和三年为内者令，至后元二年又转为内谒者令，均未可知也。如“谒”字非衍，则内谒者令当即中谒者令，亦即中书谒者令。《汉书·百官公卿表》：“成帝建始四年，更名中书谒者令为中谒者令。”然中谒者本汉初旧名。《樊郤滕灌列传》：“汉十月拜灌婴为中谒者。”《汉书·魏相传》述高帝时有中谒者赵尧等，高后时始用宦官。《汉书·高帝纪》：“少帝八年，封中谒者张释卿为列侯。”《史记·吕后本纪》作大中谒者张释，又称宦官令张泽，自是一人。大中谒者乃中谒者之长，犹言中谒者令也。《成帝纪注》引臣瓚曰：“汉初中人有中谒者令，孝武加中谒者为中书谒者令，置仆射。”其言当有所本。《贾捐之传》：“捐之言中谒者不宜受事。”此即指宣帝后中书令出取封事（见《霍光传》）言之。是则中书谒者，武帝后亦兼称中谒者，不待成帝始改矣。由是言之，《宣帝纪》与《丙吉传》之内谒者令，疑本作中谒者令，隋人讳忠，改中为内，亦固其所。此说果中，则武帝后元二年郭穰已为中谒者令，时史公必已去官或前卒矣。要之，史公卒年虽未可遽知，然视为与武帝相终始，当无大误也。

《史记》纪事，公自谓“讫于太初”。班固则云“讫于天汉”。‘案史公作《记》，创始于太初中，故原稿纪事以元封、太初为断，此事于诸表中踪迹最明。如《汉兴以来诸侯年表》、《建元以来王子侯者年表》，皆讫于太初四年，此史公原本也。《高帝功臣年表》则每帝一格，至末一格则云“建元元年至元封六年，三十六”，又云“太初元年尽后元二年，十八”。以武帝一代截而为二，明前三十六年事，为史公原本，而后十八年事，为后人所增入也。《惠景问候者年表》与《建元以来侯者年表》末，“太初已后”一格，亦后人所增，殊如《建元以来侯者年表》，元封以前六元各占一格，而太初以后五元并为一格，尤为后人续补之证。表既如此，书传亦宜然。故欲据《史记》纪事以定史公之卒年，尤不可恃。

故据《屈原贾生列传》，则讫孝昭矣；据《楚元王世家》，则讫宣帝地节矣；据《历书》及《曹相国世家》，则讫成帝建始矣；据《司马相如列传》，则讫成、哀之际矣。凡此在今《史记》本文，而与褚先生所补无与者也。今观《史记》中最晚之记事，得信为出自公手者，唯《匈奴列传》之李广利降匈奴事（征和三年）；余皆出后人续补也。史公虽居茂陵，然冢墓尚在夏阳。《水经注·河水注》：“陶渠水又东南迳夏阳县故城，又历高阳宫北，又东南历司马子长墓北。墓前有庙，庙前有碑。永嘉四年，汉阳太守殷济瞻仰遗文，大其功德，遂建石室，立碑树桓。”《太史公自序》曰：“迁生龙门。”是其坟墓所在矣，（案：汉永嘉元四年，晋永嘉时又无汉阳郡。此云：“永嘉四年汉阳太守殷济”，疑四字或误）。《括地志》（《正义》引）：“汉司马迁墓在韩城县南二十二里夏阳县故东南”，与《水经注》合。又云“司马迁冢在高门原上”，则误也。

史公子姓无考。《汉书》本传：“至王莽时，求封迁后为史通子。”是史公有后也。女适杨敞。《汉书·杨敞传》：“敞子忠，忠弟恽，恽母司马迁女也。”又云：

“大将军光谋欲废昌邑王更立。议既定，使大司农田延年报敞，敞惊惧不知所言，汗出洽背，唯唯而已。延年起至更衣，敞夫人遽从东厢谓敞曰：此国大事，今大将军议已定，使九卿来报君侯，君侯不疾应，与大将军同心，犹豫无决，先事诛矣。延年从更衣还，敞夫人与延年参语许诺，请奉大将军教令。遂共废昌邑王，立宣帝。”案恽为敞幼子，则《敞传》与延年参语之夫人，必公女也。废立之是非姑置不论，以一女子而明决如此，洵不愧为公女矣。

史公交游，据《史记》所载：《屈原贾生列传》有贾嘉；《刺客列传》有公孙季功、董生；《樊酈滕灌列传》有樊它广；《酈生陆贾列传》有平原君子（朱建子）；《张敖之冯唐列传》有冯遂（字王孙，《赵世家》亦云“余闻之冯王孙”）；《田叔列传》有田仁；《韩长孺列传》有壶遂；《卫将军骠骑列传》有苏建；《自序》有董生。而公孙季功、董生（非仲舒）曾与秦夏无且游。考荆轲刺秦王之岁，下距史公之生，凡八十有三年，二人未必能及见史公道荆轲事。又樊它广及平原君子辈行亦远在史公前。然则此三传所纪，史公或追纪父谈话也。自冯遂以下，皆与公同时。《汉书》所纪有临淮太守孔安国、骑都尉李陵、益州刺史任安。皇甫谧《高士传》所纪有处士挚峻。

史公所著百三十篇，后世谓之《史记》，《史记》非公所自名也。史公屡称“史记”，非自谓所著书，《周本纪》云：“太史伯阳读史记。”《十二诸侯年表》云：“孔子西观周室，论史记旧闻。”又云：“鲁君子左丘明，因孔子史记，具论其语，成《左氏春秋》。”《六国表》云：“秦既得意，烧天下《诗》《书》，诸侯史记尤甚，为其有所刺讥也。”又曰：“史记独藏周室，以故灭。”《天官书》云：“余观史记，考行事。”《孔子世家》云：“乃因鲁史记作《春秋》。”《自序》云：“䌷史记石室金匱之书。”凡七称“史记”，皆谓古史也。古书称“史记”者亦然。《逸周书》有《史记解》；《盐铁论·散不足篇》云：“孔子读史记，喟然而叹。”《公羊疏》引《春秋说》（谓《春秋纬》）云：“邱揽史记。”又引《闵因叙》云：“孔子使子夏等十四人，求周史记，得百二十国宝书，《感精符考异邮说题辞》具有其文，至后汉犹然。《越绝书》（四十）云：“夫子作经，揽史记。”

《东观汉记》（《初学记》卷二十一引）云：“时人有上言班固私改作史记（《后汉书》改“史记”为“国史”）。”《公羊》庄七年《传》何休注云：“不修春秋，谓史记也。是汉人所谓“史记”，皆泛言古史，不指《太史公书》，明《太史公书》当时未有《史记》之名。故在前汉，则著于向、歆《七略》者，谓之《太史公》百三十篇；《杨恽传》谓之《太史公记》；《宣元六王传》谓之《太史公书》。其在后汉，则班彪《略论》、王充《论衡》之《超奇》《案书》《对作》等篇，宋忠注《世本》（《左传正义》引），亦谓之《太史公书》；应劭《风俗通》谓之《太史公记》（见卷一及卷六），亦谓之《太史记》（见卷二）。是两汉不称《史记》之证。惟《后汉书·班彪传》称“司马迁作《史记》”，乃范曄语；《西京杂记

》称“司马迁发愤作《史记》”，则吴均语耳。称《太史公书》为《史记》，盖始于《魏志·王肃传》，乃《太史公记》之略语。晋荀勖《穆天子传序》，亦称《太史公记》。《抱朴子内篇》犹以《太史公记》与《史记》互称。可知以《史记》名书，始于魏、晋间矣。窃意史公原书本有小题而无大题，此种著述，秦汉间人本谓之“记”。《六国表》云：“太史公读秦记。”《汉书·艺文志》“春秋类”《汉著记》百九十卷。后汉班固、刘珍等在东观所作者，亦谓之《汉记》；蔡邕等所续者谓之《后汉记》。则称史公所撰为《太史公记》，乃其所也。其略称《史记》者，犹称《汉旧仪注》为《汉旧仪》、《汉仪注》，《说文解字》为《说文》，《世说新语》为《世说》矣。

《史记》一书，传播最早。《汉书本传》：“迁既死后，其书稍出。宣帝时，迁外孙平通侯杨惲祖述其书，遂宣播焉。”其所谓“宣播”者，盖上之于朝，又传写以公于世也。《七略》“春秋类”有《太史公》百三十篇。《宣元六王传》：“成帝时，东平王宇来朝，上书求《太史公书》。”是汉秘府有是书也。《盐铁论·毁学篇》：“大夫曰：司马子有言：‘天下攘攘，皆为利往’（见《货殖列传》）。”此桓宽述桑弘羊语。考桑弘羊论盐铁在昭帝始元六年，而论次之之桓宽，乃宣帝时人。此引《货殖传》语，即不出弘羊之口，亦必为宽所润色。是宣帝时民间亦有其书。嗣是冯商、褚先生、刘向、扬雄等均见之。盖在先汉之末，传世已不止一二本矣。

汉世百三十篇往往有写以别行者，《后汉书·窦融传》汉光武赐融以太史公《五宗》、《外戚世家》、《魏其侯列传》，又《循吏传》；明帝赐王景《河渠书》是也。

记言记事虽古史职，然汉时太史令但掌天时星历，不掌纪载。故太史公所撰书仍私史也。况成书之时，又在官中书令之后，其为史家著述甚明。故此书在公生前未必进御。乃《汉旧仪注》（《自序·集解》引）云：“司马迁作《景帝本纪》，极言其短，及武帝之过，帝怒而削去之（《西京杂记》卷六同）。”《魏志·王肃传》亦云：“汉武帝闻迁述《史记》，取孝景及己本纪览之，于是大怒，削而投之。于今此两纪有录无书。后遭李陵事，遂下迁蚕室。”此二说最为无稽。《自序》与《报任安书》皆作于被刑之后，而《自序》最目有孝景、今上两本纪；《报任安书》亦云本纪十二，是无削去之说也。

《隋书·经籍志》“别集类”有汉中书令《司马迁集》一卷，盖后人所辑，书已久佚。今其遗文存者：《悲士不遇赋》，见《艺文类聚》卷三十；《报任安书》，见《汉书》本传及《文选》；《与挚伯陵书》，见皇甫谧《高士传》。《悲士不遇赋》，陶靖节《感士不遇赋》序及刘孝标《辨命论》俱称之，是六朝人已视为公作；然其辞义殊未足与公他文相称。若《与挚伯陵书》，则直恐是贗作耳。

《隋志》“子部五行家”载：梁有太史公《素王妙义》二卷，亡。他书所引则作《素王妙论》。《史记·越王勾践世家集解》、《北堂书钞》卷四十五、《太平御览》卷四百四及四百七十二各引一条。其书似《货殖·列传》，盖取《货殖传》“素封”之语，故曰“素王”；非《殷本纪》“素王九主”之事，亦非仲尼素王之“素王”，殆魏、晋人所依托也。√

汉魏博士考☆

博士一官，盖置于六国之末，而秦因之。

《汉书·百官公卿表序》博士，秦官。”

《宋书·百官志》：“博士，班固云秦官。史臣案六国时往往有博士。”

案班、沈二说不同。考《史记·循吏传》：“公仪休，鲁博士也。”褚先生补《龟策传》：宋有“博士卫平”。《汉书·贾山传》祖祛，故魏王时博士弟子也。”沈约所谓“六国时往往有博士”者，指此。公仪休，即《孟子》之公仪子，繆公时为鲁相，时在战国之初。卫平在宋元王时，亦与孟子同时。疑当时未必置博士官，《史记》所云“博士”者，犹言“儒生”云尔。惟贾祛为魏王博士弟子，则六国末确有此官，且教授弟子，与秦汉博士同矣。至秦之博士，则有定员。《史记·秦始皇本纪》：“始皇置酒咸阳宫，博士七十人前为寿。”又侯生、卢生相与谋曰：“博士虽七十人，特备员不用，。”是秦博士员多至七十人。其姓名可考者，博士仆射有周青臣（《汉书·百官公卿表》仆射，秦官。自侍中、尚书、博士郎皆有。”《始皇本纪》上言“博士七十人前为寿”，下言“仆射周青臣进颂”，是青臣实博士仆射也），博士有淳于越（齐人。《史记·秦始皇本纪》），有伏生（济南人。

《史记·儒林传》），有叔孔道（薛人。《史记》本传），有羊子（《汉书·艺文志》“儒家”《羊子》四篇自注：“百章，故秦博士，，有黄疵（同上“法家”《黄公》四篇自注名疵，为秦博士。”），有正先《汉书·京房传》：“昔秦时，赵高用事。有正先者，非刺高而死，，孟康曰：“姓正名先，秦博士也。，仅六人。其中盖不尽经术之士。如《黄公》之书，《七略》列于法家。而《秦始皇本纪》云使博士《仙真人》诗。”又有“占梦博士”。殆诸子、诗赋、术数、方伎皆立博士，非徒六艺而已。又《始皇本纪》有“诸生”。《叔孙通传》则连言“博士诸生”，是秦博士亦置弟子。又：“始皇二十六年议帝号，丞相绾等奏：臣等谨与博士议”云云，是秦博士亦议典礼、政事，与汉制同矣。

汉兴，因素制，员至数十人。

《汉书·百官公卿表序》：“博士，秦官，掌通古今。员多至数十人。”

《汉官仪》（《大唐六典》卷二十二“国子博士”注引）“文帝博士七十余人，

案此汉初之制，未置五经博士前事也。员数与秦略同，亦不尽用通经之士。如高帝二年即以叔孙通为博士，通非专经之士也。又文帝时，齐人公孙臣上书陈《终始五德传》，文帝召以为博士，臣亦非专经之士也。盖犹袭秦时诸子百家各立博士之制

。

文帝始置一经博士。《后汉书·翟酺传》：“孝文皇帝始置一经博士。”（案北宋景祐、南宋嘉定本作“一经”，何焯校宋本作“五经”，案《汉书·武帝纪》及《百官公卿表》皆云武帝始置“五经博士”。

翟酺乃言“孝文皇帝始置一经博士”者，盖为经置博士始于文帝。而限以五经，则自武帝建元五年始也。考文、景时博士，如张生，如晁错，乃《书》博士；如申公，如辕固，如韩婴，皆《诗》博士；如胡毋生，如董仲舒，乃《春秋》博士。是专经博士，文、景时已有之。但未备五经，而复有传、记博士。故班固言置五经博士自武帝始也。

并立传、记。

《汉书·刘歆传》至孝文皇帝，始使掌故晁错从伏生受《尚书》。”“《诗》始萌芽。天下众书往往颇出，皆诸子传（记）。犹广立于学官，为置博士。”

赵岐《孟子题辞》：“孝文皇帝欲广游学之路，《论语》、《孝经》、《孟子》、《尔雅》皆置博士。”

武帝始罢黜百家，专立五经，而博士之员大减。

《汉书·武帝纪》建元五年春，置五经博士。”（《百官公卿表序》同）赵岐《孟子题辞》：“后罢传、记博士，独立五经而已。”

案文、景时已有《诗》、《书》、《春秋》博士。则武帝所新置者，《易》与《礼》而已。《易》之有博士，始于田王孙，在武帝时。《礼》之有博士，可考者始于后苍，在昭、宣二帝之世。而苍又兼传《齐诗》，不知为《齐诗》博士与？《礼》博士与？疑武帝时《礼》博士或阙而未补，或以他经博士兼之。未能详也。

又案传、记博士之罢，钱氏大昕以为即在置五经博士时。其说盖信。然《论语》、《孝经》、《孟子》、《尔雅》虽同时并罢，其罢之之意则不同。《孟子》以其为诸子而罢之也。至《论语》、《孝经》，则以受经与不受经者皆诵习之，不宜限于博士而罢之者也。刘向父子作《七略》，六艺一百三家，于《易》、《书》、《诗》、《乐》、《春秋》之后，附以《论语》、《孝经》（《尔雅》附）小学三目。六艺与此三者，皆汉时学校诵习之书。以后世之制明之，小学诸书者，汉小学之科目，论语》、《孝经》者，汉中学之科目；而六艺，则大学之科目也。武帝罢传、记博士，专立五经，乃除中学科目于大学之中，非遂废中、小学也。汉时，教初学之所名曰“术馆”，其师名曰“书师”，其书用《仓颉》、《凡将》、《急就》、

《元尚》诸篇，其旨在使学童识字、习字。《论衡·自纪篇》充八岁出于书馆，书馆小僮百人以上，皆以过失袒谪，或以书丑得鞭。充书日进，又无过失。”《后汉书·皇后纪》：邓皇后“六岁能《史书》，十二通《诗》、《论语》，。梁皇后“少善女工，好《史书》。九岁能诵《论语》，。是汉人就学，首学书法，其业成者，得试为吏。此一级也。其进则授《尔雅》、《孝经》、《论语》。有以一师专授者，亦有由经师兼授者。《汉书·平帝纪》元始三年，立学官，，郡国曰，学，县、道、邑、侯国曰，校，。校、学置经师一人。乡曰痒，聚曰，序，。序、库置《孝经》师一人。”《魏志·邴原传》注引《原别传》：邻有书舍，原“遂就书，一冬之间诵《孝经》、《论语》。此由一师专授者也”。《平帝纪》：元始（四）年，征天下“以一经、《论语》、《孝经》、《尔雅》教授者”。此由经师兼授者也。且汉时但有受《论语》、《孝经》、小学而不受一经者；无受一经而不先受《论语》、《孝经》者。《汉书·昭帝纪》诏曰：“朕通《保傅传》、《孝经》、《论语》、《尚书》，未云有明。”

《宣帝纪》：霍光议奏曰：“孝武皇帝曾孙病已，有诏掖庭养视，师受《诗》、《论语》、《孝经》。”《景十三王传》：广川王去“师受《易》、《论语》、《孝经》，皆通”。《疏广传》：“皇太子年十二岁，通《论语》、《孝经》。”《后汉书·范升传》九岁通《论语》、《孝经》，及长，受梁邱《易》，皆通。”是通经之前，皆先通《论语》、《孝经》。亦有但云《论语》者。《汉书·王尊传》“受《尚书》、《论语》。”《后汉书·邓皇后纪》十二通《诗》、《论语》。”《梁皇后纪》：“九岁能诵《论语》，治韩《诗》。”《马严传》：“子续七岁能《论语》，十三明《尚书》。”《荀爽传》：“年十二通《春秋》、《论语》。”《论衡·自纪篇》：“充手书既成，辞师受《论语》、《尚书》。”此数事，或举《论语》以该《孝经》，或但受《论语》而不及《孝经》，均不可考。要之，无不受《论语》者（汉人受书次第，首小学，次《孝经》，次《论语》，次一经。此事甚明。诸书或倒言之，乃以书之尊卑为次，不以受书之先后为次。受书时由卑及尊，乃其所也）。故汉人传《论语》、《孝经》者，皆他经大师，无以此二书专门名家者。如传《齐论》者，有王吉父子、宋畸、贡禹、五鹿充宗、胶东庸生。中惟宋畸无考，王吉则传《韩诗》，王骏及五鹿充宗传梁邱《易》，贡禹传《公羊春秋》，庸生传古文《尚书》。传《鲁论》者，有龚奋、夏侯胜、韦贤、鲁扶卿、萧望之、张禹、朱云。奋与扶卿无考，夏侯胜则传《尚书》，韦贤传《鲁诗》，萧望之传《齐诗》，张禹传施氏《易》，朱云传孟氏《易》。传《孝经》者，有长孙氏、江翁、后苍、翼奉、张禹。长孙无考，江翁则传《鲁诗》与《谷梁春秋》，后苍、翼奉传《齐诗》，苍又传《礼》。盖经师授经亦兼授《孝经》、《论语》，犹今日大学之或有预备科关。然则汉时《论语》、《孝经》之传，实广于五经，不以博士之废置为盛衰也。

宣帝之末，增员至十二人。

《汉书·宣帝纪》：甘露三年“立梁邱《易》、大小夏侯《尚书》、《谷梁春秋》博士”。又《百官公卿表序》博士，“宣帝黄龙元年增员至十二人”。又《艺文志》：《易》“讠于宣、元，有施孟、梁邱、京氏立于学官”。《书》，“讠孝宣，有欧阳、大小夏侯氏立于学官”。《诗》，鲁、齐、韩“三家皆立于学官”。《礼》，“讠孝宣世，后仓最明，戴德、戴圣、庆普皆其弟子，三家皆立于学官”。《春秋》，“四家之中，《公羊》、《谷梁》立于学官”。

又《刘歆传》：“往者博士：《书》有欧阳！春秋《公羊》，《易》则施孟。然孝宣皇帝犹复广立《谷梁春秋》、梁邱《易》、大小夏侯《尚书》。”

又《儒林传赞》：“初，《书》惟有欧阳，《礼》后，《易》杨，《春秋》公羊而已，至孝宣世，复立大、小夏侯《尚书》，大、小戴《礼》，施孟、梁邱《易》，谷梁《春秋》。”

《后汉书·章帝纪》建初四年十一月壬戌，诏曰：汉承秦后，褒显儒术，建立五经，为置博士。”“孝宣皇帝以去圣久远，学不厌博，故遂立大、小夏侯《尚书》。”

案宣帝增置博士事，《纪》、《表》《志》、《传》所纪互异。《纪》系于甘露三年，《表》系于黄龙元年，一不同也。《纪》与《刘歆传》均言立梁邱《易》大小夏侯《尚书》，谷梁《春秋》而《儒林传赞》复数大、小戴《礼》，《艺文志》复数庆氏《礼》，二不同也。又博士员数，《表》与《传》亦不同。据《刘歆传》，则合新旧仅得八人；如《儒林传赞》，则合新旧得十二人，似与《表》合矣。然二《传》皆不数《诗》博士。案申公、韩婴均于孝文时为博士，辕固于孝景时为博士，则文景之世，鲁、齐、韩三家《诗》已立博士。特孝宣时，于《诗》无所增置，故刘歆略之。《儒林传赞》综计宣帝以前立博士之经，而独遗《诗》鲁、齐、韩三家，则疏漏甚矣。又宣帝于《礼》博士亦无所增置。《儒林传赞》乃谓宣帝立大、小戴《礼》，不知戴圣虽于宣帝时为博士，实为后氏《礼》博士，尚未自名其家，与大戴分立也。《艺文志》谓庆氏亦立学官者，误与此同。今参伍考之，则宣帝未所有博士，《易》则施、孟、梁邱，《书》则欧阳、大小夏侯，《诗》则齐、鲁、韩，《礼》则后氏，《春秋》公羊、谷梁，适得十二人。《儒林传赞》遗《诗》三家，因刘歆之言而误。《赞》又数大小戴《礼》、《艺文志》并数庆氏《礼》，则又因后汉所立而误也。又宣帝增置博士之年，《纪》、《表》虽不同，然皆以为在论石渠之后。然《儒林传》言欧阳高孙地余“为博士，论石渠，又“林尊事欧阳高，为博士，论石渠”，张山拊“事小夏侯建，为博士，论石渠，则论石渠时，似欧阳有二博士，小夏侯亦已有博士，与《纪》、《传》均不合。盖所纪历官时代有错误也。又《易》施、孟二博士，亦宣帝所立（但在甘露、黄龙前），则《儒林传赞》所言是也。

元帝复立京氏《易》博士，未几而废。

《汉书·儒林传赞》至元帝世，复立京氏《易》。”

《后汉书·范升传》：“先帝前世有疑于此，故京氏虽立，辄复见废。”平帝复立古文《尚书》、《毛诗》、逸《礼》、《乐经》、《左氏春秋》，增员至三十人。

《汉书·儒林传赞》平帝时，又立《左氏春秋》、《毛诗》、逸《礼》、古文《尚书》。”

又《王莽传》：元始四年“立《乐经》，益博士员，经各五人。”

又《艺文志》：“《周官经》，六篇。王莽时刘歆置博士。”

《三辅黄图》：“六经，三十博士。”

案平帝时增五经为六经，博士经各五人，则六经三十人。然综计当时所立之学不及三十家。盖一家博士不止一员也。

后汉初，博士共十四人。

《续汉书·百官志》：博士十四人。”本注曰：《易》四：施、孟、梁邱、京氏；《尚书》三：欧阳、大小夏侯氏；《诗》三：鲁、齐、韩氏；《礼》二：大、小戴氏；《春秋》二：《公羊》、严颜氏。”

《后汉书·儒林传序》：光武中兴，爱好（儒）术”，“立五经博士，各以家法教授。《易》有施、孟、梁邱、京氏，《尚书》欧阳、大小夏侯，《诗》齐、鲁、韩、毛（此字衍），《礼》大、小戴，《春秋》严、颜，凡十四博士。”

案后汉初，曾置庆氏《礼》。当时为“礼”博士者，如曹充，如曹褒，如董钧，皆传庆氏《礼》者也。传二戴《礼》而为博士者，史反无闻。疑当时《礼》有庆、大小戴三氏，故班氏《艺文志》谓“《礼》三家皆立于学官”，盖误以后汉之制本于前汉也。后庆氏学微，博士亦中废，至后汉末，《礼》博士只有大、小戴二家。故司马彪、范曄均遗之耳。

后立《春秋·左氏》、《谷梁》博士。未几而罢。

《后汉书·陈元传》时议欲立《左氏传》博士，范升与元相辨难，凡十余上。帝卒立左氏学，太常选博士四人，元为第一。帝以元新忿争，乃用其次司隶从事李封。

于是诸儒以《左氏》之立议论議哗，自公卿以下数廷争之。会封病卒，《左氏》复废。”

又《贾逵传》：“至光武皇帝，奋独见之明，兴立《左氏》、《谷梁》，会二家先师不晓图讖，故令中道而废。”

自是讖后汉之末，无所增损。至魏，立《谷梁春秋》、《礼记》，而古文家经如费《易》、古文《尚书》、《毛诗》、《周礼》、《左氏春秋》遂并立于学官，博士亦增于汉矣。

《魏志·文帝纪》，黄初五年，“立太学，制五经课试之法，置《春秋谷梁》博士”。

又《高贵乡公纪》：甘露元年“夏四月丙辰，帝幸太学”云云。

又《王肃传》：“肃为《尚书》、《诗》、《论语》、三《礼》、《左氏》解，乃撰定父朗所作《易传》，皆列于学官。”

《魏略·儒宗传》（《后汉书·儒林传》注、《魏志·杜畿传》注引）：乐详，“黄初中征拜博士。于时太学初立，有博士十余人”。

《宋书·百官志》：博士。魏及晋西朝置十九人，江左初减为九人，皆不知掌何经。”

案汉世所立十四博士，皆今文学也。古文诸经，终汉之世，未得立于学官。惟后汉中叶后，博士之选不如先汉之严。故周防以治古文《尚书》为博士，卢植本事马融，兼通今、古学，亦为博士。又中平五年所征博士十四人，若荀爽、若郑玄，若陈纪，亦古文学家。爽等三人虽征而不至，若周防、卢植，固尝任职矣。而当时实未立古文学。此三人者，盖以古文学家为今文学博士，犹孔安国虽传古文《尚书》，而实为今文《尚书》博士（观安国之学传为兒宽，宽之传为欧阳高，可知胡常、翟方进虽兼传《左氏》，而实为《谷梁》博士也。古文学之立于学官，盖在黄初之际。自董卓之乱，京洛为墟。献帝托命曹氏，未遑庠序之事，博士失其官守垂三十年。今文学日微，而民间古文学乃日兴月盛。逮魏初复立太学博士，已无复昔人。其所以传授课试者，亦绝非曩时之学。盖不必有废置明文，而汉家四百年官学今文之统，已为古文学取而代之矣。试取魏时诸博士考之。邯郸淳，传古文《尚书》者也。乐详、周生烈，传《左氏春秋》者也。宋均、田琼皆亲受业于郑玄，张融、马融亦私淑郑氏者也。苏林、张揖通古今字指，则亦古文学家也。余如高堂隆上书述古文《尚书》、《周官》、《左氏春秋》，赵怡、淳于峻、庾峻等亦称述郑学。其可考者如此，则无考者可知。又以高贵乡公幸太学问答考之，所问之《易》则郑注也

，所讲之《书》则贾逵、马融、郑玄、王肃之注也，所问之礼则小戴《记》，盖亦郑玄、王肃注也。《王肃传》明言其所注诸经皆列于学官。则郑注五经亦列于学官可知。然则魏时所立诸经，已非汉代之今文学，而为贾、马、郑、王之古文学矣。

《晋书·荀崧传》：崧上疏言晋初“太学有石经古文、先儒典训，贾、马、郑、杜、服、孔、王、何、颜、尹之徒章句传注众家之学，置博士十九人”（《宋书·礼志》文同）。《宋书·百官志》以为魏博士员数亦与之同。其说虽未可尽信，然大略不甚相远。今以荀崧所举家数，与沈约所纪魏博士员数差次之。魏时，除《左传》杜注未成、《尚书》孔传未出外（荀崧言晋初“章句传注”有孔氏，盖谓孔安国书传。晋初已立孔传与否，虽不可考，然魏时确未立孔传。何以证之？孔传释《尧典》“曰若稽古”为“顺考古道”，与贾、马、王肃同，而庾峻对高贵乡公问，仅言贾、马及肃皆以为“顺考古道”，不及孔安国。是魏时未立《尚书》孔传之证也），《易》有郑氏、王氏，《书》有贾、马、郑、王氏，《诗》及三《礼》郑氏、王氏，《春秋左传》服氏、王氏，《公羊》颜氏、《谷梁》尹氏，适得十九家，与博士十九人之数相当。沈约之说虽他无所征，盖略近之矣。此十九博士中，惟《礼记》、《公》、《谷》三家为今学，余皆古学。于是西京施、孟、梁邱、京氏之《易》！欧阳、大小夏侯之《书》，齐、鲁、韩之《诗》，庆氏、大戴之《礼》，严氏之《春秋》，皆废于此数十年之间，不待永嘉之乱而其亡可决矣。学术变迁之在上者，莫剧于三国之际。而自来无能质言之者，此可异也。蜀汉与吴亦置博士，虽员数无考，而风尚略同。

《蜀志·许慈传》慈事刘熙，善郑氏学，治《易》、《尚书》、三《礼》、《毛诗》、《论语》。（中略）先主定蜀，承丧乱历纪，学业衰废，乃鸠合典籍，沙汰众学，慈为博士。”

又《尹默传》：“益部多贵今文而不崇章句，默知其不博，乃远游荆州，就司马德操、宋仲子等受古学。皆通诸经史，又专精于《左氏春秋》。自刘歆条例，郑众、贾逵父子、陈元（方）、服虔注说，咸略诵述，不复案本。子宗传其业，为博士。”

《晋书·儒林传》文立“蜀时游太学，专《毛诗》、三《礼》，（《华阳国志》同）《虞翻别传》《吴志·虞翻传》注引）翻“奏郑玄解《尚书》违失事曰：“宜命学官定此三事。又曰：“又玄所注五经，违义尤甚者百六十七事，不可不正。行乎学校，传乎将来，臣窃耻之1。

案蜀、吴学校均行古学。蜀之博士皆古学家，既有征矣。吴虞翻所上奏，在孙权世。时尚未立五经博士（孙休永安元年始立五经博士），而翻言郑注“行乎学校”，盖指民间教授言之。后立博士，韦昭实为祭酒，韦亦古文学家也。然则蜀、吴所立博士，当与魏略同，盖可识矣。

博士自六国、秦时已有弟子，汉兴仍之。

《汉书·贾山传》：“祖祛，故魏王时博士弟子也。”《史记·叔孙通传》：“陈胜起，二世召博士诸儒生问曰：‘于公何如？’博士诸生三十余人对曰”云云。《汉书·循吏传》：文翁“景帝末为蜀郡守。选郡县小吏开敏有材者张叔等十余人，遣诣京师，受业博士”。

武帝特为博士置弟子五十人。《汉书·武帝纪》：元朔（四）年“夏六月，诏曰：‘盖闻导民以礼，风之以乐。今礼坏乐崩，朕甚闵焉。故详延天下方闻之士，咸荐诸朝。其令礼官劝学，讲议洽闻，举遗兴礼，以为天下先。太常其议予博士弟子，崇乡党之化，以厉贤材焉。’丞相弘请为博士置弟子员，学者益广。”又《儒林传》：丞相、御史言，请“为博士官置弟子五十人，复其身。太常择民年十八以上仪状端正者，补博士弟子。郡国县官有好文学，敬长上，肃政教，顺乡里，出入不悖，所闻，令相长丞上所属二千石。二千石谨察可者，常与计偕，诣太常，得受业如弟子”。

其后大增员数。

《汉书·儒林传》：昭帝时“增弟子员满百人，宣帝时增倍之。元帝好儒，能通一经者皆复。数年，以用度不足更为设员千人。成帝末，或言孔子布衣养徒三千人，今天子太学弟子少，于是增弟子员三千人。岁余，复如故。平帝时王莽秉政，增元士之子，得受业如弟子，勿以为员”。《后汉书·党锢传》太学诸生三万余人。”又《儒林传》本初元年，梁太后诏曰：“大将军下及六百石，悉遣子就学。1自是游学增盛，至三万余生。”《魏略·儒宗传序》（《魏志·王肃传》注引），“黄初元年之后，新主乃复始扫除太学之灰炭，补旧石经之缺坏，备博士之员录，依汉甲乙以考课。申告州郡，有欲学者，皆遣诣太学。太学始开，有弟子数百人。至太和、青龙中，中外多事，人怀避就。虽性非解学，多求请太学。太学诸生有千数。”

博士之于弟子，职在教授及课试。《汉书·儒林传》：博士弟子“一岁皆辄课，能通一艺以上，补文学掌故缺。高可以为郎中，太常籍奏。即有秀才异等，辄以名闻。若下材不能通一艺，辄罢之，而请诸能称者”。又：“岁课甲科四十人为郎中，乙科二十人为太子舍人，丙科四十人补文学掌故云。”

《后汉书·徐防传》永元十四年，防“上疏曰：‘伏见太学试博士弟子，皆以意说，不修家法，私相容隐，开生奸路。每有策试，辄兴诤讼，议论纷错，互相是非。臣以为博士及甲、乙策试，宜从其家章句，开五十难以试之。解释多者为上第，引文明者为高说。若不依先师，又有所伐，皆正以为非。五经各取上第六人，《论语》不宜射策。虽所失或久，差可矫革。诏书下公卿，皆从防言’”。

又《顺帝纪》：阳嘉元年，秋七月“丙辰，以太学新成，试明经下第者补弟子，增甲、乙科员各十人”。

又《质帝纪》：本初元年夏四月，“令郡国举明经，年五十以上、七十以下，诣太学。自大将军至六百石，皆遣子受业，岁满课试，以高第五人补郎中，次五人太子舍人”。《通典》（十三）：“桓帝建和初，诏：“诸学生年十六，比郡国明经试，次第上名。高第五十人，上第十六人为郎中，中第十七人为太子舍人，下第十七人为王家郎。”同上：永寿二年，诏“复课试诸生，补郎、舍人”。

《后汉书·宦者传》诸博士试甲、乙科，争第高下，更相告诉。亦有私行金货，定兰台漆书经字，以合其私文。”《魏志·文帝纪》黄初五年夏四月，“立大学，制五经课试之法”。《通典》（五十三）：“魏文帝黄初五年，立太学于洛阳。”

时慕者始请太学为门人。满二岁，试通一经者称弟子，不通一经者罢遣。

弟子满二岁，试通二经者补文学掌故，不通二经者，听须后辈试，试通二经，亦得补掌故。掌故满二岁，试通二经者，擢高第，为太子舍人；不第者随后辈试，试通亦为太子舍人。舍人满二岁，试通四经者，擢其高第，为郎中；不通者，随后辈复试，试通亦为郎中。郎中满二岁，能通五经者，擢高第，随才叙用；不通者，随后辈复试，试通亦叙用。

案此即《魏志·文帝纪》所谓“五经课试之法”也。《通典》卷十三《选举》门系此事于桓帝永寿二年之后，而《吉礼》门则以为魏黄初五年事。又《北堂书钞》六十七并《太平御览》五百三十四杂引此中文句，谓出挚虞《决疑要注》，亦以为魏时事，且与汉制不类。疑《吉礼》门所纪是也。

《魏略·儒宗传序》（《魏志·王肃传》注引）：黄初中，“备博士之员录，依汉甲、乙以考课。告州郡有欲学者，皆遣诣太学。太学始开，有弟子数百人。至太和、青龙中，中外多事，人怀避就。虽性不解学，皆求请太学。太学诸生有千数，本亦避役，竟无能学。冬来春去，岁岁如是。又虽有精者，而台阁举格太高，加不念统其大义，而问字指、墨法、贴注之间，百人同试，度者未十”。《魏志·明帝纪》：“太和四年，春二月壬午，诏曰：“其郎吏明经，才任牧民，博士课试，擢其高第者亟用；其浮华不务道本者，皆罢去之。”

后汉中叶以后，课试之法密，而教授之事轻。

《后汉书·儒林传》自安帝览政，薄于艺文，博士倚席不讲，朋徒相视怠散。”《通典》（五十三）：“建安中，侍中鲍衡奏：“今学，博士并设，表章而无所教授。

1《魏略·儒宗传》《魏志·杜畿传》注引/乐详，“黄初中征拜博士。于时太学初

立，有博士十余人。学多褊狭，又不熟悉，略不亲教，备员而已”。又《儒宗传序》（《魏志·王渊传》注引），太和、青龙中，“诸博士率皆粗疏，无以教弟子。弟子本亦避役，竟无能习学”。

又汉博士皆专经教授，魏则兼授五经。《魏略·儒宗传》乐详“五业并授”。《魏志·高堂隆传》：景初中，帝以苏林、秦静等并老，恐无能传业者，乃诏“科郎吏高才解经义者三十人，从光禄大夫隆、散骑常侍林、博士静，分受四经、三《礼》，主者具为设课试之法”。

案三人分授四经、三《礼》，是一人所授非一经也。此虽非博士教弟子之法，然博士授业亦当准之。又秦静身为博士，弟子甚多，而虑其年老，无能传业。是当时博士但备员数，未尝亲授弟子也。

汉博士弟子专受一经。后汉以后，则兼受五经。后汉建初残墓砖：“十五入大学受《礼》，十六受《诗》，十七受□，十八受《易》，十九受《春秋》。”

汉博士课试弟子，惟以一艺。后汉以后，则兼试五经。

《通典》（五十三）二则见上。

此其异也。汉博士秩卑而职尊。除教授弟子外，或奉使。《汉书·武帝纪》元狩六年，夏，“遣博士大等六人分循行天下”。同上：元鼎二年，夏，大水。秋，“遣博士中等分循行”。同上：《终军传》：元鼎中，“博士徐偃使行风俗”。同上《元帝纪》：建昭四年，“临遣谏大夫博士赏等二十一人循行天下”。同上《王尊传》：“博士郑宽中使行风俗。”同上《成帝纪》：河平四年，“遣光禄大夫博士嘉等，行举濒河之郡水所毁伤、贫乏不能自存者”。同上：阳朔二年秋，“关东大水，流民欲入函谷、天井、壶口、五阮关者，勿苛留。遣谏大夫博士分行视”。同上《孔光传》：光为博士，“成帝初即位，数使录冤狱，行风俗，赈赡流民，奉使称旨”。同上《平当传》：当为博士，“使行流民幽州”。

或议政。《汉书·贾谊传》文帝召谊为博士。每诏令议下，诸老先生未能言，谊尽为之对。”同上《文帝纪》：“后元年，诏曰：“间者数年岁比不登，又有水旱疾疫之灾，朕甚忧之。其与丞相、列侯、吏二千石、博士议之，有可以佐百姓者，率意远思，无有所隐。”1同上《武帝纪》：“元朔元年冬十一月，诏曰：“朕深诏执事，兴廉举孝。今或阖郡而不举一人。其与中二千石、礼官、博士议，不举者罪。”1同上《儒林传》：元朔五年，诏太常，其议与博士弟子。“丞相、御史言”，“谨与太常臧、博士平等议”云云。《史记·三王世家》：大司马去病请定皇子位，“丞相臣青翟、御史大夫臣汤昧死言：“臣谨与列侯臣婴齐，中二千石二千石臣贺，谏大夫博士臣安等议1云云。又“臣青翟等与列侯、吏二千石、谏大夫、博士臣

庆等议”云云。《汉书·张汤传》：“武帝时，匈奴求和亲，群臣议上前，博士狄山曰：“和亲便。1同上《律历志》元封七年，太中大夫壶遂、太史令司马迁等言，历纪废坏，宜改正朔，。是时御史大夫兒宽明经术，上乃诏宽曰：“与博士共议。1同上《杜延年传》：始元四年，“丞相车千秋即召中二千石、博士会公车门，议问侯史吴法”。同上《霍光传》：昌邑王“即位，行淫乱，光遂召丞相、御史、将军、列侯、中二千石、大夫、博士会议未央宫”。同上《夏侯胜传》宣帝初即位，诏曰：“孝武皇帝功德茂盛，而庙乐未称。朕甚悼焉。其与列侯、二千石、博士议。1同上《韩延寿传》：萧望之劾延寿上潜不道，“愿下丞相、中二千石、博士共议其罪”。同上《韦玄成传》：“永光四年，乃下诏先议罢郡国庙，曰：“其与将军、列侯、中二千石、诸大夫、博士议。1同上：后月余，复下诏曰：“盖闻明王制礼，立亲庙四。祖宗之庙，万世不毁，所以明尊祖敬宗，著亲亲也。朕获承祖宗之重，惟大礼未备，战栗恐惧，不敢自显。其与将军、列侯、中二千石、二千石、诸大夫、博士议。1”同上《郊祀志》：“成帝初即位，丞相衡、御史大夫谭奏言：“甘泉泰畤、河东后土之祠宜可徙置长安。愿与群臣议定。奏可。右将军王商、博士师丹、议郎翟方进等五十人，以为甘泉、河东之祠非神灵所飨，宜徙就正阳大阴之处。”

同上《薛宣传》：哀帝初即位，宣子况、赅客杨明遮斫申咸宫门外。事下有司，御史中丞众等奏况、明皆弃市。廷尉直以为明当以贼伤人不直，况与谋，皆爵减，完为城旦。上以问公卿。“丞相孔光、大司空师丹以中丞议是，自将军以下至博士、议郎皆是廷尉。”同上《朱博传》：左将军彭宣等劾奏博及赵玄、傅晏，请诏谒者召诣廷尉诏狱。“制曰：“将军、中二千石、二千石、诸大夫、博士、议郎议。”同上《王嘉传》：“孔光等请谒者召嘉诣廷尉诏狱，制曰：“票骑将军、御史大夫、中二千石、二千石、诸大夫、博士、议郎议。1同上《韦玄成传》：“哀帝即位，丞相光、大司空武奏言：“迭毁之制，宜以时定。臣请与群臣杂议。1于是光禄勋彭宣、詹事满昌、博士左咸等五十三人，皆以为继祖宗以下五庙而迭毁。孝武皇帝亲尽宜毁。”同上：“元始五年，大司马王莽奏：“臣谨与太师孔光、长乐少府平晏、大司农左咸、中皇校尉刘歆、大中大夫朱阳、博士薛顺、议郎国由等六十七人议，皆曰：宜如建始时丞相衡等议，复南北郊如故。”

中兴以后，此制渐废，专议典礼而已。

《后汉书·光武纪》建武二年，博士丁恭议曰：“古帝王封诸侯不过百里，故利以建侯，取法于雷。强干弱枝，所以为治也。今封诸侯四县，不合法则。1《续汉书·祭祀志》建武七年五月，诏三公曰：“汉当郊尧。其与卿、大夫、博士议。1同上：“建武十九年，张纯、朱浮奏：“礼：为人子，事大宗，降其私亲。愿下有司议先帝四庙当代亲庙者及皇考庙事。下公卿、博士、议郎议。”《晋书·律历志》：黄初中，“董巴议改历”云云。

案董巴，魏博士。见后。

《魏书》（《魏志·明帝纪》注引）：景初三年，“史官复著言宜改正朔，乃诏三公、特进、九卿、中郎将、大夫、博士、议郎、千石、六百石博议”。《宋书·礼志》：明帝即位，议改正朔。博士秦静、赵怡等以为宜改。同上：“博士乐祥议：正月旦受朝贺，群臣奉赞。”《通典》（八十一）：太和六年四月，博士乐祥议明帝为外祖母服。同上（七十五）：青龙二年，博士高堂隆议执赞。同上（五十五）：青龙五年，博士秦静议正朔服色。同上（九十一）魏明帝景初中，尚书祠部问曰：“同母异父昆弟服，应几月？”，太常曹毗述博士赵怡据子游郑注：“大功九月。1同上（一百四十七）：博士赵怡议祀天地用宫县。同上（四十四）：博士秦静议蜡祭。同上（五十五）：博士秦静议凉州刺史上灵命瑞图，醮告太庙。同上（六十九）：博士田琮议异姓不相为后。同上（八十三）：“蒋济奏吊丧去冠非礼意。博士杜希议”云云。

博士秩，汉初四百石，宣帝后为比六百石。

《汉书·百官公卿表》：博士“秩比六百石”。《续汉书·百官志》博士十四人，比六百石。”本注，“本四百石，宣帝增秩。”

魏时为第五品。

《通典》（三十六）：魏官九品，第五品太学博士。

其长，自秦以后谓之“仆射”，中兴后为“祭酒”。

《汉书·百官公卿表序》：“仆射，秦官，自侍中、尚书、博士、郎皆有”，“取其领事之号”。《续汉书·百官志》博士祭酒一人，秩六百石。本仆射，中兴转为祭酒。”

博士任用，或征召。《汉书·贾谊传》文帝召以为博士。”同上《张苍传》：“文帝召公孙臣以为博士。”同上《公孙弘》、《疏广》、《贡禹》、《龚舍》、《夏侯胜传》，《后汉书·卢植》、《樊英传》：皆云“征为博士”。《后汉书·曹褒》、《郭宪传》皆云“征拜博士”。或荐举。《汉书·成帝纪》：“阳朔二年，诏曰：“丞相、御史其与中二千石、二千石杂举可充博士位者，使卓然可观。1同上《彭宣》、《孔光传》举为博士。”同上《儒林·施仇传》“梁邱贺荐仇：“束发事师数十年，贺不能及。诏拜为博士。”同上《孟喜传》：“博士缺，众人荐喜。上闻喜改师法，遂不用喜。”同上《王式传》：“诸博士皆素闻其贤，共荐式。诏除下为博士。《汉官仪》（《后汉书·朱浮传》注及《通典》引）：“博士举状曰：“生事爱敬，丧没如礼。通《易》、《尚书》、《诗》、《礼》、《春秋》、《

孝经》、《论语》，兼综载籍，穷微阐奥。师事某官，见授门徒五十人以上。隐居乐道，不求闻达。身无金痍痼疾三十六

属，不与妖恶交通、王侯赏赐。行应四科，经任博士。，下言某官某甲保举。”《后汉书·杨震传》先是博士选举多不以实。震举明经名士陈留、杨伦等。”

同上《儒林·周防传》太尉张禹荐补博士。”《魏志·张郃传》郃虽武将，而爱乐儒士。尝荐同乡卑湛经明行修，诏擢为博士。”《晋书·郑袤传》：“袤为太常。高贵乡公议立明堂、辟雍，精选博士，袤举刘毅、刘宴、程咸、庾峻，后并至公辅大位。”同上《张华传》：“郡守鲜于嗣荐华为太常博士。”

或选试。《汉书·张禹传》“试为博士”。《续汉书·百官志》“太常”本注：每选试博士，奏其能否。”《后汉书·朱浮传》：旧事，策试博士，必广求详选，爱自畿夏，延及四方。是以博举明经，惟贤是登，学者精励，远近同慕。伏闻诏书更试五人，惟取现在洛阳城者。臣恐自今以往，将有所失。求之密迩，容或未尽，而四方之学，无所劝乐。”同上《伏恭传》：“太常试经第一，拜博士。”同上《陈元传》：“太常选博士四人，元为第一。帝以元新忿争，乃用其次司隶从事李封”为博士。又《儒林·张元传》：会颜氏博士缺，元策试第一，拜为博士。”

或以贤良、文学、明经诸科进。《汉书·公孙弘传》：“武帝初即位，以贤良征为博士。元光五年，复举贤良文学，拜为博士。”同上《平当传》：“以明经为博士。”同上《师丹传》：“建昭中，州举茂才，复补博士。”《后汉书·赵咨传》：延熹元年，大司农陈豨举咨至孝有道，仍迁博士。”同上《李法传》：永光九年，应贤良方正对策，除为博士。”同上《方术·郭宪传》：“光武即位，求天下有道之人，乃征宪，拜博士。”

或由他官迁。

《汉书·晁错传》：错“为太子舍人、门大夫，迁博士”。同上《翼奉传》：“奉以中郎为博士。”同上《匡衡传》：“上以为郎中，迁博士。”同上《翟方进传》：举明经，迁议郎。”河平中转为博士。同上《儒林·欧阳生传》：欧阳地余以“太子中庶子授太子，后为博士”。《后汉书·范升传》：建武二年，光武征诣怀宫，拜议郎，迁博士。”

博士或兼给事中。

《汉书·百官公卿表序》给事中亦加官，所加大夫、博士、议郎，掌顾问应对，位次中常侍。”同上《平当传》：为博士，给事中。同上《韦贤传》：“征为博士，给事中。”同上《匡衡传》：“迁博士，给事中。”同上《薛宣传》：“哀帝初即

位，博士申咸给事中。”同上《师丹传》：“给事中博士申咸、炅钦上书”云云。《献帝传》（《魏志·魏帝纪》注引）：“给事中博士苏林、董巴上表”云云。《魏略》（《魏志·王粲传》注引）：“黄初初，以邯郸淳为博士、给事中。”《魏志·高堂隆传》：明帝“以隆为给事中，博士”。

其迁擢也，于内则迁中二千石、二千石。《汉书·叔孙通传》：汉二年，“汉王拜通为博士，号稷嗣君”。七年拜为奉常（中二千石）。同上《公孙弘传》：“拜为博士，待诏金马门。一岁中至左内史。”（二千石）同上《百官公卿表》：博士。后苍为少府（中二千石）。同上《平当传》：为博士，给事中。”“奉使十一人为最，迁丞相司直。”，比二千石）同上《韦贤传》：征为博士，给事中，进授昭帝《诗》，稍迁光禄大夫。，比二千石）同上《夏侯胜传》：征为博士，光禄大夫。同上《匡衡传》：“迁博士，给事中”，“迁为光禄大夫”。同上《张禹传》：试为博士。授皇太子《论语》，由是迁为光禄大夫。”同上《儒林传》：“郑宽中以博士授太子，迁光禄大夫，领尚书事。”《后汉书·桓荣传》，荣为博士。“拜博士张佚为太子太傅（中二千石），而以荣为少傅。”，比二千石）同上《儒林·甄宇传》：征拜博士。稍迁太子少傅。”同上《鲁恭传》：“拜为《鲁诗》博士，迁侍中。”（比二千石）同上《曹褒传》：征拜博士，又拜侍中。同上《李法传》：“除博士，迁侍中。”同上《承宫传》：拜博士，迁左中郎将。”（比二千石）同上《方术·李郃传》：父颉，官至博士，迁左中郎将。”

或迁千石及八百石，汉书·贾谊传》谊为博士，“超迁，岁中至太中大夫，比千石）。

同上《疏广传》：“征为博士太中大夫。”同上《晁错传》：“迁博士。拜为太子家令。”，八百石）同上《翼奉传》：以中郎为博士，谏大夫。，比八百石）同上《孔光传》：“是时博士选三科，高为尚书，次为刺史。其不通政事，以久次为诸侯王太傅。光以高第为尚书。”，六百石）于外，则为郡国守相。《汉书·董仲舒传》为博士。”以贤良对策“为江都相”。同上《萧望之传》是岁选博士、谏大夫通政事者，补郡国守相。”《后汉书·卢植传》征为博士，出为九江太守。”同上《儒林·牟长传》拜为博士，稍迁河内太守。”同上《儒林·周防传》：“补博士，稍迁陈留太守。”同上《儒林·伏恭传》拜博士，迁常山太守。”

或为诸侯王太傅。《汉书·儒林传》辕固以博士为清河王太傅。”同上《彭宣传》：“举为博士，迁东平太傅。”同上《师丹传》：“复为博士，出为东平王太傅。”《后汉书·杨伦传》：特征博士，为清河王太傅。”

或为部刺史、州牧。《汉书·禹贡传》：征为博士，凉州刺史。”同上《翟方进传》：“转为博士。数年，迁朔方刺史。”同上《儒林传》：“胡常以明《谷梁春秋》为博士，部刺史。”同上《儒林传》：“琅邪徐良旂卿为博士、州牧郡守。”或

为县令。

《汉书·朱云传》：“由是为博士。迁杜陵令。”

盖清要之官，非同秩之文吏比矣。

记现存历代尺度

一，刘歆铜斛尺（长工部营造尺七寸二分；九英寸又十二分之一）。

新莽嘉量，今藏坤宁宫。其斛铭曰：方尺而圜，其外深尺。斗铭云：方尺而圜，其外深寸。此尺即据斛之周径及深之所制也。《隋书·律历志》谓之刘歆铜斛尺，今从之。《隋·志》谓周尺、后汉建武铜尺、晋泰始十年荀勖律尺（即晋前尺），并与此尺同。故列之弟一种。其后复列自汉至隋十四种尺，并以弟一种尺比较之，故此尺出，而《隋·志》之十五种尺，无一不可再制矣。

王复斋《钟鼎款识》中有晋前尺拓本，余曩已考定为宋高若讷摹制之品（见前《晋前尺跋》）。今原拓已亡，扬州阮氏及汉阳叶氏刊本均与此尺不合，然阮文达跋，谓建初六年尺较此晋尺长二分强（见复斋《款识》册及《积古斋钟鼎彝器款识》十），则其拓本甚近此尺，但微弱耳。考高若讷造《隋·志》十五种尺，本用汉泉（实谓王莽钱布）尺寸，今用莽货布四积为一尺，亦与此尺甚近而微弱，然终不如此尺之得其正也。

二，汉牙尺（拓本。长工部营造尺七寸二分六厘；九英寸又五分之一）。原尺现在西充白氏，分寸用金错。

三，后汉建初铜尺（长工部营造尺七寸三分七厘；九英寸又二十四分之七）。原尺藏曲阜衍圣公府，今未知存亡。世所传拓本摹本及仿制品甚多，长短不同，均未可依据。癸亥年，鄞县马叔平（衡）见一铜尺，汉阳叶东卿（志诰）所仿以赠翁学士（方纲）者，其长如此。又上虞罗氏藏一未装裱旧拓本，长短亦同。（装裱后纸易伸展，恒较原器及原拓为长）原物既不可见，当以此本为最合矣。

四，无款识铜尺（拓本。长营造尺七寸三分五厘；九英寸又八分之七）。乌程蒋氏藏。比建初尺稍长，晋以前物也。

五，唐镂牙尺（拓本。长营造尺九寸四分弱，十一英寸又四十八分之三十九）。乌程蒋氏藏，刻镂精绝。《大唐六典》“中尚署令”注云：每年二月二日进镂牙尺，即此是也。甲士素未闻有唐尺，余据日本奈良正仓院所藏红绿牙尺，定为唐开元以前之物。

六，唐红牙尺（甲）（摹本。长营造尺九寸三分弱，十一英寸又四十八分之三十一）。

七，唐红牙尺（乙）（摹本。长营造尺九寸五分；十一英寸又十二分之十一）。

八，唐绿牙尺（甲）（摹本。长营造尺九寸五分；十一英寸又十二分之十一）。

九，唐绿牙尺（乙）（摹本。长营造尺九寸二分强，十一英寸又四十八分之二十九）。

十，唐白牙尺（甲）（摹本。长营造尺九寸三分，十一英寸又四分之一）。

十一，唐白牙尺（乙）（摹本。长同上）。

右六尺，日本奈良正仓院藏，乃日本孝谦天皇天平胜宝八年（当唐至德二载），其皇太后献于东大寺者。后手书愿文及献物帐真迹，亦藏院中。帐中有红牙拨镂尺二，绿牙拨镂尺二，白牙尺二，今并完好。观其形制，必当时遣唐使所赍去也。此六尺曾影印于《东瀛珠光》第一册中，余从珠光摹出。

十二，无款铜尺（拓本。长营造尺九寸四分强，十一英寸又六分之五）。乌程蒋氏藏，宋以前物。

十三，宋木尺（甲）（拓本。长营造尺一尺零二分，十二英寸又四分之一，）。

十四，宋木尺（乙）（拓本。长同上）。

十五，宋木尺（丙）（拓本。长营造尺九寸七分；十二英寸强）。

藏上虞罗氏。辛酉年夏出于宋钜鹿故城，同时所出磁器，有大观政和纪年款，知此乃宋尺也。

十六，明嘉靖牙尺。（拓本。长营造尺一尺微弱；十二英寸又五分）

武进袁氏藏。侧有款曰大明嘉靖年制。

十七，工部营造尺（长十二英寸又十二分之七）。

右所陈列之尺，合实物拓本、摹本共十七种。自汉迄[迄]近世之尺度，略具于是。案尺之为物，不独为人生日用所必需，其大者如调钟律、测晷景，胥于尺度是赖。故历代制作，不能不求精密，且须参考古制。晋荀勖造泰始律尺（即晋前尺），实据古器七种参校定之；唐李淳风撰《隋书·律历志》，列自周至隋十五种尺，并以晋前尺校之，示其比例，其所据者大半实物也。宋仁宗时，高若讷等议钟律得失，乃用王莽钱币尺寸，依《隋书》定尺十五种，上之。元明学者，罕有讨论。大清康熙间，曲阜孔东堂（尚任）得汉建初尺及宋三司布帛尺，其拓本、摹本多传于世，

后人得资以考订古物。又宋高若讷所造之晋前尺，其拓本尚存于王复斋《钟鼎款识》册中，沈果堂（彫）、程易畴（瑶田）等亦据以考古代礼制。光绪甲午，吴清卿（大澂）撰《权衡度量实验考》，复据古玉、古器、古钱以考历代尺度，然于唐以后之制颇略。近时所见，如刘歆铜斛尺、唐牙尺、宋木尺、明嘉靖尺，皆其氏所未及见也。故尺度一事，比权量之研究，自为简易，然在十年或二十年以前，尚不能为此比较之研究也。

据前比较之结果，则尺度之制，由短而长，殆成定例。然其增率之速，莫剧于东晋、后魏之间，三百年间几增十分之三。今六朝之尺，虽无一存，然据《隋书·律历志》所载，则：魏尺比晋前尺，一尺四分五厘（长营造尺七寸五分强；九英寸又二分之一弱）；晋后尺比晋前尺，一尺六分二厘（长营造尺七寸六分强，九英寸又二十四分之十五），宋氏尺比晋前尺，一尺六分四厘（长营造尺七寸六分五厘，九英寸又二十四分之十五强）。

梁朝俗间尺比晋前尺，一尺七分一厘（长营造尺七寸七分强；九英寸又四分之三）。

后魏前尺比晋前尺，一尺二寸七厘（长营造尺八寸七分弱，十英寸又十二分之十一弱）。

后魏中尺比晋前尺，一尺二寸一分一厘（长营造尺八寸七分强，十一英寸）。

后魏后尺（后周市尺、隋开皇宫尺同）比晋前尺，一尺二寸八分一厘（长营造尺九寸二分弱；十一英寸又四十八分之三十一）。

东魏尺比晋前尺，一尺五寸八豪（长营造尺一尺零八分强，十三英寸又二十四分之十五弱）。此即自汉尺增至唐尺之径路，而自唐迄今，则所增甚微，宋后尤微。求其原因，实由魏晋以降，以絹布为调，而絹布之制，率以二尺二寸为幅，四丈为匹，官吏惧其短耗，又欲多取于民，故尺度代有增益，北朝尤甚。自金元以后，不课絹布，故八百年来，尺度犹仍唐宋之旧。案《隋书·律历志》，谓魏及周齐，贪布帛长度，故用土尺。今征之《魏书·高祖纪》，太和十九年，诏改长尺大斗。又《杨津传》，延昌末，津为华州刺史。先是受调絹匹度尺特长，在事因缘，共相进退，百姓苦之。津乃令依公尺度。案自太和末至延昌，不及二十年，而其弊已如此，又《张普惠传》，神龟中，天下民调，幅度长广；尚书计奏，复征绵麻。普惠上疏曰：絹布匹有丈尺之赢一，犹不计其广；丝绵斤兼百铢之剩，未闻依律罪州郡。若一匹之滥，一斤之恶，则鞭户主连三长。此所谓教民以贪者也。今百官请俸，人乐长阔，并欲厚重，无复准极。得长阔厚重者，便云其州能调絹布，精阔且长，横发美誉，不闻嫌长恶广，求计还官者。此百官之所以仰负圣明也。云云。尺度之由短而长，全由于此。且当时不独增尺法，又增匹法。《魏书·卢同传》，熙平初转尚书

左丞。时相州刺史奚康生，征民岁调皆七八十尺，以要奉公之誉。部内患之，同于岁禄。官给长絹，同乃举案康生度外征调。书奏，诏科康生之罪。《北史·崔暹传》，齐天保调絹以七丈为匹，暹言之，乃依旧焉。合此数事观之，则尺度之骤增于后魏一代者，更不烦解说矣。

孔氏所藏宋三司布帛尺，未见有拓本传世。世所传仿制品，大率当工部营造尺之八寸七分许。其正确与否，所不敢知。要之短于唐尺，与上言尺度由短而长之定例不符。然细考唐宋尺制，则此尺不独不能外此例，且足为此例作一佳证也。何则？唐之尺法，本有二种。《大唐六典》金部郎中条云：凡度以北方柜黍中者，一黍之广为一分，十分为寸，十寸为尺，十二寸为大尺，十尺为丈。又云凡积柜黍为度量权衡者，调钟律、测晷景、合汤药及冠冕之制则用之。内外官司悉用大者。案此制本出后周，而隋唐沿用之。宋仍唐制，亦用二种尺。其量布帛也，或用三司布帛尺，则以四十八尺为匹；或用淮尺，则以四十尺为匹。程大昌《演繁露》云：官尺者，与浙尺同。仅比淮尺十八，公私随事致用。予尝怪之，盖见唐制而知其由来久矣。金部定制，以北方柜黍中者为则，凡横度及百黍即为一尺；此尺既定，而尺加二寸。别名大尺，唐帛以四丈为匹，用大尺准之，盖柜尺四十八尺也。今官帛乃今官尺四十八尺，准以淮尺，正其四丈也。国朝事多本唐，岂今之省尺，即用唐柜尺为定耶？不然，何为官府通用省尺，而增帛特用淮尺也？云云。案程氏所云官尺省尺，即三司布帛尺（赵与时《宾退录》云：省尺者，三司布帛尺也），虽较唐柜尺颇长，而宋人以之当唐柜尺，又以淮尺当唐大尺，其言固不诬也。而今传摹之布帛尺，长于唐柜尺者至今尺一寸许，则宋淮尺之大于唐大尺，又可见矣。故曰：此尺不足破尺度由短而长之定例，且足为此例之一佳证也。

秦都邑考

秦之祖先，起于戎狄，当殷之末，有中湣者，已居西垂，大骆、非子以后，始有世系可纪，事迹亦较有据。其历世所居之地，曰西垂，曰犬邱、曰秦，曰渭汧之会，曰平阳，曰雍，曰泾阳，曰栎阳，曰咸阳，此九地中，惟西垂一地，名义不定。犬邱、泾阳二地，有异实而同名者，后人误甲为乙，遂使一代崛起之地与其经略之迹不能尽知，世亦无正其误者。案：西垂之义，本谓西界。《史记·秦本纪》：“中湣在西戎，保西垂。”又：“申侯谓孝王曰：昔我先郿山之女，为戎胥轩妻，生中湣，以亲故归周，保西垂，西垂以其故和睦。”又云庄公“为西垂大夫”。以语意观之，西垂殆泛指西土，非一地之名。

然《封禅书》言：“秦襄公既侯，居西垂。”《本纪》亦云：“文公元年居西垂宫。”则又似特有西垂一地。《水经·漾水》注以汉陇西郡之西县当之，其地距秦亭不远。使西垂而系地名，则郿说无以易矣。唯犬邱一地，徐广曰：“今槐里也。”案：槐里之名犬邱，班固《汉书·地理志》、宋衷《世本注》均有此说。此乃周地之犬邱，非秦大骆、非子所居之犬邱也。《本纪》云“非子居犬邱”，又云“大骆地犬邱”，夫槐里之犬邱为懿王所都，而大骆与孝王同时，仅更一传，不容为大骆所有。此可疑者一也。又云宣公子庄公以“其先大骆地犬邱为西垂大夫”。若西垂泛指西界，则槐里尚在雍岐之东，不得云西垂。若以西垂为汉之西县，则槐里与西县相距甚远。此可疑者二也。且秦自襄公后始有岐西之地，厥后文公居汧渭之会，宁公居平阳，德公居雍，皆在槐里以西，无缘大骆、庄公之时已居槐里。此可疑者三也。

案：《本纪》又云“庄公居其故西犬邱”，此西犬邱实对东犬邱之槐里言，《史记》之文，本自明白，但其余犬邱字上均略去“西”字。余疑犬邱、西垂本一地，自庄公居犬邱、号西垂大夫，后人因名西犬邱为西垂耳。然则大骆之起，远在陇西，非子邑秦，已稍近中国。庄公复得大骆故地，则又西徙。逮襄公伐戎至岐，文公始逾陇而居汧渭之会，其未逾陇以前，殆与诸戎无异。自徐广以犬邱为槐里，《正义》仍之，遂若秦之初起已在周畿内者，殊失实也。此稿既成，检杨氏守敬《春秋列国图》，图西犬邱于汉陇西郡西县地，其意正与余合。

《史记》于《始皇本纪论赞》后复叙秦世系、都邑、陵墓所在，其言与《秦本纪》相出入；所纪秦先公谥号及在位年数，亦与《本纪》及《国表》不同，盖太史公别记所闻见之异辞，未必后人羈入也。其中云“肃灵公即《秦本纪》之灵公。居泾阳”，为《秦本纪》及《六国表》所未及。泾阳一地，注家无说，余曩作《犹考》，曾据此及泾阳君、高陵君之封，以证《诗·六月》之泾阳非汉安定郡之泾阳县。今更证之，考春秋之季，秦、晋不交兵者垂百年。两国间地在北方者，颇为诸戎蚕食。至秦厉共公十六年，始蜃河旁，以兵二万伐大荔，取其王城，则今之陕西同州府大荔县也。二十一年始县频阳，则今之蒲城、同官二县间地也。至灵公六年，晋城

少梁，秦击之。《六国表》作“七年，与魏战少梁”。十三年城藉姑，皆今之韩城县地。然则厉共公以后，秦方东略，灵公之时，又拓地于东北，与三晋争霸，故自雍东徙泾阳。泾阳者，当在泾水之委，今之泾阳县地。决非汉安定郡之泾阳也。且此时义渠方强，绵诸未灭，安定之泾阳与秦，中隔诸戎，势不得为秦有。即令秦于西北有斗入之地，而东略之世，决无反徙西北之理。厥后灵公子献公徙治栎阳，栎阳在今高陵县境，西距泾水入渭之处不远，则泾阳自当在高陵之西，今泾阳之境矣。余说详《犹考》中，然则有周一代，秦之都邑分三处，与宗周、春秋、战国三期相当，曰西垂，曰犬邱，曰秦，其地皆在陇坻以西，此宗周之世秦之本国也。曰汧渭之会，曰平阳，曰雍，皆在汉右扶风境，此周室东迁、秦得岐西地后之都邑也。曰泾阳，曰栎阳，曰咸阳，皆在泾渭下游，此战国以后秦东略时之都邑也。观其都邑，而其国势从可知矣。

又案：于献公即位前说：“秦以往者数易君，君臣乖乱，故晋复强，夺河西地。”孝公元年，下令国中，亦曰：“会往者厉、躁、简公、出子之不宁，国家内忧，未遑外事，三晋攻夺我先君河西地，诸国卑秦，丑莫大焉。献公即位，镇抚边疆，徙治栎阳，且欲东伐。”云云。似灵公之世，国势颇蹙，又未尝东徙。后虽云“灵公居泾阳”，然于其陵墓，则云“葬悼公西”，悼公葬雍，则灵公亦葬雍。厥后，简公、出子亦葬于雍，是灵公虽居泾阳，未尝定都也。然以其经营东北观之，则其居泾阳之事，殆无可疑。河西之失，亦非尽事实。书简公六年“塹洛城重泉”，而灵公之子献公未立时亦居河西，则河西仍为秦有，不过疆场之事，一彼一此，时有之耳。孝公下令，欲激发国人，故张大其辞，观、所纪灵公时事可知矣。√

秦郡考

自《史记·秦始皇本纪》载始皇二十六年从廷尉李斯议，分天下以为三十六郡，于是言秦郡者分为二说：一以为三十六郡乃秦一代之郡数，而史家追纪之；一以为始皇二十六年之郡数，而后此所置者不与焉。前说始于班固《汉书·地理志》，后说始于裴驷《史记集解》，而成于《晋书·地理志》。《汉志》所纪郡国沿革，其称“秦置”者二十七，河东、太原、上党、东郡、颍川、南阳、南郡、九江、巨鹿，齐郡、琅邪、会稽、汉中、蜀郡、巴郡、陇西、北地、上郡、云中、雁门、代郡、上谷、渔阳、右北平、辽西、辽东、南海。称“秦郡”者一，长沙。称“故秦某郡者”八，三川、泗水、九原、桂林、象郡、邯郸、碭郡、薛郡。中有始皇三十三年所置之南海、桂林、象郡三郡。由余所考定，则九原郡亦三十三年置。裴驷不之数，而易以鄣郡、黔中，并数内史为三十六郡。《晋志》从之，益以后置之闽中、南海、桂林、象郡，由余所考定，则闽中郡实始皇二十五年所置。为四十郡。近者钱氏大昕用班说，姚氏鼐用裴说，二者争而不决久矣。原钱氏之意，以《汉志》秦郡之数适得三十六，与《史记》冥合。又以班氏为后汉人，其言较可依据。余谓充钱氏之说，则以《汉书》证《史记》，不若以《史记》证《史记》。

夫以班氏较裴氏，则班氏古矣。以司马氏较班氏，则司马氏又古矣。细绎《史记》之文，无一与《汉志》相合，始知持班、裴二说者，皆未尝深探其本也。今尽置诸家之说，而于《史记》中求始皇二十六年所置三十六郡之数，则《秦本纪》惠文君十年，魏始纳上郡十五县，秦于是始有上郡。后九年，司马错伐蜀，灭之，秦于是有蜀郡。后十三年，攻楚汉中，取地六百里，置汉中郡。昭襄王二十九年，大良造白起攻楚，取郢为南郡。三十年，蜀守若伐取巫郡及江南为黔中郡。三十五年，初置南阳郡。庄襄王元年，初置三川郡。四年，初置太原郡。《始皇本纪》又谓始皇即位时，秦地已并巴、蜀、汉中，越宛有郢，置南郡；北收上郡以东，有河东、太原、上党郡。则巴郡、河东、上党三郡，亦始皇以前所置也。嗣后，始皇五年，初置东郡。十七年，内史腾攻韩，以其地为郡，名曰颍川。二十五年，王翦定荆江南地，降越君，置会稽郡。此十四郡皆见于本纪者也。其散见于《列传》者，则《穰侯列传》云：“穰侯卒于陶，而因葬焉。秦复收陶为郡。”

案：昭王十六年，封魏冉陶为诸侯，陶在齐、魏之间，蕞尔一县，难以立国。二十二年，蒙武伐齐河东为九县。齐之九县，秦不能越韩、魏而有之，其地当入于陶。三十六年，客卿灶攻齐，取刚寿予穰侯，则陶固有一郡之地矣。《赵策》：“秦下甲攻赵，赵赂以河间十二县。”又云：“甘罗说赵，令割五城，以广河间。”《史记·甘茂传》实用此文。河间共十七城，则亦有一郡之地。《樊哙传》“河间守军于杠里破之”，是秦有河间守矣。汉初疆域，当其故，故彭越王梁实都定陶，辟疆分赵，乃王河间。由前后证之，则始皇时实有此二郡也。《东越列传》云：“闽越王无诸及越东海王摇者，皆越王句践之后也。秦已并天下，皆废为君长，以其地为闽中郡。”而《始皇本纪》系降越君于二十五年，则闽中郡之置亦当在是年。《本

纪》但书降越君、置会稽郡，文有所略也。

《匈奴列传》言秦昭襄王时有陇西、北地、上郡，筑长城以拒胡。赵武灵王置云中、雁门、代郡，燕亦置上谷、渔阳、右北平、辽西、辽东郡以拒胡。是秦之北鄙，于上郡外，固有陇西、北地二郡，及灭燕、赵，又得其缘边八郡。故始皇二十六年前之郡，明见于《史记》者共二十有七。至《项羽》、《高祖》二纪中之碭郡，《高祖纪》之泗川郡，《纪》有泗川监平，泗川守壮、守监，皆郡官。《陈涉世家》中之陈郡、东海郡，皆见于始皇二十六年之后，然不得谓二十六年未有此郡。故秦郡之见于《史记》者共三十有一。今姑不论，而于《汉书·地理志》求之，则邯郸、巨鹿二郡当为十九年灭赵后所置，碭郡当为二十二年灭魏后所置，长沙、九江、泗水、薛郡当为二十三年灭楚后所置，齐郡、琅邪当为二十六年春灭齐后所置。《汉志》之秦郡中，除与《史记》复出外，求其真为二十六年前所有之郡，又得九郡，以益《史记》之二十七郡，共为三十六郡。比之《汉志》之三十六郡，则有陶郡、河间、闽中、黔中，而无九原、南海、桂林、象郡。《史记》于始皇二十六年大书“分天下为三十六郡”，即谓是也。

自是以后，则三十三年略取陆梁地为桂林、象郡、南海。又前年，使蒙恬发兵三十万人北击胡，略取河南地。是年，又西北斥逐匈奴，自榆中并河以东属之阴山，以为三十四县。《匈奴列传》作四十四县。此三十四县者，优足以置一大郡。以地理准之，实即九原郡之地。三十五年除道，道九原，抵云阳，自是九原之名始见于史。故三十二年始皇之碣石，归巡北边，自上郡入。至三十七年，始皇崩于沙邱，其丧乃从井陘抵九原，从直道至咸阳，明始皇三十二年以前未有九原郡也。至二世时，则有陈守、东海守见于《陈涉世家》，则秦之末年又置陈与东海二郡，故二十六年以后，于《史记》中又得六郡，并前为四十二郡，此秦一代之郡数也。

然则秦郡遂尽于此乎？曰：据史文言之，似不能有他说矣。然以当时之建置言之，则余未敢信也。今以秦四十二郡还之六国，则除六郡为秦故地，汉中、蜀郡、巴郡、陇西、北地、上郡。六郡取之胡越会稽、闽中、南海、桂林、象郡、九原。外，楚得其八，南郡、九江、泗水、东海、长沙、薛郡、黔中、陈郡。赵亦如之，太原、上党、巨鹿、云中、雁门、代郡、邯郸、河间。燕得其五，上谷、渔阳、右北平、辽西、辽东。韩、魏共得其七，河东、三川、东郡、颍川、南阳、定陶、碭郡。齐得其二。齐郡、琅邪。夫齐地之大，虽不若楚、赵，以视韩、魏，固将倍之。且负海饶富，非楚、赵边地之比也。今举全齐之地，仅置二郡，其不可解一也。燕之五郡，皆缘边郡而无腹郡，自蓟以南，古称天府之地，今虚不置郡。其不可解二也。余以为三十六郡之分，在始皇二十六年，齐国之灭，近在是年之春，距燕之亡亦不过一岁，二国新定，未遑建置，故于燕仅因其旧置之缘边五郡，于齐略分为齐与琅邪二郡，其于区画固未暇也。讫于疆理既定，则齐尚得五郡，燕尚得一郡，何以征之？曰：《汉书·高帝纪》曰：“以胶东、胶西、临淄、济北、博阳、城阳郡七十三城，立子肥为齐王。”博阳者，济南也。《史记·项羽本纪》以田安为济北王

，都博阳。《田儋列传》亦云：“田横走博阳。”《汉书》作“田横走博”，苏林以为即泰山博县。案：《汉书·王子侯表》，齐孝王子博阳顷侯，就下曰在济南，则汉初博阳当在济南，而田安之王济北，实兼济南北之地也。此汉初之郡，当因秦故。而临淄一郡，实齐郡之本名，加以琅邪，共得七郡，为田齐故地，如此则秦之疆理列国，庶得其平。故《史记·项羽本纪》云：“徙齐王田市为胶东王，立田安为济北王。”

《曹相国世家》云：“还定济北郡。”《田儋列传》云：“田荣反，击项羽于城阳。”此胶东、济北、城阳者，皆非县名，胶东治即墨，城阳治莒。则非郡奚属矣。故曰齐于临淄、琅邪外，尚有五郡也。秦于六国故都，多为郡治，临淄、邯郸，即以齐、赵之都名其郡者也。余如韩都阳翟，则秦颍川郡所治；楚都寿春，则秦九江郡所治；唯三川郡则不治魏都之大梁，而治周都之洛阳。燕则据《汉志》所载，仅得缘边五郡，而自蓟以南膏腴之地，以《汉志》郡国当之，当得广阳国之四县、涿郡之八县与渤海郡若干县，此燕宗庙社稷所在，八百余年藉以立国者也。其在秦时，不宜虚不置郡。《水经·水》注言：“始皇二十一年灭燕，以为广阳郡。高帝以封卢绾为燕王，更曰燕国。”

全氏祖望《地理志稽疑》力主是说。由今日观之，此郡之果名广阳与否，虽不可知，然其置郡之说，殊不可易，故曰燕尚有一郡也。此六郡者，于史虽无明征，然以建置言之，乃所当有，且其分置，或前乎南海六郡矣。由此言之，则秦郡当得四十有八。秦以水德王，故数以六为纪。二十六年，始分天下为三十六郡。三十六者，六之自乘数也。次当增置燕、齐六郡为四十二郡。四十二者，六之七倍也。至三十三年，南置南海、桂林、象郡，北置九原，其于六数不足者二，则又于内地分置陈、东海二郡，共为四十八郡。四十八者，六之八倍也。秦制然也。如谓不然，则请引贾生之言以证之，曰：“秦兼并天下，山东三十余郡。”秦、汉之间，自关以东谓之山东。今四十八郡，除六郡为关中地，六郡得之胡越外，其余六国故地，适得三十六郡，故云“山东三十余郡”。若秦郡之数不至四十八，则山东安得有三十余郡乎？故三十六郡者，始皇二十六年之郡数，又六国故地之郡数。此语习于人口久矣，而班固遽以是为秦一代之郡，不已疏乎！后人眩于《汉志》之说，而于贾傅之所论，史迁之所纪，瞢若无睹，或反据《汉志》以订正《史记》及《汉书》纪传，此余所以不能无辨也。√

汉郡考

班孟坚志汉地理毕而总结之曰：“本秦京师为内史，分天下作三十六郡。汉兴，以其郡太大，稍复开置，又立诸侯王国。武帝开广三边，故自高祖增二十六，文景各六，武帝二十八，昭帝一，讫于孝平，凡郡国一百三。”《志》中各郡下，又分往其沿革。其称高帝置者二十：曰河内、曰汝南、曰江夏、曰魏郡、曰常山、曰清河、曰涿郡、曰渤海、曰平原、曰千乘、曰泰山、曰东莱、曰东海、曰豫章、曰桂阳、曰武陵、曰广汉、曰定襄、曰楚国、曰淮阳国。

其称高帝时为某郡者三：京兆尹，曰高帝二年为渭南郡；左冯翊，曰高帝二年为河上郡；右扶风，曰高帝二年为中地郡。称高帝郡国者二：中山国，曰高帝郡；广阳国，曰高帝燕国。称故郡者一：丹阳郡，曰故鄣郡。计为郡二十三，为国三，合于《后序》增二十六之数，而后之祖述其说者，亦小有异同。

《续汉书·郡国志》举倍都而无武陵，《晋书·地理志》举梁国而无鄣郡，钱氏大昕举内史、胶东、衡山而无渭南、河上、中地三郡，皆求以足汉志二十六之数。其是非暂置无论，要皆以班氏之说为信而不可易也。岂独此数家而已？自来读《汉书》，殆无不以班氏之说为信而不可易也。自余考之，则上所举二十六郡国，其真为高帝置者，曾不及三分之一，而世人莫之察焉，是可异也。

诸郡中可确证为高帝置者，唯河内郡，见于《史记·汉兴以来诸侯王年表序》，清河、常山二郡，见于《樊哙传》；豫章郡，见于《黥布传》；余如汝南、魏郡、中山已不足征，至江夏、涿郡、渤海、平原、千乘、泰山、东莱、桂阳、武陵、定襄十郡，尤可证其非高帝所置。江夏属县，半为衡山故郡，吴芮之王衡山，实都邾县。及芮徙长沙，而衡山为淮南别郡，英布、刘长迭有其地。至文帝分王淮南三子，而衡山复为一国。

武帝初，伍被为淮南王画策云“南收衡山以击庐江，有寻阳之船，守下雒之城，结九江之浦，绝豫章之口。”寻阳为庐江属县，则下雒此时亦当属衡山。此四语者，实分指庐江、衡山、九江、豫章四郡，皆厉王时故地也。又云“强弩临江而守，以禁南郡之下，则淮南所虑，仅汉南郡之兵。”不言江夏。武帝之初，似尚无江夏郡。

逮元狩元年，衡山国除，次年于其地置六安国，仅得衡山五县江夏十四县、当以衡山余县及南郡之边数县置之；则高帝时不得有江夏郡也。前《秦郡考》言秦于燕之故都当置一郡，其地有《汉志》广阳国四县及涿郡、渤海二郡之半，汉初置燕国，当仍其旧。而涿郡之地，介居《汉志》之广阳、河间二国间，中叶以后，广阳、河间各得四县，故中间得有涿郡之二十九县。

若高帝时，燕之内史与赵之河间郡，决非迫隘如此，则已无置郡之余地。故《史记·酈商传》，商破燕王藏荼军，食邑涿五千户，号曰涿侯。至高帝十二年，以破英布功，改封曲周。若当时已置涿郡，决无以郡治为侯国之理。是岁卢绾称乱，子建受封，燕地未平，而高皇晏驾，其于疆域，当无变革。

是高帝时不得有涿郡、渤海二郡也。平原、千乘二郡；汉初为齐悼惠王封域，而平原实齐济北郡之地，景武以后，济北国境反居济水之南，其在汉初，实跨济水南北。《史记·曹相国世家》云，还定济北郡，攻著、漯阴、平原、鬲、卢。

著于《汉志》为济南县，卢为泰山县（文帝后济北王所都），漯阴、平原、鬲皆平原属县，故徐广云，济北分平原、太山二郡。高帝时，齐既有济北郡，则不得有平原郡也。《史记·诸侯王表》，文帝十五年，分齐为胶西国，都苑。

徐广曰，乐安有苑县。按《汉志》齐地无苑县，据《水经·瓠子河注》所引，则作高苑。高苑，千乘县也。案《史记·功臣侯表》有高苑侯丙倩，高祖六年封，武帝建元三年国除。胶西之都，似不应与侯国同处。

然《水经注》实有东西二高苑，其所谓东高苑城者，胶西之都也；所谓西高苑城者，丙倩之邑也。东高苑城以今地望准之，当在东安高苑之间，是汉初千乘之地属于胶西，不得有千乘郡也。《封禅书》云，济北以为天子且封禅，乃上书献泰山及其旁邑。

天子以他县偿之。则泰山郡之置在武帝时，非高帝所置也。东莱一郡，处胶东、胶西之北，《汉志》胶东国仅得八县，高密国（本胶西国）仅得五县，故其北得置十七县之东莱郡。汉初胶西，实有千乘之地，《史记·吴王濞传》，言胶西王邴以卖爵事有奸，削其六县。

《汉书·胶西于王端传》，亦言有司比再请削，其国去太半。则高密五县，当因胶西既削之余，胶东八县，恐亦非汉初旧城。东莱一郡，当置于二国削地后，非高帝所置也。故《汉书·高帝纪》云，以胶东、胶西、临淄、济北、博阳城阳郡，立子肥为齐王。《史记·齐悼惠王世家》数文帝时齐国别郡，但举济北、济南、留川、胶西、胶东、城阳，而无平原、千乘、泰山、东莱四郡，则高帝时无此四郡也。

武陵桂阳二郡之地，高帝时为长沙国南境，故文帝赐赵佗书曰“前日闻王发兵于边，为寇灾不止。当其时，长沙苦之，南郡尤甚。”又曰“朕欲定犬牙相入者，以间吏，吏曰，此高皇帝所以介长沙土也。朕不得擅变焉”。则长沙与南越之间，汉不得置郡；且长沙在文帝时不过二万五千户；势不能分置三郡。则武陵、桂阳二郡，非高帝所置也。

定襄一郡，若为高帝所置，则其时当属代国。案高帝封兄仲于代，王云中、代、雁门三郡；后封子于恒，王太原、代、雁门三郡，皆无定襄。《史记》举汉郡，亦但计云中以西，而定襄则在其东。则定襄非高帝郡也。此外，如东海本秦郯郡，淮阳本秦陈郡，燕之国都亦秦之一郡，而史失其名。则高帝所置之郡，其余几何？

又《汉志》所举秦郡，当高帝时，南海、桂林、象郡入于南越，闽中入于闽越，九原入于匈奴，（《汉志》五原郡注，秦九原郡，武帝元朔二年更名，若汉初尚有是郡者。然《武帝纪》云，元朔二年收河南地，置朔方、五原郡，则此郡实武帝所开。又《史记·匈奴传》，蒙恬所夺地，与汉关故河南塞至朝那卢施，事在楚汉之际。则九原之没久矣）黔中一郡，亦废于楚汉之际，则高帝时之郡数，又得几何？

即令《汉志》二十余郡悉为高帝所置，则汝南当属淮阳，常山、清河、中山属赵，涿郡、渤海属燕，平原、千乘、泰山、东莱、属齐，东海属楚，豫章属淮南，鄣郡属吴，桂阳、武陵属长沙，定襄属代，其得为汉郡者，不过江夏、魏郡、广汉三郡，而此三郡亦无所征。故谓此二十余郡为高帝所置，其误犹小，若直以孝平时之疆域为汉初之疆域，而谓此二十余郡者悉为天子所有，则全不合当时事实也。

然但据《汉志》以为说，则此误必不能免，（钱氏大昕谓高帝置郡二十六，其十之八皆属于王国，此说极是。他人未有明言之者）此则不可以不辨也。善夫太史公之言，曰“汉初内陆自山以东，尽诸侯地。汉独有三河、东郡、颍川、南阳，自江陵以西至蜀北，自云中至陇西，与内史凡十五郡。”

此十五郡者，河东一，河内二，河南三，所谓三河也；东郡四，颍川五，南阳六；自江陵以西至蜀，则南郡七，巴郡八，蜀郡九；北自云中至陇西，则云中十，上郡十一，北地十二，陇西十三，而自山以西，尚有上党；巴蜀之北，尚有汉中；共十五郡。加内史为十六。此高帝五年初定天下时之郡数也。六年，以云中属代，则并内史得十五郡；至十一年，复置云中，而罢东郡以益梁，罢颍川郡以益淮阳，则并内史为十四郡。

史公习闻十五郡之名，又习闻东郡、颍川之为汉郡，故既称与内史为十五，又并数东郡、颍川，虽云疏漏，然视班氏之误，则有间矣。由是言之，则高帝末年之郡，除王国支郡外，并无内史，唯得十四面已；至于文景之间，亦仅有二十四郡。

故枚乘说吴王曰“夫汉并二十四郡，十七诸侯，其珍怪不如山东之府”。乘之说吴，在景帝三年吴王举兵后，而十七诸侯则为文景间之事。（《史记·诸侯王表》唯文帝后七年及景帝元年共十七国）夫十七诸侯，既数文景间之诸侯，知二十四郡，亦数文景间之郡也。乘于景帝三年说吴，何以不数三年之郡，而犹数元年以前之郡？

曰：犹吾辈今日之言十八行省，二十二行省也。枚乘此书，刘奉世以其言齐赵事与史不合，疑为传者增之。然虽有增饰，而十七诸侯、二十四郡之数，不能凿空为之也。此二十四郡者，除高帝时十四郡外，则左内史一、右内史二《汉志》以分左右内史为武帝建元六年事，然《百官公卿表》纪景帝元年以晁错为左内史，则景帝初已分内史为三。

又《景帝纪》中六年诏曰“三辅举不如法令者”，诏文称三辅，不容有误，必《汉志》之误也）东郡三、《汉书·贾谊传》请割淮阳北边二三列城与东郡，以益梁，则孝文之时梁不得东郡）颍川四、淮阳五（淮阳王武于文帝十一年徙梁为郡），琅琊六（琅琊本齐别郡，文帝元年废琅琊国，以与齐）。

十五年，齐文王薨，分其地为齐、济南、济北、菑川、胶西、胶东六国，并城阳为七国。而琅琊不以封，其为汉郡，当在此时矣），河间六（河间哀王以文帝十五年薨，国除为郡），益上十四郡，为二十一郡；其余三郡，则当为汝南、魏郡、广汉。此文帝末年郡数也。而汉郡之增，实在孝景之世。元年削赵之常山郡，二年削楚之东海郡，三年削吴之会稽郡。

是岁七国反。既平其地，又以其余威削诸侯，于是始得平原、千乘、济南、北海、东莱之地于齐，得涿郡、渤海、上谷、渔阳、右北平、辽西、辽东之地于燕，得钜鹿、清河于赵，得太原、雁门于代，得沛郡于楚（沛郡本秦泗水郡，至项羽都彭城后，徙治彭城，遂名彭城郡。汉初为元王所都。景帝四年，封刘礼为楚王，续元王，后殆不尽与以彭城故地，沛郡之置当在此时。观高帝十二年春，吴王濞尚为沛侯，可知此时尚无尚沛郡。是岁复丰、沛二县，为天子汤沐邑，其他县城属楚国）。

《水经·获水注》谓楚元王冢在萧县之同孝山，足证沛郡诸县多属楚国，或分属梁之碭郡。《史记》谓内陆自山以东尽诸侯地，则汉初固不得有沛郡也），得庐江、豫章于淮南，得武陵、桂阳于长沙，而诸侯地之以新封，皇子者尚不与焉。故《史记·诸侯王年表序》言之曰“吴楚时前后诸侯以谪削地，是以燕代无北边郡，吴淮南长沙无南边郡。齐赵梁楚支郡，名山陂海，咸纳于汉。诸侯稍微”。此实善道当时之大势者也。

至《汉志》所谓高帝增二十六郡国，文景各六者，参以《史》、《汉》纪传，无一相合，而自来未有理而董之者，此则余所大惑不解也。

汉兴，矫秦郡县之失，大启诸国。时去六国之亡未远，大抵因其故坏，专制千里，建国之大，古今所未有也。当汉初定天下，异姓诸王，各据其手定之地，韩信王楚，彭越王梁，张敖王赵，韩王信王韩，卢绾王燕，英布王淮南，吴芮王长沙。

此诸王者，皆与高祖素等夷，又无骨肉之亲，外托君臣之名，而内有敌国之实。是

时高帝之策，在建姓以制异姓，故六年废楚王信，则分其地以王刘贾于荆，弟刘交于楚；又时齐代无王，则王子肥于齐，王兄仲于代；而徙韩王信于太原，收潁川郡以通东方之道。明年，韩王信叛，而代王亦弃其国，则以代王爱子如意。

九年，废赵王张敖，则徙代王于赵，而益以代地，使陈豨以赵相国守之。明年，陈豨反，则王子恒于代；彭越反，则王子恢于梁、子友于淮阳；英布反，则王子长于淮南、兄子濞于吴。又明年，卢绾反，则王子建于燕。当始封子弟时，惟恐其地之不广，力不能有所禁御也。

及异姓渐尽，又虑诸子分地之不均也，故新置之国，率因其故。洎吴濞受封，始虑东南之乱，未及半载，而高祖遽崩。吕后以嫡母之尊，废梁赵，割齐楚，以王张吕，宫车朝驾，而临淄之兵夕起矣。文帝之世，亦第稍分齐、赵以众建其子弟，惟梁代无王，则王子参于代、子武于梁，以控制东诸侯。其所用亦高帝遗策。所异者，高以同姓制异姓，文以亲制疏而已。

孝景嗣位，始大削吴、楚、赵，而七国之乱随之。既平七国，因之余威宰制诸侯，其分王诸子，亦不过一郡之地。昭宣以降，王国益微。及孝平元始中，诸侯大者十余城，小者三四县，比汉初王国，或不能得其十分之一。变置既亟，作史者但据后世版籍，略纪沿革而已。

故但据《汉志》之文以求汉初诸侯之疆域，则其大小广狭，不能与实际同日而语。今考汉初诸国之地，则大者七八郡，小者二三郡；而后世所置之郡，尚不计焉。举其目，则属齐者八，曰临淄、曰菑川、曰济南、曰济北、曰胶西、曰胶东、曰琅邪、曰城（《汉书·高帝纪》，以胶东、胶西、临淄、济北、博阳、城阳郡七十三城立子肥为齐王。

《史记·齐悼惠王世家》文帝十六年，齐孝王将闾以悼惠王子扬虚侯为齐王，故齐别郡尽以王悼惠王子，子志为济北王、子辟光为济南王、子贤为菑川王、子邛为胶西王、子雄渠为胶东王，与城阳齐凡七王，皆不数琅琊。然《悼惠王世家》云，哀八年，高后割齐琅邪郡立营陵侯刘泽为琅邪王，又云，孝文帝元年尽以高后时所割齐之城阳、琅琊、济南郡复与齐，则汉初齐固得琅邪郡。

至文帝十五年，齐文王薨，无后。其明年，文帝分齐为六，尽王悼惠王诸子，独琅邪不以封，殆于此时入汉也）属；燕者六，曰□□，曰上谷、曰渔阳、曰右北平、曰辽西、曰辽东（案：燕国都所治之郡，史失其名，武帝元朔元年，燕王定国自杀，国除为郡，则名燕都[郡？]）。

《汉书·徐乐传》称乐燕郡无终人是也。无终，《汉志》属右北平，此时当属燕郡。若以右北平为燕别都，故曰燕郡，则景帝时右北平已属汉矣。至上谷五郡，属燕

，史虽无明文，然司马迁称诸侯地皆外接于胡越，景帝后燕代无北边郡，吴淮南长沙无南边郡，则景帝以前燕代诸国各有边郡矣，下代吴诸国仿此）；属赵者六，曰邯鄲、曰钜鹿、曰常山、曰清河、曰河间、曰中山，中间益郡三，曰代、曰雁门、曰云中（赵国诸郡史无明文，以史迁云内陆自山以东尽诸侯地知之）；

属代者三，曰太原、曰代、曰雁门（《汉书·高帝纪》六年，以云中、雁门、代郡五十三县立兄宜信侯喜为代王。十一年，诏曰，代地居常山之北，与夷狄邻。赵乃从山南有之，远，数有胡寇，难以为国。颇取山南太原之地益属代。代之云中，以西为云中郡，则代受边寇益少矣。是文帝王代时已以太原易云中也）；属梁者二，曰碭郡、曰定陶，中间益郡一，曰东郡；属淮阳者，曰陈郡、曰汝南，中间益郡一，曰颍川《高帝纪》十一年立子恢为梁王，子友为淮阳王，罢东郡颇益梁，罢颍郡川，颇益淮阳）；

属楚者三，曰彭城、曰东海、曰薛郡（《汉书·高帝纪》以碭郡、薛郡、郯郡三十六县立弟文信君交为楚王，郯郡即东海，碭郡乃彭城之误。楚元王云薛郡、东海、彭城三十六县是也）属吴者三，曰广陵、曰会稽、曰鄣郡《高帝纪》以东阳、鄣郡、吴郡三十三县立刘贾为荆王。及英布反，并荆地，吴王濞之封实因故荆国境。东阳与广陵实为一郡，初治东阳，故名东阳。及濞乃都广陵。

《本传》云“吴王起兵于广陵”是也。后广陵围转小，汉乃于其北置临淮郡耳）；属淮南者四，曰九江、曰庐江、曰衡山、曰豫章《史记·黥布传》，布遂剖符为淮南王，都六，九江、庐江、衡山、豫章皆属布，后厉王淮南，亦仍其封域）；属长沙者一，曰长沙。故高帝时诸侯之郡凡三十有九，而诸郡之广狭，又当与《汉志》绝异。《汉志》，齐郡（即临淄）十二县，菑川三县，高密（即胶西）五县，胶东八县，城阳、广阳（即燕□□郡）、赵国（即邯鄲）、河间各四县，梁国（即阳郡）八县、淮阳（即陈郡）九县，楚国（即彭城）七县，鲁国（即薛郡）六县，广陵四县，六安（即衡山）五县，皆非汉初郡域。

以理度之，则《汉志》北海之二十六县，实得临淄、菑川之县，平原县十九，千乘县十五，济南县十四；泰山县二十四，实分齐之济南济北、楚之薛郡之县；东莱县十七，实得胶东胶西之县；琅邪县五十一，实得城阳之县，涿郡二十九；渤海县二十六，实得广阳河间之县，广平县十六，实得邯鄲之县，沛郡、汝南县各三十七，一得阳郡、彭城之县，一得陈郡之县；临淮县二十九，实得彭城、广陵之县，江夏县十二，实得衡山之县。

故汉初齐地，当得《汉志》之平原、千乘、济南、泰山、齐郡、北海、东莱、琅琊八郡及菑川、胶东、高密、城阳四国；燕地当得涿郡、渤海、上谷、渔阳、有北平、辽西、辽东七郡及广阳一国；赵地当得钜鹿、常山、清河三郡与魏郡之半及赵、广平、真定、中山、信都、河间六国；梁地当得山阳、济阴二郡与沛郡之半及梁东

平二国；淮阳当得汝南一郡与淮阳国；楚当得东海一郡与沛郡临淮之半及鲁、楚二国；吴当得会稽、丹阳二郡与临淮之半及广陵国；淮南当得庐江、九江、豫章三郡与江夏之半及六安国；长沙当得桂阳、武陵、零陵三郡及长沙国。

此三十二郡与一十七国者，以元始中之郡国言之也。而班《志》于诸郡国下，其言故厶国，或厶年为厶国者，仅十三郡国，而不言故厶国者三十有六，使后之读史者，疑若自高帝时即为汉郡者，此所以不能不表而出之也。√

浙江考

浙江之名，始见于《山海经》、《史记》、《汉书》、《越绝书》、《吴越春秋》诸书，而《汉书·地理志》及《水经》皆有“渐江水”，无“浙江水”。《说文解字》于“江沱”二字下出“浙”字，曰“江水至会稽山阴入海为浙江”，其后又出“渐”字曰“渐水出丹阳黟南蛮中东入海”。乾、嘉以来言水地者，率祖《说文》之说，分浙、渐为二水，以今之钱唐江当渐水，以《汉志》之分江水或南江当浙水，是惑于班、许、《水经》之言，而不悟先秦、西汉之所谓浙江，固指今之钱唐江也。《海内东经》之说出汉人手，姑置勿论，试以《史记》定之。《史记》“浙江”凡六见，《秦始皇本纪》：“过丹阳至钱唐，临浙江，水波恶，乃西百二十里从狭中渡。”

《项羽本纪》：“秦始皇帝游会稽，渡浙江。”若谓此浙江即分江水，则自丹阳至钱唐当先渡浙江，不得云“至钱唐，临浙江”也。若以浙江为《汉志》之南江，则自钱唐至山阴，不须渡浙江，又钱唐之西百二十里不得复有浙江也。则《本纪》之浙江，正谓钱唐江也。其言水波恶，亦惟钱唐江为然。又《高祖功臣侯表》“堂邑侯陈婴”下云：“定豫章、浙江，都折。”

《汉书·侯表》作都渐。“费侯陈贺”下云：“定会稽、浙江、湖阳。”《汉表》作湖陵。盖汉之定江南也，陈婴之兵自豫章至浙江之上游，定太末、黟、歙诸县；陈贺之兵自会稽时会稽郡治吴。至浙江之下游，定钱唐、余暨、山阴诸县。陈婴所都之地，《史记》作“折”，《汉书》作“渐”，盖即《汉志》、《说文》、《水经》所谓蛮夷中地，非以水名地。即以地名水，尤“浙”、“渐”为一之明证矣。湖阳，《汉表》作湖陵，即《越绝书》及《吴志·孙静传》之固陵。即今西兴。固陵之为湖陵，犹“姑孰”之为“湖孰”矣。《越绝书》言：“浙江西路固陵城者，范蠡敦兵城也。”其陵固可守，谓之固陵。汉初为楚守者，盖亦据此城以拒汉。故陈贺定浙江后，即至湖陵，则《侯表》中之浙江，亦谓今之钱唐江也。《越王句践世家》：“楚尽取故吴地，至浙江北。”

《货殖传》“浙江南则越”，即《论衡》所谓“余暨以南属越，钱唐以北属吴”，钱唐之江，两国界也。是实战国以后楚、越之界与春秋吴、越之界未必相合，而以山川大势分之，最为易晓，故移以言吴越之界。是《世家》、《列传》中之浙江，亦谓今之钱唐江也。史迁亲上会稽，吴、越诸水，皆所经历，所记不容有误。且始皇经行，皆有记注，彻侯功伐，亦书故府，其言当有所本。是秦、汉之间，已以今钱唐江为浙江，不自《史记》始。厥后袁康、赵晔、王充、朱育、韦昭等，凡南人所云浙江，无不与《史记》合。许叔重之说，自不能无误，乾、嘉诸儒过信其说，不复质之古书，是末师而非往古，重传说而轻目验，吾不能从之矣。√

鬼方昆夷獫狁考☆

我国古时有一强梁之外族，其族西自汧、陇，环中国而北，东及太行、常山间，中间或分或合，时入侵暴中国。其俗尚武力，而文化之度不及诸夏远甚，又本无文字，或虽有而不与中国同。是以中国之称之也，随世异名，因地殊号，至于后世，或且以丑名加之。其见于商、周问者，曰鬼方，曰混夷，曰獫狁；其在宗周之季，则曰獫狁，入春秋后，则始谓之戎，继号曰狄；战国以降，又称之曰胡、曰匈奴。综上所述诸称观之，则曰戎、曰狄者，皆中国人所加之名；曰鬼方、曰混夷、曰獫狁、曰胡、曰匈奴者，乃其本名。而鬼方之“方”、混夷之“夷”，亦为中国所附加。当中国呼之为戎、狄之时，彼之自称决非如此，其居边裔者，尤当仍其故号。故战国时，中国戎、狄既尽，强国辟土，与边裔接，乃复以其本名呼之。此族春秋以降之事载籍稍具，而远古之事则颇茫然，学者但知其名而已。今由古器物与古文字之助，始得言其崖略，倘亦史学家之所乐闻欤？

此族见于最古之书者，实为鬼方。《易·既济》“辞曰：‘高宗伐鬼方，三年克之。’”《未济》爻辞曰：“震，用伐鬼方，三年有赏于大国。”《诗·大雅·荡》之篇曰：“内皇于中国，覃及鬼方。”《易》之爻辞，盖作于商周之际，《大雅·荡》之篇，作于周厉王之世，而托为文王斥殷纣之言，盖亦谓殷时已有此族矣。后人于《易》见鬼方之克需以三年，知其为强国；于《诗》见鬼方与中国对举，知其为远方，然皆不能质言其地。有以为在北者，干宝《易注》云：鬼方，北方国也。，李鼎祚《周易集解》引）有以为在西者，宋衷《世本注》云：鬼方，于汉则先零羌是也。，《文选》扬雄《赵充国颂》注引）有以为在南者，伪《竹书纪年》：“武丁三十二年，伐鬼方，次于荆”，则以鬼方为荆以南之国。黄氏《日钞》且以为鬼方即荆楚矣。其余异说纷纭，不知所极。年代辽远，书阙无征，固自不足怪也。唯《竹书纪年》称“王季伐西落鬼戎，此条见《后汉书·西羌传》及章怀太子注，乃真《纪年》之文），可知其地尚在岐周之西。

今征之古器物，则宣城李氏所藏小孟鼎（今佚）。与潍县陈氏所藏梁伯戈，皆有“鬼方”字。案大、小两孟鼎皆出陕西凤翔府郿县礼村沟岸间，其地西北接岐山县境，当为孟之封地。大孟鼎纪王遣孟就国之事，在成王二十三祀（吴氏大澂《孟鼎跋》以此鼎为成王时作。案铭中尚述殷人酗酒事以戒孟，与《酒诰》辞意略同，吴说是也）。小孟鼎纪孟伐鬼方献俘受锡之事，在成王二十五祀。则伐鬼方事在孟就国之后，鬼方之地自当与孟之封地相近。而岐山郿县以东即是丰镐，其南又限以终南、太一，唯其西汧、渭之间乃西戎出入之道。又西逾陇坻，则为戎地，张衡所谓“陇坻之险，隔阂华戎”者也。由是观之，鬼方地在汧、陇之间，或更在其西，盖无疑义。虽游牧之族非有定居，然殷周间之鬼方，其一部落必在此地无疑也。然其全境，犹当环周之西北二垂而控其东北。梁伯戈虽仅有“魃方錫”及“梁伯作”数字可辨，然自为梁伯伐鬼方时所铸。而梁伯之国，杜预谓在冯翊夏阳县。《史记·秦本纪》：惠文王十年，更名少梁为夏阳。”《汉志》亦云：夏阳，故少梁。”其地在

至其种族之大小、强弱如何，《易》称“高宗伐鬼方，三年克之”，《纪年》称“王季伐西落鬼戎，俘其二十翟王”。观此二事，鬼方之非小部落可知。而小孟鼎所纪献俘之数尤为详悉，虽字多残阙！犹得窥大略（此鼎唯有吴氏式芬释文，尚多疏略，今取其献俘一节更释之）。其文曰：“王□孟以□□伐或方□□□□□□二人□戒□□□□或孚人万幸八十一人孚□□□匹□车□两孚牛□百□□□牛羊廿八羊。”又曰：“执兽一人□□百批七或□□□□□孚□□刍匹孚车两”云云。铭中“鬼方”下第三字仅存下半口字，以下文“执兽一人”在“或”前例之，当为“兽”字之泐。兽者，疑“首”之假借字。下文第九、第十两行间，尚有“折兽”二字，殆即《易》所云“有嘉折首”，他器所云“折首执讯”矣。或即馘字，虢季子白盘：“桓桓子白，献馘于王。”其字从戈、从爪，诸家或释俘、或释馘。今此字从或、从爪，其为馘字无疑。兽者折首，馘者截耳也。孚即俘之本字，幸则“三千”二字合文。兽与馘之数虽磨灭不可知，然俘人之数至万三千有余，则兽馘之数亦可知矣。此事在宗周之初，自为大捷，而《书》阙不纪。又当成王全盛之时，而鬼方之众尚如此，则其强大亦可知。梁伯戈时代虽无可考，观其文字，当在孟鼎之后。可知宗周之世。尚有鬼方之名，不独殷周间为然。此鬼方事实之略可考者也。

鬼方之名，《易》、《诗》作“鬼”，然古金文作“或”，或作“魃”。孟鼎曰：“王□孟以□□伐或方。”吴氏摹本“或”字半泐作“咸”，然第八行有“咸”字，鬼字之首，又稍磨泐。含观二字用笔位置，知确是“或”字也。其字从鬼、从戈。又梁伯戈云“魃方纘¹即蚩字），其字从鬼、从支。二字不同，然皆为古文“畏”字。案大孟鼎“畏天畏”，二“畏”字上作课，下作卜/。毛公鼎愍天疾畏，敬念王畏。”二“畏”字皆作成，皆从鬼、从卜者。尚盘“畏”字作重，则从由（《说文》：“由，鬼头也。”）、从支。卜与支同音，又支字之所从，当为支之省字。而或从卜在“鬼”字之右，或从支在“鬼”字之左，或从支在鬼头之下，此古文变化之通例，不碍其为一字也。从戈之或，亦即魃字。凡从支、从戈，皆有“击”意，故古文往往相通。如“薄伐玁狁”之“薄”，今《毛诗》作“薄”，薄者，迫也。而虢季子白盘之“搏伐”从干，不媒敦之“羣戰”从戈，师寰敦之“專卜乃众”则又从卜。《书》之“外薄四海”，其义亦为迫，而《释文》引一本作“敷诗·常武”之“铺敦淮渍”，《释文》引《韩诗》，“铺”作“敷”，《后汉书·冯緄传》亦引作“敷敦”。案“敷敦”即“戰蒙”，则字亦从支。可知从卜、从支、从戈，皆可相通，则“咸”字亦“畏”字也。其中课、或二字见于周初之器，为字尤古。其后，从卜之字变而作“咸”，从戈之字变而作“威”。古威字从戈、从女，邾公华、邾公径二钟皆然。虢叔钟作、虎亦戈形之变；而鬼、女二字皆象人跪形，形极相似，故变而从女。上虞罗氏所藏古铃，有“连亡辨姪”，亡_即亡畏。此或、威、畏三字相关之证也。魃字又变作虬王孙遣诸钟之“畏媒（即“畏忌”）。超

越”，犹儿钟之“盭于畏义”（即淑于威仪），皆如此作，既从卜，又从支，则稍赘矣。由此观之，则或、魅二字确为“畏”字，鬼方之名当作“畏方”。《毛诗传》“鬼方，远方也”。畏、远双声，故以声为训也。汉人始以魅为“鬼”字。张平子《东京赋》“况魅或与毕方”，薛综不识“魅”字，以《说文》之“魅”字释之。不知“魅或”用《小雅》“为鬼为蜮”语，尤为明白，决非指小儿鬼之魅。是周时“畏”字，汉人已用为“鬼”字。故《庄子·天地》篇之“门无畏”，《释文》“门无鬼”，司马本作“无畏”。郭象本作“门无鬼”。又《杂篇》之“徐无鬼”，亦当为“徐无畏”之误也（古人多以无畏、无忌为名，如《左传》之申之舟名无畏是也）。由是观之，汉人以隶书写定经籍时，改“畏方”为“鬼方”，固不足怪。此古经中一字之订正，虽为细事，然由此一字可知鬼方与后世诸夷之关系，其有裨于史学者，较裨于小学者为大也。

鬼方与昆夷、玁狁，其国名与地理上递嬗之迹，当详于下。其可特举者，则宗周之末，尚有隗国，春秋诸狄皆为隗姓是也。《郑语》史伯告郑桓公云：当成周者，“西有虞、虢、晋、隗、霍、扬、魏、芮”。案他书不见有隗国，此隗国者，殆指晋之西北诸族，即唐叔所受之怀姓九宗。春秋隗姓，诸狄之祖也。原其国姓之名，皆出于古之畏方，可得而征论也。案《春秋左传》凡狄女称隗氏，而见于古金文中则皆作媿（包君鼎、包君益、郑同媿鼎、芮伯作叔媿鼎、邓公子敦五器，皆如此作）。经典所以作“隗”字者，凡女姓之字，金文皆从女作，而先秦以后所写经传，往往省去女旁。如己姓之己，金文作改（苏魏改鼎、苏公敦）、作妃（见番妃鬲、号仲鬲、号文公子敦，皆女姓，非妃匹之妃），今《左传》、《国语》、《世本》皆作“己”字。庸姓之庸，金文作“墉，杜伯鬲”，今《诗》“美孟庸矣”作“庸”字。弋姓之弋，金文作找（南旁敦），今《诗》“美孟弋矣”、《谷梁传》“葬我小君定弋”，皆作“弋”字。任姓，金文作妊，苏冶妊鼎、铸公簠等。今《诗》与《左传》、《国语》、《世本》皆作“任”字。然则“媿”字依晚周省字之例，自当作“鬼”。其所以作“隗”者，当因古文畏作炫、隗作烱，馆旁之K与炒旁之𠂔所差甚微，故又误为“隗”。然则“媿”、“隗”二字之于“畏”字，声既相同，形亦极近，其出于古之畏方无疑。畏方之畏，本种族之名，后以名其国，且以为姓，理或然也。我国周后国、姓之别颇严。然在商世，则如彭祖为彭姓，铎、邳之“铎”为铎姓，皆以国为姓。况鬼方礼俗与中国异，或本无姓氏之制，逮入中国，与诸夏通婚媾，因以国名为姓。《世本》：“陆终取鬼方氏之妹，谓之女媾。”《大戴礼·帝系篇》及《水经注》“洧水”条所引作“女媾”，《汉书·古今人表》作“女媾”，而《史记·楚世家》索隐与《路史·后纪》所引皆作“女媾”。鬼、贵同声，故媿字亦通作“媿”，则“女媾”、“女媾”疑亦“女媿”、“女隗”之变。鬼方之为“媿”姓，犹玁狁之为允姓也。虽《世本》所纪上古之事未可轻信，又上古之女亦不尽以姓为称，然后世附会之说，亦必有所依据。而媾、媾二字，其音与媿、隗绝近，其形亦与媿、隗二字变化相同。或殷周间之鬼方已以媿为姓，作《世本》者因傅之上古欤？此鬼方姓氏及其遗裔之略可考者也。

混夷之名，亦见于周初之书。《大雅·绵》之诗曰：“混夷脱矣。”《说文解字》“马部”引作“昆夷”，“口”部引作“犬夷”，而《孟子》及《毛诗·采薇序》作“昆”，《史记·匈奴传》作“緄”，《尚书大传》则作“吠夷”。颜师古《汉书·匈奴传》注云吠音工犬反，昆、混、緄并工本反，四字声皆相近（《礼记》“袞”亦作“卷”，工是本工犬二音相通之证）。余谓皆畏与鬼之阳声。又变而为“葷粥”，《史记·五帝本纪》及《三王世家》）、为“薰育”，《史记·周本纪》）、为“獯鬻”（《孟子》），又变而为“俨狁”，亦皆畏、鬼二音之遗。畏之为鬼，混（胡本反或胡浑反）之为昆、为緄、为吠、为犬，古喉牙同音也；畏之为混，鬼之为昆、为緄、为吠、为犬，古阴阳对转也。混、昆与葷、薰，非独同部，亦同母之字（古音喉牙不分）。“獯鬻”则“葷薰”之引而长者也。故鬼方、昆夷、薰育、獯鬻，自系一语之变，亦即一族之称，自音韵学上证之有余矣。

然征之旧说，则颇不同。鬼方、混夷，古人无混而一之者；至混夷与獯鬻、獯鬻，则又画然分而为二。《孟子》言“太王事獯鬻，文王事昆夷”，《诗序》言“文王之时，西有昆夷之患，北有獯鬻之难”。《逸周书序》亦谓“文王立，西距昆夷，北备獯鬻”。然《孟子》以獯鬻、昆夷并举，乃由行文避复之故。据《绵》诗本文，则太王所事正是混夷。此诗自一章至七章，皆言太王迁都筑室之事，八章云：“柞械拔矣，行道兑矣，混夷脱矣，维其喙矣。”亦当言太王定都之后，伐木开道，混夷畏其强而惊走也（《经》于第九章“虞芮质厥成”以下殆言文王，郑笺以第八章系之文王，殊无所据）。太王所喙者既为混夷，则前此所事者亦当为混夷。《孟子》易以獯鬻者，下文云“文王事昆夷”，故以异名同实之獯鬻代之，临文之道不得不尔也。此古书之不可泥者一也。《诗序》所言，亦由误解经语。案《出车》诗云：“赫赫南仲，獯鬻于襄。”又云：“赫赫南仲，薄伐西戎。”既云“獯鬻”，复云“西戎”，郑君注《尚书大传》据之，遂云：“南仲一行，并平二寇。”序《诗》者之意，殆亦以“昆夷”当经之“西戎”，与郑君同。不知“西戎”即“獯鬻”，互言之以谐韵，与《孟子》之“昆夷”、“獯鬻”错举之以成文，无以异也。不其要敦以“獯鬻”与“戎”错举，正与《出车》诗同。此古书之不可泥者二也。然则旧说以“昆夷”与“獯鬻”、“獯鬻”为二，盖无所据。昆夷之地，自太王之迁自北而南观之，则必从幽北入寇。又《史记》谓“自陇以西有绵诸、緄戎、翟、獯之戎”，杨恽亦谓“安定山谷之间，昆戎旧壤”，则其地又环岐周之西，与上所考鬼方疆域若合符节。而自殷之武丁，迄于周之成王，鬼方国大民众，常为西北患，不容太王、文王之时绝不为寇，而别有他族介居其间。后世獯鬻所据之地，亦与昆夷略同。故自史事及地理观之，“混夷”之为“畏夷”之异名，又为獯鬻之祖先，盖无可疑，不独有音韵上之证据也。

獯鬻、獯鬻，皆宗周以前之称，而当时书、器均不见“獯鬻”二字，其见于传记者，以《孟子》为最古。《史记·五帝本纪》称“黄帝北逐葷粥”，《匈奴传》亦云：“唐虞以上，有山戎、獯鬻、葷粥居于北蛮。”晋灼曰：“尧时曰葷粥。”皆后世追纪之辞，不足为据，犹伊尹《四方令》、《周书·王会解》并有“匈奴”，非

事实也。然以理势度之，尚当为獾狁以前之称。葦、薰之音同于混、昆，而獾字，其声虽同，其韵已变，合“獾狁”二字乃得“薰”音，其名或当在“獾鬻”之后也。《诗》“獾狁”之獾，《释文》云：“本或作猓，音险。”《史记》以降，亦多作猓狁。古金文如兮甲盘、号季子白盘作厥赖，不類敦作厥允，又作窗允，窗即厥之异文。《说文厂部》厥，峯也。一曰地名。从厂，敢声。”案窗、峯二字连文，康峯即《谷梁传》之“岩吟”（僖三十八年）。《公羊传》作“嶽岩”，则颠倒其文。孙愐《唐韵》厥，鱼音反。”则以为厥即喙字。然则厥字之用为“厥峯”之“厥”者，一变而作“岩”，再变而作“险，古岩、险同字。《尚书序》及《墨子·尚贤》篇之“傳岩”，《史记》作“傳险”。《左氏传》“制，岩邑也”，《孟子》“不立于岩墙之下”，“岩”即“险”字。《广韵》：“岩，险也。”）；其用为“康允”之“康”者，一变作獾，再变作猓。自其最后之字，厥自当读险，不当读“鱼音反”，陆音是也。此字之音，与畏、混、葦、獾异部，其变化唯可于双声求之。殆先有“獾”音，而后有“獾狁”之二合音也。然则旧说之先“獾鬻”而后“獾狁”，或非无据矣。

獾鬻地理，一无可考。唯獾狁出入之地，则见于书、器者较多。其见于《诗》者，曰焦获，曰泾阳，曰镐，曰方，曰朔方，曰太原。此六者，昔儒考证至多，未有定说也。更求之于金文中，则见于不媒敦者，曰西俞，曰S，曰高陵；见于兮甲盘者，曰舊盧；见于虢季子白盘者，曰洛之阳。此十一地中，方与朔方、盩与洛当为一地，故得九地。九地之中，唯泾阳与洛阳（此雍州浸之洛，非豫州之伊雒）。以水得名，今尚可实指其地。而泾水自西北而东南，洛水自北而南，经流各千里，但曰泾阳、曰洛之阳，语意亦颇广莫也。欲定其地，非综此九地考之不可。案獾狁之寇周也，及泾水之北，而周之伐獾狁也，在洛水之阳，则獾狁出入当在泾、洛之间。而泾、洛二水，其上游悬隔千里，至其下流入渭之处，乃始相近，则泾阳、洛阳皆当在二水下游。泾阳既在泾水下游，则焦获亦当在泾水下游之北（陈氏启源《毛诗稽古编》：“《诗》数獾狁之恶，故先言焦获，见其纵兵深入，迫处内地；继又迫本其始！自远而来！故言镐与方，纪其外侵所经也；？泾阳，纪其内侵所极也。”《正义》亦云：“镐、方虽在焦获之下，不必先焦获乃侵镐、方。”其说均是也），郭璞《尔雅注》以为在池阳酈中者是也。不，壞敦之高陵，亦当W《汉志》左冯翊之高陵县，其地西接池阳，亦在泾水之委。然先儒多以汉时泾阳县属安定郡，在泾水发源之处，疑《诗》之泾阳亦当在彼，不知秦时亦有泾阳，在泾水下游。案《史记·秦始皇本纪》云“肃灵公居泾阳”。考秦自德公以降都雍，灵公始居泾阳，灵公子献公之世又徙栎阳，则泾阳一地当在雍与栎阳之间。而栎阳（汉之万年县）西界向陵，距泾水入渭之处不远，则灵公所居之泾阳自当在泾水下游，决非汉安定郡之泾阳也。又《穰侯列传》云“秦昭王同母弟曰高陵君、泾阳君”，盖一封高陵、一封泾阳。二君受封之年，史所不纪，然当在昭王即位、宣太后执政之初。时义渠未灭，汉安定郡之泾阳县介在边裔，太后决不封其爱子于此，且与高陵君同封，亦当同壤。后昭襄王十六年，封公子市（即泾阳君）《史记·秦本纪索隐》云泾阳君名市。”《穰侯列传》索隐乃云“名显”，误也。宛、公子悝（即高陵君）、邓，为

诸侯。宛、邓二地相接，则前所食涇阳、高陵二地，亦当相接。然则秦之涇阳，当为今日之涇阳县（汉之池阳县），而非汉之涇阳。以秦之涇阳之非汉之涇阳，益知周之涇阳之非汉之涇阳矣。此三地者，皆在涇北，自此而东北，则至洛水。虢季子白盘云：“搏伐康允，于洛之阳。”兮甲盘（世称兮田盘）云：“王初各伐厥允于S盧。”“醫盧”亦在洛水东北。醫字虽不可识，然必为从冈、罍声之字。盧则古文鱼字，《周礼·天官》獻人释文獻本或作敝。”敌、敝同字，知盧、鱼亦一字矣。古鱼、吾同音，故往往假盧、戲为吾。齐子仲姜搏云“保盧兄弟，保盧子姓”，即“保吾兄弟，保吾子姓”也。犹儿钟云“斂以宴以喜”，即“吾以宴以喜”也。敦煌本隶古定《商书》鱼家旄孙于荒”，日本古写本《周书》“鱼有民有命”，皆假鱼为吾。《史记·河渠书》功无已时兮时吾山平。”“吾山”亦即“鱼山”也。古鱼、吾同音，衙从吾声，亦读如吾。“醫盧”与《春秋》之“彭衙”为对音，(r)、彭声相近，盧、衙则同母兼同部字也。《史记·秦本纪》武公元年，伐彭戏氏。”《正义》曰：“戎号也。盖同州彭衙故城是也。”“戏”盖“盧”之伪字矣。彭衙一地，于汉为左冯翊衙县，正在洛水东北，方、镐、太原，亦当于此间求之。然则宣王之用兵于玁狁也，其初在涇水之北，《六月》第三章是也；其继也在洛水之阳，《六月》四章及兮甲盘、号季子白盘是也。而洛水东北以往，即是西河，太原一地，当在河东。《禹贡》：“壶口治梁及岐；既修太原，至于岳阳。”郑注、孔传均以太原为汉太原郡。然禹治冀州，水实自西而东，疑壶口、梁、岐而往，至霍太山，其地皆谓之太原。《左·昭元年传》宣汾、洮，障大泽，以处太原。”则太原之地，奄有汾、洮二水，其地当即汉之河东郡，非汉太原郡矣。疑太原之名，古代盖兼汉太原、西河、河东三郡地，而秦人置郡，晋阳诸县遂专其名。以古书所纪太原地望证之，亦无不合。《后汉书·西羌传》穆王西伐犬戎，取其五王，王遂迁戎于太原。”此事当出真本《竹书纪年》。案范书《西羌传序》大都取材于《国语》、《史记》、《纪年》三书，此节白鹿、白狼事，本《国语》、《史记》，则取五王及迁戎太原事，当出《纪年》。章怀太子注虽不引《纪年》为证，然郭璞《穆天子传注》引《纪年》“取其五王以东”，则迁戎太原事必本《纪年》无疑。穆王所迁者，盖即五王之众。郭璞引《纪年》云“取其五王以东”，则所迁之地，亦当在东。《穆天子传》：“天子至于雷首，犬戎胡觞天子于雷水之阿。”此亦犬戎既迁后事。案雷首山在河东蒲坂县（今蒲州），《纪年》与《穆传》所纪若果不谬，则太原在河东可知。后人或东傅之于晋阳，西傅之于平凉，皆与史事及地理不合者也。凡此八地，均在宗周东北，唯西俞一地，则在宗周之西。不媒敦云：“白氏曰：“不懸馭方，厥允广伐西俞，王命余羞迫于西，余来归献禽。今余命女御迫于署，女以我车宕伐康允于高陵。”，盖此时玁狁从东、西两道人寇，故既迫于西，归而复东迫于洛。时西寇虽去，而东方之寇已深入，故未及至洛而与之战于涇北之高陵也。是西俞之地实在周西，与《尔雅》之北陵西喻，《赵策》、《赵世家》之圣分、先俞，皆不相涉。周西之地以俞、喻、榆名者颇多，皆一字一音之偶合，讫不能指为何地。然由“羞迫于西”一语，可知玁狁自宗周之东北而包其西，与鬼方、昆夷之地全相符合也。

玁狁之号，始于何时，讫于何代；其侵暴中国，以何时为甚，亦有可讨论者。《诗》咏伐玁狁事，有《采薇》、《出车》、《六月》三篇。《六月》之为宣王时诗，世无异论。唯《采薇》、《出车》二诗，《毛传》及《诗序》皆以为文王时诗。然其诗云“王事靡盬”，又云“王命南仲”，又云“天子命我，城彼朔方”，皆不似诸侯之诗。《序》以为文王以天子之命，命将遣戍役，故其辞如此。然三家《诗》说，殊不尽然。《汉书·匈奴传》谓“懿王时，戎狄交侵，诗人始作，疾而歌之，曰：‘靡室靡家，玁狁之故。又曰，岂不日戒，俨狁孔棘，’”，则班固以《采薇》为懿王时诗也。《出车》咏南仲伐玁狁之事，南仲亦见《大雅·常武》篇，其诗曰：“王命卿士，南仲太祖，太师皇父。”《传》谓“王命卿士南仲于太祖皇父为太师”。《白虎通》释“爵人于朝，封诸侯于庙”，引《诗》曰：“王命卿士，南仲太祖。”《白虎通》多用《鲁诗》，是鲁说亦与毛同。《笺》则以南仲为皇父之太祖，系文王时人。然《汉书·古今人表》系南仲于宣王时，在方叔、召虎之下，仲山甫之上，而文王时别无南仲。《后汉书·庞参传》载马融上书曰：“昔周宣狁狁侵镐及方，孝文匈奴亦略上郡，而宣王立中兴之功，文帝建太宗之号。非唯两主有明睿之姿，抑亦扞城有城虎之助。是以南仲赫赫，列在周《诗》亚夫赳赳，载于汉策。”是班固、马融皆以南仲为宣王时人，融且以《出车》之南仲为即《常武》之南仲矣。今焦山所藏乡惠鼎云：“司徒南中，人右乡惠。”其器称“九月既望甲戌”，有月日而五年，无由知其为何时之器。然其文字不类周初，而与召伯虎敦相似。则南仲自是宣王时人，《出车》亦宣王时诗也。征之古器，则凡纪玁狁事者，亦皆宣王时器。兮甲盘称：“惟五年三月既死霸庚寅。”案长术，宣王五年三月乙丑朔，二十六日得庚寅，此正与余“既死霸”之说合。号季子白盘云惟王十有二年正月初吉丁亥。”案宣王十二年正月乙酉朔，三日得丁亥，亦与“初吉”之语合。而十二年正月丁亥为铸盘之日，则伐玁狁当为十一年事矣。由是观之，则周时用兵玁狁事，其见于书、器者，大抵在宣王之世，而宣王以后，即不见有玁狁事。是玁狁之称，不过在懿、宣数王间；其侵暴中国，亦以厉、宣之间为最甚也。

至玁狁之后裔如何，经、传所纪，自幽、平以后至于春秋隐、桓之间，但有戎号；庄、闵以后，乃有狄号。戎与狄，皆中国语，非外族之本名。戎者，兵也。《书》称“诃尔戎兵”，《诗》称“弓矢戎兵”，其字从戈、从甲，本为兵器之总称。引申之，则凡持兵器以侵盗者亦谓之戎。狄者，远也，字本作遏。《书》称“遏矣西土之人”，《诗》称“舍尔介狄”，皆谓远也。后乃引申之为驱除之于远方之义。《鲁颂》之“狄彼东南”，敏狄钟之“敷狄不龚”，曾伯藜簠之“克狄淮夷”，皆是也。因之凡种族之本居远方而当驱除者，亦谓之狄。且其字从犬，中含贱恶之意，故《说文》有“犬种”之说。其非外族所自名，而为中国人所加之名，甚为明白。故宣王以后有戎狄而无玁狁者，非玁狁种类一旦灭绝或远徙他处之谓，反因玁狁荐食中国，为害尤甚，故不呼其本名而以中国之名呼之，其追纪其先世也，且被以恶名。是故言昆戎则谓之犬戎、薰鬻则谓之獯鬻、玁允则谓之玁狁，盖周室东迁以后事矣。考《诗》、《书》、古器，皆无犬戎事。犬戎之名，始见于《左传》、《国语》、《山海经》、《竹书纪年》、《穆天子传》等，皆春秋、战国以后呼昆夷

之称，而獯鬻、玁狁亦被此名。《后汉书·西羌传》称武乙暴虐，犬戎寇边，周古公逾梁山而迁于岐下。”是以獯鬻为犬戎也。《后汉书·西羌传》引《纪年》：“穆王西征犬戎，取其五王，王遂迁戎于太原。”又引：“夷王命虢公帅六师伐太原之戎。”又引：宣王二十七年，王遣兵伐太原戎，不克。”而《诗》云“薄伐玁狁，至于太原”。太原一地，不容有二戎，则又以玁狁为犬戎也。由是观之，古之獯鬻、玁狁，后人皆被以犬戎之名，则攻幽王、灭宗周之犬戎，亦当即宣王时之玁狁。不然，玁狁当懿、宣之间仍世为患，乃一传至幽王时绝无所见，而灭宗周者乃出于他种族，此事理之必不可信者也。然则戎中最强大之犬戎既即玁狁，其余以戎名者，如汾、晋间诸戎，当即唐叔所受之怀姓九宗；又河南、山北之阴戎，伊川之陆浑戎，皆徙自瓜州，所谓“允姓之玁居于瓜州”者，亦俨狁同族也。春秋庄、闵以后，戎号废而狄号兴。《春秋》所书，闵、僖以后无单称戎者，唯云“某戎”或“某某之戎”而已。而狄之姓氏见于《左传》者，实为隗姓。后世有谓赤狄隗姓、白狄厘姓者（《世本》）。又有谓隗姓赤狄、蟠姓白狄者（《潜夫论》）。然秦汉以后之隗姓，皆出白狄故地。秦始皇时丞相隗状，虽不知其所出，当为秦人，汉隗嚣一族，则天水成纪人；魏之隗禧（见《魏志·王肃传》），亦京兆人。则赤、白二狄，疑皆隗姓，皆鬼方、玁狁后裔或同族。及春秋中叶，赤狄诸国皆灭于晋，河南、山北诸戎亦多为晋役属，白狄僻在西方，不与中国通，故戎、狄之称泯焉。尔后强国并起，外族不得逞于中国，其逃亡奔走复其故土者，或本在边裔未入中国者，战国辟土时，乃复与之相接。彼所自称，本无戎、狄之名，乃复以其本名呼之。于是胡与匈奴之名始见于战国之际，与数百年前之獯鬻、玁狁先后相应。其为同种，当司马氏作《匈奴传》时，盖已知之矣。

西胡续考

自《汉书·西域传》言：“自宛以西至安息，其人皆深目多须髯。”后世所记胡人容貌，如《世说新语》（六。）记康僧渊，《太平广记》（二百四十八。）引《启颜录》，记隋三藏法师，又（四百三十五。）引《朝野僉载》记宋蔡事，无不如是。《北史·于阗传》言：“自高昌以西诸国人等，皆深目高鼻，惟此一国，（于阗。）貌不甚胡。”《唐书·突厥传》言：“颉利族人思摩，以貌似胡，疑非阿史那种，故但为夹毕特勒而不得为设。”是胡之容貌，显与他种不同。而其不同之处，则“深目多须”四字尽之。隋唐以来，凡非胡人而貌类是者，亦谓之胡。《刘宾客嘉话录》言：“杨国忠知吏部铨，呼选人名，引入于中庭，不问资序，短小者通道参军，胡者云湖州文学。”李匡义《资暇录》（下。）云：“俗怖小儿曰‘麻胡来’，不知其源者，以为多髯之神。”李商隐《骄儿诗》：“或谑张飞胡，或嘲邓艾吃。”《东观奏记》：（上。）宣宗问宰臣白敏中曰：‘有一山陵使，胡而长，其人姓氏为谁？’敏中奏：‘景陵山陵使令狐楚。’”《侯鯖录》：（四。）

“王晋卿尝过巩洛间，道旁有后唐庄宗庙，默念始治终乱，意斯人必胡。及观神像，两眼外皆髭也。”是中国人貌类胡人者，皆呼之曰胡，亦曰胡子。此名当六朝时本施之胡人。《艺文类聚》（三十五。）载：“梁简文帝谢安吉公主饷胡子一头，启云：‘方言异俗，极有可观，山高水远，宛在其貌。’”即用《世说》所载康僧渊事，盖谓真胡人。至唐而中国人貌类是者，亦谓之胡子。《太平广记》（二百四十五。）引《御史台记》云：“邵景萧嵩俱授朝散大夫，二人状貌类胡。景鼻高而嵩须多，同时服朱绂，对立于庭。韦铤帘中独窥而咏曰：‘一双胡子著绯袍，一个须多一鼻高。’云云”。

又《云溪友议》载唐陆岩梦《桂州筵上赠胡子女》诗云：“自道风流不可攀，那堪蹙额更颓颜，眼睛深却湘江水，鼻孔高于华岳山。”是自唐以来皆呼多须或深目高鼻者为胡或胡子。此二语至今犹存，世人呼须及多须之人皆曰胡子，俗又制髯字以代之。《北梦琐言》（七。）载《蔡押衙诗》云：“可怜洞庭湖，却到三冬无髭须。”以其不成湖也。是唐人已谓须为胡。岂知此语之源，本出于西域胡人之状貌乎！且深目多须，不独西胡为然，古代专有胡名之匈奴，疑亦如是。两汉人书虽无记匈奴形貌者，然晋时胡羯，皆南匈奴之裔。《晋书·石季龙载记》云：“太子詹事孙珍问侍中崔约曰：‘吾患目疾，何方疗之？’约素狎珍，戏之曰：‘溺中可愈。’珍曰：‘目何可溺？’约曰：‘卿目眈眈，正耐溺中。’珍恨之，以告石宣。宣，诸子中最胡状，目深，闻之大怒，诛约父子。”又云：“冉闵躬率赵人诛诸胡羯，无贵贱男女少长皆斩之，死者二十余万，屯据四方者，所在承闵书诛之。于是高鼻多须至有滥死者。”

《安禄山事迹》（下。）云：“高鞠仁令范阳城中，杀胡者重赏。于是羯胡尽死，小儿掷于空中，以戈承之，高鼻类胡而滥死者甚众。”事亦相类。夫安史之众，素

号杂胡，自兼有突厥、奚、契丹诸部。晋之羯胡，则明明匈奴别部，而其状高鼻多须，与西胡无异，则古之匈奴，盖可识矣。自后汉以来，匈奴寝微，而东胡中之鲜卑，起而代之，尽有其故地。自是迄于蠕蠕之亡，主北垂者，皆鲜卑同族也。后魏之末，高车、突厥代兴，亦与匈奴异种，独西域人民与匈奴形貌相似，故匈奴失国之后，此种人遂专有胡名。顾当时所以独名为胡者，实因形貌相同之故。观《晋书·载记》之所记，殆非偶然矣。√

匈奴相邦印跋

匈奴相邦玉印，藏皖中黄氏。其形制、文字均类先秦古弥，当是战国迄秦汉间之物。考六国执政者均称“相邦”，秦有相邦吕不韦（见戈文），魏有相邦建信侯（见剑文）。今观此印，知匈奴亦然矣。史家作“相国”者，盖避汉高帝讳改。《史记·卫将军骠骑列传》屡言获匈奴相国、都尉等；而《匈奴列传》记匈奴官制，但著左、右贤王以下二十四长而不举其目，又言“二十四长亦各自置千长、百长、十长、裨小王、相封、都尉、当户、且渠之属。”（《汉书》“相”下无“封”字）。“相封”即“相邦”，古“邦”、“封”二字形、声并相近，易“邦”为“封”，亦避高帝讳耳。

惟《匈奴传》之“相封”，谓左右贤王以下所置相。匈奴诸王各有分地，大略如汉之诸侯王，其相亦当如汉之诸侯相。此匈奴相邦，则单于自置之相，略如汉之丞相矣。匈奴遗物传世者，惟汉所赐之匈奴官印，其形制、文字自当与汉印同。此印年代较古，又为匈奴所自造，而制度、文字并同先秦。可见匈奴与中国言语虽殊，尚未自制文字。即有文字，亦当在冒顿、老上以后，非初叶之事矣。

九姓回鹘可汗碑跋

和林九姓回鹘可汗碑，自来金石家皆未著录。光绪中叶，俄人始访得之，拉特禄夫《蒙古图志》中始揭其影本，光绪十九年俄使喀西尼以拉氏书送总理各国事务衙门，属为考释。时嘉兴沈乙庵先生方在译署，作阙特勤碑、苾伽可汗碑及此碑三跋，以覆俄使。俄人译以行世，西人书中屡引其说，所谓总理衙门书者也。时志文贞（锐）方为乌里雅苏台将军，亦拓阙特勤碑以遗宗室伯羲祭酒（盛昱），祭酒跋之，沈先生复书其后，于是世人始知有阙特勤碑，尚未知有他碑也。顺德李仲约侍郎（文田）始录拉氏书中各碑之文，为《和林金石录》，元和江建霞编修（标）刊之长沙，由是世知有回鹘碑，然终无由致拓本。光宣间，此碑中二段为俄国某大佐取去，致之圣·彼德堡博物馆，故近来拓本乃少五、六两段。

己未夏日，偶读法国伯希和教授所撰《摩尼教考》，见所引此碑文三行，与李录殊异，乃假沈先生所藏拉氏原书校李录，李录此碑分为五段，实则此碑共碎为八段，前三段拉氏书中已联合为一，李录从之。其后德人休列额尔、法人沙畹并考此碑，德人牟列尔又通碑阴所刊宰利文之读，伯氏所引，盖用诸氏厘定之本。余据伯氏所引联合四、五两段，则全碑文义皆可贯通。又自以行款、文义定第六段之位置（四、五两段即李录之第三、第四两片，第六段则李录之第五片）又第七、第八两段（一内宰相以下两行十二字，一罗教迭亿两行四字）李录失载，以行款求之，当在首二行，然文字太少，迄不能定其在此二行之第几格矣。又新拓本别一段，亦此碑之文，则并其在何行亦不可知，兹别附于后。余既为碑图以明全碑之形状及碑文之次序，于是碑文略可通读。前沈先生跋此碑时，仅据前三段及第七、八段，今得通读全碑，自有前跋所不能尽者，先生因命书其后。凡前跋所已详者，兹不赘焉。碑题之爱登里啰汨没蜜施合毗伽可汗，此两《唐书》之保义可汗也。

《旧书·宪宗纪》，元和三年五月丙午，正衙册九姓回纥可汗为登啰里汨蜜施合毗伽保义可汗，《回纥传》作葛德里禄没弭施合蜜毗迦可汗，《菩萨与吐迷度》，《新书·回鹘传》时健俟斤长子曰菩萨，菩萨死，其酋曰胡禄俟利发吐迷度，知如是者。碑云□史那革命数岁之间，复我旧国。案史那上所阙当为阿字，阿史那者，突厥姓也。《新书》言突厥已亡，惟回纥与薛延陀为最雄强。及吐迷度与诸部攻薛延陀，残之，并有其地。考自突厥之亡至薛延陀之亡，才十六年，薛延陀建牙郁督军山，去崑崙河不远，至是为回纥所并，所谓阿史那革命数岁之间，复我旧国者也。史称吐迷度虽归唐，拜为怀化大将军瀚海都督，然私自号可汗，官吏一似突厥。下云九姓回鹘册姓拔悉密三姓□□诸异姓金曰云云，当为上可汗尊号之事，三姓下所阙二字，当是葛禄。《新书》称葛逻禄有三族，一谋禄，或为谋刺；二炽俟，或为婆匐；三踏实力，故其酋号三姓叶护。又回鹘于九姓外，兼有拔悉密、葛逻禄总十一姓，并置都都督，号十一部落，故知所阙二字为葛禄也。阙毗伽可汗者，吐迷度之七世孙，名骨力裴罗。

天宝三年，自称骨咄禄毗伽阙可汗，天子以为奉义王，后拜为骨咄禄毗伽阙怀仁可汗者也。此下四世，具如沈先生说。汨咄禄毗伽可汗者，《新书》之阿啜，唐册为奉诚可汗者，登里啰羽录没蜜施合汨咄禄胡禄毗伽可汗者，则《新书》之骨咄禄，唐册为爱滕里啰羽录没蜜施合胡禄毗伽怀信可汗者也。第十二行之□合毗伽可汗，则保义可汗，即碑题之爱登里啰汨没蜜施合毗伽可汗。自怀仁可汗以下，至此凡九世，中间惟阙怀信可汗子滕里野合俱禄毗伽可汗一世，此可汗以永贞元年立，元和三年卒，在位四年，殆保义可汗兄弟行，岂以享国不久，故阙而不书？抑其名在碑下截断处，而今失之欤？保义可汗，史不纪为何人之子，当怀信时盖已为宰相，碑所谓当龙潜之时于诸王中最长，又所谓□□汗宰衡之时，与诸相殊异者也。回鹘可汗多自宰相出，如顿莫贺达干骨咄禄皆是也。其记破坚昆事上有初字，盖犹在怀信之世。坚昆者，即黠戛斯，《新书》，黠戛斯，古坚昆国也。保义可汗破黠戛斯，杀其可汗，诸书皆不载，惟见此碑。云复葛禄与吐蕃连□者，德宗以后，葛禄时离回鹘而与吐蕃连和，吐蕃之取北庭陷安西，皆由葛禄为之犄角，此碑所记匀曷户之战，史既失记，地亦不详。

至云□□庭半收半围之次，天可汗亲统大军讨灭元凶，却复城邑者，庭上所阙，当是北字。自贞元六年吐蕃攻陷北庭后，至是始为回鹘所复。碑云天可汗亲统大军，则在保义嗣位以后矣。云遂□□□□媚磧者，磧石上阙数字，宋初王延德《使高昌记》，谓高昌纳职城在大患鬼魅磧之东南，此大患鬼魅磧，即唐初人所谓莫贺延磧。魅与媚音同，是□□□回媚磧或即大患鬼魅磧矣。盖吐蕃陷北庭后，此磧实为吐蕃、北庭间之通道，及回鹘既复北庭，磧北无吐蕃踪迹，此道遂开，故下云凡诸行人及于畜产□□□□□，盖回鹘至此得自由往来天山南北路矣。云复吐蕃大军攻围鬼兹，天可汗领兵救援，吐蕃□□奔入于术者，于术，地名。《新书·地理志》，自焉耆西五十里过铁门关，又五十里至于术守捉城，自是西至安西都护府（即龟兹）凡五百六十里。盖吐蕃之兵，自龟兹退至于术，为回鹘所围也。云□□百姓与狂寇合从，有亏职贡者，百姓亦西北种族，如三姓、九姓、十姓、卅姓之比，惜上有阙字，不能知为何族矣。云追奔逐北至真珠河者，真珠河，即今之那林河，其下流为叶叶河，又一支流为药杀水。

《新书·地理志》，度拔达岭五十里至顿多城，乌孙所治赤山城也。又三十里渡真珠河。又《西域传》：石国西南有药杀水，入中国谓之真珠河。是皆以此河之上游为真珠河。《新书·西域传》，宁远都真珠河之北，杜环《经营行记》：石国中有二水，一名真珠河，一名质河。则并其下流，亦谓之真珠河也。云□厢沓实力者，沓实力者，三姓葛禄之一也。云攻伐葛禄、吐蕃，搴旗斩馘，追奔逐北，西至拔贺那国者，《新书》谓至德后，葛逻禄浸盛，徙十姓可汗故地，尽有碎叶、窠罗斯诸城。拔贺那国，即《新书》之判汗怛怛。及宁远都真珠河之北，与葛禄为邻，故假道于此国。云叶护为不受教令，离其土壤，此叶护即谓拔都贺那王，自突厥西徙以后，西域诸国王多称叶护者。下云册真珠智惠叶□□王，当因前王不受教令，故别立一人。此时回鹘南破吐蕃，北服葛禄，兵力直至葱岭以西，而其事史皆不书。异

时回鹘西徙之事，惟由此碑始得解之。既厘正其文，复考释之如左，因书以质沈先生，庶匡其不逮焉。√

高昌宁朔将军麹斌造寺碑跋

高昌宁朔将军麹斌《造寺记》，新出土鲁番，为考高昌麹氏事者第一史料，既详见于上虞罗叔言参事跋矣。碑阴高昌王麹宝茂结衔中，有“希□寺多浮跌无亥希利发”十一字；高昌令尹麹乾固结衔中，有“多波鋤屯发”五字，皆蕃夷语。参事疑为高昌尊号以施之国中者。余谓此皆突厥官号也。《周书·突厥传》言突厥“有叶护，次没，次特勒，次俟利发，次屯吐发”（《隋书·突厥传》文同）。此“希利发”即“俟利发”，“鋤屯发”即“吐屯发”。自突厥崛起，高昌常为所役属，故其君相皆受突厥官号。《唐书·突厥传》谓统叶护可汗“徙庭石国之千泉，遂霸西域诸国，悉授以颉利发”。案“颉利发”，即“俟利发”。《旧唐书·突厥传》其大官有屈律噉，次阿波，次颉利发，次吐屯，次俟斤。”“颉利发班”次亚当《周》、《隋》二《书》之“俟利发”，盖一语之异译。《新书》载突厥官有“俟利发”，又有“颉利发”，盖失之。征之此碑，则突厥先世已用此制，不自西突厥始。

故唐初诸外国酋长，多称“颉利发”或“俟利发”。如回纥首领，称“活颉利发菩萨”及“胡禄俟利发吐迷度”，拔野古首领，称“大俟利发屈利失”；仆骨首领，称“娑匐俟利发歌滥拔延同罗首领，称“俟利发时健噉浑首领，称“俟利发阿贪支大俟利发浑汪，黠戛斯首领，称“俟利发失钵屈阿栈”。即龟兹王诃黎伐失毕，“诃黎伐”亦“俟利发”或“颉利发”之音变也。凡此诸王或首领皆有“俟利发”或“颉利发”号，盖突厥于其所属之国，皆授其王或首领以己国官职。故唐灭东、西突厥，即于其故地及属国置羁縻州，并命其王为都督、刺史，盖即用突厥旧制也。然“俟利发”一语，疑本出蠕蠕。突厥主称“可汗”，后称“可贺敦”，皆袭蠕蠕旧号，“俟利发”亦然。《魏书·蠕蠕传》阿那瑰族兄有“俟力发示发”，从父兄有“俟力发婆罗门”。突厥后起，故沿以为官号。其上冠以“希□寺多浮跌无亥”八字者，则官号上所加之美称，如“某某可汗”、“某某可敦”之类。

日本大谷伯爵藏高昌延昌册年所写《大品般若经》，其跋尾高昌王结衔为“使持节（缺）跋弥磗伊离地（缺四、五字）阗豆（缺三、四字）利发”。“伊离”即“伊利”，“阗豆”即“达头”之异译，皆突厥可汗之美名也。北方种族，于君长名称上，率加以美名。唐代诸帝之有尊号，亦当为对外族而设也。“鋤屯发”，高昌所写《大品般若经》径作“吐屯发”，则本监察之义。《唐书·突厥传》统叶护可汗悉授西域诸国以颉利发，而命一吐屯监统以督赋入。”是“吐屯”本监统之官。《太平广记》（二百五十）引《唐御史台记》，谓“突厥谓御史为‘吐屯’”。是“吐屯”职掌与唐御史略同，御史亦以监察为职者也。

惟唐时突厥命其国人为吐屯，以监统属国；此则以高昌国相为之。其上所冠“多波”二字，亦美名也。至此碑立于麹宝茂建昌元年，碑中所云“与突厥同盟结婚”，盖犹其先世事，其后二国世为婚姻。《隋书·高昌传》言“鞠伯雅大母，本突厥可汗女，慈恩《三藏法师传》言“西突厥叶护可汗长子咀度设，是高昌王麹文泰妹婿

”，盖终高昌之亡，常附庸于突厥。《隋书》称其“臣属铁勒”，盖属一时之事矣。

己未九月。

书虞道园高昌王世勋碑后

道园撰此碑，自云据“高昌王世家”，盖畏吾儿旧谱谍也。所记回鹘源流，可与《唐书·回鹘传》相发明。碑云畏吾而之地有和林山，二水出焉曰秃忽刺，曰薛灵哥。”“秃忽刺”即《唐书·回鹘传》之独乐水，《地理志》谓之独逻河。《志》云温昆河、独逻河皆屈曲东北流，至回鹘衙帐北五百里合流。”

案温昆河下流虽入独逻河，然出和林山者，实温昆而非独逻。碑独言“秃忽刺”者，举委以该其源也。“薛灵哥”即《回鹘传》之娑陵水，《地理志》谓之仙娥河，所谓“回鹘牙帐北六七百里至仙娥河”是也。温昆、仙娥二河，均出杭爱山，唐人谓之乌德鞬或郁督军山，此碑云“和林山”，则以地名名之也。碑纪回鹘始祖曰“卜古可罕”，《元史·巴尔术阿而忒的斤传》引作“不可汗”，欧阳玄《高昌契氏家传》作“普鞠可汗”，则两《唐书》所未载。以世次计之，尚在六朝之初，不能求其人以实之矣。碑又言：“卜古可罕传三十余君，至玉伦的斤，数与唐人相攻战，久之乃议和亲。于是唐以金莲公主妻玉伦之子葛励的斤。”

案“玉伦，即【唐书】之“护输”。《唐书·回鹘传》回鹘承宗立，凉州都督王君诬暴其罪，流死壤州。族子瀚海府司马护输乘众怨，共杀君奭，梗绝安西诸国贡道。久之，奔突厥，死。子骨力裴罗立。”案“护”，“玉”声之转，输”、“轮”字之误。“护输”殆本作“护轮”，转为“玉伦”。其子“葛励的斤”，即骨力裴罗，“葛励”亦“骨力”之声转也。“金莲公主”，即宁国公主，以唐乾元元年嫁骨力裴罗，时骨力嗣位已久，不得如碑所云，在玉伦的斤之世也。碑又云：“唐嫁公主，取福山石，后七日而玉伦的斤薨。自是国多灾异，民弗安居，传位者数亡，乃迁诸交州而居焉。”交州，今火州也。此事全与史不合，盖回鹘西徙以后，已不能纪远，其所记，多荒忽不足信，不如两《唐书》之的事实矣。

《唐贤力苾伽公主墓志》跋

此志之首有“驸马都尉故特进兼左卫大将军云中郡开国公踏没施达干阿史德觅觅”衔名，此公主之夫也。《旧唐书·突厥传》“开元三年，默极女婿阿史德胡禄归朝，授以特进”。“胡禄”与此志之“觅觅”殆是一人，胡禄者其号（回纥可汗尊号中有胡禄，字或作合禄，皆美名也）。觅觅者其名也。后觅觅坐事死，公主没入宫，逮毗伽可汗求和，乃许归其亲兄墨特勤私第。志所记事实止于此。

文中天恩载被，礼秦晋于家凡，谓唐许毗伽可汗求和事。乃黄虎痴跋此志，谓唐以公主嫁毗伽可汗，突厥风俗虽与中国殊，亦无从兄弟为婚之法也。默啜之号，志称“天上得果报男突厥圣天骨咄禄默啜可汗”，与《册府元龟》、《资治通鉴》所载开元二年默啜求和表文同，惟无“默啜”二字耳。癸亥长夏，记于京师履道坊北之寓庐。

鞑靼考

鞑靼之名，始见于唐之中叶。阙特勤碑之突阙文中有三十姓鞑靼，OtuzTatar九姓鞑靼，TokuzTatar是为鞑靼初见纪录之始。案阙特勤碑立于开元二十年，则鞑靼之名古矣。李德裕《会昌一品集》卷五，有《赐回鹘盟没斯特勒等诏书》，末云卿及部下诸官，并左相阿波兀等部落，黑车子达怛等，平安好。”又卷八，《代刘沔与回鹘宰相颉于伽思书》云：纥挖斯专使将军踏布合祖云，发日，纥挖斯即移就合罗川居回鹘旧国，兼已得安西、北庭、达怛等五部落。是为鞑靼见于汉籍之始。时唐武宗会昌二年也。嗣于懿宗咸通九年，从朱邪赤心讨庞勋，僖宗中和二年，从李克用讨黄巢，并有功。至后唐、汉、周，仍世入贡，故薛、欧《五代史》及欧、宋《唐书》并记其事，而欧氏于《五代史》并为达怛立传。宋初太祖、太宗朝尚三次入贡，后为西夏隔绝，不与中国通。而两宋人纪录中尚屡见其名，乃《辽史·营卫志》所记诸部族，《百官志》所记属国职名中，皆无鞑靼；本纪中虽三见“达旦”字，亦去其偏旁，《金史》乃并绝其迹。正史中至《明史》始复有《鞑靼传》，而《明史》之《鞑靼传》，实蒙古传也。然则辽、金三百年中，唐宋间所谓鞑靼者，果何往乎？观宋元人之著书，知当时固有鞑靼！其对辽金之关系！决非浅鲜！正史中必不容没其事！而竟不概见！此读史者当发之疑问也。以余之所见，则唐宋间之鞑靼，在辽为阻卜，在金为M，在蒙古之初为塔塔儿，其漠南之汪古部，当时号为白达达者，亦其遗种也。

曷言乎鞑靼在辽为阻卜？在金为阻璞也？《辽史·圣宗纪》开泰元年正月，达旦国兵围镇州，州军坚守，寻引去。而《萧图玉传》云：开泰中，阻卜复叛，围图玉于可敦城，势甚张。图玉使诸军齐射却之，屯于窝鲁朶城。按《圣宗纪》，统和二十二年，以可敦城为镇州，《地理志》，镇州建安军节度，本古可敦城，则《纪》《传》所载地名既合，年岁又同，自是一事，而一称达旦，一称阻卜，是阻卜即鞑靼之证一也。《续资治通鉴长编》（卷五十五）真宗咸平六年七月，契丹供奉官李信来归，言戎主母后萧氏有姊二人，长适齐王，王死自称齐妃，领兵三万屯西鄙驴驹儿河，使西捍塔鞑，尽降之。案《辽史·圣宗纪》，统和十二年八月，诏皇太妃领西北路乌古等部兵及永兴宫分军抚定西边，以萧挾凛督其军事。十五年三月，皇太妃献西边捷，九月，萧挾凛奏讨阻卜捷。而《萧挾凛传》则云：十二年，夏人梗边，皇太妃受命总乌古及永兴宫分军讨之，挾凛为阻卜都详稳。凡军中号令，太妃并委挾凛。

十五年，敌烈部人杀详稳而叛，遁于西北荒，挾凛将轻骑逐之，因讨阻卜之未服者。诸蕃岁贡方物充于国，自后往来若一家焉。挾凛以诸部叛服不常，上表乞建三城以绝后患，从之。考三城者，谓镇州及防、维二州，皆在驴驹河西南，与西夏相去绝远，是统和间太妃西征非讨西夏而实经营阻卜诸部，乃李信谓之西捍塔鞑，是阻卜即鞑靼之证二也。而此事完全之证据，乃在《金史》。《金史·夹谷清臣传》：北_璞叛，上谴责清臣，命右丞相襄代之。又《内族襄传》：襄代清臣，遂屯临潢

，（中略）乃命支军出东道，襄由西道。而东军至龙驹河，为阻僕所围，三日不得出，求援甚急，（中略）襄即鸣鼓进发，（中略）向晨压敌，突击之。围中将士亦鼓噪出大战，获輿帐牛马，众皆奔斡里札河，遣完颜安国追蹙之，众散走。会大雨，冻死者十七八，降其部长，遂勒勋九峰山石壁云云。今按《元朝秘史》（四）大金因塔塔儿箴古真薛兀勒图不从他命！教王京丞相领军来剿捕，逆著浯泐札河将箴古真薛兀勒图袭将来。案王京者，完颜之对音，《圣武亲征录》、《元史·太祖纪》并记此事，皆作“丞相完颜襄”，浯泐札河亦即《金史》之斡里札河（今乌尔载河），是二书记事并相符合。而《金史》之阻僕、《元秘史》谓之塔塔儿，正与《辽史·萧图玉传》之阻卜、《圣宗纪》作达旦者，前后一揆；而塔塔儿一语，为鞑鞑之对音，更不待言。故曰唐宋之鞑鞑，在辽为阻卜，在金为阻僕也。

更从地理上证之。唐时鞑鞑住地，据阙特勤碑侧之突厥文，两记三十姓鞑鞑，皆在黯戛斯、骨利干之后，契丹、白霄之前。日本箭内博士谓黯戛斯在突厥西北，骨利干又在其北，契丹、白霄皆在突厥之东，则在其间之三十姓鞑鞑，当居突厥东北，与金元间之塔塔儿方位全同。其说良是。今假名此部曰东鞑鞑，然此碑突厥文中，尚有九姓鞑鞑，此部住地无可考。然《唐书·地理志》引贾耽《入四夷道里记》云：中受降城正北如东八十里有呼延谷，谷南口有呼延栅，北口有归唐栅，车道也，入回鹘使所经。又五百里至鹏鹑泉，又十里入碛，经麋鹿山、鹿耳山、错甲山，八百里至山燕子井；又西北经密栗山、达旦泊、野马泊、可汗泉、横岭、绵泉、镜泊，七百里至回鹘牙帐。此达旦泊在回鹘牙帐东南数百里，疑以鞑鞑人所居传名。九姓鞑鞑所居，盖当在此。今假名此部曰西鞑鞑。《会昌一品集》所见达怛，其一与黑车子连称者，似与东方之三十姓鞑鞑相当；其一与安西北庭连称者，似即西方之九姓鞑鞑也。而唐末五代以来，见于史籍者，只有近塞鞑鞑。此族东起阴山，西逾黄河、额济纳河流域，至北宋中叶，并散居于青海附近，今假名之曰南鞑鞑。

欧阳公《五代史》之所传，王延德使高昌时之所经，李仁甫《续通鉴长编》之所见，皆是族也。而《辽史》所记阻卜，其分布区域，乃各与此三部鞑鞑相当，李信谓辽齐妃领兵屯西鄙驴驹儿河，西捍塔鞑，而《辽史·文学传》萧韩家奴之言曰：阻卜诸部，自来有之，曩时北至驴驹河，南至边境，人多散居，无所统一，惟往来抄掠。及太祖西征，至于流沙，阻卜诸部望风悉降，是辽时边境以北至驴驹河，皆有阻卜部落，此可拟唐时之东鞑鞑。又《太祖纪》云：天赞二年九月丙申朔，次古回鹘城，丙午，遣骑攻阻卜。《萧图玉传》云：阻卜复叛，围图玉于可敦城。《萧惠传》云：西阻卜叛，都监涅鲁古等将兵来援，遇敌于可敦城西南。又《萧挈不也传》，阻卜酋长磨古斯给降，挈不也逆于镇州西南沙碛间。

案古回鹘城即今外蒙古额尔德尼昭西北之合刺八刺合孙（唐时回鹘牙帐），在鄂尔昆河西岸；可敦城即镇州，其地今虽未能考定，要当在鄂尔昆河之东，喀鲁哈河左右。而阻卜自其西南来，则其住地当在可敦城西南。唐时达旦泊正在此方面，故此部可拟唐时之西鞑鞑。又《辽史·属国表》，圣宗开泰五年，书阻卜酋长魁可来降

。《圣宗纪》作党项魁可来，《兵卫志》言西夏元昊谅作智勇过人，能使党项阻卜掣肘大国。此以阻卜与党项互举连言，则阻卜又南与党项相近。此种阻卜，又可拟唐末五代之南鞑靼。故辽时阻卜分布之广，正与唐宋人所谓鞑靼相同。至见于《金史》之阻牒若北阻牒，则略当唐时之东鞑靼，亦即蒙古人所谓塔塔儿。此亦可由地理上证明之。《金史·宗浩传》云：内族襄以为攻破广吉刺，则阻蹠无东顾之忧。是阻蹠在广吉刺之西，而《元朝秘史》记翁吉刺住地云：合勒合河流入捕鱼儿海子处，有帖儿格等翁吉刺。其记塔塔儿住地，则云：阿亦里兀惕、备鲁兀惕两种塔塔儿，在捕鱼儿海子与阔连海子中间，兀儿失温地面（今鄂尔顺河）。又云：察阿安、阿勒赤、都塔兀惕、阿鲁孩四种塔塔儿，在兀勒灰失鲁格勒只惕地面（今乌尔浑河与色野尔集河合流处），皆东与在喀尔喀河流域之翁吉刺为邻。

又载扯克扯儿地面（今苏鲁克斜鲁山），有塔塔儿人，距翁吉刺之德薛禅家不远，与《金史》所载阻蹠地望无一不合。故《辽》、《金》二史中阻卜阻牒之为鞑靼，自地上证之而有余矣。

若然，辽、金之阻卜、阻牒，于唐宋为鞑靼，于蒙古为塔塔儿，则阻卜、阻牒之名，乌从起乎？又于唐宋以前、蒙古以后，得求此名之源流否乎？然求之前后诸史，绝不见有与阻卜或阻牒相类之名称，余乃不得不设一极武断、极穿凿之假说，曰：阻卜、阻牒者，鞑靼二字之倒误，且非无意之误而有意之误也。何以言之？曰：辽、金人文字中多言鞑靼，如史愿《亡辽录》（《北盟会编》卷二十一引）云：辽于沙漠之北，则置西北路招讨府，（中略）镇摄鞑靼蒙骨迪烈诸国。又，金主亮遣翰林学士韩汝嘉与宋国信使副徐嘉等宣谕公文（《北盟会编》卷二百二十九引）云：向来北边有蒙古鞑靼等，从东昏王时数犯边境。是辽、金时固有鞑靼，其《国史》、《实录》亦当不讳言鞑靼；而《辽》、《金》二史中无之者，曰蒙古人讳言鞑靼故。蒙古人何以讳言鞑靼？曰蒙人本非鞑靼，而汉人与南人辄以此名呼之，固为蒙古人所不喜；且元末修史之汉臣，已不复知鞑靼与蒙古之别，而辽、金史料中所记鞑靼事，非朝贡即寇叛，彼盖误以蒙古之先朝贡于辽、金也，虑其有损国礼，故讳之尤深。当蒙古盛时，《秘史》、《亲征录》并记太祖受金官职事，初未尝以此为讳，然《宋》、《辽》、《金》三史之作，在顺帝之世，其时蒙古之势力既已坠地，故于文字之间尤多忌讳，试举实证以明之。《续资治通鉴长编》于太祖乾德四年、开宝二年、太宗太平兴国八年，并书鞑靼入贡，盖本与《国史》及《会要》，《建炎以来朝野杂记》（乙集十九）亦云：鞑靼于太祖、太宗朝各再入贡，乃《宋史·本纪》于外国朝贡无一不书，独无太祖太宗鞑靼入贡事。王延德《使高昌记》载于王明清《挥麈前录》者，中有鞑靼字凡六处，《宋史·高昌传》全录其文，惟删去有鞑靼字之处。《亡辽录》（《北盟会编》卷二十一引）天祚于保大四年得大石林牙兵，又得阴山鞑靼毛割石兵，自谓天助，欲出兵收复燕云，大石林牙力谏云云；《东都事略·附录》（二）亦云：耶律延禧得大石林牙七千骑，又阴结鞑靼毛褐室韦三万骑助之，而《辽史·天祚纪》则云：天祚既得林牙耶律大石兵，又得阴山室韦谟葛失兵，自谓得天助，再谋出兵收复燕云。《辽史》此节，分明出于

二书，而二书皆有鞑靼字，《辽史》独无。又《松漠记【纪】闻》：余都父子以游猎为名，遁入夏国，夏人问其兵几何，云亲兵二三百，遂不纳。投鞑靼，鞑靼先受悟室之命，其首领诈出迎，具食帐中，潜以兵围之。余都出敌，不胜，父子皆死。

《辽史·耶律余睹传》则云：余睹假游猎为名遁西夏，夏人问汝来有兵几何，余睹以二三百对，夏人不纳，卒。此事与《纪闻》同。当出《纪闻》，而独无投鞑靼被杀事；《金史·叛臣传》亦但言边部杀余睹及其二子，函其首以献，《太宗纪》亦言部族节度使土古厮捕斩余睹及其诸子，而不明言其为何部。是数证者，谓非元人修史时有意删去鞑靼字不可也。

然辽金史料中之鞑靼，固自倍蓰于宋史料，又不必与他事并见，史臣以其不可删，且不胜删也，乃或省其偏旁作达旦字，又创为改字之法。考鞑靼之始见载籍也，其字本作达怛（《会昌一品集》及《册府元龟》），后作达靺（薛、欧《五代史》及《梦溪笔谈》），至宋南渡后，所撰所刊之书乃作鞑靼，鞑字不见于《集韵》、《类篇》，是北宋中叶尚无此字，其加革旁，实涉靺字而误。然辽金史料中，其字当已有作鞑靼者，其倒也或作怛达，或作靺鞨，极与阻牒二字相似，当时史料中或有一二处误作阻牒，或省作阻卜者，史臣乃利用其误，遂并史料中之不误者而尽改之，以避一时之忌讳。其于《辽史》太祖、圣宗纪三处尚存达旦字者，盖史臣所未及改，抑故留此间隙以待后人之考定者也？且《辽史》所见之达旦三处，不独省其偏旁，亦异其书法，凡史家于敌国使来则书聘，属国则书贡，此诸史之通例，《辽史》本纪惟于梁、唐、周、宋四国书聘，后晋、北汉、西夏之称臣或受册而书贡，南唐虽未称臣，亦仍书贡，至塞北诸部更无不书贡者。

惟《道宗纪》太康十年二月庚午朔，萌古国遣使来聘，三月戊午，远萌古国遣使来聘。独书聘者，以示蒙古之先与辽世为敌国也。而《太祖纪》书神册三年二月达旦国来聘，《圣宗纪》书统和二十三年六月达旦国九部遣使来聘。亦书聘者，盖元代修史诸臣，已不知鞑靼与蒙古之分，误以辽史料中之鞑靼为蒙古之先，故以敌国书法书之，与《道宗纪》之书萌古来聘，同一用意。由此二条，可见元人修史时讳言鞑靼之隐。《金史》之中亦有类是之特笔。如西北西南招讨司下之钺军详隐，本有十处，今《地理志》、《兵志》所载均为九处，《地理志》有移典钺而无萌古钺，《兵志》反是。其实二者均当有之，盖萌古、萌骨之为蒙古，此人人所易知，元人必以蒙古列于金之钺军为讳，故于《地理志》删之，而于《兵志》亦删去移典钺，以与《地理志》之九处相应。然于其首大书曰：西北西南之钺军十，明移典、萌骨二钺皆所当有，故于二《志》互见，以使人推考得之。《兵志》部族节度使有萌骨部族，而《地理志》中无之，亦由此故。其所以删彼而存此者，缘《地理志》记各部族节度使各详稳，皆自为一行，易属人目；若《兵志》之文，则蝉联而下，非通读全文，难以觉察故也。此皆史臣之微辞。《辽》、《金》二史中之阻卜、阻牒，亦犹是矣。要之吾侪既发见元人讳言鞑靼之隐，则其删削事实，改易名目，并不足深怪，而上所陈述武断穿凿之假说，固自有可能性在也。

漠南鞑靼（阴山鞑靼）之见于载籍也，较漠北东、西二鞑靼（三十姓鞑靼及九姓鞑靼）为后。唐会昌初年，回鹘为黠戛斯所破，其一部南走中国近塞。时李德裕为相，筹所以防御招抚之者甚备，具见《会昌一品集》中。而其中所记近塞蕃族，仅有沙陀、契苾、退浑、党项四部而无鞑靼。至咸通九年，鞑靼始从朱邪赤心讨庞勋，赤心时为蔚州刺史，则尔时鞑靼必已居蔚州近塞，知鞑靼之徙阴山左右，当在会昌与咸通之间。然则未徙之时，果居何地？抑称何名？自欧史以来颇有异说。余谓阴山鞑靼当即三十姓鞑靼或九姓鞑靼一部之南下者，盖当时东、西二鞑靼均有南徙之可能性，即《会昌一品集》中之达怛与黑车子连称者，余前既定为三十姓鞑靼。当唐之季，黑车子一族实已南徙幽州近塞（见拙著《书津田博士室韦考后》），则其邻部之达怛，同时亦南徙并州近塞，固非不可解之事。又九姓鞑靼住地，余前以贾耽《道里记》中之达旦泊拟之，此泊在回鹘牙帐东南，当回鹘入唐之道。回鹘既破，此部相率南徙，亦自然之势也。日本箭内博士乃据阎复驸马高唐忠献王碑所引《汪古氏家传》及《蒙鞑备录》，谓阴山鞑靼出于沙陀，乃突厥人种，与漠北鞑靼之属蒙古人种者全非同族。

余意此二族在唐并为鞑靼，在《辽史》并为阻卜，自不既视为异种。但南徙之后，与沙陀、党项诸部杂居，故此部中颇含有他种人，而其与党项之关系，尤较沙陀为密，故昔人多互称之。如折氏本党项大姓，而《册府元龟》（卷九百七十二）之党项折文通，同卷又称之为达怛都督折文通；又《辽史·属国表》有阻卜酋长魁可，而《圣宗纪》作党项魁可，宋史·党项传》，景德二年，熟户旺家族击夏兵，擒军主一人以献；又大中祥符二年，夏州略去熟户旺家族首领都子等来归。案旺家即白鞑靼名族汪古之异译，而《宋史》以为党项部族。《元史·阿剌兀思剔吉忽里传》云：阿剌兀思剔吉忽里，汪古部人。金源氏堑山为界，以限南北，阿剌兀思剔吉忽里以一军守其冲要。而《蒙鞑备录》则云：金章宗筑新长城，在静州之北，以唐古钁人戍之。唐古亦即党项之异译，盖鞑靼与党项，自阴山贺兰山以西，往往杂居，故互受通称。然若据此而遽谓阴山鞑靼出于党项，则与谓其出于沙陀者，同为无根之说也。故余对箭内博士之二元论，宁主张一元论，以唐之鞑靼、辽之阻卜名称之统一，非是无以解释之故也。

萌古考

余曩作《鞑靼考》，始证明元之季世讳言鞑靼，故鞑靼之名，虽已见于唐代，而《宋》、《辽》、《金》三史中乃不概见，又或记其实而没其名，其于蒙古亦然。蒙兀之名亦见于唐世，《辽史》虽两记萌古来聘事，而部族属国中并无其名，《金史·兵志》虽有萌骨部族节度使及萌骨钁详稳，而《地理志》部族节度使八处详稳、九处皆无之。知元人讳言其祖与讳言鞑靼同。乃就书传所记蒙古上世事实，汇而考之，署曰《萌古考》。一年以来，频有增益，既别成《南宋人所传蒙古史料考》，又就前考稍有补正，因并写为此篇，以俟异日论定焉。

《旧唐书·北狄传》：室韦，契丹之别类也（中略），其北大山之北，有大室韦，其部落傍望建河居。其河源出突厥东北界俱轮泊，屈曲东流，经西室韦界，又东经大室韦界，又东经蒙兀室韦之北、落俎室韦之南；又东与那河忽汗河合，又东经南黑水秣鞞之北、北黑水秣鞞之南，东流注于海。《唐书·北狄传》：室韦直北曰纳北支部，北有大山。山外曰大室韦，濒于室建河。河出俱伦泊，迤而东；河南有蒙瓦部，其北落坦部。水东合那河忽汗河，又东贯黑水秣鞞。故跨水，有南、北部，而东注于海。

案新、旧二《书》记室韦事大略相同，知《新书》实本《旧书》，惟望建河作室建河，蒙兀作蒙瓦，落俎作落坦，为异耳。望建河所出之俱轮泊，即今呼伦泊，《元朝秘史》之阔连海子也。今由呼伦泊东出者，惟额尔古纳河，东北流与黑龙江合，东流与混同江合。混同江之北源为嫩江，即《魏书·失韦传》之难水。此《传》之那河，《元朝秘史》之纳浯河也，而此那河在忽汗河前。忽汗河者，今之呼尔喀河。然则此《传》之那河，非谓其下流之混同江，而谓其上流之嫩江也。然额尔古纳河与嫩江实不相通，故日本津田博士（左右吉）勿吉渤海诸考，以此《传》所记为出传闻之误，其说是也。然则望建河只是额尔古纳河之古名，不兼黑龙江、混同江言之；蒙兀室韦亦只在额尔古纳河之下游，然后后来蒙古住地在额尔古纳河敖嫩河流域者，始可得而说矣。

《五代史记·四裔附录》引胡峤《陷虏记》：契丹东北至靺鞨，其人髡首，披布为衣，不鞍而骑，大弓长箭，尤善射，遇人辄杀而生食其肉，契丹诸国皆畏之。契丹五骑遇一靺鞨，则皆散走。其国三面皆室韦。

案此靺鞨，日本箭内博士（亘）《鞑靼考》以《辽史》之梅里急、《元朝秘史》之蔑儿乞惕当之。然元初蔑儿乞惕住今色楞格河流域，远在契丹西北，与此记东北之说不合，其左右亦绝无室韦部落。惟《唐书》之蒙兀室韦，则西有大室韦，北有落俎室韦，东亦与兴安岭东之室韦本部相望，与三面皆室韦之说合。又《唐书·地理志》载贾耽《入四夷道里记》云：俱轮泊四面皆室韦，蒙兀室韦在出俱轮泊之望建河南；又南与契丹接，故云其国三面皆室韦矣。然则靺鞨殆即蒙兀室韦之讹转

，后世所以称蒙古者，曰梅古悉、曰谟葛失、曰毛割石、曰毛揭室、曰毛揭室韦、曰萌古子、曰盲骨子、曰蒙国斯、曰蒙古斯、曰萌子、曰蒙子，皆与此鞑劫子之音相关系，似不能以梅里急、篋儿乞惕当之也。

《契丹国志》（二十二）四至邻国地理远近，正北至蒙古里国。国无君长所管，亦无耕种，以弋猎为业，不常其居，每四季出行，惟逐水草。所食惟肉酪而已。不与契丹争战，惟以牛羊驼马皮毛之物与契丹为交易。南至上京四千余里。

案《契丹国志》系采辑诸书而成！此条今未见所本！当出赵志忠《阴山杂录》诸书。

《辽史·道宗纪》太康十年二月庚午朔，萌古国遣使来聘。三月戊申，远萌古国遣使来聘。

凡史家于敌国使来则书聘，属国则书贡，此诸史之通例也。《辽史·本纪》，惟于梁、唐、周、宋四国书聘；后晋、北汉、西夏以称臣或受册而书贡；南唐虽未称臣，亦仍书贡；至漠北诸部，更无不书贡者。此于萌古及远萌古独书聘，以示蒙古之先与辽世为敌国也。又《太祖纪》，神册三年二月达旦国来聘，《圣宗纪》，统和二十二年六月，达旦国九部遣使来聘。亦书聘者，缘元时修史诸臣不知蒙古与鞑靼之别，误以鞑靼为蒙古之先，故亦以敌国书法书之也。元人修三《史》时，讳言鞑靼及蒙古，余已于《鞑靼考》中详论之，此二条乃史臣删削未尽者，然亦异其书法。蒙古入贡于辽，当不止此二次也。此区别萌古与远萌古为二，知当时实分数部。《辽史·营卫志》有鹤刺唐古部，《钦定辽史国语解》（三）云：蒙古语鹤刺，远也。则远萌古国，其本语当云鹤刺萌古国。

然此为契丹人分别之辞，而非蒙古人所自称，不待言也。

《辽史·天祚纪》保大二年四月，金已取西京，沙漠以南部族皆降，上遂遁于讹沙烈。时北部谟葛失赉马驼食羊。六月，谟葛失以兵来援，为金人败于洪灰水，擒其子陀古及其属阿敌音。同上，保大四年春正月，上趋都督马哥军，金人来攻，弃营北遁，马哥被执。谟葛失来迎，赉马驼羊，又率部人防卫，封谟葛失为神于越王。同上，天祚既得大石林牙兵，又得阴山室韦谟葛失兵，自谓得天助，再谋出兵，收复燕云。

史愿《亡辽录》（三朝北盟会编》卷二十一引）：天祚于保大四年得大石林牙兵，又得阴山鞑靼毛割石兵，自谓天助，谋出兵收复燕云。《东都事略·附录》（二）耶律延禧得大石林牙七千骑，又阴结鞑靼毛揭室韦三万骑助之。《金史·太祖纪》天辅六年（辽保大二年）五月，谟葛失遣其子菹泥格失贡方物。同上《太宗纪》，天会三年三月，斡鲁以谟葛失来附，请授印绶。

案谟葛失、毛割石、毛揭室韦（当作毛揭室韦，见下），上与蒙兀室韦鞑劫子，下与萌古子、萌骨子、蒙国斯（见《三朝北盟会编》卷二百三十）、蒙古斯诸名相应，亦当指蒙古。惟《辽》、《金》二史所记谟葛失事，一若人名，非部族名者，其实不然。《续资治通鉴长编记【纪】事本末》（卷一百四十三），宣和五年二月，兀室杨璞到馆，谓赵良嗣等曰：西京路疆土，又非原约当割，若我家不取，待分与河西毛揭室家，必得厚饷。河西，谓夏国，毛揭室，谓鞑靼也。云云。毛揭室即毛揭室韦，亦即谟葛失，是谟葛失是部名非人名之证。其云毛揭室为鞑靼者，缘中国人不甚分别蒙古、鞑靼故也。又《辽》、《金》二史记谟葛失若人名然者，缘蒙古之祖先受封入贡于辽、金，为元末所深讳，故变其辞如此，亦犹《亡辽录》、《东都事略》记保大四年天祚南下事，并有鞑靼，而《辽史》特删之也。且谟葛失、毛割石之为蒙古，尚有他证。赵良嗣《燕云奉使录》（《北盟会编》卷九引）载良嗣问金史[使]乌歇等曰：闻契丹旧酋走入夏国，借得人马过黄河，夺了西京以西州县，占了地土不少，不知来时知子细否？使副对曰：来时听得契丹旧酋在沙漠，已曾遣人马追赶，终须捉得。兼沙漠之间是鞑靼、萌古子地分，两国君长并已降拜了本国，却走那里去？！国书中已载矣。云云。是天祚北走时，所依乃鞑靼、蒙古二部；其所率以南下者，亦即此二部之众。

其谓两国已降拜了本国者，即指天辅六年谟葛失贡方物之事也。然则视谟葛失、毛割石、毛揭室韦为蒙古之对音，与史事亦合。顾保大二年三月天祚走入夹山，则谟葛失所居，当距夹山不远，与前之蒙兀室韦、后之蒙古，住地不合；然当辽之世，蒙古人已有一部南徙阴山左右，辽西南面招讨司所属有梅古悉部（《营卫志》梅古悉部，圣宗以唐古户置，唐古疑本作萌古，《辽史》以忌讳改之也），金西北、西南二路之钚军，有萌骨钚详稳（见《金史·兵志》，而《地理志》详稳九处中删之），皆谓此蒙古一部之南徙者。《马哥（可）·保（波）罗记行》记天德军（金丰州，在今归化城附近）事云：此地，我辈呼之为Gog及Magog国，而彼等自称为汪古Ung及萌古Mungul国。当鞑靼移动（谓蒙古南征）之前，此二族早住此地，故以名之。汪古乃此地土著，萌古亦有时为鞑靼之别称，云云。据此记事，则蒙古未兴《松漠记[纪]闻》：盲骨子，《契丹事迹》谓之蒙古国，即《唐书》所记之蒙兀部。同上，盲骨子，其人长七尺，捕生麋鹿食之。金人尝获数辈至燕，其目能视数十里，秋毫皆见，盖不食烟火故眼明。与金人隔一江，尝渡江之南为寇，御之则返，无如之何。

案此所记者，蒙古本部事也。蒙古人不火食，事或有之，胡峤所记鞑劫子杀人生食其肉之说，即由此传讹，江盖谓克鲁伦河。

《建炎以来系年要录K卷九十六），绍兴五年（金天会十三年）。

是冬金主亶以蒙古叛，遣领三省事宋国王宗盘[磐]提兵破之。蒙古者，在女真之东北，在唐为蒙兀部，其人劲悍善战，夜中能视，以鲛鱼皮为甲，可捍流矢。（下略

）原注：以张汇《金虏节要》、洪皓《记闻》、王大观《行程录》[参修]。蒙国，《编年》谓之萌骨子，《记闻》谓之盲骨子，今从《行程录》）同上（卷一百三十三）绍兴九年（金天眷二年）女真万户呼沙呼（此四库馆臣校改《大金国志》作胡沙虎，当是《要录》原文）北攻蒙古部（《国志》作盲骨子）粮尽而还。蒙古追袭之，至上京之西北，大败其众于海岭。同上（卷一百四十八）绍兴十三年（金皇统三年）三（应为四）月，蒙古复叛金，金主亶命将讨之。初，鲁国王昌既诛，其子星哈都（《大金国志》作胜花都）郎君者，率其父故部曲以叛，与蒙古通，蒙古由是强取二十余团寨，金人不能制。（原注：据王大观《行程录》。案《松漠纪闻》，达贵长子大伊玛被囚，遇赦得出，欠子勘，今为平章，皓以今年六月归，乃不见此事，未知孰的。今姑附见，更俟详考）同上（卷一百五十五），绍兴十六年（金皇统六年）八月，金元帅兀术之未卒也，自将中原所教神臂弓弩手八万人讨蒙古。因连年不能克，是月，领汴京行台尚书省事萧博硕诺（《大金国志》作萧保寿奴）与蒙古议和，割西平河以北二十七团寨与之；岁遗牛羊米豆，且命册其酋鄂伦贝勒（《国志》作熬罗孛极烈）为蒙古国王，蒙人不肯。（原注：据王大观《行程录》）同上（卷一百五十六）绍兴十七年，（金皇统七年）三月，蒙古与金人始和，岁遗牛羊米豆帛絹之属甚厚。于是蒙古鄂伦贝勒乃自称祖元皇帝，改元天兴。金人用兵连年，卒不能讨，但遣精兵分割要害而还（原注：此据王大观《行程录》。案《录》称岁遗牛羊五十万口、米豆共五十万斛、絹三十万匹、帛三十万两，恐未必如此之多。今削去其数，第云甚厚，更俟详考）。《旧闻证误》（卷四），皇统四年秋，元帅遣使报监军（原注：时监军者讨蒙古）曰：南宋以重兵逼胁，和约大定，除措置备御，早晚兵到矣。至次年冬十月，元帅亲统大军十万众，水陆并集（原注：出王大观《行程录》）。案皇统四年甲子，本朝绍兴十四年也。前二年已分划地界矣，不知兀术何以历二年之久而后加兵于蒙古？恐必有误。同上（卷四），皇统七年春三月，国使还，蒙古许依所割地界，牛羊倍增；金国许赐牛羊各二十五万口，今有倍之。每岁仍赂絹三十万匹、帛三十万两，许从和约（原阙书名，四库本注云：当出王大观《行程录》）。案本朝岁遗北人银絹各二十五万匹两，而北人遗蒙古乃又过之，恐未必然。

刘时举《续宋中兴编年资治通鉴》（卷四），绍兴五年冬，蒙古叛金。同上，八年，金伐蒙，为所败。同上，十七年，金与蒙国议和，蒙国自称祖元皇帝。《大金国志·熙宗纪》，天会十三年冬，皇伯宋王宗盘[磐]提兵攻盲骨子，败之。同上，天眷元年，女真万户胡沙虎北攻盲骨子，粮尽而遗，为盲骨子袭之，至上京之西北，大败其众于海岭（下皇统六年又出此条）。同上，皇统七年，滕骨国平。初，挾懒既诛，其子胜花都郎君者，率其父故部曲以叛，与滕骨通。兀术之未死也，自将中原所教神臂弓手八万人讨之，连年不能克。皇统之六年，复遣萧保寿奴与之和，议割西平河以北二十七团寨与之，岁遗牛羊米豆，且册其酋长熬罗孛极烈为滕辅国王，至是始和，岁遗甚厚。于是熬罗孛极烈自称祖元皇帝，改元天兴。大金用兵连年，卒不能讨，但遣精兵分据要害而还。《建炎以来朝野杂记》（乙集卷十九）有蒙国者，在女真之东北，唐谓之蒙兀部，金人谓之蒙兀，亦谓之萌骨。人不火食，夜

中能视，以鲛鱼皮为甲，可捍流矢。自绍兴时叛，都元帅宗弼用兵连年，卒不能讨，但分据要害，反厚贿之。其主僭称祖元皇帝，至金亮之际，并为边患，其来久矣。《蒙鞑备录》，旧有蒙古斯国，在金人伪天会间，亦尝扰金虏为患。金人尝与之战，后乃多与金帛和之。案李谅《征蒙记》曰：蒙人尝改元天兴，自称太祖元明皇帝。今鞑人甚朴野无制度，珙尝讨究于彼，闻蒙已残灭久矣。《直斋书录解題》：《征蒙记》一卷，金人明威将军登州刺史李大谅撰。建炎钜寇之子，随其父成降金者也。所记蒙人（原作家人，因字形相近而误）跳梁，自其全盛时已不能制矣。

以上十五条，李氏所记出于王大观《行程录》，赵珙所录出于李大谅《征蒙记》，而刘时举、宇文懋昭又本于李氏。李氏、赵氏对《行程录》、《征蒙记》二书本执存疑之态度，余于《南宋人所传蒙古史料考》始证明二书皆南宋人伪作。其所记事，无一不与史实相矛盾，语已具彼考中，兹不复赘。

《宋史·洪皓传》，绍兴十二年八月，金人来取赵彬等三十人家属，诏归之。皓谓秦桧曰：彼方困于蒙兀，始示强以尝中国，若遽从之，谓秦无人，益轻我耳。

案此出《盘洲文集》（卷七十四）《忠宣行状》，可知金皇统间蒙古实有寇金之事，但不至如《行程录》、《征蒙记》之所载耳。

炀王《江上录》（《三朝北盟会编》二百四十三引），正隆三年，下诏小龙虎大王镇守蒙古。《三朝北盟会编》（卷二百二十九），绍兴三十一年（金正隆六年）七月廿一日，金遣翰林学士韩汝嘉与国信使副徐襄、张抡宣谕公文云：向来北边有蒙古鞑靼等，从东昏王时，数犯边境。自朕即位，久已宁息。顷准边将屡申此辈又复作过，比之以前保聚尤甚，众至数十万。（下略）

案此事缘金主亮已决南伐之计，故藉北征蒙鞑为辞，以拒宋使入境，非真有此事也。

楼钥《北行日记》（卷下），乾道六年正月十五日，宿相州城外安阳驿，把车人言，去年十二月，方差使一番为年时被蒙子国炒。旧时南畔用兵，尽般兵器在南京，今却般向北边去。三月中，用牛三千头般未尽，间被黄河水涨后且休。又云，蒙古国作梗，太子自去边头议和，半年不决，又且归，今又遣莫都统提兵去。

案蒙子即蒙古子之略，《系年要录》（卷一百九十一）张抡问韩汝嘉曰：萌子小邦，何烦皇帝亲行！是当时亦谓蒙古谓萌子、蒙子也。

宋乾道六年，即金大定十年。《金史·世宗纪》，是年八月壬申，遣参知政事宗叙北征巡。又《宗叙传》，十一年，奉诏巡边。六月至军中，将战，有疾，诏以右丞相纥乞石烈志宁代宗叙还。《志宁传》亦云，十一年代宗叙北征。虽二《传》纪事

并后于《本纪》一年，然此数年中，金有事于北方可知也。《金史》但言北巡、北征，而不言所征者何部，赖楼氏所记知之。若太子自去边头议和云云，则固齐东野语也。要之，《金史》于金人用兵蒙古事往往多所忌讳，不明白书之如此，及章宗朝兵事皆是。然则蒙古故事，宋人既增其伪，而元人复汨其真，诚可谓史学之不幸也。《蒙鞑备录》云：金虏大定间，燕京及契丹地有谣言云，鞑靼来，鞑靼去，赶得官家没去处。葛酋雍宛转闻之惊曰，是必鞑人为我国患。乃下令极于穷荒出兵剿之，每三岁遣兵向北剿杀，谓之减丁。（中略）至伪章宗立，明昌年间不令杀戮，是以鞑人稍稍还本国，添丁长育。案此事正史绝无纪载，惟《世宗纪》书大定七年闰七月甲戌，诏秘书监移刺子敬经略北边；又十年八月壬申，遣参知政事宗叙北巡。十年之役，既缘蒙古，则七年之役，当亦相同。二役相去适三年，每三岁减丁之说，殆由此传讹。然大定十年以后，《纪》不复书巡边事，惟《唐括安礼传》载大定十七年诏遣监察御史完颜觐古速行边，而筑壕之议，即起于是年。可知大定之世，北边未尝无事也。

《金史·夹谷清臣传》，明昌六年，清臣受命出师，行尚书省事于临潢府。遣人侦知虚实，以轻骑八千令宣徽使移刺敏为都统，左卫将军充招讨使，完颜安国为左右翼，分领前队；自选精兵一万以当后队。进至合勒河，前队敏等于栲栳冻攻营十四，下之。回迎大军，属部斜出，掩其所获羊马资物以归。清臣遣人责其贋罚。北阻蹠由是叛去。

案《金史·章宗纪》，于明昌承安间兵事，不书叛者主名，此传亦然。今以地理考之，合勒河者，《元朝秘史》之合勒合河，今之喀尔喀河也；栲栳冻者，《唐书》之俱轮泊，《秘史》之阔连海子，今之呼伦泊也。移刺敏等自合勒河北进，则所至者为栲栳冻东畔，此地当金元间为蒙古合答斤撒勒只兀惕二部所居。《圣武亲征录》，太祖责汪罕书曰：我时又如青鸡海鹑，自赤儿黑山飞越于盃而之泽掬斑脚鸽以归君，此谁？哈答斤散只兀弘吉刺诸部是也。案此处有缺文，贝勒津译拉施特《集史》中太祖书曰：我如鹞鸟，自赤儿古山飞越捕鱼儿淖尔，擒灰色蓝色足之鹤以致于汝。此鹤谓谁？朵儿奔塔塔儿诸人是也。我又如蓝色之鹰，越古阑淖尔，擒蓝色足之鹤以致于汝。此鹤谓谁？哈答斤撒儿助特翁吉刺特是也（据洪侍郎钧汉译本）。案捕鱼儿淖尔即贝尔泊，古阑淖尔即呼伦泊，则合答斤撒勒只兀惕二部，正在呼伦泊之东，清臣所攻即此二部。《内族宗浩传》所谓连岁扰边，皆合底忻、山只崑二部为之者，亦于此传得其证矣。

同上《内族宗浩传》：北方有警，命宗浩佩金虎符驻泰州，便宜从事。北部广吉刺者尤桀骜，屡胁诸部入塞。宗浩请乘其春莫【暮】马弱攻之，时阻蹠亦叛，内族襄行省事于北京，诏议其事。襄以为若攻破广吉刺，则阻蹠无东顾之忧，不若留之以牵其势。宗浩奏，国家以堂堂之势，不能扫灭小部，顾欲藉彼为捍乎？！臣请先破广吉刺，然后提兵北灭阻蹠。章再上，上从之，诏谕宗浩曰：将征北部，固卿之诚，更宜加意，毋致后悔。宗浩覘合底忻与婆速火相结，广吉刺之势必分；彼既畏我见讨

，而复掣肘仇敌，则理必求降，可呼致也。因遣主簿撒领军为先锋，戒之曰：若广吉刺降，可就征其兵以图合底忻，仍使余部所在，速使来报，大军当进与汝夹击，破之必矣。合底忻者，与山只昆皆北方别部，恃强中立，无所羁属，往来阻幙、广吉刺间，连岁扰边，皆二部为之也。

撒入敌境，广吉刺果降，遂征其兵万四千骑，驰报以待。宗浩北进，命人赍三十日粮，报撒会于移米河共击敌，而所遣人误入婆速火部，由是东军失期。宗浩前军至忒里葛山，遇山只昆所统石鲁、浑滩两部，击走之，斩首千二百级，俘生口车畜甚众。进至呼歇水，敌势大蹙，于是合底忻部长白古带山只昆部长胡必拉及婆速火所遣和火者皆乞降，宗浩承诏谕而释之。胡必拉言，所部必烈土，近在移米河，不肯偕降，乞讨之。乃移军趋移米，与迪烈土遇，击之，斩首三百级，赴水死者十四五，获牛羊万二千，车帐称是。合底忻等恐大军至，西渡移米，弃重遁去。

撒与广吉刺部长/里虎追蹙及至竺里不水！大破之。婆速火九部斩首、溺水死者四千五百余人，获驼马牛羊不可胜计。军还，婆速火请内属，并请置吏。上优诏褒谕，迁光禄大夫，以所获马八千置牧以处之。

案此亦记金人用兵蒙古事也。广吉刺，即《辽史·天祚纪》之王纪刺，《元朝秘史》之翁吉刺，《元史》之弘吉刺也。元世宗吉刺歹、瓮古歹二氏，入蒙古七十二种中（《辘耕录》一h而《金史·百官志》光吉刺为白号姓，蒙古为黑号姓，则广吉刺疑本非蒙古同族也。此传有广吉刺部长忒里虎，即《秘史》蒙文卷四所谓翁吉刺敦迭儿格克，卷六所谓合勒合河入捕鱼儿海子处有帖儿格等翁吉刺，《圣武亲征录》所谓弘吉刺部长帖木哥者也，婆速火则广吉刺之别部，《元史·特薛禅传》，特薛禅，孛思忽儿弘吉刺氏；婆速火，即孛思忽儿之异译；又婆速火所遣和火者，乃特薛禅之子案陈那颜之弟火忽也。广吉刺与婆速火本是一族，故宗浩言合底忻与婆速火相结，广吉刺之势必分也。合底忻、山只昆二部，皆蒙古奇渥温氏。《秘史》

（一）朶奔篋儿干之子，不忽合塔吉做了合答斤姓氏，不忽秃撒勒只做了撒勒只兀惕姓氏，孛端察儿做了孛儿只斤姓氏，此合底忻即合答斤，山只昆即撒勒只兀惕，皆孛端察儿二兄之后。《秘史》蒙文（四）有合答斤撒勒只兀惕相和的种一语，知二族本自相合，若必列土、迪列土，传文前后互异，不知必、迪二字孰是。如必字不误，则必烈土当即《秘史》之别勒古讷惕，此亦与合答斤撒勒只兀惕同出于朶奔篋儿干。或此族中微，乃为撒勒只兀惕所役属耳。传中地名，如忒里葛山，当即今之特穆根山；呼歇水，当即辉河；移米河，当即伊敏河，一名依奔河，并在呼伦泊东南，与弘吉刺合答斤撒勒只兀惕地望皆合，惟竺里不水无考耳。此传所记宗浩北伐事，以《章宗纪》及《内族襄传》参校之，在承安三年。

考金自明昌以后，北垂多事，《纪》、《传》于防边事岁不绝书，而不明言所防者何部。钱竹汀《金史考异》乃疑《大金国志》所记爱王事为实有其人，殊不知爱王事出金人《南迁录》，其书乃南人伪撰，宋人已有定论，绝不足据。惟此传明言连

岁扰边，皆合底忻、山只崑二部为之，然后章宗一朝之边患，始得其主名。又案《董师中传》，明昌四年，师中上疏曰：今边鄙不驯，反侧无定，必里哥孛瓦贪暴强悍，深为可虑。又云：南北两属部数十年捍边者，今为必里哥孛瓦诱胁，倾族随去。考必里哥亦云毕勒哥、必勒格，《辽史·天祚纪》有回鹘王毕勒哥，《秘史》俺巴孩罕之父名想昆必勒格，乃蛮太阳罕之父，称亦难察必勒格罕，是毕勒哥、必勒格，乃美名或爵名，其名当为孛瓦。孛瓦即此传之合底忻部长白古带，亦即《秘史》蒙文（四）之合答斤部长巴忽撒罗吉也。孛瓦、白古带、巴忽，相为对音，甚为明白，然则为明昌承安间之边患者，合底忻其首也。

其余诸部，惟广吉剌一败移刺睹之兵，阻蹊则本从金师北伐，后因争俘获而叛，故明昌承安间之兵事，非对鞑靼而对蒙古也。《金史·李愈传》，愈于泰和二年上书，谓北部侵我旧疆千有余里，不能雪耻，则当时部族之猖獗与金师之失利，可想而知。故自明昌之末，先后遣丞相夹谷清臣、内族襄行省于临潢北京，又遣尚书右丞夹谷衡行院于抚州，出重臣以临之，筑壕堑以备之。而明昌六年夹谷清臣栲栳冻之役，承安元年内族襄斡里札河之役，三年内族宗浩移米河之役，最为大举。以今考之，惟斡里札河一役系伐鞑靼，其前后二役，皆为蒙古也。此传所云连岁扰边皆二部为之者，确为史家特笔，盖元之季年，讳言鞑靼，即蒙古寇金之事，当时亦不乐闻，故《纪》、《传》虽偶见广吉剌、合底忻、山只崑分部之名，而此诸部之总名迄不一见，但浑言北部而已。当此诸部寇金之时，成吉思汗已崛起三河之源，斡里札河一役，实与金人掎角以覆阻蹊，而此役与移米河一役，诸部受创颇巨，故泰和元年漠北十一部共立札木合为局儿可汗，翁吉剌、合答斤撒勒只兀惕、塔塔儿皆与焉。

此固对成吉思汗之同盟，亦对女真之同盟也。阔亦田之役，诸部尽为成吉思汗所败，金之边患亦以稍息。成吉思汗亦有事于克烈乃蛮诸部，未遑南伐，逮诸部既灭，遂一举而下中都，上距移米河之役不过十六年，亦可谓兴之暴矣。元人以章宗朝边患虽非孛儿只斤氏，而实其同族，故隐约书之。余顷考鞑靼事，知《辽》、《金》二史中有待发之覆，因汇举蒙古上世事实疏通证明之，庶足为读史者之一助乎！

丁卯四月八日重改正。

南宋人所传蒙古史料考

凡研究史学者，于某民族史，不得不依据他民族之纪载。如中国塞外民族，若匈奴、若鲜卑、若西域诸国，除中国正史中之《列传》、《载记》外，殆无所谓信史也。其次若契丹、若女真，其文化较进，记述亦较多，然因其文字已废除，汉人所编之辽、金二史外，亦几无所谓信史也。至于蒙古一族，虽在今日尚有广大之土地与行用之文字，然以其人民沉溺宗教，不事学问。故当时《纽察脱卜赤颜》（《秘史》）与《阿儿坛脱卜赤颜》之原本，已若存若亡，反藉汉文及波斯文本以传于世。且其国文字创于立国之后，于其国故事，除世系外，殆无所记载，故此族最古之史料，仍不能不于汉籍中求之。而汉籍中所载金天会皇统间蒙古寇金及金人款蒙一事，在蒙古上世史中，自为最重大之事项。宋时记此事者有二专书，今虽并佚，而尚散见于他籍。其中宇文懋昭《大金国志》一种，传世尤广。

西人多桑作《蒙古史》于千一百四十七年，书蒙古忽都刺伐金，金与议和而退，与《国志》所记年岁相合，盖即本诸国志者也。嗣后，洪侍郎钧、屠敬山寄、柯学士劭杰，皆参取宇文《国志》及多桑书以记此事。日本那珂博士迈世于《成吉思汗实录注》中引宇文氏书，但以宇文氏书中之“熬罗孛极烈”为蒙古之“合不勒罕”而非“忽都刺罕”。然其信宇文氏书，与诸家无异。余去岁草《辽金时蒙古考》，亦但就《国志》录之，当时虽未敢深信，顾未得其所本，姑过而存之，亦未加以辨证。嗣读李心传《建炎以来系年要录》及刘时举《续宋中兴编年资治通鉴》，并记此事，而《要录》尤详，始知《续鉴》、《国志》皆本李氏。李氏记此事凡五条，次条无注，首条及后三条并注云：“出王大观《行程录》。”而李氏别撰《旧闻证误》，所引王大观《行程录》二条，语亦略同。

又李录记金人杀宇文虚中事，引征《蒙记》一条，云王大观《行程录》与之同，又云“二人皆北人，益知虚中死节无疑也”。知王大观乃金人，其人盖与于征蒙之役，因作《行程录》，与《征蒙记》为同时之作，故二书记事，往往互相表里。如赵珙《蒙鞑备录》所引蒙古称帝改元一事，徐梦莘《三朝北盟会编》所引胜花都郎君北走、宇文虚中谋反二事，并与《行程录》同。顾《征蒙记》一书，徐氏《会编》、岳珂《桧史》、李氏《要录》、赵氏《备录》并引之，陈振孙《直斋书录》亦有其书，是宋末犹有传本。而《行程录》，则除李氏外，未有征引及之者。虽二书显晦之不同，然其记事则一也。然则此重大事项，有同时人之记述，又有二书互相羽翼，且《征蒙记》一书，又出于蒙古未兴以前，史料之可信，宜无过于此者。然细考二书之记事，乃全与史实不合，盖宋南渡初叶人所伪作而托之金人者。今集录其原文，一一辨之，于蒙古上世史之研究，不为无裨焉。

一、《建炎以来系年要录》（卷九十六）：“绍兴五年（金天会十三年）是冬，金主亶以蒙古叛，遣领三省事宋国王宗盘提兵破之。蒙古者，在女真之东北，在唐为蒙兀部，其人劲悍善战，夜中能视，以鲛鱼皮为甲，可捍流矢。”（下略。原注以

张汇《金虏节要》、洪皓《记闻》、王大观《行程录》参修《蒙古编年》谓之萌骨子，《记闻》谓之盲骨子，今从《行程录》）

二、同上（卷一百三十三）：“绍兴九年（金天眷二年）女真万户呼沙呼（此四库馆臣校改《大金国志》作胡沙虎，当是《要录》原文）北攻蒙古部（《国志》作盲骨子）粮尽而还。蒙古追袭之，至上京之西北，大败其众于海岭。”

三、同上（卷一百四十八）：“绍兴十三年（金皇统三年）三月，蒙古复叛金！金主亶命将讨之。初，鲁国王昌既诛，其子星哈都《大金国志》作胜花都。郎君者，率其父故部曲以叛，与蒙古通，蒙古由是强取二十余团寨，金人不能制。”（原注：据王大观《行程录》。案《松漠记闻》达赉长子大伊玛被囚，遇赦得出，次子勛今为平章。皓以今年六月归，乃不见此事，未知孰的。今姑附见，更俟详考）

四、同上（卷一百五十五）：“绍兴十六年（金皇统六年）八月，金元帅兀术之未卒也，自将中原所教神臂弓弩手八万人讨蒙古。因连年不能克，是月，领汴京行台尚书省事萧博硕诺（《大金国志》作萧保寿奴）与蒙古议和，割西平河以北二十七团寨与之，岁遗牛羊米豆，且命册其酋鄂伦贝勒（《国志》作熬罗孛极烈）为蒙古国王，蒙人不肯。原注：据王大观《行程录》）

五、同上（卷一百五十六）绍兴十七年（金皇统七年）三月，蒙古与金人始和，岁遗牛羊、米豆、绵絹之属甚厚。于是蒙古鄂伦贝勒乃自称祖元皇帝，改元天兴。金人用兵连年，卒不能讨，但遣精兵分据要害而还。”原注：此据王大观《行程录》。案《录》称岁遗牛羊五十万口，米豆共五十万斛，絹三十万匹，绵三十万两。恐未必如此之多。今削去其数，第云甚厚，更俟详考%

六、《旧闻证误》（卷四）：“皇统四年秋，元帅遣使报监军（原注：时监军者讨蒙古）曰：“南宋以重兵逼胁，和约大定，除措置备御，早晚兵到矣。至次年冬十月，元帅亲统大军十万众，水陆并集。”原注：出王大观《行程录》）案皇统四年甲子，本朝绍兴十四年也。前二年已分画地界矣，不知兀术何以历二年之久而后加兵于蒙古，恐必有误。

七、同上（卷四）：皇统七年春三月，国使还，蒙古许依所割地界，牛羊倍增。金国许赐牛羊各二十五万口，今又倍之，每岁仍赂絹三十万匹，绵三十万两，许从和约。（原阙书名。四库本注云：当出王大观《行程录》）案本朝岁遗北人银、絹各二十五万匹、两，而北人遗蒙古乃又过之，恐未必然。

右所集七事，次条及末条李氏未注所出，余皆云“出王大观《行程录》”。然次条与一、三、四、五诸条相为首尾，自当同出一书。末条之出《行程录》，则有第五条注可证，馆本案语不为无根也。李氏于第三、第五、第六、第七诸条并有疑辞。

第三条注，据洪忠宣《松漠记闻》疑鲁国王昌（即挾懒）子无胜花都其人。案《金史》纪转载挾懒二子，曰斡带乌达补，与挾懒同时被诛。而《记闻》所云“次子勗今为平章”者，据《金史》表传，乃挾懒之弟、而非其子，然则据《记闻》以驳此录，亦以五十步笑百步耳。惟因《记闻》不记此事，疑为虚诞，则极有理。案忠宣在金，颇周旋于悟室诸贵人之间，如挾懒果有子通蒙古，蒙古果有寇金事，忠宣不容不知。而忠宣记萌骨子挾懒事，并未及此，此与其所驳三、四、六、七诸条，均无可解答者也。顾记事之误，古人大抵有之，而必以此录为伪书者，尚有他说。

一、征蒙本事之无根也。据第一条，则天会十三年征蒙之役，主帅为领三省事宋国王宗盘。案《金史·熙宗纪》宗盘与宗翰宗干并领三省事在十四年三月，且《纪》及《宗盘传》并无征蒙事。又据第六条，则皇统四年征蒙主帅为监军某，考是时突合速与娄室子活女相继为元帅左监军，大臭为右监军，并见《金史》本传。而大臭方在汴行元帅府事，则征蒙之监军，非突合速即活女也。而突合速及活女《传》并无北征事。又据第四、第六两条，宗弼于皇统五年冬自将征蒙古，又即殁于是月（《录》虽未见宗弼之卒，然于皇统六年书“金元帅兀术之未卒也”云云，则六年已卒可知。《征蒙记》以为卒于五年十月，《北盟会编》、《系年要录》皆从之，其实卒于皇统八年。说见后），则卒于军中可知，而《金史》纪传并无此事。盖天眷皇统间，蒙古小小侵盗，事或有之。金主亮宣谕宋国信使副徐嘉等公文（见《北盟会编》卷二百二十九）云向来北边有蒙古鞑靼等，自东昏王（熙宗降封之称）时数犯边境。”洪适撰其父忠宣《行状》（《盘洲文集》卷七十四）载绍兴十二年，金人来取赵彬辈三十家。忠宣谓秦桧曰：“彼方困于蒙兀，姑示强以尝中国。”似《行程录》所记不为无因。然金亮宣谕之文，乃因背盟事决，故藉北征蒙鞑之名，以拒宋使入境，本不可据为典要，则洪忠宣之言亦不过一时折秦桧之辞，其作《松漠记闻》亦但云“盲骨子与金人隔一江！尝渡江之南为寇！御之则返！无如之何”而已！岂有兴师十万，用兵数年，元戎老于行间，国力殫于养寇，而史官载笔，乃无一字及之者乎？此可断为伪者一也。

二、宗弼卒年之岐误也。宗弼之卒，《金史·熙宗纪》云“皇统八年十月辛酉”，本传不书月日，而系年则同。而宋人之书，如《北盟会编》、《系年要录》，皆系于绍兴十五年，即皇统五年，实本于《征蒙记》及此录。二者虽未易定其是非，然元人修《金史》时，《熙宗实录》虽亡，而金时所修国史尚有太祖、太宗、熙宗、海陵四朝《本纪》（见《滋溪文稿》卷二十五《三史质疑》），则《金史·熙宗纪》当本金国史之旧，与卫绍王、哀宗二《纪》无所凭藉者不同，其所记年月，自足依据。此录系之皇统五年，自为巨谬。且宗弼与宋定和约在皇统元年，乃至四年秋而始有发兵之书，既以四年发兵，而兵集乃在五年之冬，又既以兵集之月死，而又云“连年不能克”。种种矛盾，决非身在行间者之语。此可断为伪者二也。

三、人名、官名之附会也。录中人名，除兀术外，尚有胡沙虎、萧保寿奴二人，皆金熙宗时在汴京差除之官。《伪齐录》金人废刘豫后（天会十五年）以女真胡沙虎

为汴京留守，又以契丹萧保寿奴兼行台尚书右丞相。”《金史·熙宗纪》天眷二年，以挾懒为行台左丞相，杜充为右丞相，萧宝邪律晖为行台平章政事。”又“皇统七年十月壬子，平章行台尚书省事奚宝薨”。案萧保寿奴、萧宝奚宝实系一人。《金史·太祖纪》天辅二年闰月，九百奚部萧宝率众来降。”是宝本奚人，故举其姓谓之“萧宝”，举其部族谓之“奚宝”。又奚与契丹种族最近，又久服属于契丹，故又谓之契丹萧保寿奴。是萧宝初为行台右丞相，后降为行台平章政事，至皇统七年卒官，初未尝领行台尚书省事，是时领行省者，实为宗弼。宗弼将死而勸继之，二人皆金之懿亲或尊属也。盖征蒙与乞和二事，本南人向壁虚造，乃借《伪齐录》中胡沙虎、萧保寿奴之名以资点缀。此可断为伪造者三也。此录记事，盖无一足信，更以之与《征蒙记》相参校，则愈明白矣。

《征蒙记》一卷，《直斋书录解題》云：“金人明威将军登州刺史李大谅撰。建炎巨寇之子，随其父成降金者也。所记家人（当作蒙人，因字形相近而误）跳梁，自其全盛时已不能制矣”云云。其书久佚，《北盟会编》引其书凡千五六百言，赵珙《蒙鞑备录》亦引其语，而《系年》《要录》及《掇史》所引，均在《会编》中，或转从《会编》录之。其书大抵与《行程录》相表里。今就《会编》所引者，疏通证明之。其作伪之迹尤为显著，条列如左：《三朝北盟会编》（卷一百九十七）：“伪官李成男李大谅《征蒙记》曰：天眷元年，都元帅鲁国王闕辣总四辅南行府都统河南诸路军兵公事总督都元帅，大王四太子至今呼四辅。谕曰：“都元帅割三京与南宋，何缘不与吾计议？其中都元帅必有逆谋，欺罔国朝，恐与南宋别有异图，其理未当。尔等四辅，自今后都元帅府，应有行移军文字，如吾不在府第，无吾手押，不得承受回报。故来面谕尔等，切宜谨守，只待吾急赴国朝整会割还地土。是时大谅父咸在中山府，谓大谅曰：“今北狄猖獗，非吾所忧。吾虑者，都元帅兀术性刚，恐还朝有异议。又都元帅长男胜都花，引大族下骑兵及万户北入沙漠省亲，恐副元帅北征，相遇未便，吾虽走骑报知令回避，未知何如？次年，皇统元年，副元帅诏至行府，数都元帅南和宋好，包逆甚明，已将口贼诛废。有长男胜都花知罪惧诛，虏掠北道，分遣精骑追袭杀捕。王山言兀术之戕其叔挾懒也，帛练拉杀之，其家三百余口，皆以帛练拉杀，合焚其尸，屠其所居之地，三邨之人皆不留。”

案金时始任都元帅者，为太宗母弟杲，而宗翰继之。天会十三年，宗翰为大保，其位始虚。十五年七月，宗翰薨。十月，乃以元帅左监军挾懒为左副元帅，宗弼为右副元帅。至天眷二年七月，以右副元帅宗弼为都元帅，左副元帅挾懒为行台左丞相，是挾懒未尝为都元帅也。又宗弼白军中入朝，请诛挾懒，在天眷二年，此记以为元年，非是。至谓都元帅长男胜都花，引大族下骑兵及万户北入沙漠省亲，尤为不然。《金史·挾懒传》废刘豫时（天会十五年），挾懒与右副元帅宗弼俱在河南。明年（天眷元年）朝京师，及挾懒与宗磐谋反（天眷二年），出为行台左丞相。手诏慰遣，至燕，复与翼王鹍谋反。熙宗乃下诏诛之。挾懒自燕南奔追而杀之于祁州。”《宗弼传》亦言宗弼往燕京诛挾懒，挾懒自燕南奔，将南入于宋，追而杀之于祁州。祁州者，自燕入宋之道，非入沙漠之道。是挾懒获罪后，未尝北至沙漠，

何以胜都花乃入沙漠省亲？惟张汇《金虏节要》谓挾懒初欲南归朝廷，不克，既而北走沙漠儒州望云凉甸（今直隶赤城县）。兀术遣右都监挾不也追而获之，下祁州元帅府狱。果如其说，则挾懒父子北走，当在宗弼往燕京图挾懒之后，不在其自军中入朝之时，何缘与之相遇乎？至熙宗天眷之元，共历三年，此以天眷元年之明年为皇统元年，尤为巨谬。

《三朝北盟会编》（卷二百十五）：“金人李大谅《征蒙记》曰：皇统元年，副元帅兀术诛都元帅挾辣，以割河南还大宋，有逆谋。提兵过江，复取河南，四年回师，谓南北行府三帅曰：“吾顷因国有叛臣，结连南宋，自引军吊伐，问罪宋国。大军至亳州，由庐越淮，桥道阻遏车骑，吾心荧惑未决。忽淮阴二进士远来献陈平宋国策。时吾急遣龙虎阿鲁保二帅探路先行，韩常周柒骑兵至淮上，吾入盱眙，疑有重兵把路。龙虎使人报曰，淮南无一人一骑为备。已遣五千骑越淮，分守盱眙龟山，把截水陆两势造桥。吾大喜，昼夜兼行。至淮上，果桥成六座，分步骑径济淮南，占据运河，摆布斥候，细观南耗，东过淮阴，南至六合，西临昭信，昼夜不绝。因观宋室所立龟山城寨，临淮分势，就山为隘，若聚粮屯兵，此地据守，吾虽铁心，未敢轻举。但见空壁，吾心自恃，宋室虽有建城立势之心，而无聚粮据守之法。又观二进士所陈图策，淮南路盱眙至楚州，行路窄隘，左有长淮，右临河渠，粮道遥远，有过邵伯至山阳人骑回，惟是获到菱实、鸡头、莲子。闻诸军不避寒酷，踏泥打冻，决池涸港，掘藕拾菱，寻鱼摸蚌，又宰杀骡马，相兼为食，诸军饥苦之声，耳不忍闻，但虚心宽谕而已。

又诸军士云：輜重俱尽，有食奴婢者。又多言南军不测，要回淮上。惟吾心所料，南宋既修盱眙，此乃据山临水大利之势，尚无守法措置，安有智谋就吾敌也，决无渡江之理。吾独与萧平章计议，大言檄书于宋：“若从此约，请诣辕门计议。如敢违拒，水陆星电越江。萧平章南去，日视诸军饥心嗷嗷，忘失昼夜。龙虎阿鲁保言：“若南宋受檄，犹得半军回，若宋兵渡江，不击自溃。王曰：“尔论正与吾心同。吾西望粮音，南听萧信，心神不宁。，如此月余！忽萧平章跃骑走报。不觉喜感天神！与南使同来议：止淮为界。誓约定，南使回，吾班师回泗。点集兵马輜重，骡马依稀四分，奴婢十中无六七。惜哉，军机至此而不能决。若能决，无一人一骑得回也。吾私心用智，但一檄书下宋取捷，乃万世不传之上策。吾近因贼徒激恼气冲，吾守顺昌，箭疮发作，遇阴雨，痛连骨髓。忽承诏报，宇文国相连中外官守七十余员，欲乘边事未息及迁都之尤谋反，幸得万户司寇惟可也告首，捕获宇文等。请帅暂归朝议事，至五年（《会编》脱此二字，据《要录》所引增）十月，宣到皇叔都元帅辽国王危笃亲笔，遗四行府帅曰：“吾天命寿短，恨不能与国同休。少年勇锐，冠绝古今。事先帝南征北讨，为大元帅左都监，行营号太予军。东游海岛，南巡杭越，西过兴元，北至小不到云城。今契丹汉儿侍吾岁久，心服于吾。吾大虑者，南宋近年军势雄锐，有心争战。闻张、刘、韩、岳例有不协，国朝之幸。吾今危急，虽有其志，命不可保。遗言于汝等，吾没后，宋若败盟，招贤用众，大举北来，乘势撼中原人心，复故土如反掌，不为难矣。吾分付汝等，切宜谨守，勿忘吾

戒，如宋兵势盛敌强，择用兵马破之。若制御所不能，向与国朝计议，择用智臣为辅，遣天水郡王桓安坐汴京，其礼无有弟与兄争，如尚悖心，可辅天水郡王并力破敌，如此又可安中原人心，亦未深为国朝患害，无虑者一也。宋若守吾誓言，奉国朝命令，时通国信，益加和好，悦其心目，不数岁后，供需岁币，色色往来，竭其财赋，安得不重敛于民。江南人心奸狡，既扰乱非理，人情必作叛乱，无虑者二也。十五年后，南军衰老，纵用贤智，亦无驱使，无虑者三也。俟其失望，人心离怨，军势隳堕，然后观其举措。此际汝宜一心选用精骑，备具水陆，谋用才略，取江南如拾芥，何为难耶？尔等切记吾嘱。吾昔南征日，见宋用军器，大妙者不过神臂弓，次者重斧，外无所畏。今付样造之。元帅死，赠大孝昭烈皇帝。”

案此节抵牾失实，亦与前同。兀术杀挾懒事，在天眷二年，而此以为皇统元年。兀术遣萧毅使宋，约与宋画淮为界，在皇统元年，宇文虚中之死在皇统六年（此本《金史·熙宗纪》及《虚中传》）。《宋史》本传云：绍兴十四年，则为皇统四年。《行状》云：绍兴乙丑，则皇统五年也。《会编》、《要录》皆从之），而此并以为皇统四年。兀术之死在皇统八年，而此以为五年（《会编》、《要录》皆从之），此年岁之不合者也。萧毅使宋时，其官载于国书者，为行台尚书户部兼工部侍郎兼左司郎中，并非平章，而平章政事萧宝则未尝使宋，此云“萧平章南去日”云云，盖误合萧宝、萧毅为一人。宇文虚中仕金，官至翰林学士承旨礼部尚书，国相之称，更为鹘突。至钦宗北狩后，以皇统元年封天水郡公，至海陵正隆元年，纪书“天水郡公赵桓薨”，是钦宗未尝有郡王之封也。而此云“天水郡王桓”，尤类野语。又云“兀术死，赠大孝光烈皇帝”。案金时追帝者，如景宣皇帝、德宗、睿宗、显宗，皆以其子为帝追尊。其余宗属有开国大勋者，若宗翰、宗望，皆无追帝之事。宗弼之亲与宗望等，而功则不逮，更不容独蒙帝谥，故岳珂《桧史》、李心传《要录》，皆以为疑。此称名之不合者也。李成父子本雄州归信人，而此记云“兀术提兵过江复取河南”，以黄河为江，北人必无此语。又兀术语中云“惜哉，军机至此而不能决”。此全是宋人语气。此文字之不合者也。若兀术皇统元年冬南侵之役，时两国讲和已有成议，信使往还络绎于道，宋人敛兵江南，绝无抵抗。

《北盟会编》于金人陷泗州及楚州后载张俊之言曰：“南北将和，虏谓吾怠，欲搃柘皋之愤耳。勿与交锋，则虏当自退。”阴遣戚方至泗州巡绰，金人果引去。是金人此次渡淮，不过以偏师致怨，且以促和，决无须元帅亲行。就令亲行，亦决无此记所述狼狈之理。又兀术皇统四年危笃亲笔云“张、刘、韩、岳例有不协”，此时岳已前死，张、刘、韩三人亦早释兵柄，此事实之不合者也。综此二节所记述观之，知《征蒙记》之失实，与《行程录》同。使二书为后世追记之书，或远道纪闻之作，则虽有误谬，绝不至发生事之有无及书之真伪之问题。然王大观书名《行程录》，乃记所经历者。李大谅亦同时人，又官至刺史，非草野僻陋可比，岂有身在行间，目击时事，而记述荒谬至于此极者乎？且二书所记年月、事实，胥与正史不合，而二书则事事相合，知此二书实一人所伪撰，或一书之变名，且出于南人之手而托之北人者也。原宋人所以伪为此种书者，缘南渡之初，庙算与国论恒立于相反之

地位，当局者度一时之利害，故以和为主。其极也至于称臣受册而不恤，舆论激于一时之耻辱！故以战为主，而不复问彼我之情势。逮和议既成，则国论屈于庙算，而人心之激昂则或倍于前。

其作伪书以叙述国耻者，则有若《孤臣泣血录》、《南烬纪闻》等。而《行程录》及《征蒙记》则又托为北人之言，一面造作蒙古寇金事，以示金人在北方常有后顾之忧，一面造作兀术诸书，以证明金人虚声啁喝之故技及南征狼狈之状。凡此，皆当时不满于和议之所为也。其书既为南人所伪记，则其中所载蒙古事，自无史学上之价值。由是蒙古史中不能不删去最古之一大事项，而断定蒙古之信史当自成吉思汗始也。又有与皇统征蒙事相类者，则蒙古助爱王寇金一事也。此事出张师颜《金人南迁录》，而《大金国志》仍之。《南迁录》一书，今有传本，故其事不烦复述。又其书之伪，前人已有定论，亦不待再论。考此书出于金陵迁后一二年，李心传《建炎以来朝野杂记·乙集》（卷十九）“女真南徙”条末有注云近传《南迁录》事，悉差误。盖南人伪为之，今不取。”考《朝野杂记·乙集》成于宋宁宗嘉定九年，即金南迁后二年。此时已见其书，且已烛其伪。李氏尚有《辨南迁录》一卷，见于《宋史》本传，则不知著于何年。赵与时《宾退录》（三）云近岁金虏为鞑靼所攻，自燕奔汴，有《南迁录》一篇，盛行于时，其实伪也。卷首题，通直郎秘书省著作郎骑都尉赐绯张师颜编，。虏之官制，具于士民须知，独无，通直，一阶，其伪一也。虏之世宗以孙原王璟为储嗣，父曰允恭，璟立，追尊允恭为显宗。《录》乃谓璟为允植之子，其伪二也。虏之君臣虽以小字行，然各自有名，粘罕名宗维，兀术名宗弼，《录》乃称，宗献王罕忠烈王术，，其伪三也。”虏事，中国不能详，然灼知其伪者已如是，而士大夫多信之。陈振孙《书录解题》云：“金人《南迁录》一卷，称伪著作郎张师颜撰。顷见此书，疑非北人语，其间有晓然附会者。或曰华岳所为也。近扣之汴人张总管翼，云，岁月皆抵牾不合，，益证其妄。”赵珙《蒙鞑备录》云蒙人不知何为国号，何为年号。《南迁录》载鞑有诏与金国，称龙虎九年，非也，此皆宋人语。”

元苏文爵《三史质疑》滋溪文稿卷二十五亦云：“叶隆礼、宇文懋昭《辽金国志》皆不及见国史，其说多得之于传闻。盖辽末金初，裨官小说中间失实处甚多。至于建元改号、传次征伐及将相姓名，往往杜撰，绝不可信。如张师颜《南迁录》，尤为纰缪。”此宋元以来定论如此！四库全书总目》复痛论之曰：“案《金史》世宗太子允恭生章宗，而夔王允升最幼。今此书乃作长子允升、次允猷、次允植。允升、允猷以谋害允植被诛，而允植子得立为章宗，世次具不合。又称章宗被弑，磁王允明立为昭王；昭王又被弑，立潍王允文为德宗；德宗殂，乃立溜王允德为宣宗。与史较，多一代，尤不可信。又《金史》郑王允蹈诛死绝后，不闻有爱王大辨其人。所称天统、兴庆等号，《金史》亦无此纪年，舛错缪妄，不可胜举”云云。然则此书之伪，更不待论。

然爱王之事，金时民间实有此种传说，南人遂附会点缀以成此《录》，绝非其所创

造。《金史·王永中传》：“宣宗贞祐三年，太康县人刘全尝为盗，亡人卫真界，诡称爱王。所谓爱王，指石古乃（永中长子）。石古乃实未尝有王封，小人妄以此目之。事觉被诛。兴定四年，亳州谯县人孙学究私造妖言云：“爱王终当奋发，今匿迹民间，号刘二。卫真百姓王深等皆信以为诚然。有刘二者出而当之。事觉，诛死者五十二人，缘坐者六十余人。”是金南迁之初，有自称爱王者，其一在贞祐三年，正与《南迁录》成书时相当。然此传说之起，实远在章宗之世，李心传不信《南迁录》者也，其所撰《朝野杂记》亦记爱王事！乙集》卷十九“女真南徙条”云：

初，璟（章宗名）之立也，越王、郑王皆有不平语，璟召郑王杀之。（绍熙四月十一年）（整理者案原文如此）。越王有二子，长曰爱王，越妃所生，葛王（谓世宗）爱之，赐以铁券，璟恶之而不敢杀也。爱王寻居上京以叛，越王遂为璟所杀（庆元三年五月）。璟死无子，而雍之诸子惟允济在，璟所嬖内侍李黄门传璟遗命，与尚书右丞撒罕勒共立之，爱王时在中都，允济疑其为变，囚之真定。

案此条记事，虽略在《南迁录》之后，然卷十三“杂事门”已有爱王之叛一条，云：

爱王，葛王孙也。始，允恭既早世，葛王爱其兄越王，欲立之，既而不果。今主立，爱王遂谋叛，为其妻父仆散琦所告，事觉。乃以放牧会宁府为名，据上京以叛。明昌六年三月丁酉也，金主三召之不至，因结契丹、鞑靼、蒙国以叛，取慈岳等州，时越王在咸平，契丹檄金人，请立之为帝。金主徙王于庆阳，五月丁酉，赐王死，诛其家人八十余人，惟越王在焉。至今为金国患。仆散琦即承安四年来贺上生辰者。（明昌六年本朝庆元元年，承安四年本朝庆元六年，作此录后数年，乃见有记虏中事者，以爱王为郾王允恭之子。案允恭乃原王璟之父，淳熙十六年三月密札下沿边诸州，避其名讳甚详，昔以为郾王后，实误甚矣）

案此条称章宗为“今主”，则记此条时，章宗尚存。考《朝野杂记甲乙二集序》，甲集成于嘉泰二年，乙集着手于嘉泰四年，而中断于开禧元年，后复编次成书，至嘉定九年成而序之。则此条前半，当是嘉泰开禧间所记（当金章宗泰和四五年），而编末附记者，则嘉定间所续也。所记与《南迁录》颇有异同，而亦有爱王结契丹、蒙古之说。惟《南迁录》以爱王为郑王子，李氏以为越王子。又所引记虏中事书以为郾王子。案郾王初封越王，宋人多以其初封呼之，是二说原无差异。允恭亦永中之音讹，此与《金史》所载爱王指石古乃之说，正相符合。

盖三者同出一源。考金自明昌以后，北垂多事，三次远征与筑壕之役，前后数年，天下为之骚动。镐、郑二王适以此时先后被诛，而镐王尤为无罪。民间不知征调之因，因讹传爱王作乱之说，此与钱少詹《金史考异》以明昌承安间兵事未见叛者主名，遂疑爱王实有其人，古今心理正复相同。实则当时扰边者，为蒙古别部合底忻

山只昆，而牵连及广吉刺与阻讐，《金史》宗浩、夹谷清臣、内族襄诸《传》叙次甚明。余于《辽金时蒙古考》已详著其事。爱王事之为讹言，不待论也。此讹言传于本国，乃有刘全、刘二假借名义以倡乱。于十年或二十年之后传于国外，别有井研李氏之记事，且为《南迁录》附会之中心，更分派而为《大金国志》。至近世史学大家钱竹汀氏尚惑其说，亦可谓妖言也已。以其与皇统征蒙事相类，故附论之。

《元朝秘史》之主因亦儿坚考

十数年来，日本箭内（亘）、羽田（亨）、藤田（丰八）三博士及松井（等）、鸟山（喜一）二学士，各就辽、金二《史》之“钚军”发表其新说。（余所得见者，仅箭内博士《再就辽金时代之钚军》[《史学杂志》第二十六篇第十号]，鸟山学士《就钚军之疑》[同上第三十七编第八号]、藤田博士《问题之二语虬与泊》[同上第三十七编第九号]三篇）。于是钚军之事，为史学上一大问题。余于契丹、女真、蒙古文字懵无所知，对此问题自不能赞一辞。然近读《元朝秘史》，就史实上发见与金末钚军相当之名称，此名称与自来钚军之音读略有不同，于史实之同一及言语之歧互，殊不能得其解。适《史学杂志》编者介藤田博士征余近业，因提出此史实，并余个人之见解，以就正于博士，并乞羽田鸟山诸君子之教，惜箭内博士已归道山，不获复请益也。

《元朝秘史》有所谓“主因亦儿坚”者。

（卷一）。捕鱼儿纳浯儿阔连纳浯儿豁牙儿札兀刺兀儿失温沐涟捏不坤阿亦里兀（惕）备鲁兀（惕）塔塔儿亦儿格捏俺巴孩合罕斡勤斡克抽斡额孙斡乞泥额许迭周塔塔儿主因亦儿坚俺巴孩合罕巴里周乞塔敦阿（勒）坛合罕纳阿抽斡（惕）灰突儿（明译：捕鱼儿海子、阔连海子，两个海子中间的河，名兀儿失温。那河边住的塔塔一种人，俺巴孩将女儿嫁与他，亲自送去，被塔塔儿人[原文塔塔儿中之主因种]拿了，送与大全家）

《续集》卷一）。帖兀纳豁亦纳成吉思合罕豁兀只（勒）乞塔（惕）。亦儿坚突儿秣弥刺罢（原作伯）。抚州宜阿（卜）。抽忽捏坚答巴阿儿答巴周宣德府宜阿（卜）。抽者别古亦古捏（克）。把阿秃儿豁牙里莽来亦列罢（原作伯）察（卜）赤牙（勒）古儿抽察（卜）赤牙（勒）答巴阿泥别乞列（克）迭周田迭者别鸣诘列论阿泥兀都周歌多（勒）格周亦列兀仑田迭莎里牙客额周合里罢（原作伯）合里（黑）答周乞塔敦扯里兀（惕）捏客耶客延噉（勒）客阿机刺不帖帖列捏客周阿亦石宣德府因豁失兀纳古儿抽者别豁亦纳（黑）石忽儿罢塔塔周多（卜）秃（勒）周孙都儿抽阿亦速浑歹亦泥答鲁罢成吉思合罕豁（勒）扯里（克）答鲁察周乞塔（惕）歌多（勒）格周合刺乞塔敦主儿扯敦主亦讷额列坤斡抹浑扯里兀的答鲁周察（卜）赤牙刺古儿帖列昏只兀巴亦塔刺乞都周察（卜）赤牙仑合阿（勒）合者别阿（卜）抽答巴阿（惕）不里周答巴周成吉思合罕失刺迭（克）秃儿保兀罢（原作伯）中都宜额额列周豁脱（惕）豁脱（惕）巴刺合（惕）途儿扯里兀（惕）亦列周额额列兀（勒）罢（[明译：]在后羊儿年，成吉思征金国，先取了抚州，经过野孤岭，又取了宣德府。使者别、古亦古捏[克]，做头哨。至居庸关，见守御的坚固，者别说，可诱他战。于是把军马佯回了，全家见了，果然尽出军马追袭，直至宣德府山觜行，者别却翻回来了，将全国陆续来的军马杀败。成吉思中军随后到来，将金国的契丹、女真[原文此下有“主亦讷”三字]等紧要的军马都胜了。比至居庸，杀了的人如烂

木般堆著，者别将居庸关取了。成吉思入关，至龙虎台下了营，遣军马攻取北平等郡）。

同上）。中都宜额额列（克）迭仑阿（勒）坛合纳也客那颜王京丞相阿（勒）。坛合纳都刺（惕）合仑腾格理合札仑札牙安察（黑）也客斡罗也兀（惕）格恢察忽兀古儿罢（原作别）忙豁（勒）马石古出帖耶亦列周必答纳额列坤斡抹浑合刺乞塔敦主儿扯敦主亦纳额儿乞（惕）扯思兀的答鲁周不连（勒）帖列乞都主为亦帖格（勒）秃察（卜）赤牙里别儿不里周阿（卜）主为（[明译：]初，北平被攻时，金王京丞相对金主说：天地气运，大位子交代的时节敢到了，达达每好生强盛，将咱猛勇的[原文此下有契丹、女真、主亦纳三语]军马杀绝，可倚仗的居庸关取了）。

《续集》卷二）。巴撒成吉思合罕札儿里（黑）孛鲁仑孛斡儿出木合黎豁牙刺莎余儿合（勒）斡古仑乞塔（惕）亦儿格捏彻额薛斡古列额客延乞塔（惕）亦儿格纳主亦泥塔豁牙儿撒察兀忽必牙（勒）都周阿不（惕）浑撒亦（惕）可兀的阿纳失鸭兀班把里兀（勒）周迓步（惕）浑撒亦（惕）斡乞的阿纳斡思格周额篋昔颜豁儿理札撒兀鲁（惕）浑乞塔（惕）亦儿格纳阿（勒）坛罕纳亦帖格（勒）田亦纳兀（惕）忙豁仑额不格思额赤格昔巴刺（黑）三合刺乞塔（惕）主囚亦儿坚阿主为者额朵额米纳亦帖格（勒）田亦纳兀（惕）孛斡儿出木合黎塔豁牙儿备由者客延札儿里（黑）孛（勒）罢（明译：成吉思又对二人[孛斡儿出木合黎]说，金国的百姓不曾分与您，如今有金国的主因种，你二人均分，凡好的儿子教与你擎鹰，美的女子教与妻整衣。已前金主曾倚仗著他做近侍，将咱达达祖宗废了。你二人是我近侍，却将他每来使唤者。原文作：已前，金主曾倚仗的、宠任的，又将咱达迭的祖宗、父亲杀了的。这契丹的主因种，如今赏与我所倚仗的、宠任的孛斡儿出木合黎两人者）。

凡五见。其或云“主亦纳主亦泥”者，并“主因”语尾之变化。据第一条称“塔塔儿主因亦儿坚”，则当是塔塔儿之一种，否则他族之在呼伦贝尔两湖间，与塔塔儿人杂居者也。又据第四条称“乞塔惕亦儿格纳主亦泥乞塔惕”者，蒙古人呼金国之称，则主因必为金之属部。又称“合刺乞塔惕主因亦儿坚合刺乞塔惕”者，蒙古人呼契丹之称，则主因种中必多含契丹人。又第四条称“主因种杀蒙古祖父”云云，即指第一条所记“主因人执送俺巴孩汗”，及《秘史》卷一末所记“塔塔儿人毒死也速该”二事。是“合刺乞塔惕主因亦儿坚”即“塔塔儿主因亦儿坚”，非异族也。又据第

二、第三两条，则此族当金之季世，曾于宣德居庸间与于防御蒙古之役，且其兵力足与契丹女真相鼎足，故欲求与主因相当之种族或团体，不可不合于三种之条件，即（一）足与契丹女真鼎立之部族或军队，（二）金之边兵而曾与于宣德居庸间之战事者，（三）此部族或军队中兼有契丹人及塔塔儿人是也。而求合于此三种条件者，舍金末之钚军，无以当之。兹分疏于左：

金末与契丹女真鼎立之种族，无论为汉人也。然汉人不得冠以塔塔儿或契丹之名，是与第三条件不合。又孛斡儿、出木合黎二人未尝中分汉人，此显著之事实也。惟金之虬军，散居于东北、西北、西南三路，有部族节度使八、详稳九，其兵数虽或少于女真，要亦不减契丹，优足与二者并称。而此外能具此条件者，别无他军或他族，此虬军之与条件（一）合者也。

金之虬军，本以戍边，未尝用之中原，至章宗泰和南伐之役，始用劲军。

《金史·杨云翼传》：时全创议南伐，宣宗以问朝臣。云翼曰，泰和举天下全力，驱虬军以为前锋，。”《大金国志·章宗纪》：先是泰和六年，帝大发兵，西北诸虬，生蕃也，邻接北，号曰，骁骏，，众有三万，尽数起发侵江南。次午罢兵，和好如始。虬人罢归，因赏不均，皆叛归北。”

及南北议和，虬军亦各归其部。卫绍王时，蒙古入寇，西北、西南二路之虬军，早折而入于蒙古。

《蒙鞑备录》：章宗筑新长城，在静州之北，以唐古虬人戍之。酋首因唐古虬结耶刺都虬木典虬咩虬，后典虬等俱叛，金人发兵平之，虬人散走，投于鞑人”云云。殆与《大金国志》所记为一事。

而东北路八部族节度使之虬军则尚无恙，故大安三年会河之败，中都戒严，上京留守徒单镒遣同知乌古孙兀屯将兵二万卫中都，泰州刺史术虎高琪亦以兵三千至屯通玄门外，而高琪之兵，史特称为“虬军”。

见《金史》术虎高琪、移刺撻不也、完颜素兰、纥石烈执中诸《传》及《建炎以来朝野杂记乙集》十九。

此军至中都后，未几即移屯缙山。

《金史·术虎高琪传》大安三年，累官泰州刺史，以虬军三千屯通玄门外。未几升缙山县为镇州，以高琪为防御使，所部虬军赏赉有差。”此事不书年月，考《卫绍王纪》大安三年十一月，纥石烈、胡沙虎走还京师，请兵二万屯宣德，诏与三千人屯妫川。崇庆元年正月，右副元帅胡沙虎请退军屯南口，诏数其罪，免之。”《纥石烈执中传》同。高琪之屯缙山，当在胡沙虎免职之后，即崇庆元年之春。然则此时中都西北，惟恃此一军为重镇矣。

至宁元年怀来之战，其精锐实此军也。

案怀来之役，诸书所记略有异同。《圣武亲征录》云：“癸酉（金至宁元年，蒙古

太祖八年）秋，上复破之（宣德、德兴），遂进军至怀来。金帅高琪将兵与战，我军胜，追至北口，大败之，死者不可胜计。时金人堑山筑寨，悉力为备。上留怯台薄察顿兵拒守，遂将别众西行，由紫荆口出。金主闻之，遣大将奥屯拒隘，勿使及平地。比其至，我众度关矣。乃命哲别率众攻居庸南口，出其不备，破之。进兵至北口，与怯台薄察军合。”《元史·太祖纪》则云：八年癸酉秋七月，克宣德府，遂攻德兴，拔之。帝进至怀来，及金行省完颜纲元帅高琪战，败之。追至北口，金兵保居庸。诏可忒薄剌守之，遂取琢鹿。帝出紫荆关，败金师于五回岭，拔涿、易二州。契丹讹鲁不花献北口，遮别遂取居庸，与可忒薄剌合。”此节大致取诸《亲征录》，惟于金主帅中加完颜纲一人。《金史》于《卫绍王纪》，但书“八月壬申，尚书左丞完颜元奴（即纲别名）将兵备边”。《术虎高琪传》亦但云“八月，尚书左丞完颜纲将兵十万行省于缙山，败绩”。语甚简略，一若此役与高琪无涉者。然《完颜纲传》颇详其颠末，云：“至宁元年，纲行省事于缙山。徒单镒使人谓纲曰：“高琪驻兵缙山，士皆思奋，与其行省亲征，不若益兵为便。纲不听。徒单镒复使人止之曰：“高琪措画已定，彼之功即行省之功。纲不从。纲至缙山，遂大败。”《徒单镒传》语亦略同。由此观之，此役完颜纲虽为大帅，且亲往视师，然军中措画本出高琪，故《亲征录》于此役主帅专属之高琪。《蒙鞑备录》亦同。此役实自会河川后为金与蒙古第二次之大战，其战事始于怀来，终于缙山。故或举怀来，或举缙山，而其重要将领为高琪，则其重要军队为其所部之钁军无疑也。

而《秘史》所云胜金国、契丹、女真主因紧要的军马，正指此役。

案《秘史》记此事，承羊儿年成吉思伐金而下，其实此节所记，包含辛未、壬申、癸酉三年之事，即下二节记金人议和、西夏纳女事，亦承羊儿年书之，不复纪年。缘《秘史》本非编年之书，记一事，但欲具其本末，而于系年之法则所不讲。就这点亲征之记事，自为辨晰也。成吉思初次伐金之役（自辛未至甲戌），其取居庸也，《亲征录》系之癸酉，《秘史》亦无两度取居庸之事，而《金史·卫绍王纪》则一书于辛未九月，再书于癸酉七月，《承裕传》亦于辛未岁书“大元游兵入居庸”，《元史》从之。顾无论其为一取或再取，而《秘史》书败契丹女真主囚等紧要兵马于克宣德之后、取居庸之前，则《秘史》此项记事正与《亲征录》癸酉岁记事相当，其为怀来之役而非辛未会河之役，其所记取居庸事，为癸酉之事而非辛未之事，可断言也。此役完颜纲、高琪之兵数至十万，其中必网罗各种军队。《蒙鞑备录》云再刷山东河北等处及随驾护卫人马三十万，令高琪为大元帅，再败。是以鞑人迫于燕京城下。”亦指此役。但《备录》只记中原人马，且侈其数，而《秘史》则但举契丹、女真、主囚三种军马，文各有所不备也。

此钁军之与条件（二）合者也。

至第三条件，则舍钁军外更无从他求。考金宣宗贞祐二年中都钁军之叛，实为中都陷落之原因。

案此事《金史·宣宗纪》失书，惟《兵志》云宣宗南迁，钚军叛去，兵势益弱。”《抹撚尽忠传》云：“宣宗还汴，尽忠与右丞相承晖守中都。（中略）宣宗诏尽忠善抚钚军，尽忠不察，杀钚军数人。已而中都受围”云云。又《术虎高琪传》：“初，宣宗将迁南京，欲置钚军于平州，高琪难之。及迁汴，戒彖多（抹撚尽忠别名）。厚抚此军，彖多辄杀钚军数人，以至于败。宣宗末年尝曰：“坏天下者，高琪、彖多也，终身以为恨云。”又《完颜素兰传》云：“去岁都下书生樊知一诣高琪言，，钚军不可信，，高琪以刀杖决杀之。自是无复敢言兵马利害者。使其党移刺塔不也为武宁军节度使招钚军，已而无功，复以为武卫军使。”又《移刺塔不也传》云：“贞祐二年，迁武宁军节度使，招徕中都G军，无功。”《建炎以来朝野杂记》（《乙集》卷十九）云贞祐二年冬，燕京之钚军叛，与鞑靼共围燕京。”此种记事，皆甚简略，惟《亲征录》记此事最详（见后）。而以钚军为契丹军。《元史·太祖纪》：九年甲戌六月，“金钚军斡答等杀其主帅，率众来降，诏三模合、石抹明安与斡答等围中都。”此记事，全本之《亲征录》，惟“钚军”二字，乃其所特加。合上所引诸条观之，知《元史》加此二字，至为确当。又由高琪塔不也诸《传》观之，则贞祐二年叛去之钚军，即至宁元年战于怀来缙山间之钚军，不待论也。

而此钚军，或以为契丹军。

《亲征录》：“甲戌夏四月，金主南迁汴梁，留其太子守中都，以丞相完颜福兴（即承晖）左相泰忠（即抹撚尽忠）为辅。金主行距涿，契丹军在后。至良乡，金主疑之，欲夺其原给铠仗还营。契丹众惊，遂杀主帅素温而叛，共推斡答比涉儿札刺儿为帅，而还中都。福兴闻变，军阻芦沟，忽令得渡。斡答遣裨将塔塔儿帅轻骑千潜渡水，复背击守桥众，大破之，尽夺衣甲、器械、牧马之近桥者。由是契丹军势渐振，（中略）斡答比涉儿遣使诣上行营纳款。（中略）上以契丹众将来归，遂命散只兀儿三模合拔都领契丹先锋将明安太保兄弟等为向导，至则与斡答等并力围中都”云云。案此记事与《金史》抹撚尽忠及术虎高琪二《传》稍有差池。二《传》并谓金主命尽忠善抚钚军，而此《录》则谓金主欲夺其原给铠仗，是以惊叛。案《金史·宣宗纪》五月壬午，车驾发中都。丙戌，次定兴。丁亥，次安肃州。癸巳，次中山。”是五月之杪，宣宗已至中山，距涿州已远。而《元史·太祖纪》记斡答等之叛在六月，则《金史》抹撚尽忠激变之说，较得事实。《录》传之金主，误也。且《亲征录》记事中，亦有足证其所谓契丹军即钚军者。《录》云“契丹军杀其主帅素温”，案“素温”者，“详稳”之对音。“详稳”者，汉语“相公”之转。辽时诸军皆有详稳，金则惟钚军有之。据《金史·地理志》及《兵志》，西北、西南二路钚军，其帅称详稳；其东北路之钚军，则称部族节度使。此钚军为高琪所统！本自东北路来！似其帅当称节度使，不当称详稳。然如乌古里部族节度使、迪烈女古部节度使皆属东北路，而《奥屯襄传》有乌古里钚详稳，《完颜铁哥传》有底刺虬详稳，《移刺塔不也传》有迪烈虬详稳。底刺、迪烈皆迪烈女古部之略，是东北路钚军亦有详稳也。就此一语，可证《录》中契丹军之即钚军，又可证《录》中

契丹军之叛，与金、元二史所记钚军之叛，实为一事也。

或更以为中有塔塔儿人。

拉施特《集史》中之《太祖纪》，与《亲征录》同出阿儿坛脱卜赤颜，其记此事与《亲征录》小异。《录》云：“斡答遣裨将塔塔儿帅轻骑千潜渡水，复背击守桥众。”而《集史》则云：“叛众联合河之彼岸塔塔儿众千人，前后夹攻，大破守桥兵。”又原注云：“塔塔儿人驻于此地，服属金主。”（据洪侍郎译）是“塔塔儿”一语，《亲征录》译为人名，拉施特译为种名，且加以注释，盖《录》误也。如拉氏所记，当时钚军盖分驻于永定河左右，其西畔之契丹人先叛，而东畔之塔塔儿人复起而应之。此军来时，泰州其兼有此二种人，固自不足异也。蒙古遣三模合拔都明安太保与之会师，亦自有故，盖三模合为散只兀人，本与塔塔儿人同居呼伦贝尔二湖之东。而石抹明安，《元史》云桓州人，《蒙鞑备录》则云钚家人（原作纪，盖纪为钚之误，钚又虬之误）盖西北路诸钚中之契丹人。蒙古所以遣此二人者，亦当以其与契丹塔塔儿有连故也。

此尤与条件（三）巧合者。然则《秘史》之主因亦儿坚，非钚军，其孰能当之？此钚军自叛金后，虽服属蒙古，然颇有独立之势，故蒙古卒分其众，以与孛斡儿、出木合黎二人。

《金史·宣宗纪》贞祐三年二月，武清县巡检梁佐、柳口镇巡检李咬住，以诛钚贼张晖、刘永昌等功，进官有差，皆赐姓完颜。”又《完颜佐传》佐本姓梁氏，初为武清县巡检。完颜咬住本姓李氏，为柳口镇巡检。久之，以佐为都统，咬住副之，屯直沽。贞祐二年，钚军遣张晖等三人来招佐，佐执之。翌日，刘永昌率众二十人持文书来，署其午曰，天赐%佐掷之。麾众执永昌及晖等，并斩之。”又《移剌福孙传》“兴定二年，福生上书曰：“为今之计，惟先招徕钚人，选择钚人中旧有宿望雄辨者，谕以恩信，彼若内附，然后中都可复，辽东可通”云云。盖钚军叛金以后，其势力被于中都东北，故通辽东招直沽，而三模合、明安与之会师，亦由古北口经景蓟檀顺诸州以往，且钚军虽纳款于蒙古，实有独立之志，通好辽王之使，与遣蒙古使同发。见《亲征录》。天赐纪年，盖亦其所自署，此与耶律留哥蒲鲜万奴张致等称尊建号，为一时风气。蒙古开国时，待诸降将甚厚，钚军又有下中都之功，而其将斡答、比涉儿、札刺儿后不复显，其民亦被分者，盖恶其反覆故也。钚军三将中，后惟札刺儿之名间见于史籍，然恐别是一人。《蒙鞑备录》燕京等处，有纸蟬儿元帅、史元帅、刘元帅等甚众。”

余曩据《元史·耶律秃花传》“统万户札刺儿、刘黑马、史天泽伐金”，疑“纸蟬儿”乃“札刺儿”之讹。且意此札刺儿，即《亲征录》戊寅岁将契丹军从木华黎南征之札刺儿，亦即癸酉岁与斡答、比涉儿共叛金之札刺儿也。后见沈乙庵先生（曾植）。所校《备录》云：纸蟬儿元帅，舛讹不可读。纸者，札之误。蟬者，蜡之误

。札蜡儿元帅，即口《元史·石抹也先传》也先之子查刺，《耶律秃花传》之札刺儿也。《秃花传》称“统万户札刺儿、刘黑马、史天泽伐金”。王恽《史忠武公家传》：“朝议遣三大帅分统汉地兵，诏公及刘黑马、萧札刺居右，为万户。其居左者悉为千户（案明刊王恽《秋涧集》脱“及刘黑马”以下二十字，《国朝名臣事略》所引有之）。此纸蟬儿元帅即萧札刺，史元帅即天泽，刘元帅即黑马，所谓汉地三万户也”云云。案《辇耕录》云石抹曰萧，而石抹也先，元人亦谓之萧也先。”则沈先生据《秋涧集》作“萧札刺”，谓札刺儿即石抹也先之子查刺，甚有理据，即《亲征录》戊寅岁之札刺儿，亦当为查刺。盖是岁石抹也先从木华黎南征，死于蠡州，查刺即代领其众，故《录》不云也先，而云查刺也。且《亲征录》记札刺儿从木华黎南征，与乌叶儿元帅、秃花元帅俱。案石抹也先之兵，本与吾也而（即乌叶儿）同在北京，其取东京、取北京、平张致，皆与吾也而共事，亦足证《亲征录》戊寅岁之札刺儿非癸酉岁之札刺儿，而当为萧查刺也。由此言之，则钚军三将后皆无考，盖必于中都陷后为蒙古所黜戮。至成吉思末年，乃分其众以与孛斡儿、出木合黎二人耳。

由右所举事实推论之！则此项钚军，大抵多契丹人。当金之中叶，远戍呼伦贝尔两湖之间，与塔塔儿人杂居，故中有塔塔儿人。后复徙泰州近塞，大安之季，刺史术虎高琪率之以援中都，因与于怀来之役，后复叛金，与蒙古共围中都，旋有异志。蒙人恶其反覆，遂分其众以赐功臣，此军与《秘史》主因亦儿坚之三大条件无乎不合，颇疑“主因”一语，即“钚军”之对音，然与从来相传“钚”字之音读不能尽合，故胪举此事实，以质博雅君子，或于“钚”字音义之研究不为无裨欤。

乙卯春日写定。

致藤田博士书一

敬启者。前日寄上《元朝秘史中之主因种考》，想达左右。此文但就文献上证明《秘史》之“主因亦儿坚”即金末之“G军”，而于“G”字之音义不敢赞一辞。然穷此文之结论，则主因自当为钚军之对音，与近日诸家所说钚字之音不能吻合。国维对此亦稍有臆见，今悉陈之，以就正于左右。读尊著《钚字考》，以汉籍中钚字为女真文“𡗗”字之窜入。然𡗗之与钚，虽皆从L，而其左旁则绝不相似。顷从《华夷译语》女真语中见一“么卜”字（Grude氏音注本第十三叶），其女真字为么卜壳，其音为又安，其义为床，以此外字当辽、金、元三史中之钚字，似较𡗗字为近。此说若中，则钚之音当读如“又”，此与《秘史》以主因对钚军之说合。何则？蒙古语中月母之字，读若英语之J，亦读若Y，如《秘史》卷一文译之“主儿乞”直译作“禹儿乞”，卷四又作“主儿勤”，又《亲征录》作“月儿斤”，《元史·太祖纪》作“要儿斤”，《世系表》作“岳里斤”，卷三之“者该晃脱合儿”，卷六作“也该晃脱合儿”，卷八之“者迭儿”，卷六作“牙的儿”，《亲征录》作“也迭儿”。又如“札刺亦儿”亦作“押刺伊而”（《元史·太祖纪》）。“者塔黑”（《亲征录》）亦作“约塔黑”（拉施特书）。“卓忽难”（阎复《驸马高唐忠献王碑》）亦作“月忽难”，（《秘史》及《亲征录》）。而“者勒蔑”，（《秘史》）、“折里麦”（《太祖纪》）、“折里麻”（《速不台传》）亦与“月吕蔑思”（《后村集》一百四十二。又《剡源集》十八）、“月吕麻思，《元史·列传十》）之名同出一源。是蒙古语中主与又同读也。契丹、女真语虽无可考，然如“耶律”亦为“世里，《辽史·营卫志》及《世表》）。“阐刺，《金史·耨盭温敦思忠传》：阐刺，汉语云行人也）亦为“押刺，《金史·唐括安札传》）。则此事当与蒙古语无殊。由是言之，则钚之音读如“主”，亦读如“欧”，欧与杳声转最近。

邵氏《续宏简录》“钚音杳”之注，殆有相当之根据，羽田博士疑邵氏但据钚字之偏旁以拟其音，国维宁信昔人取契丹或女真此字以入汉籍者，正以此字合于汉字谐声之法则故也，然则地名中“钚里舌”（《金史·世宗纪》大定十四年）之与“杳沙，《章宗纪》明昌四年，《辽史·游幸表》、《金史·地理志》桓州下并作查沙，亦缘查、杳同纽，未必系字之误），人名中“钚里”之与“裒履，《辽史·列传十六》），“钚舍，《金史·忠义传一》）之与“遥设，《辽史·天祚纪》、《金史·海陵纪》及《白彦敬传》、《李通传》。“钚哲，《辽史·天祚纪》）、“钚者，《金史·纥石烈志宁传》、《徒单克宁传》、《窝斡传》）之与“瑶质”（《辽史·列传十八》）、“遥折，《金史·佞幸·萧裕传》），钚查刺”、“钚叱刺，并《元史·兵志》）、“钚札刺，《元史·石抹孛迭传》）之与“么查刺，《金史·夹谷清臣传》）、“咬查刺”（《金史·忠义传一》）当系同名异译。是钚之有杳音，略可得而比定矣。又箭内博士曾从文献上证明《金史·太祖纪》之“萧钚里”即《辽史·天祚纪》之“萧敌里”，又《金史·徒单思忠传》之“钚椀，乃《温迪罕蒲睹传》、《移刺窝斡传》之“迪斡”，《辽史·天祚纪》之“钚而毕”即《圣宗纪》之“迪离毕，维案亦即《营卫志》之“突吕不”）。其说甚确。是钚字

于主、查二音外，又有敌、迪之音，此又与《黑鞑事略》都由切之音相关。而契丹初起时之人名部名中，此三音已互相错综，如耶律氏之始祖，其名为“泥礼，《旧唐书·契丹传》）。或“涅里，耶律俨《辽实录》）。或“雅里，金陈大任《辽史》）。其姓为“耶律”，或“世里，而其部名则为“迭刺”也。遥辇氏之始祖，其姓名为“迪辇钚里”，其部名则为“遥辇”也。六奚部中姚里部之最初部长，其名为“哲里”，而金元奚人亦多以“瑶里”、“姚里”为姓。又辽之道宗字“涅邻”，小字“查刺”。耶律仁先字“紉邻”，小字“查刺”。

此外，如部之“涅刺”，姓之“述律”，名之“女里”、“沔里孙”、“欧里思”、“欧里斯”，亦皆与此有关。颇疑此等诸名，本出一源，当时故小异其音读，以区别其或为名、或为姓、或为部，又以之区别此部与彼部、此人与彼人，故音读时有不同。《黑鞑事略》、《元秘史》对钚字之音，殆皆得其近似者，然其最初之音，当读欧或沔，缘舌齿之音，固不得先于喉音也。国维于言语学未尝问津，不知此种臆说有当否？如尊意以为可备一说，请以此书付《史学杂志》附于《主因考》之后，以俟诸大家董正之。敬颂起居不宣。

致藤田博士书二

前寄一函，想达左右。国维近岁稍治辽、金、元三朝事。然对于此类书籍，无论国内、国外，甚感不备。去岁读羽田博士拙著《鞑靼考》之批评，又承东京大学见赠《满鲜历史地理研究报告》第十一册，后有前十册报告总目，始知故箭内博士及松井学士并有《鞑靼考》，乃购诸东京书肆，绝不可得。顷始由友人展转借得数册，得读箭内博士之文，考证精密，钦佩无已。其尤可喜者，多年未决之钚军问题，因此机会，殆得解释之希望。缘箭内博士《鞑靼考》中征引多桑及贝勒津书中六种鞑靼之名（此间无多氏及贝氏书即有之，因系法、俄二国文字，维亦未能通读）。博士并取之以与《元朝秘史》中之七种塔塔儿相比定。

其中最后二种，尚有讨论之余地。至如Altch（多氏译）。TAnchi（山贝氏）。之为《秘史》之阿勒赤塔塔儿，Tehagan（多氏）。Be-lyeT.（ChaganT.）（贝氏）。之为察阿安塔塔儿，Toutoualloutes（多氏）。T.Tutukulius（贝氏）。之为都塔兀惕、阿亦里兀惕、塔塔儿之合语，及Cuyin（多氏）。TKiui（贝氏）。之为主因塔塔儿，此四项殆为自明之事实，更不容有他说。然则塔塔儿之一种，明初译《秘史》时以“主因”二字表之者，其在拉施特哀丁书中乃为Cuyin（多氏）。或Kiui（贝氏）。虽多贝二译此语，首音有Coukiu之殊，然其同为牙音则一也。而据国维近日之研究，则《秘史》之主因种，其在史实上与金末之钚军一一相当，故“主因”当是“钚军”之对音，而波斯文献中之与主因相当之部族，其字乃作Cuyin若Kiui。波斯用表音文字，视汉语之用主因、竹囚、竹温、只温等字表之者（《辘耕录》汉人八种中有竹囚、竹温、竹亦歹，许有壬《右丞相怯烈公神道碑》、《元史·镇海传》并有只温皆主因之异译），或得其实。然则辽、金、元三史中之“钚”字，绝非误字。其或作“钚”者，乃“钚”字之省，其音当读“居黝反”，其或与主、竹、敌、迪等字相通者，乃其讹变之音。我辈前日之推校比定，未得其正鹄也。此拙著《主因考》之结论必当如此，未知有当与否？伏希教正，敬问起居。

金界壕考

《金史·内族襄传赞》论北边筑壕事，以元魏、北齐之筑长城拟之。后世记金界壕者，如赵珙《蒙鞑备录》、《元史·速不台传》，并谓之长城。然金世初无长城之称也。其见于史者，曰边堡，曰界壕。界壕者，掘地为沟堑以限戎马之足；边堡者，于要害处筑城堡以居戍人。二者于防边各有短长：边堡之设，得择水草便利处置之，而参差不齐，无以御敌人之侵軼；壕堑足以御侵軼矣，而工役绝大，又塞外多风沙，以湮塞为患。故世宗朝屡遣使经画，卒不能决。章宗时边患益亟，乃决开壕之策，卒于承安三年成之。其壕堑起东北讫西南，几三千里，此实近古史上之大工役。今其遗迹虽湮没，而见于载籍者，尚可参稽而得其概略。然欲考其遗迹之所在，不可不先知金边堡及界壕之沿革也。

金之边堡界壕，盖创于其初叶。《金史·地理志》称：“金之封疆，北自蒲与路之北三千余里火鲁火曷谋克地为边，右旋入泰州婆卢火所浚界壕，而西历临潢、金山，跨庆、桓、抚、昌、净州之北，出天山外，包东胜，接西夏，云云。”案：《婆卢火》本传，不记浚界壕事，而但记其屯田泰州，天眷元年，驻乌古迪烈地，薨。考乌古迪烈地在泰州之北，大定、明昌间之边堡界壕，在东北路者，实起于乌古迪烈地，而达泰州边界。则婆卢火之驻乌古迪烈地，或即因经营壕堑之故。是金熙宗初年已有壕堑之计画矣。有壕堑则不能不置戍守，置戍守则不可无堡垒，则边堡之筑亦当在同时。《移剌按答传》云：“参知政事完颜守道经略北方，按答摄咸平路屯军都统。入为兵部侍郎，徙西北、西南两路。旧设堡戍，迫近内城者，于极边安置，仍与泰州、临潢边堡相接。”案《世宗纪》，完颜守道经略北方，在大定三年，则大定之初，金边固已有堡戍矣。至五年正月，诏泰州、临潢接境设边堡六十，驻兵万三千，此据《世宗纪》。《阿勒根彦忠传》作置堡戍七。未几而有开壕之议。《纥石烈良弼传》：“参知政事宗叙请置沿边壕堑。良弼曰：‘敌国果来伐，此岂可御哉？’”又《李石传》：“北鄙岁警，朝廷欲发民穿深堑以御之。

石与丞相纥石烈良弼皆曰：‘不可。北俗无定居，出没不常，惟当以德柔之。若徒深堑，必当置戍，而塞北多风沙，曾未期年，堑已平矣。不可疲中国有用之力，为此无益。’议遂寝。”案开壕之议，发于宗叙。宗叙以大定十年参政，次年巡边，未岁而卒。是开壕之议，起大定十年后也。至十七年，世宗思宗叙言，诏两路招讨司及乌古石垒部族、临潢、泰州等路分定堡戍，具数以闻。《兵志》及《宗叙传》。二十一年，增筑泰州、临潢府等路边堡及屋宇。《世宗纪》。《地理志》记其事云：“大定二十一年，世宗以东北路招讨司在泰州境及临潢路旧设二十四堡障，参差不齐，遣大理司直蒲察张家奴往视其处置。于是东北自达里带石堡子至鹤五河地分，临潢路自鹤五河堡子至撒里乃，皆取直列置堡戍。评事移剌敏言：‘东北及临潢所置，土瘠樵绝，当令所徙之民，始逐水草以居，分遣丁壮营毕，开壕堑以开边。’”案世宗欲取直置堡戍者，盖为防敌人侵軼计，而土瘠樵绝，于戍兵不便，故移剌敏建议令戍兵姑逐水草别开壕堑以备边。盖以壕堑取直线，堡戍仍旧参差，以互

相剂。四月，遣吏部郎中奚胡失海经画壕堑，旋为沙雪埋塞，不足为御。乃言：‘可筑二百五十堡，堡日用工三百，一月可毕，粮亦足备，可为边防久计。泰州九堡、疑十九堡之脱。临潢五堡之地斥卤，官可为屋外，自撒里乃以西十九堡，旧戍军舍少，可令大盐冻官木三万余，与直东堡近岭求木，每家构室一椽以处之。’案此节但记诸人建议，未及当时实行之状。据《地理志》，则于泰州下记堡十九，临潢府下记堡三十七。注云：“大定间二十四，后增。”则大定五年诏泰州、临潢接境所设边堡七十。及是年胡失海所议筑之堡二百五十，皆未尝实行也。至章宗明昌初，北部入寇，乃复有开壕之议。《纪》称“明昌五年三月，诏集百官议北边开壕事”，“五月罢北边开壕之役”。然未见，此役复兴。《张万公传》云：“初，明昌间，有司建议，自西南、西北路沿临潢达泰州，开筑壕堑以备大兵，役者三万人，连年未就。御史台言：‘所开旋为风沙所平。无益于御侮而徒劳民。’上因旱灾，问万公所由致。万公对以‘劳民之久，恐伤和气，宜从御史台所言，罢之为便’。后丞相襄师还，卒为开筑，民甚苦之。”案章宗时旱灾，在承安元年，是明昌、承安间，开壕之役固未罢也。及承安三年，“丞相襄出兵临潢，因请就用步卒穿壕筑障，起临潢左界北京路以为阻塞，言者多异同，诏问方略。襄曰：‘今兹之费虽百万贯，然功一成，则边防固而戍兵可减半，岁省三百万贯。且宽民转输之力，实为永利。’诏可。襄亲督视之。军民并役，又募饥民以佣，即事五旬而毕。于是西北、西南路亦治塞如所请。”《内族襄传》。案丞相襄所治者，乃临潢路之界壕也。其在西北路者，则《完颜安国传》云：“以功迁西北路招讨使。承安二年，以营边堡功召签枢密院事。”

《独吉思忠传》云：“承安三年改西北路招讨使。初，大定间修筑西北屯戍，西自坦舌，东至胡烈么，几六百里。中间堡障，工役促迫，虽有墙隍，无女墙副堤。思忠增缮，用功七十五万，止用屯戍军卒，役不及民。上嘉其劳，赐诏奖谕。”《章宗纪》系此事于永安五年，失之。在西南路者，则《仆散揆传》云：“揆升西南路招讨使，沿缴筑垒穿堑，连亘九百里，营栅相望，烽堠相应，人得恣田牧，北边遂宁。召拜参知政事。”案《章宗纪》：“承安四年二月，以西南招讨使仆散揆为参知政事。”则此亦承安三年事也。临潢、西北、西南三路界壕开筑之本末，见于《纪》、《传》者如此。惟东北路界壕，则筑自何人，成于何年，殊无可考。案《宗浩传》云：“宗浩进拜尚书右丞相，时惩北边不宁，议筑壕堑以备守戍，群臣多异同。平章政事张万公力言其不可；宗浩独谓便。乃命宗浩行省事以督其役。”考宗浩拜右丞相在泰和三年正月，而张万公即以三月朔致仕。

又据《万公传》，万公谏开壕，乃因旱灾言之，而旱灾在承安元年，则《传》所谓“命宗法行省事以督开壕之役”者，与《传》首所云“北边有警，命宗浩佩金虎符驻泰州便宜从事”者，实为一事，事当在承安元二年。《传》系之于拜右丞相之后，殊为失实。缘当时北部入寇，泰州、临潢首当其冲，诸路界壕皆于承安三年竣工，不应最冲要之东北路，独迟至泰和三年始开筑也。然则金之界壕，萌牙于天眷，讨论于大定，复开于明昌，落成于承安。虽壕堑之成甫十余年，而蒙古入寇中原，

如入无人之境。然使金之国力常如正隆、大定之时，又非有强敌如成吉思汗，庸将如独吉思忠、完颜承裕，则界壕之筑，仍不失为边备之中下策，未可遽以成败论之也。

一、东北路之界壕

金之界壕，起于东北路招讨司境。而东北路招讨司，金初为乌古迪烈统军司，海陵时改乌古迪烈招讨司，世宗初乃改东北路招讨司。又招讨司初治乌古迪烈部，后治泰州。故欲考东北路界壕之所在，不能不先考乌古迪烈部及泰州之所在也。

甲、乌古边烈部

乌古迪烈，本辽时二部族之名。《辽史·营卫志》国外十部中有乌古部、隈古部、当云隗乌古部。《道宗纪》、《部族表》正作隗乌古部，《表》又作奥畏乌古部。《圣宗纪》、《百官志》作奥隈于厥部，《志》又复出乌隈乌骨里部，皆此部也。敌烈八部。而国内诸部，以乌古户置者，太祖二十部中有乌古涅刺部、图鲁部，圣宗三十四部中有斡突碗乌古部。以敌烈户置者，圣宗三十四部中有迭鲁敌烈部、北敌烈部。《百官志》尚有土河乌古部，不知属国内欵，国外欵？又有八石烈敌烈部，即《营卫志》之敌烈八部也。是辽时乌古敌烈，各有国外、国内二种。国外者其本部，国内诸部则契丹所俘本部之户口，别编置成部族者也。其部族各有节度使及详稳，其上又有乌古敌烈部详稳及乌古敌烈统军司。二官颇有重复之嫌疑，都详稳统国外诸部，统军司则统国内诸部者也。其在国外之二部，据日本津田博士之研究，则乌古部游牧于今喀尔喀河流域，敌烈部游牧于今乌尔顺河流域，皆在今兴安岭之西。则在国内之乌古敌烈部，当在今兴安岭之东。《辽史·道宗纪》：“寿隆二年九月，徙乌古敌烈部于乌纳水，以当北边之冲。”案乌纳水，疑即今桂勒尔河。此河南源为乌哈纳河，出乌哈纳山，疑为当时全河亦纳此称矣。至金世，则乌古敌烈之本部乃不复见，其在兴安岭东之乌古敌烈部，亦稍徙而东北。《海陵纪》：“天德四年十一月，买珠于乌古迪烈部及蒲与路。”《地理志》：“乌古迪烈统军司，后改为招讨司，与蒲与路近。”案金蒲与路在上京北六百里，即今黑龙江呼兰一带之地。又近世产珠之地，以松花江、嫩江、艾晖各江为最。则金之乌古迪烈部当在兴安岭以东，嫩江流域南，与泰州为邻。故其各分部亦各与泰州近。《杲传》云：“天辅元年，杲以兵一万攻泰州，下金山县。

女固脾室四部及渤海人皆来降，遂克泰州。宗干、宗雄并娄室《传》略同。案女固、脾室皆迪烈分部之名，《地理志》部族节度使中有迪烈女古部。《辽史·天祚纪》书：“保大三年，敌烈部皮室叛。”此女固脾室即女古皮室也。又《兵志》及《宗叙传》，以乌古石垒临潢、泰州连言。又《宗尹传》：“大定二十四年，世宗将幸上京，曰：‘临潢、乌古里石垒，岁皆不登。朕欲自南道往。’”案金时，由北道往上京者，必由临潢、泰州，此以乌古里石垒替泰州字，当由此部逼近泰州故也。

。则金时乌古迪烈部地，在兴安岭之东，蒲与路之西，泰州之北，可断言也。

乙、泰州

《金史·地理志》：“泰州昌德军节度使，本契丹二十部族牧地。海陵正隆间置德昌军，隶上京。大定二十五年罢之。

承安二年复置于长春县，以旧泰州为金安县，隶焉。北至边四百里，南至懿州八百里，东至肇州二百五十里。户三千五百四，县一，旧有金安县，承安三年置，寻庚。长春。”辽长春州，韶阳军，天德二年降为县，隶肇州，承安三年来属。案此文中显著有误字，则昌德军当作德昌军，承安二年当作承安三年，得由本文注文订正之。《完颜铁哥传》：“贞佑二年，迁东北路招讨使兼德昌军节度使。”则德昌是，昌德非也。其所记界至，亦有可疑者。案金长春县即辽长春州，《辽史·营卫志》：“鸭子河泊，东西二十里，南北三十里，在长春州东北三十五里。”考鸭子河即今松花江，鸭子河泊即今松花江西之科尔布察罕泊。其西南三十五里，即辽长春州、金长春县之所在。承安三年置新泰州于此。然此地东南距肇州不过二百里，又西南至懿州殆将千里，西北至界亦将六百里。余疑此文本旧泰州之界至，而史官误以系之新泰州者也。果如是，则金之旧泰州，当在今洮尔河之南，洮南县之东某地点矣。又《兵志》云：“东北路招讨司，初置乌古迪烈部，后置于泰州。泰和间以去边尚三百里，宗浩乃命分司于金山。”《宗浩传》则云：“明年，承安四年。拜枢密使。初，朝廷置东北路招讨司泰州，去境三百里，每敌入，比出兵连袭，敌已遁去。至是宗浩奏徙之金山以据要害，设副招讨二员，分置左右。由是敌不敢犯。”《志》、《传》纪此事系年不同，然皆在承安三年置泰州于长春县之后，则招讨司自泰州徙金山，谓自长春徙，非自旧泰州徙也。然宗浩于承安元、二年已佩金虎符驻泰州，便宜从事。此时旧泰州已罢，新泰州未置。所驻之泰州，自系调旧泰州，时宗浩正督开壕之役。见上。又承安三年，出兵移米河。大破广吉刺、合底忻、山只昆诸部。疑徙东北路招讨司于金山，正在此时。时招讨司已徙治金山，故是岁复置泰州，不治旧泰州，而治其东之长春也。

然则东北路招讨司，实自旧泰州徙金山。金山又在旧泰州西北三四百里，盖即兴安岭之古名。《娄室传》：“宗雄等下金山县，使娄室分兵二千，招沿山达散之人。”则金山为连山之大名可知。《地理志》：“右旋入泰州婆卢火所浚界壕，西历临潢、金山。”则泰州、临潢西北境之山，当时并谓之金山，其为今之兴安岭无疑矣。《旧唐书·回纥传》：“乌介可汗去幽州界八十里下营，河东刘沔率兵奄至，乌介惊走东北约四百里外，依和解室韦下营，嫁妹与室韦，托附之，为回鹘相美权者逸隐啜逼诸回鹘杀身介于金山。”此金山，以地望度之，实谓兴安岭。《元史·耶律留哥传》：“留哥率所部会按陈于金山，刑白马白牛，登高北望，折矢以盟。按陈曰：‘吾还奏，当以征辽之责属尔。’”度其地望，似亦谓泰州、临潢西境之山，是辽金前后，亦呼兴安岭为金山也。日本津田博士《金代北边考》，据《金史》

杲、宗雄、宗干诸《传》，谓金山在长春之西，旧泰州之东。案《杲传》：“杲以兵一万攻泰州，下金山县，女固脾室四部及渤海人皆降，遂克泰州。”《宗雄传》云：“斜也、（即杲小名）宗雄与宗干、娄室取金山县，遂与斜也俱取泰州。”其攻克之次，自先春州，次金山，次泰州。然详玩文义，盖春州克后，斜也以正兵攻泰州，面别遣宗雄等攻其西北之金山县，且招降诸部族。金山既下，泰州前后受敌，乃不可守。此兵家常事，不足据为东西之次第也。然则金之泰州，东界肇州，北界乌古迪烈部，西北以金山与外族为界。乌古迪烈部与泰州之位置既定，然后金东北路之界壕，始可得而考也。

金之西北路及临潢路边堡，《地理志》略记其名，而界壕所在，则未之记。界壕利在径直，两边堡则参差不齐，不必尽在界壕线上。

然由边堡以定界壕之所在，当无大误也。《志》云：“东北路，自达里带石堡子至鹤五河地分。临潢路，白鹤五河堡子至撒里乃，皆取直列，置堡戍。”屠氏寄于《蒙兀儿史记》首释之云：“达里带，满洲语，有石也。堡在嫩江西岸，布特哈旧总管衙门之北伊倭齐之地。”又云：“鹤五河即《蒙古游牧记》科尔沁右翼中旗之鹤午河，堡在河上。”又近坊间所出地图，自黑龙江布特哈城之东南，直抵兴安岭之索岳尔济山，画一弧线，题曰：“金长春外堡”，盖即本之屠氏所监修之《黑龙江实测图》。屠图未见。据屠氏之说，似曾目验此界壕及边堡遗址者。然屠氏于额尔古纳河迤西之边堡遗址，屡屡言之，而从未言及兴安岭一带有古长城遗址，当是别有所本。案《西清黑龙江外纪》二。云：“布特哈有土城，因山起伏，西去数千里直达木兰。相传兄弟二人所筑，土人谓之乌尔科。流人亡去不识涂者，多由此入关。”屠氏《图》金边堡起于布特哈，正与《外纪》说合。殆即以此说为根据，而不著其所本；且若得之目验者，则其卤莽诡秘不可讳也。夫《外纪》所记布特哈土城事，自为史学上最有兴味之材料，然其可信与否，须由实地探检决之，屠氏遽信为事实，亦失之轻易。然其以《金志》之鹤五河为《蒙古游牧记》之鹤午河，则至当不可易也。案《记》云：“科尔沁右翼中旗北二百六十里，有鹤午河，出伊克呼巴海山，经摩尔托山东南流入左翼前旗界，会榆河。”又云：“榆河，蒙古名海拉苏台。源出兴安山，经火山东南流，会贵勒尔河。”胡图桂勒尔河。是鹤午河出兴安岭东麓，为桂勒尔河北源之一，金时泰州、临潢分界于此。征之蒙古文献，则此处为金与外族之分界，无可疑也。案《圣武亲征录》屡见塞字及汉塞字，而壬戌、癸亥二年两见阿兰塞，其地望甚为明画。

壬戌年云：“秋，乃蛮杯禄可汗会蔑儿乞部长脱脱别吉、朵鲁班、塔塔儿、哈答斤、散只兀诸部，暨阿忽出拔部、泰赤乌部长。忽都花别吉斡亦刺部长。等，来犯我军及汪可汗。上先遣乘高觐望于捏干贵因都彻地、赤忽地黑诸山，有骑自赤忽儿黑山来告，乃蛮渐至。

上与汪可汗自兀鲁回失连真河，移军入塞。汪可汗子亦刺合居北边，后至据高岭。

方下营，杯禄可汗易之曰：‘彼军漫散，俟其众聚，吾悉卷之。’对阿忽出、火都二部兵，从乃蛮来，与前锋合。将战，遥望亦剌合军势不可动，遂还。亦剌合寻亦入塞会我军，拟战，置輜重他所。上与汪可汗倚阿兰塞为壁，大战于阙亦坛之野。”又癸亥年云：“上止军于阿兰塞，急移輜重于失连真河。中略。上移军合兰只之野。中略。上亦将兵至斡儿弩，遗忒哥山冈沿哈勒合河顺进云云。”案上二条中所见地名，虽有未经论定者，然如兀鲁回失连真河《秘史》作兀勒灰失鲁格勒只惕。之为今乌尔浑河及色野尔集河，哈勒合河之为今喀尔哈河，殆无异议也。据此二条，则阿兰塞与乌尔浑河、色野尔集河极近，而乌尔浑河与鹤午河发源处尤近。则阿兰塞即鹤五河堡子附近之界壕也。又拉施特《集史》同记壬戌年事云：“帝与汪罕离兀鲁回失鲁楚地只特河，向汪古部地。以行近哈拉温赤敦，汪罕子鲜昆在边外从。而后行及山隘，逾隘即汪古部界。中略。未战，而鲜昆军已过山隘至汪古部地云云。”据洪侍郎译贝勒津本。以此记事与《亲征录》相比较，则阿兰塞分明即此哈刺温赤敦。又此谓“逾隘即汪古部界”，汪古部分明即乌古部之异译，非阴山北之汪古部。时乌古久为金属，乌古地即金地，故《录》以塞目之。至哈刺温赤敦之名，《秘史》凡两见。卷六云：“成吉思在巴勒渚纳海子住时，合兰只战役后。有弟合撒儿，将他妻并三子也古、也松格、秃忽撒在王罕处，罄身领几个伴当走出来寻成吉思。寻至合刺温山，蒙文作合刺温磧都。缘岭寻不见。”又卷八：“成吉思对木合黎说：‘东边至合刺温山，蒙文作合刺温只都。你就做左手万户。’”日本那珂博士注：“以合刺温山为兴安岭全体之大名。”余案那珂说是也。《元史·特薛禅传》：“太祖谕火忽曰，哈老温迤东涂河、潢河之间，火儿赤纳庆州之地，与亦乞列思为邻，汝则居之。”然则临潢、庆州西北之连山，亦称哈刺温，与那珂氏说合。然虞集《句容郡王世绩碑》《道园学古录》卷二十三。云：“至元二十五年，也只里王为叛王火鲁哈孙所攻。五月，王从成宗移师援之，败诸兀鲁灰。还至哈刺温山，夜渡贵列河，败叛王哈丹之军，盖得辽左诸部。《元史·土土哈传》略同。案兀鲁灰即《亲征录》之兀鲁回，今之乌尔浑河。贵列河即今之桂勒尔河。是虞集之哈刺温山，与《亲征录》之阿兰塞，拉施特之哈刺温赤敦，地望密合。案：《蒙古游牧记》一。云：“科尔沁右翼中旗北二百里，有温山，蒙古名哈禄那。”哈禄那即哈刺温之对音。此山去鹤午河极近。又此地为金元间东西交通孔道。宗浩出兵泰州，前军至忒里葛山。忒里葛山即今索岳尔济山北方之特尔根山，则师由此道也。成吉思命合撒儿领右手军，沿海自大宁经浯刺、纳浯二江，今松花江及嫩江。泝讨浯儿河今洮尔河。回营。由此道也。土土哈败叛王于兀鲁灰，还至哈刺温山，夜渡贵列河，亦由此道也。然则哈刺温赤敦，本兴安岭之一峰，以其当东面孔道，且为金人要塞之所在，故蒙古人亦举以名兴安岭之全体耳。由是言之，金东北路之界壕，殆沿兴安岭置之。西南至桂勒尔河北源之鹤五河堡子处，与临潢路界壕接。若屠氏之所图，非经目验固有不能遽信者。此东北路界壕之略可考者也。

二、临潢路之界壕

《金史·地理志》：“大定中，临潢边堡，自鹤五河至撒里乃，凡五堡。自撒里乃

以西，凡十九堡。”撒里乃一地，见于《辽史·道宗纪》及《金史·地理志》，然其地望绝无可考。据上节所考，金东北路之界壕，既沿兴安岭置之，则临潢路之界壕，亦必沿兴安岭无疑。拉施特书：“帝驻军乞埭界上察哈察儿山。”察哈察地，《秘史》作扯克彻儿，《亲征录》作彻彻儿，即今之苏克苏鲁山，据《蒙古游牧记》，在阿鲁科尔沁旗北二百三十里。今亦以此山之名其南北之兴安岭山脉。此路界壕直至庆州。《地理志》于庆州下云：“北至界二十里。”又其倚郭朔平县下云“有椎场务”，则庆州有界壕可知。

案庆州即今之白塔子，自是迤而西南，至达里泊南之胡烈么，与西北路界壕接。其详俟于下节论之。

三、西北路之界壕

金之西北路招讨使，初驻燕子城，后为抚州治。后徙界上。后为桓州治。而昌州亦旧属桓、抚二州。故桓、抚、昌三州以北之界壕，并西北路之界壕也。《章宗纪》：“承安五年九月己未，尚书省奏：‘西北路招讨使独吉思忠言，各路边堡墙隍，西自坦舌，东至胡烈么，几六百里。向以起筑匆遽，并无女墙副堤，近令修完。计工七十五万，止役戍军，未尝动民，今已毕工。’上赐诏奖谕。《独吉思忠传》同，但以为永安三年事，是。”是西北路界壕，西起坦舌，东迄胡烈么。坦舌，屠敬山谓即今山西武川厅北之塔集呼都克。然其地已在西南路招讨司辖境，屠说非也。胡烈么，屠氏以为即《章宗纪》承安三年斜出等“请开市场于辖里裒”之辖里裒，而未能实指其地。余案：《章宗纪》之辖里裒，《食货志》作辖里尼要，而《地理志》于昌州之宝山县下云：“有狗冻，国言押恩尼要。”则尼要一语与淖尔同源。《钦定金史国语解》，索伦语尼要，水甸也。今多伦诺尔东北、达里泊之南，有一泊名活来库勒，库勒亦谓泊也。盖即金之辖里尼要也。自此西南之界壕，元人并有记述。其在桓州北者，王恽《中堂事记》《秋涧先生大全集》卷八十。云：“中统二年三月二十四日乙酉，次桓州故城。二十七日戊子，次新桓州。西南十里外，南北界壕尚宛然也。距旧桓州三十里。案此谓新桓州距旧桓州之里数，非谓界壕距旧桓州之里数也。二十八日己丑，饭新桓州，未刻，扈从銮驾入开平府，距新桓州四十有五里。”案元开平府，即今多伦诺尔厅之昭奈曼寺，则新桓州即今之库尔图巴尔哈孙。旧桓州即今库尔图巴尔哈孙南波罗城北之某地点也。王恽所见界壕，当在旧桓州城北十余里，而《金志》云桓州北至旧界一里半，一里殆十里之误也。在抚州北者，则《长春真人西游记》述之。长春以辛巳岁二月十一日过抚州，十五日过盖里泊，十九日出明昌界，谓明昌间所筑界垣。皆向东北行。案：抚州故城即今哈刺巴尔哈孙，黑城。盖里泊即今之克勒泊，而自盖里泊至明昌界之日程，与自抚州至盖里泊之日程略等，则长春所出之明昌界，去秋涧所见界壕不远矣。至昌州北之界壕，则张德辉《纪行》记之曰：“北过抚州，惟荒城在焉。北入昌州，居民仅百家，中有廨舍，乃国王所建也，亦有仓廩，隶州之盐司。州之东有盐池，周广可百里，土人谓之狗冻，以其形似故也。州之北，行百余里，有故垒隐然，连亘山谷。

垒南有小废城，问之居者，曰：‘此前朝所筑堡障也。’城有戍者之所居。”沈子敦《西游记金山以东释》释之曰：“《方輿纪要》云：‘金昌州在兴和金抚州。西北。’又云：‘威宁废县北有昌州城。’案威宁故城在察哈尔正黄旗西南八十余里，地在抚州之西，则昌州在抚州西北。”余按此说非也。德辉与长春同自抚州趋鱼儿冻，今达里泊。长春过抚州后即东北行，德辉虽不取此道，决无西北趋察哈尔右翼地之理，然则昌州仍当于抚州正北求之。《口北三厅志》二。云：“察哈尔镶黄旗牧厂北四十里，有达拍逊诺尔，华言泡子河，盖即金之狗冻。”然则昌州当在抚州稍东北，而张德辉所见故垒，又在其北百余里，盖较界壕在桓、抚二州北者，又稍迤而北矣。

四、西南路之界壕

西南路界壕之与西北相接者，实为净州。赵珙《蒙鞑备录》云：“章宗筑新长城，在静州之北。”《金史·地理志》：“净州，下。刺史。大定十八年以天山县升为丰州支郡，北至界八十里。”案：彭大雅《黑鞑事略》云：“沙井，天山县北八十里。”是沙井在界上也。

元人置砂井总管府及砂井县于此。耶律楚材《湛然居士集》卷三《和移刺子春见寄》云：“邂逅沙城识子初。”又卷四《寄沙井刘子春诗》云：“寄语沙城老故人。”盖以其地有界垣，故谓之沙城。

《备录》谓新长城在静州之北，以唐古朮人守之，即《元史·阿剌兀思剔吉忽里传》所谓“金源氏堑山为界，以限南北，阿剌兀思剔吉忽里以一军守其冲要”者也。又《传》云：“既平乃蛮，从下中原，复为向导，南出界垣。”又云：“太祖留阿剌兀思剔吉忽里归镇本部，为其部众所杀，其妻阿里黑携幼子孛要合与侄镇国逃难，夜遁至界垣，告守者，缒城以登，因避地云中。”此界垣即净州北八十里之界垣，无可疑也。净州地望，今不易考。《蒙古游牧记》云：“四子部落旗北有废净州城。”似失之太北。案天山以山名县，自当在阴山中。而彭大雅云：“出沙井则四望平旷，荒无际天。”盖已在阴山北麓。然则天山沙井，并当在四子部落之南，不得在其北也。

西南路界壕之可考见者止此，而《仆散揆传》云：“筑垒穿堑，连亘九百里。”盖此壕自沙井西包东胜、云内之北，直抵黄河，与西夏接。《地理志》记金之封域云：“右旋入泰州婆卢火所浚界壕，而西经临潢、金山，跨庆、桓、抚、昌、净州之北，出天山外，包东胜，接西夏云云，”殆可谓兼为界壕写照也。√

西辽都城虎思斡耳朵考

西辽事迹，见于中土记载者，至为简略。其建都之地，《辽史》作“虎思斡耳朵”，《天祚纪》：延庆二年，耶律大石班师东归，马行二十日，得善地，遂建都城，号虎思斡耳朵）。《金史》作“骨斯讹鲁朵”，《忠义粘割韩奴传》：大定中，回纥移习览三人至西南招讨司贸易，自言本国邹恬番部，所居城号骨斯讹鲁朵。俗无兵器，以田为业，所获十分之一输官，耆老相传。先是，契丹至，不能拒，因臣之。契丹所居屯营乘马行，自旦至日中，始周匝）。《元史》作“谷则斡儿朵”，《曷斯麦里传》：曷斯麦里，西域谷则斡儿朵人，初为西辽阔儿罕近侍，后为谷则斡儿朵所属可散八思哈长官）或作“古徐鬼国讹夷朵”，《郭宝玉传》：甲戌，从帝讨契丹遗族，历古徐鬼国讹夷朵等城，破其兵三十余万。案鬼当作儿，钱竹汀说）。《元遗山文集》作“古续儿国讹夷朵”，《文集》二十八，《大丞相刘氏先莹神道碑》：车驾征契丹遗族，是为西辽历古续儿国讹夷朵等城，战合只，破之）。刘郁撰常德《西使记》作“亦堵”，《西使记》：二月二十四日过亦堵。两山间土平民伙，沟洫映带，多故皇坏垣。问之，盖契丹故居也。计其地去和林万五千里，而近有河，曰亦运流，汹汹东注，土人曰此黄河也）。亦堵者，盖“i化夷朵”之略。

李真常《长春真人西游记》谓之“大石林牙”（《西游记》上：十月十有六日，西南过板桥，渡河。晚至南山下，即大石林牙[自注：大石，学士林牙小名]。其国王，辽后也。自金师破辽，大石林牙领众数十走西北，移徙十余年，方至此地。其风土气候，与金山以北不同。平地颇多，以农桑为务，酿葡萄为酒，果食与中国同。惟经夏秋无雨，皆疏河灌溉，百谷用成。东北西南，左山右川，延袤万里，传国几百年），亦但谓之“大石”，《西游记》上：《游河中西园诗》“大石东过二十程”。又卷下：《读衬句》“西过大石半年居”。则又以人名名其国都。而拉施特《蒙古史》则谓之“八喇沙衮”。案《元史·地理志》“西北地附录”，笃来帖木儿属地中有“八里茫”一地，《经世大典图》亦有八里茫图，在阿力麻里之西南，可耳鲁（即葛逻禄）亦刺八里之南，倭亦（今乌什）之北，故武进屠氏（寄）。《蒙兀儿史记》以八里茫为“八里沙”之伪，即以拉氏书中之“八喇沙衮”当之，其说是也。余谓虎思斡耳朵者，契丹之新名，其名行于东方。八喇沙衮者，突厥之旧名，早行于东西二土，八喇沙衮即《唐书·地理志》之裴罗将军城也。

《资治通鉴考异》（二）引《唐元宗实录》突厥葛逻禄下首领有裴罗达干，《唐书·突厥传》突骑施黑姓可汗有阿多裴罗，《回鹘传》骨咄禄毗伽阙可汗之名为骨力裴罗，又有将军鼻施吐拔裴罗，《大唐会要》（九十八）有回纥演者裴罗，《册府元龟》（九五五）纪突厥首领有采施裴罗，又（九七一及九七二）纪回纥使臣有近支伽裴罗、阿德俱裴罗、裴罗达干等，是裴罗者，突厥种族中之人名也。回鹘人中有称“将军”者，当是应用汉语。辽金时之“相温”、“详稳”、“详袞”，元时之“桑昆”、“想昆”，并自此语出。是裴罗将军一城，当是西突厥故名，讫辽金间，西域人犹以此名呼之，谓之“八喇沙衮”，《元史》又略称“八里沙”，此地

名源流之可考者也。又自地理上言之，则有三证：一，《唐书·地理志》载贾耽《皇华四达记》云至热海后百八十里出谷至碎叶川口，八十里至裴罗将军城，又西四十里至碎叶城，北有碎叶水，北四十里有羯丹山，十姓可汗每立君长于此。”案热海者，今之特穆尔图泊。碎叶水者，今之吹河。是裴罗将军城在吹河之南又距吹河东人特穆尔图泊处八十里。

而《元朝秘史》（五）云王罕又走去回回地面垂河，行人合刺乞塔种古儿皇帝处。”（同卷六《太祖遗王罕书》，蒙文内亦有此语，但译文略去“垂河”字样）又卷六云：“乃蛮古出鲁（克）过委元合儿鲁种处，至回回地面垂河，行与合刺乞塔种的人古儿罕相合了。”案垂河即吹河。合刺乞塔即黑契丹，蒙古人以之呼西辽。古儿皇帝古儿罕，即耶律大石自号之葛儿罕（《辽史·天祚纪》），若阔儿罕（《元史·曷思麦里传》）也。是西辽都城地滨吹河，《西游记》言“西南过板桥，渡河，晚至南山下，即大石林牙。此河亦谓吹河”。《西使记》契丹故居有河曰，亦句），运流汹汹东注。”正与东入特穆尔图泊之吹河合，此一证也。今吹河之南即天山山脉，其山西人谓之阿历山德岭。《西游记》云“晚至南山下”，即谓此山。《西使记》云“两山间土平民伙，沟洫映带”，则兼水南之天山水北之羯丹山而言，此二证也。《唐志》自裴罗将军城至阻罗斯之距离，凡三百五十里。

据《大唐西域记》及《慈恩法师传》，则五百八九十里（两书无裴罗将军城，今以自素叶水城至咀逻私之里数，加裴罗至素叶之里数计之）。大抵贾耽所书里数，率较玄奘所书为短，当由计里之单位或方法不同。今征之元人所记，则邱长春自大石林牙西行七八日始见一石城（此城即咀罗斯，以长春前此沿山向西行，而至此，山忽南去，乃并西南山行。与《西域记》自素叶至哄逻私皆西行至咀逻私后方西南行者密合）。常德以二月二十四日过亦堵，二十八日过塔赖寺，塔赖寺即长春所见之石城。但长春以车行，常德以马行。又常德奉使，当宪宗己未，在太宗大置站赤之后，故迟速不同。即如自咀罗斯至赛篮，长春行五日，常德仅三日。又自赛篮至寻思干，长春行十四日，常德仅八日。以比例求之，则常德五日之行程，正当长春七、八日，是二书所记自西辽都城至阻罗斯之行程，正与玄奘及贾耽所记自裴罗将军城至阻罗斯之里数相应，此三证也。然则八刺沙衮即裴罗将军城，殆无疑问。考隋唐以来热海以西诸城，碎叶为大，西突厥盛时已为一大都会。《慈恩传》言“至素叶水城，逢突厥可汗方事畋游，军马甚盛。”及唐高宗既灭贺鲁，移安西都护府于龟兹，以碎叶备四镇之一（《唐书·西域传》）。调露中，都护王方翼筑碎叶城，四面十二门，为屈曲隐伏之状（《唐书·地理志》及《王方翼传》）。后突骑施乌质勒屯碎叶西北，稍攻得碎叶城，因徙居之（同《突厥传札》）。

开元十年，十姓可汗请居碎叶城，安西节度使汤嘉惠表以焉耆备四镇（同上《西域传·焉耆传》）。嗣后，突骑施别种苏禄子吐火仙复居之（同上《突厥传》）。大宝七年，始为北庭节度使王正见所毁（《通典》一九三引杜环《经行记》），后葛禄复据其地。唐中叶以后，与西域隔绝，其地遂无所闻。及大石林牙既平西域，思

复契丹故地，乃东徙于此。然不居碎叶而居其东四十里之裴罗将军城者，盖唐时碎叶故城已毁坏无余故也。而《金史·忠义传》言“契丹所居屯营，乘马行，自旦至日中始周匝”。则视唐之碎叶城广大可知，更无论故裴罗将军城矣。据《辽史·天祚纪》自大石都此，讫直鲁古亡，凡七十有八年。其未东徙时，则都于寻斯干。”

此事《辽史》虽不纪，然谓班师东归，马行二十日得善地，正与邱长春《寻斯干诗》所谓“东石东过二十程”者相合，故西辽名寻斯干为河中府（《西游记》自注邪迷思干大城，大石有国时名为河中府。《湛然居士集》卷四《再用韵纪西游事诗》注：西域寻斯干城，西辽目为河中府）。东徙之后，仍建为陪都。《西游记》云：西南至寻斯干，万里外回纥国最佳处，契丹都焉。”即以其西都言之。耶律文正《湛然居士集》（二）和裴子《法见寄》云扈从出天山，从容游大石。”此大石谓寻斯干。盖寻斯干与虎思斡耳朵为契丹东西二都，故并得大石之名耳。西辽都城自来未有真切言之者，故聊发其概焉。

元铜虎符跋

上虞罗氏藏铜牌一，上端文隐起作虎首，首下有孔，以便系佩。孔下蒙古字一行，两面同。余谓此即《元史》之虎符也。元之虎符，俗云“虎头牌”。汪元量《水云集·湖州歌》云：“文武官僚多二品，还乡尽带虎头牌。”

关汉卿《闺怨佳人拜月亭杂》剧云：“虎头儿金牌腰内悬。”则当时本谓之“牌”，不谓之“符”。雅言谓之“虎符”，名虽古，制则非矣。

往读《元史》，窃怪元人受虎符之赐者极多，乃无一传世者。今见此牌，并忆汪、关诗词语，可以知当时金、银诸符之制矣。

蒙文《元朝秘史》跋

此本卷首书题下有“忙豁仑纽察脱察安”二行，曩顾千里跋此本，以为撰人姓名，余谓此即《元朝秘史》之蒙古语也。忙豁仑即蒙古，脱察安即《元史》之脱必赤颜若脱卜赤颜，非撰人名。明火原洁《华夷译语·凡例》云：字下小注卜字、必字者，皆急读合口音也，不用读出。

考《元史》之脱必赤颜若脱卜赤颜，《元史·国语解》改作托（卜）齐延，卜字正作字下小注，则读为脱察安，固其所也。《元史·虞集传》有旨修《经世大典集》，请以国书《脱卜赤颜》增修太祖以来事迹，承旨塔失海牙曰：脱卜赤颜非可令外人传者。遂已。

案既称国书《脱卜赤颜》，则当文宗时，此书尚无汉译之本。乃《察罕传》言仁宗命译脱必赤颜，名曰《圣武开天记》，及《纪年纂要》、《太宗平金始末》等书，俱付史馆云云。考明《文渊阁书目》卷五有《元朝秘史》、《续秘史》各二部，卷六有《圣武开天记》一部，则察罕所译与虞集所请，自非一书，缘《圣武开天记》既宣付史馆，且至明初尚存，则与虞集国书之目、塔失海牙不传外人之言，不能相符。疑元时自有两种《脱卜赤颜》，其译为《圣武开天记》者，殆即今之《元圣武亲征录》，而虞道园所请以修《经世大典》者，则今之《元朝秘史》也。明郑晓《今言》（四）：洪武十五年，命翰林侍讲火原洁等编类《华夷译语》！复令取《元秘史》参考，以切其字、谐其声音。则洪武中叶，此书已有译本。

今按此书“元朝秘史”四字，明是明人所题，而《续集》卷一蒙文内“中都”字样，译文易为“北平”，即用洪武元年所改之名，则移译之事，自在洪武元年后。考宋濂《銓坡集》（四）有《吕氏采史目录序》，云：洪武元年冬十有一月，命启十三朝实录，建局删修《元史》。明年秋七月史成，自太祖至于宁宗，总一百五十九卷；顺帝三十六年之事，旧乏实录，缺略不备，于是奏遣使者十一人遍行天下，凡涉史事者悉上送官。今之北平，乃元氏故都。章贡、吕仲善时司膳成均，乃被是选。是月癸卯，即乘驿北上，八月丁卯抵北平，凡诏令、奏疏、拜罢、奏请，布在方册者，悉辑为一；有涉于番文，则令译而成文。至冬十一月壬辰朔始完。以帙计者八十，舁至行中书省，借官印识之，进于南京，濂于是有所依据，修成《续史》四十八卷。夏六月（洪武三年），复诣阙上进云云。是洪武二年采史之役，实兼译事。

此《元朝秘史》，亦即所译番文之一，惜洪武三年重修时，仅续成顺帝一朝事；而于已成之百六十九卷未遑修改，故《元史》中迄未采入此书一字。宋濂《元史目录后记》虽云“凡前书所未备者，颇补完之”，盖亦一具文而已。此书，吕仲善既上之史馆，故洪武十五年撰《华夷译语》时得取以参考。今传本行款，正与洪武本《华夷译语》相同，盖出一时所刊。前人误视为元槧本，盖未之深考也。

又按元时《脱卜赤颜》实不止此，《文宗本纪》，至顺三年五月，撒迪请备录皇上登极以来固让大兄往覆奏答，其余训敕辞命，及燕帖木儿等宣力效忠之迹，命朶来续为《蒙古脱卜赤颜》，置之奎章阁，从之。又《虞集传》，文宗以妥欢帖木儿太子乳母夫言，明宗在日，谓太子非其子，黜之江南，召翰林学士承旨阿邻帖木儿、奎章阁大学士忽都鲁笃弥实书其事于《脱卜赤颜》云云。其书体例，同《亲征录》？抑同此书？

虽不可考，而云续为《蒙古脱卜赤颜》，则与此书标题正同。意当尚有纪宪宗以下诸朝事者，借乎其仅传此本也。

乙丑十月望日。

《圣武亲征录校注》序

《圣武亲征录》一书，乾隆间修《四库书》时，以其序述无法，词颇蹇涩，译语互异，未著于录，仅存其目于《史部·杂史类》中。钱竹汀先生始表章其书，为之跋尾。道光以后，学者颇治辽、金、元三史及西北地理，此书亦渐重于世。张石洲、何愿船二先生始为之校勘，而何氏治之尤勤。其歿后，稿本流传京师，光绪朝士若顺德李仲约侍郎、萍乡文道希学士、嘉兴沈子培先生递有增益。岁在甲午，桐庐袁重黎大常刊之于芜湖，是为此书有刊本之始。顾张、何二家所据本，虽云出竹汀先生家，然辗转传抄，谬误百出；石洲仅得翁覃溪学士家藏本一校之，无大悬绝也。

余前在海上，于嘉兴沈先生座上见其所校《说郛》本《亲征录》，为明弘治旧抄，与何本异同甚多。先生晚岁不甚谈元史事，然于《说郛》本犹郑重手校。未几，先生归道山，其校本遂不可见。比来京师，胶州柯凤孙学士为余言，元太祖初起时之十三翼，今本《亲征录》不具，《说郛》本独多一翼。乃益梦想《说郛》本。旋知其本藏江安傅君沅叔所，乙丑季冬，乃从沅叔借校。沅叔并言，尚有万历抄《说郛》本在武进陶氏。丙寅正月赴天津，复从陶氏假之，其佳处与傅本略同。又江南图书馆有汪鱼亭家钞本，亦移书影钞得之。合三本互校，知汪本与何氏祖本同出一源，而字句较胜，夺误亦较少。《说郛》本尤胜，实为今日最古最备之本。因思具录其异同，为校记以饷学者。顾是书有今本之误，有明钞本之误，有原本之误，三者非一一理董，犹未易遽读也。幸而此书之祖称之《秘史》，与其兄弟之拉施特书、其子姓之《元史》及当时文献尚可参验，因复取以比勘，存其异同，并略书其事实，为校注一卷。

昔吴县洪文卿侍郎译拉施特书，并为《秘史》及此《录》作注，而遗稿不传，其说略见《元史译文证补》中。武进屠敬山撰《蒙兀儿史记》，于是《录》探索尤勤。近复有仁和丁益甫考证地理，亦非无一二可采。兹复剽取其说，其有瑕颚，间加辨正，虽不敢视为定本，然视何氏校本，则差可读矣。当有元成宗之世，西域人拉施特撰《蒙古全史》，其《太祖纪》一种，除所载宗室世系及西域战事详于此《录》外，余大都与此《录》符同，故学者多谓此《录》出于蒙古《脱卜赤颜》。往读《元史·察罕传》，言“仁宗命译《脱必赤颜》，名曰《圣武开天记》，及《经年纂要》、《太宗平金始末》等书，俱付史馆”云云。

案明修《元史》，其《太祖》、《太宗》二《纪》大半取材此《录》而明《文渊阁书目》乃有《圣武开天记》而无《圣武亲征录》，颇疑《亲征录》即《开天记》。故《开天记》译于仁宗时，而此《录》之成确在世祖之世。今本癸亥年王孤部下原有注云：“今爱不花驸马丞相白达达是也。”考阎复《高唐忠献王碑》及《元史·阿剌兀思剔吉忽里传》，爱不花当中统之初已总军事，又，其子阔里吉思，成宗即位封高唐王，则爱不花之卒必在世祖时，而此《录》成时，爱不花尚存，则非察罕所译之《开天记》明矣。

又此《录》虽冠以“圣武”之名，实兼备英、文之事，且太祖事止记岁名，而太宗事则详及月日，盖所取材本自不同。疑太祖朝事出《脱卜赤颜》，与《开天记》同源；太宗朝事则别取《平金始末》等书以益之。且作者于蒙古文字未能深造，证以《秘史》，蟾驳不一而足，故仁宗朝复令察罕重译。今拉施特书幸存而察罕书不传，殊令人有遗憾已。

丙寅二月清明日，海宁王国维。

《长春真人西游记校注》序

《长春真人西游记》二卷，题“门人真常子李志常述”。案志常字浩然，道号通玄大师。长春将歿，命门人宋道安提举教门事，尹志平副之。未几，道安以教门事付志平。太宗十年戊戌，志平年七十，又举志常自代。宪宗即位，以志常领道教事，戊午岁卒，凡主全真教事者二十有一年。至元间，释祥迈撰《辨伪录》，载志常掌教时，侵占各路寺院四百八十二处，又令令狐璋、史志经等集《老子化胡成佛经》及《八十一化图》，谤讪佛教。少林裕长老以闻。宪宗召少林及志常廷辨于和林万安阁，志常论拙，遂令毁《化胡》等经及将所占寺院三十七处还付释家。志常因此忿恚而卒。

考此《录》本为僧徒攻全真教而作，于长春师弟颇极丑诋，所记全真家占居僧寺一节，诚为事实。然自金贞祐以来，河朔为墟，巨刹精蓝，鞠为茂草，缁衣杖锡百不一存。乱定之后，革律为禅者不可胜数，全真之徒亦遂因而葺之，以居其人。坐以寇攘，未免过当。虽长春晚节以后颇凭藉世权以张其教，尹、李承之，颇乖重阳创教之旨。然视当世僧徒如杨琏真伽辈，则有间矣。然则祥迈所记，亦仇敌诬谤之言，安可尽信哉！此《记》作于长春没后，前有孙阳《序》，署戊子秋后二日，正当睿宗拖雷监国之岁。而卷末有庚寅七月大葬仙师事，盖书成后所加入。考全真之为道，本兼儒释，自重阳以下，丹阳、长春并善诗颂，志常尤文采斐然。其为是《记》，文约事尽，求之外典，惟释家《慈恩传》可与抗衡，三洞之中未尝有是作也。

乾隆之季，嘉定钱竹汀先生读《道藏》于苏州元妙观，始表章此书，为之跋尾，阮文达遂写以进秘府。道光间，徐星伯、程春庐、沈子敦诸先生迭有考订，灵石杨氏因刊入《连筠录丛书》，由是此书非复丙库之附庸，而为乙部之要籍矣。光绪中叶，吴县洪文卿侍郎创为之注，嘉兴沈乙庵先生亦有笺记，而均未刊布。国维于乙丑夏日始治此书，时以所见疏于书眉，于其中地理、人物亦复偶有创获。积一年许，其得若干条，遂尽一月之力，补缀以成此注。盖病洪、沈二家书之不传，聊以自便检寻云尔。因略论作者事迹，弁于其首云。

丙寅孟夏，海宁王国维。

《蒙鞑备录》跋

此书题“宋孟珙撰”，书中亦自称名为珙。案《宋史·孟珙传》，珙未尝使蒙古，疑别一人也。书中称“去岁庚辰年”、“今辛巳年”。是此书作于辛巳，乃宋宁宗嘉定十四年，蒙古太祖之十六年也。是岁宋遣苟梦玉使蒙古。《元史·太祖纪》十六年，宋遣苟梦玉来请和。”耶律铸《双溪醉隐集》二《凯歌凯乐词》注云：“昔我太祖皇帝出师问罪西域，辛巳岁夏驻弊铁门关。宋主宁宗遣国信使苟梦玉通好乞和，太祖皇帝许之，敕宣差噶哈送还其国。（刘时举《续宋中兴编年资治通鉴》[十五]）

嘉定十四年辛巳，鞑靼国使葛合赤孙来议事。”噶合赤孙即《双溪醉隐集·凯歌凯乐词》注之宣差噶哈，成吉思使送苟梦玉者）又引《蜀边事略》：“绍定元年戊子，制置使郑损与所代官四川制置使桂如渊会于顺庆，以时相所喻和议密指告之，且舆以朝廷所授苟梦玉《使北录》二册。”是梦玉于是岁北使亦有纪录。顾梦玉远至西域，而此书所记行程迄于燕京，未及漠北。又梦玉亲见太祖，而撰此《录》者仅见木华黎国王，故知非梦玉书。

案《齐东野语》（卷十九）《嘉定宝玺》条云：“贾涉为淮东制阃，尝遣都统司计议官赵珙往河北蒙古军前议事。久之，珙归，得其大将扑鹿花所献，皇帝恭膺天命之宝，玉玺一座！并元符三年宝样一册！及镇江府诸军副都统翟朝宗所献宝检一座，并缴进于朝。诏下礼部太常寺讨论受宝典礼。此嘉定十四年七月也。”《宋史·贾涉传》亦言初，翟朝宗得玉玺献诸朝，至是赵珙还，又得玉印，文与玺同而加大。”是嘉定辛巳使蒙古军前者有赵珙，与此书撰述岁月及称名相同，则撰此书者当即其人，后人不知其姓，误以为孟珙耳。

据《野语》，珙为淮东制置使贾涉所遣，非奉朝命，与后来江淮制置使史嵩之遣邹伸之报谢蒙古使同。而是年苟梦玉奉使，则以朝命行之，故梦玉至西域见成吉思汗，珙仅至燕见木华黎也。

又《宋史·李全传》：“嘉定十三年，赵拱以朝命谕京东，过青崖固，严实求内附。拱与定约，奉实款至山阳，举魏、博、恩、德、怀、卫、开、相九州来归。贾涉再遣拱往，配兵二千，李全亦请往。（中略）全所携镇江军五百人多怨愤，全乃分隶拱，使先归”云云。此事在撰此书前一年，赵拱当亦赵珙之伪，其使蒙古军前，当在再使京东之后矣。（珙盖以金人降宋，故《野语》载士子贻葛司成书称为“异类”。其属使山东、河北，盖亦以其熟于北方情状故也。）

海宁王国维。

《黑鞑事略》跋

此书后有嘉熙丁酉永嘉徐霆长孺《跋》云：“霆初归自草地！尝编叙其风土习俗。及至鄂渚，与前纲书状官彭大雅解后，各出所撰以相参考，亦无大辽绝，遂用所著者为定本。间有不同，则霆复疏于下方”云云。今书中顶格书者，大雅原书，其低一字者，长孺所疏也。长孺随使蒙古，在宋理宗端平初年，当蒙古窝阔台汗之七八年。本书云：“霆至草地时立金帐，想是以本朝皇帝亲遣使臣来，故立之以示壮观。前纲邹奉使至不曾立，后纲程大使、更后纲周奉使至皆不立。”

考《宋史·理宗纪》，绍定五年（壬辰）十二月，大元再遣使，议攻金，史嵩之以邹伸之报谢。端平元年（甲午）十二月己卯，大元遣王楸来。辛卯遣邹伸之、李复礼、乔士安、刘溥报谢。二年（乙未）正月，以御前宁淮军统制、借和州防御使程芾为大元通好使，从义郎王全副之。嘉熙二年（戊戌）三月己丑，命将作监周次说为大元通好使。本书所谓邹奉使即邹伸之，程大使即程芾，周奉使即周次说。是长孺随使当在邹伸之之后，程芾之前，而邹、程奉命使北，相距才一月，中间未必更遣他使。本书所谓前纲邹奉使至时不立金帐者，疑谓伸之壬辰初使时事，而长孺则与于伸之再使之役。盖伸之初使实衔史嵩之命，而再使时则奉朝命，故曰“霆至草地时立金帐，想是以本朝皇帝亲遣使臣来”，可互证也。故伸之再使，虽奉命于甲午十二月，然其至草地已在丙申之夏。本书云：“霆在燕京，见差胡丞相来，黠货更可畏，下至教学行及乞儿行，亦出银作差发”云云。

考《皇元圣武亲征录》，甲午（太宗七年）遣忽都忽主治汉民。乙未夏，忽都忽籍到汉民一百一十一万有奇。《元史·耶律楚材传》亦纪此事，则云“丙申七月，忽都虎以民籍至”云云，视《亲征录》差后一年。案忽都忽、忽都虎，《元史·太宗纪》亦作胡土虎，本书胡丞相即谓此人。其至燕京定差发，当在乙未、丙申间，而长孺适以是时留燕，则亦当在乙、丙间矣。后至草地住月余，其回程宿野狐岭在七月十五日，则其至草地时正当盛夏。又跋中称彭大雅为前纲书状官，则大雅当在邹伸之壬辰一行中。

大雅后为四川制置副使，以贪黠获咎。宋季《三朝政要》（二）：“嘉熙四年，彭大雅使北。”是大雅于此书成后又膺专对之命。又《宋史》多记大雅获罪事，而《政要》则颇称大雅守蜀之功，云：“彭大雅守重庆时，蜀已残破，大雅披荆棘，冒矢石，竟筑重庆城，以御利阗，蔽夔峡，为蜀之根柢，自此支吾二十年，大雅之功也。然取办迫促，人多怨之。其筑重庆也，委幕僚为记，不惬意，乃自作之曰：“某年月日，守臣彭大雅筑此为国西门，谒武侯庙，自为祝文，云云。其文老成简健，闻者莫不服之。后不幸遭败而卒，蜀人怀其思，为之立庙。”故其为此书，叙述简该，足征觐国之识。长孺所补，亦颇得事实。蒙史开创时史料最少，此书所贡献当不在《秘史》、《亲征录》之下也。

乙丑十二月，海宁王国维。

黑车子室韦考

丁卯暮春，从友人借得日本文科大学所印《满洲朝鲜历史地理研究报告》，中有津田博士《室韦考》谓室韦本部自后魏迄唐并在今嫩江流域，而唐人并兴安岭西及呼伦泊西南诸部族皆呼之曰“室韦，盖本之室韦本族部人之言，而非诸部族之所自称者。其说甚精辟，独不及黑车子室韦及其南徙事，因补著之。考两《唐书·室韦传》，并无黑车子部落。唐人及五代人著书，有“黑车子”，而不承认以“室韦”字，故津田博士于《辽代乌古敌烈考》中，释《辽史·太祖纪》之黑车子室韦为二部之名，然《辽史·百官志》属国职名中有室韦国大王府、有黑车子室韦国大王府，则“黑车子室韦”五字自当连续，博士释为二部者非也。其住地，则《会昌一品集》（卷六）赐黠戛斯书云：黑车子犹去汉界一千余里，在沙漠之中。《五代史：四裔附录》引胡峤《陷虏记》云：契丹北有黑车子。语皆广泛，无以指定其地。考《通鉴》言回鹘乌介可汗走保黑车子（《考异》云从《会昌伐叛记》、《实录》、《新传》）。

《旧书·回纥传》独云依和解室韦，则黑车子殆即和解室韦之异名。《旧书·室韦传》云：今室韦最西，与回纥接界者，乌素固部落，当俱轮泊之西南，次东有移塞没部落，次东有塞曷支部落，次东有和解部落，次东又有乌罗护部落，又有那礼部落。案俱轮泊即今呼伦泊，则和解部室韦之地当在今呼伦泊东南；又其东之乌罗护部落，即《旧书·北狄传》别出之乌罗浑，传云：此部南与契丹接，则那礼部落当即谓耶律氏始祖泥礼所统之部落也（泥礼见《旧书·契丹传》。耶律《辽实录》作涅里，陈大任《辽史》作雅里）。则和解部落当在今兴安岭左右，与岭西之达怛相近。

《会昌一品集》（卷五）“赐回鹘温没斯特勒等诏书”云：秋热，卿及部下诸官，并左相阿波兀等部落黑车子达怛等平安好。案左相即左厢（回鹘有内宰相、外宰相而无左右相，故相当读为厢。《通典》西突厥分十箭，为左右厢，鄂尔昆河西畔之回鹘必伽可汗残碑亦有“□厢沓实力”之名，是突厥、回鹘皆分属部为左右厢。左右两厢，唐人亦作两相，见贾公彦《仪礼疏》卷十七及卷三十四），黑车子与达怛并为回鹘左厢部落，则二部相近明矣。然至回鹘国破、种人分散之时，此部或他种室韦之一部，亦随回鹘而南，至中国塞下，《旧书·回纥传》那颉啜战胜全占赤心部下七千帐，因据室韦黑沙、榆林，东南入幽州雄武军西北界，《新书》易之曰：那颉啜收赤心部下七千帐，东走振武大同，因室韦黑沙南窥，幽州节度使张仲武破之，悉得其众。

据《旧书》之文，则黑沙、榆林并是地名，其地当在振武大同之东北，幽州之西北，而与室韦连言，殊不可解。据《新书》，则黑沙似是部名，盖即黑车之异译，盖此时黑车子室韦当有一部游牧幽州塞外者，盖那颉啜因之，否则自振武大同东趋幽州，与黑车子室韦之原住地固风马牛不相及也。《会昌一品集》（卷二）《幽州纪

《圣功碑铭》云：回鹘下有二部，曰赤心宰相、曰那颉啜特勒。赤心者，天性忿鸷，戎马尤盛，初与名王媿没斯首谋内附，俄而负气恃力，潜图厉阶，为媿没斯所给，诱以俱胝可汗，戮于帐下，其众大溃，东逼渔阳公（谓卢龙节度张仲武）。以室韦悍极之兵，近我边鄙，俾其侦逻，且御内侵，寻以征役不供，为虜所败，由是介马数万连亘幽陵，云云。盖其时室韦虽为回鹘役属，然亦朝贡于唐，故仲武俾其侦逻，而室韦不从，故曰“征役不供”。又（卷十五）《请发镇州兵马状》云：又幽州奏进官孙方造云，仲武破回鹘之时，收得室韦部落主妻儿。昨室韦部落主欲将羊马金帛赎妻儿，仲武并不要，只使杀回鹘监使，即还妻儿。是回鹘侵幽州之众，中有室韦可知。时此种室韦根据地，去幽州亦不甚远。《旧书》云：会昌三年，乌介去幽州界八十里下营。是夜，河东刘沔率兵掩至乌介营，乌介惊走东北约四百里外，依和解室韦下营。

案两《唐书》刘沔、石雄诸传、《新书·回鹘传》，刘沔遣石雄夜袭乌介营，在振武不在幽州，则乌介东走幽州塞外，又东北走和解室韦，并在被袭之后，《旧书》记被袭事于东走幽州后，甚误。然乌介于被袭后，曾去幽州界八十里下营；又自此走东北四百里外依和解室韦下营，似事实也。和解室韦原住地在兴安岭左右，所谓黑车子去汉界一千余里是也；而乌介依室韦乃仅东北走四五百里，则是时和解室韦之全部若一部，必已西南徙无疑。逮至契丹之兴，则黑车子室韦更南徙中国近塞。

《辽史·太祖纪》云：唐天复三年九月，讨黑车子室韦，唐卢龙节度使刘仁恭发兵数万，遣养子赵霸来拒。至武州，太祖谍知之，伏劲兵桃山下，遣室韦人牟里诈称其酋长所遣，约霸兵会平原。既至，四面伏发，擒霸，歼其众，乘胜大破室韦。明年七月，复讨黑车子室韦，唐河东节度使李克用遣通事康令德乞盟。冬十月，太祖以骑兵七万会克用于云中。又太祖二年冬十月，遣轻兵取吐浑叛入室韦者。夫黑车子室韦原住地本在契丹之北，乃因伐黑车子故，而南与刘仁恭交兵，复与李克用会盟。又吐浑与黑车子道里远隔，何以叛入室韦？

此必因黑车子室韦已南徙幽并近塞，故有此事实也。余作《鞑靼考》及《蒙古考》，见此二部当唐之季世均有南徙之迹，此黑车子室韦亦然。

盖当回鹘既衰、契丹将兴之际，北方民族间受到一种之感应，故有移徙之事，其原因虽不可知，而迁徙则为事实，故备论之。

蒙古札记

塔纳

塔纳，《秘史》旁注及译文均云“大珠”，即今东珠也。东珠之名起于近世，然中国汉魏时已知之。鱼豢《魏略》云：“扶余出大珠，如酸枣。”（《太平御览》卷入百二引）《魏志》及《后汉书·东夷传》并袭其文。《辽史·食货志》“铁离秣鞞、于厥等部，以蛤珠、青鼠、貂虎、胶鱼之皮，牛羊驼马毳厨物，来易于辽者，道路触属。”且由契丹入宋。宋人甚重之，谓之北珠，然惟宫禁用之，民间买卖有禁。《续资治通鉴长编》（卷三百九）。“元丰三年。李承之权三司使。有商人违禁货北珠，乃为贵主所售，狱久不决。承之曰：“朝廷法令畏王姬乎。遂命取之。”至徽宗朝，北珠尤多入中国。《三朝北盟会编》（卷三）“中国崇宁之间，漫用奢侈，宫禁竞尚北珠。北珠者，自北中来榷场相贸易。天祚知之，始欲禁绝，其下谓中国倾府库以市无用之物，此为我利，而中国可以困。因恣听之。而天祚亦骄汰，遂从而慕尚焉。北珠美者大如弹子，而小者若桐子，皆出辽东海汉中。每八月望，月色如昼，则必大熟。而北方沍寒，九十月则坚冰厚已盈尺，凿冰没水而取之，人已病焉。又有天鹅能食蚌，则珠藏其嗉。又有俊鹞号海东青，能击天鹅。人以俊鹞而得天鹅，则于其嗉得珠焉云云。”案近世东省采珠，率以四月往，八月还。此凿冰采珠及得之天鹅嗉中之说，恐皆出传闻之误。惟北珠自此多输入中国，则事实也。及宋白海上与金人交通，金亦以北珠相遗。

《续通鉴长编》（四百四十二）：“重和元年闰九月，阿骨打发渤海人李善庆、熟女真散都、生女真勃达三人，赍国书并北珠、生金、貂革、人参、松子同马政等来。”故北宋之季，藏珠最富。然《宣和录》（《北盟会编》九十七引）记：“靖康之变，虏人入内，径取诸库珍珠四百二十三斤，玉六百二十三斤，珊瑚六百斤，玛瑙一千二百斤，北珠四十斤，西海夜明珠一百三十个。”亦未免夸大其辞。观《大金吊伐录》（一）：“天会四年正月，宋主致谢书，别幅有珍珠蹙圈夹袋子一副。注：上有北珠二十三颗，麻调珠全。”又：“宋主遣李税持宝物折充金银书，有珍珠束带一条。注：上有北珠二十五颗。”北珠独记颗数，则其珍贵可知，似库中不应有四十斤之多也。南渡以后，宫禁势家犹有此物，盖又新自榷场输入者。

《癸辛杂志记》：韩彦古以白玉为小合，满贮北珠遗范西叔。”又记：“韩平原诛后，斥卖其家所有之物，至于败衣破絮，亦各分为小包，包为价若干。时先妣漫以数券得一包，则皆妇人敝鞋也。方悲恨，欲弃之，疑其颇重，则内藏大北珠二十粒。”是南宋富贵家亦有此物，不独宫禁也。金时尽有产珠之地，故官自采捕，《金史·海陵纪》：天德四年十一月辛丑，买珠于乌古迪烈部及蒲与路，禁民间私相贸易，仍调两路民夫采珠一年。”

又《世宗纪》：大定九年七月，罢东北路采珠。”故金之末年藏珠为最多。《世威

徒单四喜传》：正大九年制旨取宫中宝物，马蹄金四百枚，大珠如栗黄者七千枚。”此珠之入中国者也。其输入塞外诸部及西方诸国者，如《秘史》所载：塔塔儿有塔纳秃款只列。”（大珠衾）“畏吾儿亦都护以塔纳思入贡。”太宗时，西方之报达国，亦“令岁贡塔纳思”，盖金时回回商人转贩至彼。然报达之塔纳思，恐系西海所产珠之大者，蒙古人漫以东方塔纳之名名之耳。蒙古初年，此珠之用尤广。《辇耕录》（卷三十）云：“只孙宴服！贯大珠以饰其肩背膺间！首服亦如之。”

故《元史》列传中亦谓只孙服为珠衣。至元之叔季，此物似已渐少，杨瑀《山居新话》载：“伯颜太师利阔阔歹平章家所藏答纳环子。”又记：“至元间伯颜太师擅权，典瑞院都事口口建言，宜造龙凤牌以宠异之，三珠以大答纳嵌之，饰以红刺鸦忽杂宝，牌身脱钹元德上辅功臣号字，嵌以白玉。此牌计直数万定，事败毁之，即以珠物给原主，盖厥价尚未酬也。”夫以一牌之直至数万定，除去红刺鸦忽，其三珠之价，至少当得一二万定。则其时此珠已不甚多，盖终元之世未尝开采也。

烧饭

《秘史》记成吉思汗、王罕与乃蛮将可克薛兀撒刺黑对陈于巴亦答刺黑别勒赤。逮夜，王罕移营去。天明，成吉思看王罕立处无人，曰：“他将我做烧饭（蒙文土兀食连）般撒了。”烧饭之语，颇为费解。《亲征录》译此语曰：“彼辈无乃异志乎？”拉施特哀丁则曰：“我今在火坑中而王罕弃我。”皆夫其解。屠敬山乃以蒙古俗旅行辄掘新灶，不用旧灶解之，亦非也。烧饭本契丹女真旧俗，亦辽金时通语。《续资治通鉴长编》（卷一百十）：“契丹主既死，则设大穹庐，铸金为象，朔望节忌辰日辄置祭，筑台高逾丈，以盆焚食，谓之烧饭。”（原注，正史载此事于《契丹传》，《实录》同）《三朝北盟会编》（卷三）：“女真死者，埋之而无棺槨。贵者生焚所宠奴婢所乘鞍马以殉之，所有祭祀饮食等物尽焚之，谓之烧饭。”此俗亦不自辽金始。

王沈《魏书》言“乌桓葬则歌舞相送，肥养一犬，以采绳婴，并取死者所乘马衣服，皆烧而送之”（《魏志·乌桓传》注引）然烧饭之名，则自辽金始，而金人尤视为送死一大事。《金史·镐王永中传》明昌二年正月，孝懿皇后崩。二月丙戌，掸祭，永中始至。辛卯，始克行烧饭礼。”而妃嫔亲王烧饭，天子往往亲与其礼。《后妃传》世宗元妃李氏，大定二十一年二月戊子薨。甲申，葬于海王庄。而申，上如海王庄烧饭。”《夔王允升传》：“贞祐元年薨。既殓，烧饭，上亲临奠。”其大臣贵戚死，则遣使为之烧饭。《张万公传》泰和七年薨。命依宰臣故事，烧饭赙葬。

又《世戚乌古论元忠传》承安二年讣闻。上遣宣徽使白琬烧饭，赙物甚厚。”契丹女真并有此俗，蒙古亦当有之。故成吉思见弃于王罕，乃云“将我做烧饭般撒了”，犹言视我如刍狗也。《秘史》（卷二）有“合札鲁亦捏鲁”一语，旁注云：“地

里烧饭祭祀。”足证蒙古亦有此俗，且其汉译烧饭一语，直至明初犹行于世也。满洲初入关时，犹有此俗。吴梅村《读史偶述》诗云：“大将祁连起北邙，黄肠不虑发邱郎，平生赐物都燔尽，千里名驹衣火光。”后乃以纸制车马代之，今日送三之俗，即辽金烧饭之遗也。

扫花

《秘史》蒙文（卷三）有“扫花”一语，旁译与文译并云“人事”。案扫花，元人亦云撒花，亦云撒和、人事，犹云人情也。汪水云诗“官军要讨撒花银”，所谓人事银也。

《山居新话》云：都城豪民，每遇假日，必以酒食招致省宪僚吏翹杰出群者款之，名曰撒和。凡人有远行者，至巳午时以草料饲驴马，谓之撒和，欲其致远不乏也。”撒和亦与人事义近。此自与者方面言之也。至自取者、受者言之，亦可云撒花。《元典章》载中统纪元颁新政诏云凡事撒花等物，无非取给于民。”

《黑鞑事略》云：“其见物则欲，谓之撒花。”又云，“撒花，汉语觅也”。明译人事，兼包与、受二者言之，尤为切当。日本那珂博士译《元秘史》改为给事，则误矣。

安答

《秘史》记成吉思汗、札木合幼年初做安答时，互易髀石髑头，及攻克蔑儿乞，又互易带马，重新作安答。是安答云者，必以易物为订交条件。故《亲征录》注云：“安答，交友之物。”其诂致确也。此亦契丹旧俗。

《辽史·圣宗纪》：“上与斜軫于太后前易弓矢鞍马，约以为友。”（统和元年）又“与麻都骨世励易衣马为好（开泰四年）。与夷离毕兵部尚书萧世宁定为友契，以重君臣之好，同上）。《道宗纪》阻卜酋长余古赧及爱的来朝，诏燕王延禧相结为友。”（太安二年）与蒙古结安答之俗完全相似。则蒙古语中安答一语，或即自契丹语出也。

兀孙额不干

明译《秘史》，于种名、人名之句读，颇有差误。那珂博士日文译本是正殊多，然亦有未及改正者。如卷三，豁儿赤兀孙额不干阔阔搠思，明译误作豁儿赤兀孙（句），额不干（句），阔阔搠思（句）。那珂译本以豁儿赤兀孙额不干为句，阔阔搠思为句。实则豁儿赤为一人，兀孙额不干为一人，与阔阔搠思共为三人。观卷八九十五千户中，有豁儿赤，有许孙，即兀孙。又太祖敕语中，以豁儿赤为林木中万户

，以兀孙额不干为别乞，名位各异，断不能视为一人。那珂氏误从明译句读，以豁儿赤兀孙为一人，乃不得不以九十五千户中之许孙当元史之哈散纳。屠敬山、柯学士皆从之。于是豁儿赤事迹，亦抵牾不可解矣。

赵官

《秘史续集》（一）谓“宋主为赵官，其名称殊不可解”。余案赵官者，赵扩之音伪，乃直斥宁宗御名也。金人辄直呼宋帝之名，如呼钦宗为赵桓，高宗为赵构，并见纪载。其呼宁宗亦然。

《金史·仆散揆传》云：“朕以赵扩背盟，侵我疆场。”又云：“赵扩闻之，料已破胆。”又云：“如使赵扩奉表称臣，（中略）亦可罢兵。”《内族宗浩传》云宋遣方信孺赍其主赵扩誓书宋。”是金人每谓宁宗为赵扩。蒙古人亦以金人所呼者呼之耳。

常仁卿

刘郁《西使记》记宪宗己未常德仁卿从皇弟旭烈西征事。常德之名，罕见纪载，惟王恽《秋涧先生大全集》（卷十二）。有题《常仁甫运使西觐纪行五言律二首》云九万鹏抟翼，孤忠驾使轺。功名元有数，风雪不知遥。抵北逾鳌极，维南望斗杓。胡生摇健笔，且莫诧东辽。”（自注，《五代史》有胡峤《陷虏记》）“三策条民便，逾年致节旄。梦惊羊胛日，险历幻人刀。碧怨坚昆异，黄金甲第高。白头书卷里，留滞敢辞劳。”西觐记即谓《西使记》也。

《东洋史要》序

同学山阴樊君炳清，译日本桑原隲藏君之《东洋史要》既成，刊有日矣。吾师藤田学士乃论述此书之大旨，而命国维书其端曰：

自近世历史为一科学，故事实之间不可无系统。抑无论何学，苟无系统之智识者，不可谓之科学。中国之所谓“历史”，殆无有系统者，不过集合社会中散见之事实，单可称史料而已，不得云历史。历史有二：有国史，有世界史。国史者，述关系于一国之事实。世界史者，述世界诸国历史上互相关系之事实。二者其界斛然，然其不可无系统则一也。抑古来西洋各国，自为一历史团体，以为今日西洋之文化。我东洋诸国，亦自为一历史团体，以为东方数千年来固有之文化。至二者相受相拒，有密接之关系，不过最近世事耳。故欲为完全之世界史，今日尚不能。于是大别世界史为东洋史、西洋史之二者，皆主研究历史上诸国相关关系之事实，而与国史异其宗旨者也。

又曩之所谓“西洋史”者，亦大抵不过西洋各国国史之集合者，不得称西洋史。其称东洋史、西洋史者，必自国史杂沓之事实中，取其影响及他国之事变，以说明现时之历史团体者也。抑我东方诸国相影响之事变，不胜枚举：如释迦生于印度，其教自支那、朝鲜入日本；汉以攘匈奴而通西域；唐之盛也，西逾葱岭，南庵有交趾支那！以与波斯、大食海陆相通；元之成吉思汗，兵威振于中亚，及西方亚细亚，至其子孙，席卷支那、朝鲜，馀势及于日本；又如日本之倭寇，及丰臣秀吉，其关系于朝鲜及明之兴亡者不少。然则东方诸国，所以有现时之社会状态者，皆一一有其所由然，不可不察也。

故欲解释现时之社会状态，则研究东洋史其要也。桑原君之为此书，于中国及塞外之事，多据中国正史。其印度及中央亚细亚之事，多采自西书。虽间有一二歧误，然简而赅，博而要，以视集合无系统之事实者，其高下得失，识者自能辨之。余尤愿读是书者，就历史上诸般之关系，以解释东方诸国现时之社会状态，使毋失为科学之研究，乃可贵耳！

光绪二十五年十一月，海宁王国维述

《欧罗巴通史》序

凡学问之事，其可称科学以上者，必不可无系统。系统者何？立一系以分类是已。分类之法，以系统而异：有人种学上之分类，有地理学上之分类，有历史上之分类。三者画然不向谋已。比较言语，钩稽神话，考其同异之故，迹其迁徙之实，或山河悠隔，而初乃兄弟；或疆土相望，而元为异族。是以合匈牙利于蒙古，入印度、波斯于额利亚，是为人种学上之分类。本自然之境界，顺山川之形势，但睹外界，不问内容，是以鲁突跨两洲，而欧亚之界自若。英领遍四海，而华离之形弥章，是为地理学上之分类。一区之内，错然交通，其势力足以相突，文化足以相发，不问人种、宗教、洲域之异同，但取历史上之关系，兼容并包，联为一体，是以印度与欧人同祖，仍为东洋史之国民；撒拉孙、突厥，与欧人异族，不害为西洋史之要素，是为历史上之分类。历史上之分类，大别为二，即东洋史与西洋史是已。此两史上之邦国，各为一群，以遂其文化之发达。

以西洋史言之，波斯以西诸国，若巴比伦，若西里亚，若希伯来，若阿剌伯，虽国于亚洲，然其事实，关系于东洋史者绝少，从历史上观之，盖纯然西洋史上之民族也。其可为两史上公共之材料者，除蒙古之西侵，与近世欧人之东略外，数千年中，殆无可指之事实。故历史之分东西，亦所不得已也。

日本理学士箕作元八及峰岸米造两君所著《西洋史纲》盖模德人兰克（Ranke）氏之作，以供中学教科之用者，书虽不越二百页，而数千年来西洋诸国之所以盛衰，文明之所以递嬗，若掌指而棋置，盖彼中最善之作也。同学徐君有成等，既译此书，易名《欧罗巴通史》，索国维言，以冠其首。国维幸此书之得传于吾国也，故忘其固陋，而序之。

光绪二十六年十二月。

论近年之学术界

外界之势力之影响于学术，岂不大哉！自周之衰，文王、周公势力之瓦解也，国民之智力成熟于内，政治之纷乱乘之于外，上无统一之制度，下迫于社会之要求，于是诸子九流各创其学说，于道德、政治、文学上，灿然放万丈之光焰。此为中國思想之能动时代。自汉以后，天下太平，武帝复以孔子之说统一之。其时新遭秦火，儒家唯以抱残守缺为事，其为诸子之学者，亦但守其师说，无创作之思想，学界稍稍停滞矣。佛教之东，适值吾国思想凋敝之后，当此之时，学者见之，如饥者之得食，渴者之得饮，担簦访道者，接武于葱岭之道，翻经译论者，云集于南北之都，自六朝至于唐室，而佛陀之教极千古之盛矣。此为吾国思想受动之时代。然当是时，吾国固有之思想与印度之思想互相并行而不相化合，至宋儒出而一调和之，此又由受动之时代出而稍带能动之性质者也。自宋以后以至本朝，思想之停滞略同于两汉，至今日而第二之佛教又见告矣，西洋之思想是也。

今置宗教之方面勿论，但论西洋之学术。元时罗马教皇以希腊以来所谓七术（文法、修辞、名学、音乐、算术、几何学、天文学）遗世祖，然其书不传。至明末，而数学与历学，与基督教俱入中国，遂为国家所采用。然此等学术，皆形下之学，与我国思想上无丝毫之关系也。咸、同以来，上海、天津所译书，大率此类。唯近七八年前，侯官严氏（复）所译之赫胥黎《天演论》（赫氏原书名《进化论与伦理学》，译议不全）出，一新世人之耳目，比之佛典，其殆摄《摩腾》之四十二章经乎。嗣是以后，达尔文、斯宾塞之名，腾于众人之口，物竞天择之语，见于通俗之文。顾严氏所奉者，英吉利之功利论及进化论之哲学耳。其兴味之所存，不存于纯粹哲学，而存于哲学之各分科。如经济、社会等学，其所最好者也。故严氏之学风，非哲学的，而宁科学的也，此其所以不能感动吾国之思想界者也。

近三四年，法国十八世纪之自然主义，由日本之介绍，而入于中国，一时学海波涛澎湃矣。然附和此说者，非出于知识，而出于情意。彼等于自然主义之根本思想，固懵无所知，聊借其枝叶之语以图遂其政治上之目的耳。由学术之方面观之，谓之无价值可也。其有蒙西洋学说之影响，而改造古代之学说，于吾国思想界上占一时之势力者，则有南海康有为之《孔子改制考》、《春秋董氏学》，浏阳谭嗣同之《仁学》。（康）氏以元统天之说，大有泛神论之臭味，其崇拜孔子也颇模仿基督教，其以预言者自居，又居然抱穆罕默德之野心者也。其震人耳目之处，在脱数千年思想之束缚，而易之以西洋已失势力之迷信，此其学问上之事业不得不与其政治上之企图同归于失败者也。然（康）氏之于学术非有固有之兴味，不过以之为政治上之手段，《荀子》所谓“今之学者以为禽犊者也”。（谭）氏之说，则出于上海教会中所译之治心免病法，其形而上学之以太说，半唯物论、半神秘论也。人之读此书者，其兴味不在此等幼稚之形而上学，而在其政治上之意见。（谭）氏此书之目的，亦在此而不在彼，固与南海氏同也。

庚辛以还，各种杂志接踵而起，其执笔者，非喜事之学生，则亡命之逋臣也。此等杂志，本不知学问为何物，而但有政治上之目的，虽时有学术上之议论，不但剽窃灭裂而已。如《新民丛报》中之《汗德哲学》其纰缪十且八九也。其稍有一顾之价值者，则《浙江潮》中某氏之《续无鬼论》。作者忘其科学家之本分，而闯入形而上学，以鼓吹其素朴浅薄之唯物论，其科学上之引证亦甚疏略，然其唯有学术上之目的，则固有可褒者。又观近数年之文学，亦不重文学自己之价值，而唯视为政治教育之手段，与哲学无异。如此者，其褻渎哲学与文学之神圣之罪，固不可追，欲求其学说之有价值，安可得也！故欲学术之发达，必视学术为目的，而不视为手段而后可。汗德《伦理学》之格言曰：“当视人人为一目的，不可视为手段。”岂特人之对人当如是而已乎，对学术亦何独不然。然则彼等言政治，则言政治已耳，而必欲渎哲学文学之神圣，此则大不可解者也。

近时之著译与杂志既如斯矣，至学校则何如？中等学校以下，但授国民必要之知识，其无与于思想上之事，固不俟论。京师大学之本科，尚无设立之日，即令设立，而据南皮尚书之計畫，仅足以养成咕哔之俗儒耳。此外私立学校，亦无足以当专门之资格者。唯上海之震旦学校，有丹徒马氏（良）之哲学讲义，虽未知其内容若何，然由其课程观之，则依然三百年前特嘉尔之独断哲学耳。国中之学校如此，则海外之留学界如何？夫同治及光绪初年之留学欧美者，皆以海军制造为主，其次法律而已，以纯粹科学专其家者，独无所闻。其稍有哲学之兴味如严复氏者，亦只以余力及之，其能接欧人深邃伟大之思想者，吾决其必无也。即令有之，亦其无表出之之能力，又可决也。况近数年之留学界，或抱政治之野心，或怀实利之目的，其肯研究冷淡干燥无益于世之思想问题哉！即有其人，然现在之思想界，未受其戕戕之影响，则又可不言而决也！

由此观之，则近数年之思想界，岂特无能动之力而已乎，即谓之未尝受动，亦无可也。夫西洋思想之入我中国为时无几，诚不能与六朝唐室之于印度较，然西洋之思想与我中国之思想，同为入世间的，非如印度之出世间的思想，为我国古所未有也。且重洋交通，非有身热头痛之险，文字易学，非如佉卢之难也，则我国思想之受动，宜较昔日为易，而顾如上所述者何哉？盖佛教之入中国，帝王奉之，士夫敬之，蚩蚩之氓，膜拜而顶礼之。且唐宋以前，孔子之一尊未定，道统之说未起，学者尚未有入主出奴之见也，故其学易盛，其说易行。今则大学分科不列哲学，士夫谈论，动诋异端，国家以政治上之骚动，而疑西洋之思想皆酿乱之麴蘖。小民以宗教上之嫌忌，而视欧、美之学术皆两约之悬谈。且非常之说，黎民之所惧；难知之道，下士之所笑。此苏格拉底之所以仰药，婆鲁诺之所以焚身，斯披诺若之所以破门，汗德之所以解职也。其在本国具如此，况乎在风俗文物殊异之国哉！则西洋之思想之不能骤输入我中国，亦自然之势也。况中国之民固实际的而非理论的，即令一时输入，非与我中国固有之思想相化，决不能保其势力。观夫三藏之书已束于高阁，两宋之说犹习于学官。前事之不忘，来者可知矣。

然由上文之说，而遂疑思想上之事，中国自中国，西洋自西洋者，此又不然。何则？知力人人之所同有，宇宙人生之问题，人人之所不得解也。具有能解释此问题之一部分者，无论其出于本国或出于外国，其偿我知识上之要求而慰我怀疑之苦痛者，则一也。同此宇宙，同此人生，而其观宇宙人生也，则各不同。以其不同之故，而遂生彼此之见，此大不然者也，学术之所争，只有是非真伪之别耳。于是非真伪之别外，而以国家、人种、宗教之见杂之，则以学术为一手段，而非以为一目的也。未有不视学术为一目的而能发达者，学术之发达，存于其独立而已。然则吾国今日之学术界，一面当破中外之见，而一面毋以为政论之手段，则庶可有发达之日欤？√

论新学语之输入

近年文学上有一最著之现象！则新语之输入是已。夫言语者！代表国民之思想者也。思想之精粗广狭，视言语之精粗广狭以为准，观其言语，而其国民之思想可知矣。周秦之言语，至翻译佛典之时代而苦其不足；近世之言语，至翻译西籍时而又苦其不足。是非独两国民之言语间有广狭精粗之异焉而已，国民之性质各有所特长，其思想所造之处各异，故其言语或繁于此而简于彼，或精于甲而疏于乙，此在文化相若之国犹然，况其稍有轩D者乎！抑我国人之特质，实际的也，通俗的也；西洋人之特质，思辨的也，科学的也。长于抽象而精于分类，对世界一切有形无形之事物，无往而不用综括（Generalization）及分析（Specification）之二法，故言语之多，自然之理也。吾国人之所长，宁在于实践之方面，而于理论之方面，则以具体的知识为满足，至分类之事，则除迫于实际之需要外，殆不欲穷究之也。

夫战国议论之盛，不下于印度六哲学派及希腊诡辩学派之时代，然在印度，则足目出，而从数论、声论之辩论中抽象之而作因明学，陈那继之，其学遂定。希腊则有雅里大德勒，自哀利亚派诡辩学派之辩论中抽象之而作《名学》；而在中国，则惠施、公孙龙等所谓名家者流，徒骋诡辩耳，其于辩论思想之法，固彼等之所不论，而亦其所不欲论者也。故我中国有辩论而无名学，有文学而无文法，足以见抽象与分类二者皆我国人之所不长，而我国学术尚未达自觉（Selfconsciousness）之地位也。况于我国夙无之学，言语之不足用，岂待论哉！夫抽象之过，往往泥于名而远于实，此欧洲中世学术之一大弊，而今世之学者犹或不免焉。乏抽象之力者，则用其实而不知其名，其实亦遂漠然无所依，而不能为吾人研究之对象。何则？在自然之世界中，名生于实；而在吾人概念之世界中，实反依名而存故也。事物之无名者，实不便于吾人之思索。故我国学术而欲进步乎，则虽在闭关独立之时代，犹不得不造新名。况西洋之学术骘骘而入中国，则言语之不足用，固自然之势也。

如上文所说，言语者，思想之代表也，故新思想之输入，即新言语输入之意味也。十年以前，西洋学术之输入，限于形而下学之方面，故虽有新字新语，于文学上尚未有显著之影响也。数年以来，形上之学渐入于中国。而又有一日本焉，为之中间之驿骑，于是日本所造译西语之汉文，以混混之势，而侵入我国之文学界。好奇者滥用之，泥古者唾弃之，二者皆非也。夫普通之文字中，固无事于新奇之语也；至于讲一学，治一艺，则非增新语不可。而日本之学者，既先我而定之矣，则沿而用之，何不可之有？故非甚不妥者，吾人固无以创造为也。侯官严氏，今日以创造学语名者也。严氏造语之工者固多，而其不当者亦复不少。兹笔其最著者，如Evolution之为“天演”也，Sympathy之为“善相感”也。而天演之于进化，善相感之于同情，其对Evolution与Sympathy之本义，孰得孰失，孰明孰昧，凡稍有外国语之知识者，宁俟终朝而决哉！又西洋之新名，往往喜以不适当之古语表之，如译Space（空间）为“宇”，Time（时间）为“宙”是已。夫谓Infinite space（无限之空间）Infinite time（无限之时间）曰宇曰宙可矣，至于一孔之隙，一弹指之间，何莫非空间、时

间乎？空间、时间之概念足以该宇宙，而宇宙之概念不足以该空间、时间。以宇宙表Space time，是举其部分而遗其全体（自概念上论）也。以外类此者不可胜举。夫以严氏之博雅而犹若是，况在他人也哉！且日人之定名，亦非苟焉而已，经专门数十家之考究，数十年之改正，以有今日者也。窃谓节取日人之译语，有数便焉：因袭之易，不如创造之难，一也；两国学术有交通之便，无杆格之虞，二也（叔本华讥德国学者于一切学语不用拉丁语而用本国语，谓如英法学者，亦如德人之愚，则吾侪学一专门之学语，必学四五度而后可。其言颇可味也）。有此二便而无二难，又何嫌何疑而不用哉？

虽然，余非谓日人之译语必皆精确者也。试以吾心之现象言之，如Idea为“观念”，Intuition之为“直观”，其一例也。夫Intuition者，谓吾心直觉五官之感觉，故听、嗅、尝、触，苟于五官之作用外加以心之作用，皆谓之Intuition，不独目之所观而已。观念亦然。观念者，谓直观之事物，其物既去，而其象留于心者。则但谓之观，亦有未妥。然在原语亦有此病，不独译语而已。Intuition之语源出于拉丁之In及tuitus二语，tuitus者，观之意味也。盖观之作用，于五官中为最要，故悉取由他官之知觉，而以其最要之名名之也。Idea之语源出于希腊语之Idea及Idein，亦观之意也，以其源来自五官，故谓之观；以其所观之物既去，而象尚存，故谓之念，或有谓之“想念”者。然考张湛《列子注序》所谓“想念以著物自丧”者，则想念二字，乃伦理学上之语，而非心理学上之语，其劣于观念也审矣。至Conception之为“概念”，苟用中国古语，则谓之“共名”亦可（《荀子·正名篇》）。然一为名学上之语，一为文法上之语，苟混此二者，此灭名学与文法之区别也。由上文所引之例观之，则日人所定之语，虽有未精确者，而创造之新语，卒无以加于彼，则其不用之也谓何？要之，处今日而讲学，已有不能不增新语之势；而人既造之，我沿用之，其势无便于此者矣。

然近人之唾弃新名词，抑有由焉，则译者能力之不完全是也。今之译者（指译日本书籍者言），其有解日文之能力者，十无一二焉；其有国文之素养者，十无三四焉；其能兼通西文、深知一学之真意者，以余见闻之狭，殆未见其人也。彼等之著译，但以罔一时之利耳。传知识之思想，彼等先天中所未有也。故其所作，皆粗漏庞杂，佶屈而不可读。然因此而遂欲废日本已定之学语，此又大不然者也。若谓用日本已定之语，不如中国古语之易解，然如侯官严氏所译之《名学》，古则古矣，其如意义之不能了然何？以吾辈稍知外国语者观之，毋宁手穆勒原书之为快也。余虽不敢谓用日本已定之语必贤于创造，然其精密，则固创造者之所不能逮（日本人多用双字，其不能通者则更用四字以表之。中国则习用单字。精密不精密之分全在于此）。而创造之语之难解，其与日本已定之语，相去又几何哉！若夫粗漏佶屈之书，则固吾人之所唾弃，而不俟踌躇者也。

《国学丛刊》序

学之义不明于天下久矣。今之言学者，有新旧之争，有中西之争，有有用之学与无用之学之争。余正告天下曰：学无新旧也，无中西也，无有用无用也。凡立此名者，均不学之徒。即学焉，而未尝知学者也。

学之义广矣。古人所谓学，兼知行言之。今专以知言，则学有三大类：曰科学也，史学也，文学也。凡记述事物，而求其原因，定其理法者，谓之科学；求事物变迁之迹，而明其因果者，谓之史学；至出入二者间，而兼有玩物适情之效者，谓之文学。然各科学，有各科学之沿革。而史学又有史学之科学，如刘知几《史通》之类。若夫文学，则有文学之学，如《文心雕龙》之类焉；有文学之史，如各史文苑传焉。而科学、史学之杰作，亦即文学之杰作。故三者非戡然（戡[ji à o]：古代量谷物时平斗斛的用具，引申为校正的意思）有疆界，而学术之蕃变（蕃变：变迁；变化。蕃，通“番”），书籍之浩瀚，得以此三者括之焉。

凡事物必尽其真，而道理必求其是，此科学之所有事也。而欲求知识之真，与道理之是者，不可不知事物道理之所以存在之由、与其变迁之故，此史学之所有事也。若夫知识、道理之不能表以议论，而但可表以情感者，与夫不能求诸实地，而但可求诸想象者，此则文学之所有事。古今东西之为学，均不能出此三者。惟一国之民，性质有所毗，境遇有所限，故或长于此学而短于彼学。承学之子，资力有偏颇，岁月有涯涘，故不能不主此学，而从彼学。且于一学之中，又择其一部而从事焉。此不独治一学当如是，自学问之性质言之，亦固宜然。然为一学，无不有待于一切他学，亦无不有造于一切他学。故是丹而非素，主入而奴出，昔之学者或有之，今日之真知学、真为学者，可信其无是也。

夫然，故吾所谓学无新旧，无中西，无有用、无用之说，可得而详焉。何以言学无新旧也？夫天下之事物，自科学上观之与自史学上观之，其立论各不同。自科学上观之，则事物必尽其真，而道理必求其是。凡吾智之不能通而吾心之所不能安者，虽圣贤言之有所不信焉。虽圣贤行之有所不嫌焉。何则圣贤所以别真伪也，真伪非由圣贤出也。所以明是非也，是非非由圣贤立也。自史学上观之，则不独事理之真与是者，足资研究而已，即今日所视为不真之学说，不是之制度风俗，必有所以成立之由，与其所以适于一时之故。其因存于邃古（邃[su i]古：很远的古代），而其果及于方来，故材料之足资参考者，虽至纤悉不敢弃焉。故物理学之历史，谬说居其半焉。哲学之历史，空想居其半焉。制度、风俗之历史，弃髦（髦[m á o]：本意是毛发中的长毫，也指幼儿垂在前额的短发。弃髦就是过时的风俗、制度等）居其半焉。而史学家弗弃也。此二学之异也。然治科学者，必有待于史学上之材料。而治史学者，亦不可无科学上之知识。今之君子，非一切蔑古，即一切尚古。蔑古者，出于科学上之见地，而不知有史学。尚古者，出于史学上之见地，而不知有科学。即为调停之说者，亦未能知取舍之所以然，此所以有古今新旧之说也。

何以言学无中西也？世界学问，不出科学、史学、文学。故中国之学，西国类皆有之。西国之学，我国亦类皆有之。所异者，广狭、疏密耳。即从俗说而姑存中学、西学之名，则夫虑西学之盛之妨中学，与虑中学之盛之妨西学者，均不根之说也。中国今日，实无学之患，而非中学、西学偏重之患。京师号学问渊薮，而通达诚笃之旧学家，屈十指以计之，不能满也。其治西学者，不过为羔雁禽犊之资，其能贯串精博，终身以之如旧学家者，更难举其一二。风会否塞（风：消息、传闻。会：理解、领悟。丕塞：闭塞不通），习尚荒落（习惯风尚荒凉冷落），非一日矣。余谓中、西二学，盛则俱盛，衰则俱衰。风气既开，互相推助。且居今日之世，讲今日之学，未有西学不兴，而中学能兴者；亦未有中学不兴，而西学能兴者。特余所谓中学，非世之君子所谓中学；所谓西学，非今日学校所授之西学而已。治《毛诗》《尔雅》者，不能不通天文博物诸学；而治博物学者，苟质以《诗》《骚》草木之名状而不知焉，则于此学固未为善。必如西人之推算日食，证梁虞翻、唐一行之说，以明《竹书纪年》之非伪，由《大唐西域记》以发见释迦之支墓，斯为得矣。故一学既兴，他学自从之，此由学问之事，本无中、西，彼鳃鳃（鳃鳃[xǐxǐ]，恐惧貌）焉虑二者之不能并立者，真不知世间有学问事者矣。

顾新旧、中西之争，世之通人，率知其不然，惟有用、无用之论，则比前二说为有力。余谓凡学皆无用也，皆有用也。欧洲近世农、工、商业之进步，固由于物理、化学之兴。然物理、化学高深普偏之部，与蒸气、电信有何关系乎？动植物之学，所关于树艺、畜牧者几何？天文之学所关于航海、授时者几何？心理社会之学，其得应用于政治、教育者亦渺（渺[xiǎo]：指稀有的，罕见的）。以科学而犹若是，而况于史学、文学乎？然自他面言之，则一切艺术，悉由一切学问出。古人所谓不学无术，非虚语也。夫天下之事物，非由全不足以知曲（曲：偏，某一个方面），非致曲（致力于某一个方面，《中庸》：“其次致曲，曲能有诚。”）不足以知全。虽一物之解释，一事之决断，非深知宇宙人生之真相者，不能为也。而欲知宇宙、人生者，虽宇宙中之一现象，历史上之一事实，亦未始无所贡献。故深湛幽渺之思，学者有所不避焉；迂远繁琐之讥，学者有所不辞焉。事物无大小，无远近，苟思之得其真，纪之得其实，极其会归，皆有裨于人类之生存福祉，己不竟其绪（绪即丝线的头，表示开端的意思。竟绪意为完成前人遗留下来的未竟的事业），他人当能竟之；今不获其用，后世当能用之，此非苟且玩愒之徒所与知也。学问之所以为古今、中西所崇敬者，实由于此。凡生民之先觉，政治教育之指导，利用厚生之渊源，胥由此出，非徒一国之名誉与光辉而已。世之君子可谓知有用之用，而不知无用之用者矣。

以上三说，其理至浅，其事至明，此在他国所不必言，而世之君子犹或疑之，不意至今日而犹使余为此哓哓也。适同人将刊行《国学杂志》，敢以此言序其端。此志之刊，虽以中学为主，然不敢蹈世人之争论，此则同人所自信，而亦不能不自白于天下者也。√

《国学丛刊》序

(代罗叔言参事)

宣统辛亥，某始创《国学丛刊》于京师，遭遇国变，中道而辍。今年春，海上友人乞赍续之，亟允其请。编类既竟，乃书其端曰：秦汉以还，迄于近世，学术兴替，可得而言。自九流之学，并起衰周；六艺之传，独出孔氏。战国以为迂阔，强秦燔其诗书。而诸儒偃蹇戎马之间，崛强刀锯之下。鲋、腾父子，藏其家书；高、赤师弟，擅其口说。犹闻制氏之乐，不废徐生之容。偶语之诛不能加，挟书之律无所用。既乎中阳受命，王路小亨。柱下御史，独明律历；咸阳博士，还定朝仪。乃孝武之表章，兼河间之好古，古文间出，绝学方兴。山岩甫出之书，遽登秘府，太常未立之学，或在民间。旋校中秘之文，并增博士之数。此一盛也。

建武以降，群籍颇具。子春笃老，始通《周官》之读；康成晚出，爰综六艺之文。赵、张问难于生前，孙、王辨证于身后。此又一盛也。黄初君臣，雅擅词翰；正始贵胄，颇尚清谈。洎于六朝，此风犹盛。竭神思于五言，罄辩论于二氏。然而崔、皇特起于江南，徐、熊并驰于河北，二刘金声于隋代，孔、贾玉振于唐初。综七经而定正义，历两朝而著功令。此又一盛也。先秦学术，萃于六经，炎汉以还，爰始分道。则有若子长述史，成一家之言；叔重考文，发六书之旨。善长山川之说，君卿制度之书，并自附庸，蔚为大国。义兼于述作，体绝于古今，此又旷世之鸿裁，难语一时之风会者矣。爰逮晚唐，兹音不嗣；天水肇建，文物鼎兴。原父小传，别启说经之途，次道二书，聿新方志之体。长睿馀论，存中笔谈，并示考古之准绳，穷格物之能事。至于欧、赵之集金石，宣和之图彝器，南仲释吉金之文，鄱阳录汉碑之字，旨趣既博，局涂大开。

洎于元明，流风稍坠。天道剥复，钟美本朝。顾、阎濬其源，江、戴拓其宇。小学之奥，启于金坛；名物之蹟，理于通艺。根柢既固，枝叶遂繁。爰自乾嘉以还，迄于同光之际，大师间出，馀裔方滋。专门若西京之师，博综继东都之业；规摹跨唐代之大，派别衍宋人之多。伊古以来，斯为极盛矣！昀昀先畴，巍巍遗构，高、曾之所耕获，祖父之所经营，绵延不替，施于今日，保世滋大，责在后人。自顷孟陬失纪，海水横流，大道多岐，《小雅》尽废。番番良士，劣免儒硎，莘莘胄子，翻从城阙。或乃舍我熊掌，食彼马肝，土苴百王，粃糠三古，闵父知其将落，宣圣谓之不祥。

非无道尽之悲，弥切天崩之惧。然而问诸故府，方策如新；瞻彼前修，典刑未沫。重以地不爱宝、天启之心，殷官太卜之所藏，《周礼》盟府之所载，两汉塞上之贖，有唐壁中之书，并出尘埃，丽诸日月。芒、洛古冢，齐、秦故墟，丝竹如闻，器车踵出。上世礼器之制，殊异乎叔孙中；中古衣冠之奇，具存于明器。并昔儒所未见，幸后死之与闻。非徒兴起之资，弥见钻求之亟。至于先人底法，仅就椎轮；历

代开疆，尚多販脱。作室俟堂构之饰，析薪资负荷之劳，功有相因，道无中止。譬诸注坡之马，造父不能制其势；建瓴之水，神禹不能回其流。观往昔之隆汙，抚今兹之际会，盛衰之数，盖可知矣。某爰始志学，颇识前闻，既乎遯荒，益多暇日。思欲标艺林以寸草，助学海以涓流。乃因同气之求，重续春明之梦，尽发敝篋，聿求友声，聊供研悦之新知，并刊散亡之故籍。先民有作，同惊风雨之晨；来者方多，终冀昌明之日。

甲寅五月。

国朝三百年学术

国朝三百年学术，启于黄、王、顾、江诸先生，而开乾嘉以后专门之风气者，则以东原戴氏为首。东原享年不永，著述亦多未就者，然其精深博大，除汉北海郑氏外，殆未有其比。一时交游门第，亦能本其方法，光大其学，非如赵商、张逸辈但知墨守师说而已。戴氏礼学，虽无成书，然曲阜孔氏、歙金氏、绩溪胡氏之学，皆出戴氏。其于小学亦然，书虽未就，而其“转注假借”之说，段氏据之以注《说文》，王、郝二氏训诂音韵之学亦由此出也。戴君《考工记图》，未为精核，歙县程氏以悬解之才，兼据实物以考古籍，其《磬折古义》《考工创物小记》等书，精密远出戴氏之上；而《释虫小记》、《释草小记》、《九穀考》等，又于戴氏之外，自辟蹊径。

程氏于东原虽称老友，然亦同东原之风而起者也。大抵国初诸老，根柢本深，规模亦大，而粗疏在所不免；乾嘉诸儒，亦有根柢，有规模，而加之以专，行之以密，故所得独多；嘉道以后，经则主今文，史则主辽金元，地理则攻西北，此数者亦学者所当有事。诸儒所攻，究亦不为无功，然于根柢规模，逊前人远矣。

戴氏之学，其段、王、孔、金一派，犹有继者；程氏一派，则竟绝焉。近惟吴氏大澂之学近之，然亦为官所累，不能尽其才，唯其小学，所得则又出程氏之上，亦时为之也。

沈乙庵先生七十寿序

我朝三百年间，学术三变：国初一变也，乾嘉一变也，道咸以降一变也。顺康之世，天造草昧，学者多胜国遗老，离丧乱之后，志在经世，故多为致用之学。求之经史，得其本原，一扫明代苟且破碎之习，而实学以兴。雍乾以后，纪纲既张，天下大定，士大夫得肆意稽古，不复视为经世之具，而经史小学专门之业兴焉。道咸以降，涂辙稍变，言经者，及今文，考史者，兼辽金元；治地理者，逮四裔，务为前人所不为。虽承乾嘉专门之学，然亦逆睹世变，有国初诸老经世之志。故国初之学大，乾嘉之学精，道咸以降之学新。窃于其间，得开创者三人焉，曰昆山顾先生，曰休宁戴先生，曰嘉定钱先生。国初之学创于亭林，乾嘉之学创于东原、竹汀。道咸以降之学，乃二派之合，而稍偏至者，其开创者仍当于二派中求之焉。

盖尝论之：亭林之学，经世之学也，以经世为体，以经史为用。东原、竹汀之学，经史之学也，以经史为体，而其所得往往裨于经世。盖一为开国时之学，一为全盛时之学，其涂术不同，亦时势使之然也。道咸以降，学者尚承乾嘉之风，然其时政治风俗，已渐变于昔，国势亦稍稍不振，士大夫有忧之，而不知所出，乃或托于先秦西汉之学，以图变革一切。然颇不循国初及乾嘉诸老为学之成法。其所陈夫古者，不必尽如古人之真，而其所以切今者，亦未必适中当世之弊。其言可以情感，而不能尽以理究，如龚璦人、魏默深之俦。其学在道咸后，虽不逮国初、乾嘉二派之盛，然为此二派之所不能摄。其逸而出此者，亦时势使之然也。今者时势又剧变矣。学术之必变，盖不待言。世之言学者，辄依依无所归，顾莫不推嘉兴沈先生以为亭林、东原、竹汀者俦也。

先生少年，固已尽通国初及乾嘉诸家之说。中年治辽金元三史，治四裔地理，又为道咸以降之学，然一秉先正成法，无或逾越。其于人心世道之污隆，政事之利病，必穷其原委，似国初诸老。其视经史为独立之学，而益探其奥窔，拓其区宇，不让乾、嘉诸先生。至于综览百家、旁及二氏，一以治经史之法治之，则又为自来学者所未及。若夫缅想在昔，达观时变，有先知之哲，有不可解之情，知天而不任天，遗世而不忘世，如古圣哲之所感者，则仅以其一二见于歌诗，发为口说，言之不能以详。世所得而窥见者，其为学之方法而已。

夫学问之品类不同，而其方法则一。国初诸老，用此以治经世之学，乾嘉诸老，用之以治经史之学，先生复广之，以治一切诸学。趣博而旨约，识高而议平，其忧世之深，有过于龚、魏，而择术之慎，不后于戴、钱。学者得其片言，具其一体，犹足以名一家，立一说。其所以继承前哲者以此，其所以开创来学者亦以此。使后之学术变而不失其正鹄者，其必由先生之道矣。

窃又闻之，国家与学术为存亡。天而未厌中国也，必不亡其学术。天不欲亡中国之学术，则于学术所寄之人，必因而笃之。世变愈亟，则所以笃之者愈至。使伏生、

浮邱伯輩，天不畀以期颐之寿，则诗书绝于秦火矣。既验于古，必验于今。其在《诗》曰：“乐只君子，邦君之基。乐只君子，万寿无期。”又曰：“乐只君子，邦家之光。乐只君子，万寿无疆。”若先生者，非所谓学术所寄者欤？非所谓邦家之基，邦家之光者欤？

己未二月，先生年正七十，因书先生之学所以继往开来者，以寿先生。并使世人知先生自兹以往，康强寿考，永永无疆者，固可由天之不亡中国学术卜之矣。√

译本《琵琶记》序

欲知古人，必先论其世；欲知后代，必先求诸古；欲知一国之文学，非知其国古今之情状、学术不可也。近二百年来，瀛海大通，欧洲之人讲求我国故者亦夥矣，而真知我国文学者盖鲜。则岂不以道德、风俗之悬殊，而所知所感亦因之而异欤？抑无形之情感固较有形之事物为难知欤？要之，疆界所存，非徒在语言文字而已。以知之之艰，愈以知夫译之之艰。苟人于其所知于他国者虽博以深，然非老于本国之文学，则外之不能喻于人，内之不能慊诸己，盖兹事之难能久矣。如戏曲之作，于我国文学中为最晚，而其流传于他国也则颇早。法人赫特之译《赵氏孤儿》也，距今百五十年；英人大维斯之译《老生儿》，亦垂百年。

嗣是以后，欧利安、拔善诸氏并事翻译，讫于今，元剧之有译本者，几居三之一焉。余虽未读其译书，然大维斯于所译《老生儿》序中，谓元剧之曲但以声为主，而不以义为主，盖其所译者，科白而已。夫以元剧之精髓全在曲辞，以科白取元剧，其智去买椟还珠者有几？日本与我隔裨海，而士大夫能读汉籍者亦往往而有，故译书之事反后于欧人，而其能知我文学，固非欧人所能望也。

癸丑夏日，得西村天囚君所译《琵琶记》而读之。南曲之剧，曲多于白。其曲白相生，亦较北曲为甚。故欧人所译北剧，多至三十种，而南戏则未有闻也。君之译此书，其力全注于曲。以余之不敏，未解日本文学，故于君文之趣、神、味、韵，余未能道焉；然以君之邃于汉学，又老于本国之文学，信君之所为，必远出欧人译本之上无疑也。

海宁王国维序于日本京都吉田山麓寓庐。

《玉溪生诗年谱会笺》序

善哉，孟子之言诗也！曰：“说诗者，不以文害辞，不以辞害志。以意逆志，是为得之。”顾意逆在我，志在古人，果何修而能使我之所意不失古人之志乎？此其术，孟子亦言之，曰：“诵其诗，读其书，不知其人，可乎？是以论其世也。”是故由其世以知其人，由其人以逆其志，则古诗虽有不能解者，寡矣。汉人传诗，皆用此法，故四家诗皆有序。序者，序所以为作者之意也。《毛序》今存，《鲁诗说》之见于刘向所述者，于诗事尤为详尽。及北海郑君出，乃专用孟子之法以治诗。其于诗也，有谱，有笺。谱也者，所以论古人之世也；笺也者，所以逆古人之志也。故其书虽宗毛公，而亦兼采三家，则以论世所得者然也。

又《毛诗序》以《小雅·十月之交》、《雨无正》、《小旻》、《小宛》四篇为刺幽王作，郑君独据《国语》及《纬候》以为刺厉王之诗，于谱及笺并加厘正。尔后王基、王肃、孙毓之徒申难相承。洎于近世，迄无定论。逮同治间，函皇父敦出于关中，而毛、郑是非乃决于百世之下（敦铭云：“函皇父作周损盘、香、尊器、敦、鼎、自豕鼎降十，又两磬、两壶。周嫗其万年子子孙孙永宝用。”“周损”犹言“周姜”，即函皇父之女归于周而皇父为作媵器者。《十月之交》“艳妻”，《鲁诗》本作“閼妻”，皆此敦“函”之假借字。“函”者，其国或氏广娘”者，其姓。而幽王之后，则为姜、为嬖，均非殒姓。郑长于毛，即此可证：）。信乎，论世之不可以已也。故郑君序《诗谱》曰：欲知源流清浊之处，则循其上下而省之；欲知风化芳臭气泽之所及，则旁行而观之。”治古诗如是，治后世诗亦何独不然？

余读吾友张君孟劬《玉溪生年谱》，而益信此法之不可易也。有唐一代，惟玉溪生诗词旨最为微晦。遗山论诗，已有“无人作郑笺”之叹。三百年来，治之者近十家，盖未尝不以论世为逆志之具。然唐自大中以后，史失其官，《武宗实录》亦亡于五季，故《新》、《旧》二书，于会昌后事，动多疏舛。后世注玉溪诗者，仅求之于二《书》，宜其于玉溪之志多所扞格也。君独旁搜远绍，博采唐人文集、说部及金石文字以正刘、宋二《书》之失。宋次道之补亡，吴廷珍之纠谬，君殆兼之而一寄于此《谱》以古书例之，朱、冯诸君之书，齐鲁韩毛之序也；君书，则郑君之谱及笺也。其所考定者，固质诸古而无疑；其未及论定者，亦将得其证于百世之下。

郑君说《小雅·十月之交》，其已事也。君尝与余论浙东、西学派，谓浙东自梨洲、季野、谢山以迄实斋，其学多长于史；浙西自亭林、定宇以及分流之皖、鲁诸派，其学多长于经。浙东博通，其失也疏；浙西专精，其失也固。君之学，固自浙西人而渐渍于浙东者，故曩为《史微》，以史法治经、子二学，四通六辟，多发前人所未发。及为此书，则又旁疏曲证，至纤至悉。而孰知其所用者，仍先秦两汉治经之家法也。故述孟子、郑君之言以序君书，意亦君之所首肯乎。

丁巳六月。

雪堂校刊群书叙录序

近世学术之盛，不得不归诸刊书者之功。

刊书之家，约分三等，逐利一也，好事二也，笃古三也。

前者勿具论，若近世吴县之黄、长塘之鲍、虞山之张、金山之钱，可谓好事者。若阳湖孙氏、钱塘卢氏，可谓笃古者也。然此诸氏者，皆生国家全盛之日，物力饶裕，士大夫又崇尚学术，诸氏或席丰厚，或居京师之位，有所凭藉，成书较易，其事业未可云卓绝也。

若夫生无妄之世，小雅尽废之后，而以学术存亡为己责，搜集之，考订之，流通之，举天下之物，不足以易其尚，极天下之至艰，而卒以达其志，此于古之刊书者未之前闻，始于吾雪堂先生见之。尝譬之为人臣者，当无事之世，事圣明之主，虽当贤者，当守官法而已。至于奇节独行与宏济之略，往往出于衰乱之世，则以一代兴亡与万世人纪之所系，天固不惜生一于人者以维之也。学术亦然，孙、卢诸氏之于刊书，譬之人臣当官守法而已。至于神物之出，不与世相应，天既出之，固不忍听其存亡，而如先生之奇节宏略，乃出于其间，亦以学术存亡之所系，等于人纪之存，故天不惜生一二人者以维之也。先生校刊之书，多至数百种，于其殊尤者，皆有叙录。戊午夏日，集为二卷，别行于世。

案先生之书，其有功于学术最大者，曰《殷虚书契前后编》，曰《流沙坠简》，曰《鸣沙古室古佚书》及《鸣沙石室古籍丛残》。此四者之一，已足孔壁汲冢之所出。其余所集之古器古籍，亦皆问世之神物，而大都出于先生之世。顾其初出，举世莫之知，知亦莫之重也。其中重之者，搜集一二以供秘玩，斯已耳。其欲保保存之、流传之者，览于事之艰巨，辄中道而废，即有其愿与力矣，而非有博识毅力如先生者，其书未必能成，成亦必不能多且速。而此间世而出之神物，固将有时而毁且佚，或永锢于海外之书库，是虽出犹不出也。先生独以学术为性命，以此古器古籍为性命所寄之躯体。思所以寿其躯体者，与常人之视养其口腹无以异。

辛亥以后，流寓海外，鬻长物以自给，而殷虚甲骨，与敦煌古简佚书，先后印行，国家与群力之所不能为者，竟以一流人之力成之。他所印书籍，亦略称是。旅食八年，印书之费以巨万计，家无旬月之蓄，而先生安之。自编次校写、选工、监役，下至装潢之款式，纸墨之料量，诸凌杂烦辱之事，为古学人所不屑为者，而先生亲之，举力之所及，而惟传古之是务，知天既出神物，复生先生于是时，固有非偶然者。《书》有之曰：功崇惟志，业广惟勤。先生之功业，可谓崇且广矣。而其志与勤，世殆鲜知之。

余从先生游久，知之为最详，故书以为序，使世人知先生之所以成就此业者，固天

之所启，而非好事者与寻常笃古家所能比也。

戊午六月既望。√

《殷虚文字类编》序

今世弱冠治古文字学者，余所见得四人焉：曰嘉兴唐立庵友兰，曰东莞容希白庚，曰胶州柯纯卿昌济，曰番禺商锡永承柞。立庵孤学，于书无所不窥，尝据古书、古器以校《说文解字》。希白则专攻古金文，欲补吴县吴宪斋中丞之书，而其书皆未就。纯卿为凤荪学士次子，年最少，读书亦最多。尝以书问字于余。余叹其逸足，每思所以范之。前岁撰《殷虚书契补释》一编寄余，尚未能中绳墨也。锡永从上虞罗叔言参事游。壬戌夏，持参事书访余于上海，出所纂《殷虚文字类编》索余文弁其首。癸亥五月，余来京师，锡永书亦垂刊成，乃始得而序之。

夫殷虚文字之学，始于瑞安孙仲容比部，而实大成于参事。参事于宣统庚戌撰《殷虚贞卜文字考》，甲寅复撰《殷虚书契考释》创获甚多。丙辰之夏，复集殷虚文字之不可识者，为《殷虚书契待问编》，参事与余续有所释，皆笺识其上。其于《考释》一书又大有增删。锡永乃汇诸书，以《说文》次序编之，其所自释者亦十之一二，精密矜慎不作穿凿附会之说。如编中释穴、衡、机、壬、独、猷诸字，均极精确。又如啓半字，余释为解祗，以从两手判牛角与从刀判牛角同意。锡永乃谓篆文之刀乃力之省，尤为神悟。

呜呼！如锡永此书，可以传世矣！虽然书契文字之学自孙比部，而罗参事，而余所得发明者不过十之二三。而文字之外，若人名、若地理、若礼制，有待于考究者尤多。故此新出之史料，在在与旧史料相需，故古文字、古器物之学与经史之学实相表里，惟能达观二者之际，不屈旧以就新，亦不继新以从旧，然后能得古人之真，而其言乃可信于后世。若以锡永之条理，剂以立庵、纯卿之博综，他日所得必将有进于是编者。余虽不敏，犹将濡笔而序之。夏至后十日序于京师黄华门北之寓庐。

《金文编》序

孔子曰：“多闻阙疑。”又曰：“君子于其所不知，盖阙如也。”许叔重撰《说文解字》，窃取此义，于文字之形声义有所不知者，皆注云：“阙。”至晋荀勖等写定《穆天子传》，于古文之不可识者，但如其字以隶写之，犹此志也。宋刘原父、杨南仲辈释古彝器，亦用此法。

自王楚、王休、薛尚功之书出，每器必有释文，虽字之绝不可释者，亦必附会穿凿以释之，甚失古人阙疑之指。近时阮文达、吴荷屋、吴子宓诸家书，亦仍其例。

惟吴清卿中丞之《恒轩所见所藏吉金录》，始专摹款识，不附释文。又中丞撰《说文古籀补》，别以字之不可识者为附录一篇，乃有合于《说文》注阙之例。今古文日出，古文字之学亦日进。中丞书中附录之字，颇有可灼知其为某字者，其本书中之字亦有不能不致疑者。顾未有续中丞书而补其阙遗、匡其违失者，亦兹学之缺典也。

癸亥冬日，东莞容君希白出所著《金文编》相示，其书祖述中丞而补正中丞书处甚多，是能用中丞之法而光大之者。余案阙疑之说出于孔子，盖为一切学问言。独于小学则许叔重一用之，荀勖辈再用之，杨南仲三用之。近时吴中丞又用之。今日小学家，如罗叔言参事，考甲骨文字，别撰《殷虚文字待问编》一卷，亦用此法。而希白是编，与参事弟子商锡永《殷虚文字类编》用之为尤严。

至于他学，无在而不可用此法。古经中若《易》若《书》，其难解盖不下于古文字，而古来治之者皆章疏句释，与王、薛诸氏之释彝器款识同，余尝欲撰《尚书注》，尽阙其不可解者，而但取其可解者著之，以自附于孔氏阙疑之义。荏冉数年，未遑从事。希白倘有意乎？甲子夏五书于京师履道坊北之永观堂。

传书堂记

乌程蒋孟萃学部落其藏书之室，颜之曰“传书堂”，盖其先德书箴先生书室之旧额也。初，道、咸之间，西吴藏书家数蒋氏书箴先生、尊人子皇先生与季父季卿先生，以兄弟相师友，专攻小学，兼精雠校，大江以南，精槧名钞，麋走其门。子皇先生藏书之居，曰“俚簃馆”，曰“茹古精舍”，季卿先生之居，曰“求是斋”，皆有声吴越间。无何，赭寇乱作，两先生挟其书走海门。而季卿先生旋卒，书之厄于水火、盗贼者几大半。比子皇先生歿，先生悉推家产于诸昆弟，而独取书籍二十篋，名其所居曰“传书之堂”，其风尚如此！

孟萃即先生长子也，幼传家学，能别古书真伪。自官京师、客海上，其足迹率在南北大都会，其声气好乐，又足以奔走天下，故南北故家若四明范氏、钱唐汪氏、泰州刘氏、泾县洪氏、贵阳陈氏之藏流出者多归之。其于先世遗籍，求之尤勤，凡旧籍之有“茹古精舍”、“求是斋”图记者，估人恒倍蓰其直以相要市，孟萃辄偿之。藏书家知孟萃者，间得蒋氏故书，亦颇以相赠遗。故孟萃所得先世遗书，虽经兵火转徙之后，尚不下百种。然以视其所自搜集者，劣足当其百分之一。顾取先人旧额，以“传书”名其堂。余谓为子孙者如孟萃，始可谓之能传书矣。

余闻之百围之木，必生于堂密；寻文之鱼，不产于潢污。”西吴藏书，盖有端绪。自宋初，沈东老父子始以收书知名。南渡后，叶石林退居弁山，复以藏书雄东南。其后，若齐斋倪氏、月河莫氏、竹斋沈氏、直斋陈氏、随斋程氏、草窗周氏、藏书多者号十万卷，少者亦三四万卷，视行都蔑如也。有明一代，若茅顺甫之白华楼、沈以安之玩月楼、姚翔卿之玩画斋，并有簿录，犹有陈、程诸氏遗风。国朝自蠡舟董氏、疏雨刘氏、芳茱严氏后，尤不易更仆数。而姚彦侍方伯之姻进斋、陆刚父观察之丽宋楼，实为之殿。

光绪之末，陆氏书流出海外，姚氏之藏亦归京师图书馆，浙西文献为了俄空。而孟萃与其同里张石铭观察、刘翰怡京卿，崛起丧乱之际，旁搜远绍，蔚为大家，海内言藏书者推南浔。顾或举欧阳公语，谓“物聚于所好，而得于有力之疆”。然当世有力如三家者，无虑百数，而三家独以藏书名，则岂不以石林、直斋诸先哲之遗风所被者远，其源流清浊之所处，风化芳臭气泽之所及，固与他郡殊欤？一家之泽，犹一乡也。

若孟萃者，生于藏书之乡，又生于藏书之家，其于经籍，心好之而力赴之，固非偶然。是故书有存亡，唯此传书之精神，则历千载而不亡。石林、直斋之藏久为煨烬，而今有张、刘诸家，茹古精舍”、“求是斋”之书十不存一，而今有孟萃。然则蒋氏三世之精神风尚，虽传之百世可也。《诗》云：“诒厥孙谋，以燕翼子”，子皇、书箴二先生以之；又云“昭兹来许，绳其祖武”，孟萃以之。余既登孟萃之堂而览其书，乐其搜讨之勤而又能道春先人之美也。故书而著之，俾后世知所自焉。

壬戌六月。

库书楼记

光宣之间，我中国新出之史料凡四：一曰殷虚之甲骨，二曰汉晋之简牍，三曰六朝及有唐之卷轴，而内阁大库之元明及国朝文书实居其四。顾殷虚甲骨，当其初出世，已视为骨董之一，土人仍岁所掘，率得善价以去，幸无毁弃者。而西垂简牍、卷轴，外人至不远数万里，历寒暑、冒艰险以出之，其保藏之法尤备。独内阁文书，除宋元刊写本书籍入京师图书馆外，其余十三年之间，几毁者再，而卒获全者，虽曰人事，盖亦有天意焉。案内阁典籍厅大库，为大楼六间，其中书籍居十之三，案卷居十之七。其书多明文渊阁之遗，其案卷则有列朝之朱谕、敕谕，内外臣工之黄本、题本、奏本，外藩属国之表章，历科殿试之大卷，其他三百年间档册、文移，往往而在，而元明遗物亦间出其中。

盖今之内阁，自明永乐至于国朝雍正，历两朝十有五帝，实为万几百度从出之地。雍、乾以后，政务移于军机处，而内阁尚受其成事，凡政府所奉之朱谕，臣工所缴之敕书、批摺，胥奉储于此，盖兼宋时宫中之龙图、天章诸阁，省中之制敕库、班簿房而一之。然三百年来，除舍人、省吏循例编目外，学士、大夫罕有窥其美富者。宣统元年，大库屋坏，有事缮完，乃暂移于文华殿之两庑。地隘不

足容！其露积库垣内者尚半，外廷始稍稍知之。时南皮张文襄公方以大学士、军机大臣管学部事，奏请以阁中所藏四朝书籍设学部京师图书馆。其案卷，则阁议概以旧档无用，奏请焚毁，已得俞旨矣。适上虞罗叔言参事以学部属官赴内阁参与交割事，见库垣中文籍山积，皆奏准焚毁之物，偶抽一束观之，则管制府干贞督漕时奏摺，又取观他束，则文成公阿桂征金川时所奏，皆当时岁终缴进之本，排比月日，具有次第。乃亟请于文襄，罢焚毁之举，而以其物归学部，藏诸国子监之南学，其历科殿试卷则藏诸学部大堂之后楼。辛、壬以后，学部后楼及南学之藏又移于午门楼上所谓历史博物馆者。越十年，馆中资费绌，无以给升斗，乃斥其所藏四分之三，以售诸故纸商，其数以麻袋计者九千，以斤计者十有五万，得银币四千圆，时辛酉冬日也。

壬戌二月，参事以事至京师，于市肆见洪文襄揭帖及高丽国王贡物表，识为大库物，因踪迹之，得诸某纸铺，则库藏具在，将毁之以造俗所谓还魂纸者，已载数车赴西山矣。亟三倍其值价之，称贷京津间，得银万三千圆，遂以易之。于是此九千袋、十五万斤之文书卒归于参事。参事将筑库书楼以储之，而属余为之记。余谓此书濒毁者再，而参事再存之，其事不可谓不偶，然固非参事能存之也，国朝祖宗圣德神功之懿、典章制度、声名文物之盛，先正訏谟远猷之富，与夫元明以来史事之至蹟、至隐，固万万无亡理。天特假手于参事以存之耳。然非笃于好古如参事者，又乌足以与于斯役也。参事夙以收藏雄海内，其天津之嘉乐里第，有殷时甲骨数万枚，古器物数千品、魏晋以降碑志数十石、金石拓本及经籍各数万种，实三古文化学术之渊藪。

今者又得此大库之书，宸翰之楼、大云之库与斯楼鼎峙北海滨。世有张茂，先必将见有庆云休气发于汉津、箕斗之间，而三垣十二次无不浴其光景者，何其祲欤！虽然，参事固不徒以收藏名家者也，其于所得之殷虚文字，固已编之、印之、考之、释之，其他若“流沙坠简”、若“鸣沙石室古佚书”等，凡数十种，先后继出，传古之功，求之古今人，未见其比。今兹所得，又将以十年之力检校、编录，而择其尤重要者次第印行。其事诚至艰且巨，然以前事征之，余信参事之必能办此也。其诸山川重秀、天地再清，举斯楼之藏，还之天府，以备石室、金匱之储，至千万世传之无穷，余又信参事之必有乐乎此也。然则斯书之归参事，盖犹非参事之志欤？

壬戌七月。

经学概论讲义

第一章 总论

孔子以前，有《易》、《书》、《诗》、《礼》、《乐》、《春秋》诸书。而未有经名。《礼记》有《经解篇》。其所举之经凡六。曰：“温柔敦厚。《诗》教也，疏通知远，《书》教也，广博易良，《乐》教也，絮静精微。《易》教也；恭俭庄敬，《礼》教也；属辞比事，《春秋》教也。”此篇记以为孔子之言，虽未必然，要不失为七十子后学之说。《庄子·天下篇》亦云《诗》以道志，《书》以道事，《礼》以道行，《乐》以道和，《易》以道阴阳，《春秋》以道名分。”其所述者，盖儒家之恒言；是战国时，“六经”之名固已确立矣。此“六经”中，《诗》、《书》、《礼》、《乐》皆古代之遗文。百家诸子多称《诗》、《书》，《礼》、《乐》独为儒家所传。《荀子》屡云：“隆《礼》、《乐》而杀《诗》、《书》。”《庄子》云：“其在《诗》、《书》、《礼》、《乐》者，邹鲁之士，缙绅先生，多能明之。”《易》为卜筮之书。《春秋》为鲁国史，孔子以前，其行世不及《诗》、《书》、《礼》、《乐》之广。儒家以孔子赞《易》修《春秋》，遂尊之为经。故《诗》

《书》、《礼》、《乐》者。古代之公学！亦儒家之外学也；《易》、《春秋》者！儒家之专学，亦其内学也。其尊之为经者，以皆孔子手定之故。儒家谓孔子删《诗》、《书》，定《礼》、《乐》，赞《周易》，修《春秋》，以经圣人手定，故谓之经。六经亦谓之六艺。汉初，《乐经》先亡，故又称五经。古所谓经，皆不出此六者。其余孔子之言，为门人所记者，如《论语》、《孝经》，均不在六经数。二书汉人皆谓之传。《尔雅》为释经之书，亦传之一也。《孟子》则与《荀子》并在诸子之列。其后《周官》、《礼记》，以附于《礼》而称经。《左传》、《公羊》、《穀梁传》，以附于《春秋》而称经。唐以后，遂有“九经”之目。而《论语》、《孝经》、《尔雅》则谓之“三传”，盖犹承汉人之旧。宋儒自《礼记》中别出《大学》、《中庸》，与《论语》、《孟子》并称四书。亦犹汉人呼《论语》、《孝经》为传之意。然汉人于石经未刊《论语》，唐石经中并刊《论语》、《孝经》、《尔雅》，宋人补刊蜀石经，并及《孟子》。宋元以后，又有“十四经，兼《大戴礼》）、“十三经”之目。于是古人所谓传，皆得经名。然其初，本谓孔子手定之书，不可不知也。其所谓之经者，常也，谓可为后世常法者也。故诸子百家目其先师之书。亦谓之经。如墨家有《墨经》。道家谓老子之书为《道德经》，医家谓神农《本草》为《本草经》，黄帝《素问》为《内经》。其余小小方技，如相牛、相马之属，亦各有经，甚至茶谱谓之《茶经》，酒谱谓之《酒经》，皆谓其先师之书，足以常为后世程式者，其与儒家称孔子之书为经之意，固不相远。故今可得下经之定义曰：“经者，孔子手定之书，足为后世常法也。”今当就经之次序，分别论之。

第二章 《周易》

《易》之为书，自古有之。初伏羲氏画八卦，文王重之，为六十四卦。卦积六画而成，故每卦有六爻。卦有卦辞，爻有爻辞，相传亦文王所作也（或云《爻辞》周公作，故谓之《周易》）。《易》之书，古代但以供卜筮之用。孔子晚而学《易》，乃作《彖》上下传以释卦辞，《象》上下传以释爻辞，又作《系辞》上下传，《文言》、《说卦》、《序卦》、《杂卦》诸传。以释其大义，谓之十翼。其书说阴阳消长之理。《系辞传》云易穷则变，变则通，通则久。”郑玄赞《易》，以“变易”“不易”二语释之。变易者，《传》之所谓“穷则变”也；不易者，《传》所谓“通则久”也。天道如是，人事亦然。圣人推天道以明人事，而作此书，以为人事之准绳，占筮之用，其一端也。孔子《易》学，传之弟子商瞿。汉初传《易》者，有施、孟、梁邱三家。又有京氏、费氏，多以象数为说。魏王弼出，始纯以义理说之，然颇杂以老庄之说。唐以后，诸家说渐亡，而王弼注立于学官，流传至今。宋时程子颐作《程氏传》，亦说义理。朱子复参以象数，作《周易本义》。宋元以后，并立于学官。要皆得《易》之一端云。

第三章 《尚书》

《书》谓之《尚书》者，以其为上古之书也。《书》始尧、舜，终秦穆公。相传孔子删《书》，定为百篇。至秦焚书，亡其七十二篇。伏生以所存二十八篇教于齐鲁之间。其篇名为：《尧典》（兼今之《舜典》）。《皋陶谟》（兼今之《益稷》）。《禹贡》、《甘誓》、《汤誓》、《盘庚》（兼今三篇）。《高宗彤日》、《西伯戡黎》、《微子》、《牧誓》、《洪范》、《金縢》、《大诰》、《康诰》、《酒诰》、《梓材》、《召诰》、《洛诰》、《多士》、《无逸》、《君奭》、《多方》、《立政》、《顾命》（兼今康王之诰）。《费誓》、《吕刑》、《文侯之命》、《秦誓》。其后又益以《太誓》（《秦誓》），为二十九篇。伏生之传，为欧阳、大小夏侯三家，所谓《今文尚书》也。汉景帝时，鲁共王发孔子宅，于其壁中得《古文尚书》四十五篇，多于今文者十六篇。孔安国以今文读之，通其二十九篇，其十六篇无说，谓之《逸书》，遂亡于汉魏之间。时今、古文二学皆微，晋初乃有伪造孔安国《尚书传》者，析旧有之二十八篇为三十一篇（欧阳今文及马融、郑玄注古文已如此）。又易《泰誓》以伪《泰誓》三篇，又增出伪书二十四篇，共五十八篇，今所传本是也。唐时立于学官。宋时朱子弟子蔡沈作《尚书集传》，亦据伪孔安国本。元明以后，亦立于学官。自宋以来，儒者已疑《泰誓》及二十四篇之伪；历元明至清四代，遂为定论。其伪者亦魏晋间人搜辑古逸书所成！其言多有裨于政治道德！不可废也。其真者多纪帝王行事及君臣论治之语，实中国三千年来政治道德之渊源，亦中国最古之史也。

第四章 《诗》

《诗》，大都周世之所作也。其采诸各国者，谓之风，有《周南》、《召南》、《邶风》、《鄘风》、《卫风》（三者皆卫诗）。《王风》（周东都之诗）。《郑风》、《齐风》、《魏风》、《唐风》（晋诗）。《秦风》、《陈风》、《桧风》、《曹风》、《豳风》，凡十五国。其王朝所作，以美刺政事者，谓之雅；以祭先王及百神者，谓之颂。雅有《小雅》、《大雅》。颂有《周颂》又鲁为周公之后，宋为先代之后，皆得用天子礼乐，故其诗亦谓之颂焉。国风之诗，多民间歌谣，古人采之，以观风俗及政治之美恶。至于雅、颂，则多出于士大夫之手，或咏歌先王之德，或陈古以刺今，其言均可讽诵；而道德政治上之教训，亦多寓其中。其使人感发兴起，较《易》、《书》为深，故孔子屡令弟子学《诗》，以为教育之方术。《诗》出于孔氏者三百十一篇，其六篇无辞，故为三百五篇。汉兴，，《诗》者有鲁、齐、韩三家，至后世俱亡；《毛诗》稍后出而独存。今之《毛诗故训传》，汉毛萼所作也，汉末郑玄复为之笺。六朝以后，《毛诗》孤行。宋人始舍旧注而以新意说《诗》，朱子《诗集传》，其一也，朱子既歿，其书立于学官，人皆宗之。二者各有得失，未可偏废。

第五章 《礼》

一、《仪礼》六经中之《礼经》，谓今之《仪礼》也。六朝以前，无“仪礼”之名，其书但谓之《礼》。或据其首数篇，谓之《士礼》，或谓之《礼经》。或谓之《礼记》（非今之《礼记》）。汉初高堂生所传者，凡十七篇：曰《士冠礼》，曰《士昏礼》，曰《士相见礼》，曰《乡饮酒礼》，曰《乡射礼》，曰《燕礼》，曰《大射仪》，曰《聘礼》，曰《公食大夫礼》，曰《觐礼》，曰《丧服》，曰《士丧礼》，曰《既夕礼》（即《士丧礼》之下篇）！曰《士虞礼》，曰《特牲馈食礼》，曰《少牢馈食礼》，曰《有司彻》（即《少牢馈食礼》下篇）其中惟士礼稍备，天子、诸侯、大夫之礼多不具。盖孔子之时，已无完书。就其存者观之，其记诸礼节目，至缴至悉。经后往往有记，以补经之所未备。《丧服》一篇复有传，则为释经而作也。又汉时，鲁淹中得古文《礼》五十六卷，比高堂生所传增多三十九篇。然所增如《中霤礼》等，皆琐碎非十七篇之比，又无师说，故书亦不传。高堂生之传，其后为大、小戴氏及庆氏。及后汉郑玄以古文校十七篇，择其是者从之，并为之注，通行至今。宋儒于他经皆有注，独于此经则全用郑氏之说也。

二、《礼记》汉初有记百三十一篇，戴德所传八十五篇，戴圣传四十九篇。今之《礼记》即戴圣之本，其书多七十子后学所记，亦有秦汉人作，皆《礼经》之支流也。如《冠义》、《昏义》、《乡饮酒义》、《射义》、《燕义》、《聘义》、《大传》、《祭义》，皆释《礼经》之大义；如《奔丧》、《投壶》，说者以为《礼经》之逸篇。又如《曾子问》、《丧服小记》、《杂记》、《丧大记》、《问丧》、《服问》、《间传》、《三年问》、《丧服四制》九篇皆属丧服，《郊特牲》、《祭法》、《祭统》诸篇皆属祭祀，皆《礼经》之附庸。其余有属通论者，有属制度者，有属明堂阴阳者，有属子法者，皆足补《礼经》之不备；而《曲礼》、《内则》

》、《少仪》诸篇，又切于日用。故六朝以后，《礼经》学微而《礼记》遂昌。汉末，郑玄作《礼记注》。唐初，孔颖达等定《五经正义》，有《礼记》而无《礼经》，遂取《仪礼》而代之。宋朱子特取其中《大学》、《中庸》二篇，为之章句，与《论语》、《孟子》合称“四书”。元陈澧作《礼记集说》，明初立于学官，然不及郑注远甚也。

三、《周礼》载周之官制，凡分六官《天官冢宰》、《地官司徒》、《春官宗伯》、《夏官司马》、《秋官司寇》、《冬官司空》。《冬官》篇亡，以《考工记》补之。六官官属共三百六十，其制与《诗》、《书》所载不尽相合，其书亦最晚出。汉刘歆始笃好之，于《七略》载其书，谓之《周官经》，王莽时立于学官。后汉初废，然民间颇有传习者。刘歆弟子杜子春始通其训诂。郑兴、郑众父子亦治此经。郑玄校以旧本，合三家说为之注。当时遂与《仪礼》、《礼记》并称三《礼》。实则为周时制度之书，与《礼经》无涉也。

第六章 《春秋》

《春秋》本鲁史记之书，孔子修之。自鲁隐公元年，历桓、庄、闵、僖、文、宣、成、襄、昭、定，凡十公，讫于哀公十四年。凡十二公二百四十二年，以事系日，以日系月，以月系时，以时系年。盖本鲁史之旧，孔子加以笔削，以见一王之法，以寓褒贬。传《春秋》者五家，今存三家，左氏、公羊、穀梁是也。

一、《左氏传》《春秋左氏》传者，左邱明之所作也。昔人谓孔子将作《春秋》，与左邱明观其史记，为有所褒讳贬损，不可书见，口授弟子，弟子退而异言。邱明恐弟子各按其意以失其真，故论本事而作传，故其书以史事为详，后世知春秋时事迹者，全赖此书。汉兴，张苍献之。司马迁作《史记》，多采其书。然汉人皆以为史书，不以为经说。后汉初立于学官，未几而废，然民间颇传习之。贾逵、服虔等并为之注。今所传者，晋杜预注也。魏晋以后，说《春秋》者皆以左氏为宗。

二、《公羊传》初，齐人公羊高受《春秋》于子夏，五世相传，其说皆口授。至汉景帝时，公羊寿始与其弟子胡毋子都著于竹帛。同时董仲舒亦治公羊《春秋》，作《春秋繁露》以辅之子都，于是公羊之学大显。其传有严氏、颜氏二家之学，其书皆不传，专者后汉何休注也。公羊家说《春秋》，以为《春秋》非纪事之书，重义而不重事。《春秋》书法，字字皆有义例。凡时月日名字之异，皆求其所以然。于是设为科旨条例，至为烦赜，亦颇有非常异义可怪之论。何休之注，虽成于后汉之季，然用胡毋生条例，及公羊先师之说，前汉《春秋》之学，惟此尚为全书。此学在两汉最显，至魏晋以后，左氏盛行，而公羊遂微。

三、《穀梁传》出于鲁人穀梁赤，比二《传》为晚出。汉时曾立于学官，然未几而废。旧注皆不传，传者惟晋范宁注。六朝以后，其学亦微。

第七章 《论语》

《论语》者，孔子弟子记孔子言行之书，弟子之言合于孔子者，亦附见焉。孔子生时，弟子已各有所记。既卒，门人相与辑而论纂，故谓之《论语》。汉兴，传者有三家：《鲁论语》二十篇；《齐论语》二十二篇；《古论语》出孔子壁中，凡二十一篇。张禹初受《鲁论》，又受《齐论》，择善而从，别为《张侯论》，其书盛行于后汉。郑玄以《古论》校《张侯论》，用《鲁论》之篇次，采《古论》之文字，复为之注，顾其书（今敦煌所出，有唐人写郑注《论语》《述而》、《子罕》、《乡党》三篇）不传。魏时何晏作《集解》，其本亦与郑校本同，其注则兼采古今之说，六朝时立于学官。宋朱子出，复为《论语集注》，宋以后立于学官。《论语》多言立身行己之事，较六经之言经世者尤于人为切近，故历代皆以为通经之门户。汉人受经者，必先通《论语》、《孝经》，宋以后读五经者，必先受四书，皆以此也。

第八章 《孝经》

《孝经》者，孔子为曾子陈孝道之书。汉时亦有今文古文、今文十八章，古文二十二章。六朝时，今文《孝经》有郑氏注（或云郑玄所作），后有伪为古文孔安国传者，二书世多疑之。唐明皇因采旧说，自为之注（用今文本），唐时立于学官。宋朱子作《孝经刊误》，用古文本，然其书不行。

第九章 《尔雅》

《尔雅》者，昔人荟萃训诂之书，其中以释《诗》、《书》为多。孔子之时已有此书。后人又有附益。汉时与《孝经》、《论语》并为初学之书。故刘向父子校书。列之“经”类中。汉人注者数家。后世皆亡。今唯晋郭璞注存。世以其为释经之书。故亦附之经后焉。

第十章 《孟子》

《孟子》！本诸子之书！然汉文帝已立《孟子》博士，后乃罢之。后汉赵岐为之注。北宋末，席益补刻蜀石经，附《孟子》于后，为十三经。南宋初，邵武士人假孙奭之名，为赵注作疏，越州刊诸经疏，亦刊此疏，盖已跻于诸经之列。朱子复为之集注，列于四书。于是十三经之名，遂一定而不可易矣。

第十一章 历代之经学

《史记》称孔子弟子身通六艺者七十二人，六艺即“六经”，是孔子之门未有分经之事也。然商瞿传《易》，子夏传《诗》，曾子、子游特善于《礼》，是孔子门人

于经既各有专长。其后如孟子通五经，尤长于《诗》、《书》荀子特隆于《礼》、《乐》，汉初诸儒，皆以一经名家，其设教也，先授《尔雅》及诸子书，次授《论语》、《孝经》，最后乃授一经。然其时诸大儒，无不兼通五经者。其后乃有今、古学之分。今学者，乃先秦以来师师相传之学，汉初皆立于学官，是为官学。古学则后出之古书，民间创通传习者也。二者各有家法，本不相谋。

后汉以后，古学渐盛，后有郑玄者，博通五经，兼综今古，于《易》、《书》、《诗》、三《礼》、《论语》，皆为之注，学者宗之。于是两汉今古二家之学，渐微而亡。同时王弼之《易注》，伪托之孔安国《尚书传》，杜预之《左传集解》，亦与郑氏之书并行于世。至南北朝学者，乃复为此种经注作释，谓之义疏，亦谓之正义。唐有天下，令孔颖达等撰《五经正义》。于《易》用王弼注，《书》用孔安国传，《诗》用郑氏《毛诗笺》，《礼记》用郑氏注，《春秋左氏传》用杜预注。均采前人旧疏，为之正义。于是此五注者，遂为官学正本。

其后贾公彦撰《周礼》、《仪礼》二疏（皆用郑注），杨士勋撰《穀梁传疏》（用范宁集解），徐彦撰《公羊疏》（用何休注），于是九经皆有正义。而《论语》有梁皇侃旧疏（用何晏集解），《孝经》有元行冲疏（用明皇御注），《尔雅》有孙炎、高琬二疏（皆用郭璞注）。至宋真宗时，命邢昺校定《论语》、《孝经》、《尔雅》三疏。合贾氏《周礼》、《仪礼》二疏，杨氏《穀梁疏》，徐氏《公羊疏》刊布之，谓之《七经正义》，以继孔颖达《五经正义》之后，以是亦为官学正本。唐时学者，皆谨守旧注，无敢出入。宋刘敞、欧阳修、苏轼、王安石等，始以新意说经。同时周敦颐、程颢程颐兄弟、张载、邵雍等，复为心性之学，至朱子而集其大成。朱子于《易》作《本义》，于《诗》作《集传》，唯《尚书》注未成，以授其门人蔡沈，沈作《集传》。朱子又作《四书集注》，皆与汉魏以来旧注不同。其说义理或较旧注为长。其后朱子之书，尽立于学官。明以后，《春秋》亦用胡安国传，《礼记》用陈澧集说。于是五经旧注，皆遏而不行。

明永乐中，作《五经大全》，为宋元经注之义疏，犹唐宋之《五经正义》、《七经正义》为汉魏经注之义疏也。元明二代，笃守宋注，与唐人之笃守旧注无异。有清一代，其取士虽仍用宋注，然亦兼采旧说。学者著书，尤多发明汉学。其于诸经各有专家：于《易》，则由虞翻以上溯孟氏；于《书》，则古学求诸马、郑，今学求之欧阳、大小夏侯；于《诗》，兼采齐、鲁、韩。而陈氏奂之《毛诗传疏》、孙氏诒让之《周礼正义》、胡氏培晕之《仪礼正义》、陈氏立之《公羊义疏》，其精博均在六朝唐人义疏之上。至郝氏懿行之《尔雅义疏》，虽释郭注，其识并驾郭氏而上之。缘有清一代，考证之风大盛，穷经之方法既定，又得小学、史学之助，故其于经学之成功，实非元明之所能及也。

致沈兼士

(1922年12月8日)

【国立北大研究所国学门关于学术之通信，国学季刊第1辑】

兼士先生有道：

前日辱手教，并属提出研究题目，兹就一时鄙见所及，提出四条。惟《古字母》及《共和以前年代》二条，其事甚为烦重，非数年之力所能毕事，姑提出以备一说而已。

前日寄上新作《书式古堂书画画汇考中所录唐韵后》一篇，由叔平兄转交，想蒙察入。

题目四纸附上呈改。专肃，敬候起居不尽

王国维顿首十一，十，二十研究发题

(一)《诗》《书》中成语之研究说明，古今言语文章，无不根据于前世之言语。今之言语中，有元明之成语；元明言语中，有唐宋之成语，唐宋言语中，有汉魏六朝之成语；汉魏言语中，有三代之成语。凡此成语，率为复语，与当时分别之单语！意义颇异，必于较古之言语中求之。今之成语，我辈得求之于元明以上之言语中；汉魏六朝之成语，我辈得求之于三代言语中。若夫《诗》、《书》为三代言语，其中必有三代以上之成语，然今日所存言语，无更古于三代者，其源既不可求，其语亦遂不可解，然犹可参互求之。

今略举数例，如：《诗·鄘风》子之不淑，云如之何。”《传》《笺》均以“善”训“淑”。不知“不淑”乃古成语。《杂记》载诸侯相吊辞曰：寡君闻君之丧，寡君使某，如何不淑。”《左》庄十一年传，鲁吊宋辞曰：“天作淫雨，害于粢盛，若之何不吊。”襄十四年传，鲁吊魏辞曰：“寡君使瘠闻君不抚社稷，而越在他境，若之何不吊。”

古“吊”“淑”同字，若之何“不吊”即如何“不淑”也。是“如何不淑”一语，乃古吊死唁生之通语。“不淑”犹言不幸也，子之不淑，云如之何”者，言夫人当与君子偕老，而宣公早卒，则子之不幸，将如之何矣。《王风》“遇人之不淑”，亦犹言遇人之不幸，与遇人之艰难同意也。又“陟降”一语，亦古之成语；其义为“陟”，或为“降”，不必相兼。《大雅》文王陟降，在帝左右”，是陟而连言降者也。《周颂》陟降厥士，日监在兹”，是降而连言陟者也。《尚书》多言降格，格

之本字为各，其字从久，与降字形、声、义三者皆相近，故陟降一语又转为“陟各”。《左》昭七年传“叔父陟恪，在我先王之左右”，正用《诗》语。恪即各之借字，“陟各”即“陟降”也。古“陟”“登”声相近，故又转为“登假”。《曲礼》告丧曰：“天王登假，《庄子·养生主》彼且择日而登假，《大宗师》是智之能登假于道也，若此“登假”，亦即“陟降”。《书·文侯之命》言“昭登于上，《史记·晋世家》引今文），《诗·大雅》言“昭假于下，登假相对为文，是“登假”即“陟降”之证也。又转而为“登遐”。《墨子·节葬篇》秦之西有义渠之国者，其亲戚死，聚柴薪而焚之燹上，则谓之登遐。”“登遐”，亦即“陟降”也。上所举“陟恪”、“登假”、“登遐”诸语，皆举其一端言之；则《诗》之“陟降”，于《大雅》义当为“陟”，于《周颂》义当为“降”，然则古之成语不能以分别之单语解之，断可知矣（《传》以文王上接天下接人解“文王陟降”，《笺》以天上下其事解“陟降厥土”！皆坐分别解之之误）。又如《大雅》“帝命不时”！“不时”即“丕时”。《书·君奭》在让后人於丕时”！即用此语。

永言配命，与永言孝思，句法不同，孝思”、“配命”，皆为成语。《诗》“孝思维则”，毛公鼎铭“不巩，先王配命”，亦其一证。《诗》《书》中如此类，其数颇多，自来注家均以雅训分别释之，殊不可通。

凡此类语，能荟萃而求其源委欤？其或不能，则列举之而阙所不知，或亦治经者所当有事欤？

（二）古字母之研究

说明，一字之音，有母有韵。古韵之学，创于宋人，至近世而极盛。古字母之学，创于嘉定钱氏，同时休宁戴氏亦作《转语》二十章，而其书不传，其流亦微。惟番禺陈氏作《切韵考》，始据《广韵》中反切，以求中古字母之系统；其所得，与等韵家之三十六字母不同。至于古音中之字母，则尚未有论其全体者，此亦音韵学上一阙点也。此问题不待说明；所当说者，材料与方法耳。

今举其委，约有五端：一、经传异文。如《尚书》古今文，《春秋》《三传》，实同名异，往往遇之；汉儒注中，某读为某，亦其类也。二、汉人音读。古注中某读如某，某读若某是也。三、音训。如仁人、义宜之类。《释名》一书，所用以相释者，什八九皆同母字也。四、双声字，如玄黄，角发、栗烈之类，皆同母字也。五、反切。孙炎以下，至于徐邈李轨之音，见古书注及《经典释文》者是也。苟以此数者参互相求，但顺材以求合，而不为合以验材，仿顾氏《唐韵正》之例，勒为一书，庶几古字母部目或睹其全，不让古韵之学专美欤！

（三）古文学中联绵字之研究

说明，联绵字，合二字而成一语，其实犹一字也。前人《骈雅》、《别雅》诸书，颇以义类部居联绵字，然不以声为之纲领；其书盖去类书无几耳。此等复语，其变化不可胜穷，然皆有其公共之源。如风曰簪发，泉曰簪沸，跋扈曰畔援，广大曰伴奭，分散曰判奭；字虽不同！其声与义各有其相通之处。又如雨之小者曰霖霖，草之小者曰藤芜，曰绵马，木之柔者曰木髦，虫之小者曰蠓蠓，状草木之细密曰親髦，状鸟之小者曰绵蛮；殆皆与微字之音义相关。辞赋既兴，道语尤夥，乃至重叠用之，如《离骚》须臾、相羊，见于一简之中；《上林赋》福测泌櫛，铅呀豁阍”，叠于一句之内，其实为一语之变化也。若集此类之字，经之以声，而纬之以义，以穷其变化，而观其会通，岂徒为文学之助，抑亦小学上未有之事业欤！

（四）共和以前代之研究

说明，《史记》年表起于共和，厉王以前，年祀无考。《鲁世家》别据鲁历，上讫考公；而伯禽一代未著年数，则未能上关周初也。其诸公羊数，亦刘歆《三统历》所纪，互有异同。《汲冢纪年》虽有夏商年纪，此太史公所谓“不同，乖异，不足取信者”，今兹所传，又非原本，自皇甫谧以下向壁虚造者，更无论已。然《周书》、《武成》、《召诰》、《顾命》诸篇，颇具年月，如能以黄帝颡顓夏殷周鲁六历，各上推四五百年，各著其分至，朔望之甲子，以与《尚书》及古器物之月日相参证，虽宗周诸王在位之年数，无从臆说，然武王克殷之年，周公营洛之岁，与成王在位年数，或可得定欤？

附志：黄帝等六历，及历法，及積年，见《开元占经》卷一百五，并参考汪日桢《古今推步诸术考》。

致何之兼等

(1922年12月下旬)

何、李、安、郝、王诸学兄足下：

前日奉手书，敬悉一是。过辱奖饰，所不敢承。今将见问事宜条覆如左：

(一) 联绵字取材之处，须遍四部，先以隋以前为限。好在五君共同研究，可以分担经、史、子、集四部。就一部分中每阅一书，即将其中联绵字记出（并记卷数，以便再检），其有类似联绵者，亦姑记之（如《庄子》中人名三字者，中亦有联绵字），后再增删，汇集，分类。

(二) 分类之法，拟分双声字为一类；叠韵字为一类；其非双声、叠韵者，又为一类。双声字以字母为次（古音字母不过二十馀，不妨借用三十六字母叠韵字以《广韵》为次；其非双声、叠韵者，则以第一字之声或韵为次。而一母韵又以其意义最近者，互相系连，则可以观其会通矣。

(三) 汉魏人经注中字，与《尔雅》、《方言》、《释名》、《广雅》、《说文》中字，任经部者兼之。金石文字（汉魏以前者），任史部者兼之；《史记》、《汉书》中所载古赋，与《文选》往往有异同，亦须兼采。子部中如高诱《吕览》、《淮南》注，亦可采入。集部于《楚辞》、《文选》外，可参考《全上古三代秦汉六朝文》。

(四) 五君表字、籍贯，望见示，庶后日通信便于称呼。专覆，敬询近祺不一

王国维敬启

罗君楚传

君楚，名福荃，浙江上虞人。祖树勳，江苏候补县丞。父振玉，学部参事官。君楚幼而通敏，年十岁，能读父书。其于绝代语释、别国方言，强记县解，盖天授也。年未冠，既博通远西诸国文学，于法朗西、日耳曼语所造尤深，继乃治东方诸国古文字学。当光绪之季，我国古文字、古器物大出，其荦荦大者，若安阳之甲骨、敦煌塞上之简牘、莫高窟之卷轴。参事实始为之搜集、编类、考订、流通，有功于学问甚巨。而塞内外诸古国，若西夏、若突厥、若回鹘，远之若修利、若觉怯罗、若身毒，其文字、器物亦多出我西北二垂，胥与我国闻相涉。而梵天文字，则又我李唐之旧学也。我老师、宿儒，以文字之不同，瞠目束手，无如之何。惟君楚实首治梵文，又创通西夏文字之读，将以次有事于突厥、回鹘、修利诸文字，故海内二三巨儒谓他日理董绝国方言一如参事之理董国闻者，必君楚其人也。有唐之季，拓跋氏割据夏州。及宋初而滋大，拓地数千里，传世三百年，自制文字，行于其国。迄蒙古中叶，社稷虽墟，河西、陇右尚用其文字。然近世所传，不过二三金石刻，且举世莫能名焉。

光绪末，俄人某于甘州古塔中得西夏译经数篋，中有汉夏对译字书名《掌中珠》者，君楚得其景本数叶，以读西夏石刻《感通塔记》及法属河内所藏西夏文《法华经》残卷，旁通四达，遂通其读，成《西夏国书略说》一卷。嗣后，元初所刊河西字《藏经》又颇出于京师，君楚治之益力，撰《华严经释文》卷未成。由是，西夏文字所识十逾八九矣。又尝从日本榘教授亮受梵文学，二年而升其堂，凡日本所传中土古梵学书，若梁真谛翻《梵语》唐义净《梵唐千字文》以下若干种，一一为之叙录，奥博精审，簿录家所未有也。君楚体素弱，重以力学，年二十二而病疡生于胸，仍岁不瘳，二十六而夭，时辛酉九月也。所著书多未就，以欧文记者尤丛杂不可理。

今可写定者，《梦轩琐录》三卷，即《古梵学书序录》及攻梵语之作也；《西夏国书略说》一卷；《宋史西夏传注》一卷；译沙畹、伯希和二氏所注《摩尼教经》一卷，古外国传记辑存》一卷，大唐西域记所载伽蓝名目表》一卷，敦煌古写经原跋录存》一卷，伦敦博物馆敦煌书目》一卷，巴黎图书馆敦煌书目》一卷。余初见君楚时，君楚方六七岁。盖亲见其自幼而少、而长、而劬学、而著书。君楚为学，有异闻必以语余，余亦时以所得告之。余作《西胡考》，君楚为余征内典中故事。

君楚所释《华严经》刻本，今于其歿后数月，始得考定为元初杭州所刊河西字《大藏经》之一，恨不得以语君楚。然则余亦安得复有闻于君楚耶？将突厥、回鹘、修利诸史料，不能及今世而理董耶？即异日有继君楚之业者，如君楚之高才力学，又岂易得也。君楚没，海内知参事及君楚者无不痛惜。嘉兴沈乙庵先生与余言君楚，辄涕泗不能禁。然则君楚之死，其为学术之不幸何如也！君楚之葬也，沈先生为铭其墓。妻汪氏割臂以疗君楚，寻以毁卒，余亦铭之。无子，有女子一。卒之次年

，弟福葆生子承祖，参事命为之后。

余既哀君楚之亡，乃掇其学问之大要为之传，使后世知君楚不愧为参事子焉。

论政学疏

臣窃观自三代至于近世，道出于一而已。泰西通商以后，西学西政之书输入中国，于是修身齐家治国平天下之道乃出于二。光绪中叶新说渐胜，逮辛亥之变，而中国之政治学术几全为新说所统一矣。然国之老成，民之多数尚笃守旧说，新旧之争，更数十年而未有已，国是淆乱，无所适从。臣愚以为新旧不足论，论事之是非而已，是非之标准安在，曰在利害，利害之标准安在，曰在其大小，新旧之利害虽未遽决，然其大概可得言焉。

原西说之所以风靡一世者，以其国家之富强也。然自欧战以后，欧洲诸强国情见势绌，道德堕落，本业衰微，货币低降，物价腾涌，工资之争斗日烈，危险之思想日多，甚者如俄罗斯赤地数万里，饿死千万人，生民以来未有此酷。而中国此十二年中，纪纲扫地，争夺乃仍，财政穷蹙，国几不国者，其源亦半出于此。臣尝求其故，盖有二焉。西人以权利为天赋，以富强为国是，以竞争为当然，以进取为能事，是故扶其奇技淫巧，以肆其豪强兼并，更无知止知足之心，浸成不夺不厌之势。于是国与国相争，上与下相争，贫与富相争，凡昔之所以致富强者，今适为其自毙之具。

此皆由贪之一字误之也。西说之害根于心术者一也。

中国立说首贵用中，孔子称过犹不及，孟子恶举一废百。西人之说大率过而失其中，执一而忘其余者也。试以最浅显者言之。国以民为本，中外一也。先王知民之不能自治也，故立君以治之，君不能独治也，故设官以佐之。而又虑君与官吏之病民也，故立法以防制之。以此治民是亦可矣。西人以是为不足，于是有立宪焉，有共和焉。然试问立宪共和之国，其政治果出于多数国民之公意乎，抑出于少数党人之意乎，民之不能自治，无中外一也。所异者以党魁代君主，且多一贿赂奔走之弊而已。

孔子言患不均，《大学》言平天下，古之为政未有不以均平为务者，然其道不外重农抑末，禁止兼并而已。井田之法，口分之制，皆屡试而不能行，或行而不能久。西人则以是为不足，于是有社会主义焉，有共产主义焉。然此均产之事，将使国人共均之乎？抑委托少数人使均之乎，均产以后，将合全国之人而管理之乎，抑委托少数人使代理之乎？由前之说则万万无此理，由后之说则不均之事，俄顷即见矣。俄人之行之伏尸千万，赤地万里，而卒不能不承认私产之制度，则曩之汹汹又奚为也。臣不敢谓西人之智大率类此，然此其章章者矣。

臣观西人处事皆欲以科学之法驭之。夫科学之所能驭者空间也、时间也、物质也，人类与动植物之躯体也。然其结构愈复杂，则科学之律令愈不确实。至于人心之灵及人类所构成之社会国家，则有民族之特性，数千年之历史，与其周围一切之境遇

，万不能以科学之法治之。而西人往往见其一，而忘其他。故其道方而不能圆，往而不知反，此西说之弊根于方法者二也。

至西洋近百年中，自然科学与历史科学之进步，诚为深邃精密，然不过少数学问家用以研究物理，考证事实，琢磨心思，消遣岁月斯可矣。而自然科学之应用又不胜其弊，西人兼并之烈，与工资之争，皆由科学为之羽翼，其无流弊如史地诸学者，亦犹富人之华服，大家之古玩，可以饰观瞻，而不足以养口体。是以欧战以后，彼土有识之士，乃转而崇拜东方之学术，非徒研究之又信奉之。

数年以来，欧洲诸大学议设东方学术讲座者以数十计，德人之奉孔子老子说者，至各成一团体，盖与民休息之术莫尚于黄老，而长治久安之道莫备于周孔。在我国为经验之良方，在彼土尤为对症之新药。是西人固已憬然于彼政学之流弊，而思所变计矣。

最近二三十年中中国新发见之学问

古来新学问起，大都由于新发见。有孔子壁中书出，而后有汉以来古文家之学；有赵宋古器出，而后有宋以来古器物、古文字之学。惟晋时汲冢竹简出土后，即继以永嘉之乱，故其结果不甚著然。同时杜元凯注《左传》，稍后郭璞注《山海经》已用其说。而《纪年》所记禹益、伊尹事至今成为历史上之问题。然则中国纸上之学问赖于地下之学问者，固不自今日始矣。自汉以来，中国学问上之最大发现有三：一为孔子壁中书，二为汲冢书，三则今之殷墟甲骨文字、敦煌塞上及西域各处之汉晋木简、敦煌千佛洞之六朝及唐人写本书卷、内阁大库之元明以来书籍档册。此四者之一，已足当孔壁汲冢所出，而各地零星发见之金石书籍，于学术有大关系者尚不及与焉。故今日之时代，可谓之发见时代自来未有能比者也。今将此二三十年发见之材料，并学者研究之结果分五项说之。

（一）殷墟甲骨文字。此殷代卜时命龟之辞，刊于龟甲及牛骨上。光绪戊戌己亥间始出于河南彰德府西北五里之小屯。其地在洹水之南，水三面环之。《史记·项羽本纪》所谓“洹水南殷墟上”者也。初出土后，潍县估人得其数片以售之福山王文敏（懿荣）。文敏命秘其事，一时所出先

后皆归之。庚子文敏殉难，其所藏皆归丹徒刘铁云（鹔）。铁云复命估人搜之。河南所藏至三四千片。光绪壬寅，刘氏选千余片影印传世，所谓《铁云藏龟》是也。丙午上虞罗叔言参事始官京师，复令估人大搜之，于是丙丁以后所出多归罗氏。自丙午至辛亥所得约二三万片。而彰德长老会牧师明义士（T·M·Menzies）所得亦五六千片。其余散在各家者，尚近万片。近十年中乃不复出其著录此类文字之书。贝U《铁云藏龟》外，有罗氏之《殷墟书契前编》、《殷墟书契后编》、《殷墟书契菁华》。《铁云藏龟》之余，日本林泰辅博士之《龟甲兽骨文字》、明义士之《殷墟卜辞》（The Oracle Records of the Waste of Yin），哈同氏之《戡寿堂所藏殷虚文字》凡八种。而研究其文字者，则瑞安孙仲容比部始于光绪甲辰，撰《契文举例》。罗氏于宣统庚戌撰《殷商贞卜文字考》，嗣撰《殷虚书契考》、《释殷虚书契待问编》等。商承祚氏之《殷虚文字类编》复取材于罗氏改定之稿。而《戡寿堂所藏殷虚文字》，余亦有考释。此外孙氏之《名原》亦颇审释骨甲文字，然与其《契文举例》皆仅据《铁云藏龟》为之，故其说不无武断。审释文字自以罗氏为第一。其考定小屯之为故殷虚及审释殷帝王名号，皆由罗氏发之。余复据此种材料作《殷卜辞中所见先公先王考》，以证《世本》《史记》之为实录。作《殷周制度论》以比较二代之文化。然此学中所可研究发明之处尚多，不能不有待于后此之努力也。

（二）敦煌塞上及西域各地之简牍。汉人木简，宋徽宗时已于陕右发见之。靖康之祸为金人索之而去。当光绪中叶，英印度政府所派遣之匈牙利人斯坦因博士（MAurel Stein）访古于我和阾（Khotan），于尼雅河下流废址得魏晋间人所书木简数十枚。嗣于光绪季年先后于罗布淖尔东北故城得晋初人书木简百余枚。于敦煌汉长城故

址得两汉人所书木简数百枚。皆经法人沙畹教授（Ed·Chavannes）考释其第一次所得，印于斯氏《和阗古迹》（Sand-buried Ruins of Khotan）中，第二次所得别为专书于癸丑甲寅间出版。此项木简中，有古书、历日、方书，而其大半皆屯戍簿录。于史地二学关系极大。癸丑冬日，沙畹教授寄其校订未印成之本于罗叔言参事。罗氏与余重加考订，并斯氏在和阗所得者，影印行世，所谓《流沙坠简》是也。

（三）敦煌千佛洞之六朝唐人所书卷轴。汉晋牋简，斯氏均由人工发掘得之。然同时又有无尽之宝藏于无意中出世，而为斯氏和法国之伯希和教授携去大半者，则千佛洞之六朝及唐、五代、宋初人所书之卷子本是也。千佛洞本为佛寺，今为道士所居。当光绪中叶，道观壁坏，始发见古代藏书之窟室。其中书籍居大半，而画幅及佛家所用幡幢等亦杂其中。余见梗阳端氏所藏敦煌出开宝八年灵修寺尼画观音像，乃光绪己亥所得。又乌程蒋氏所藏沙州曹氏二画像，乃光绪甲辰以前叶鞠裳学使（昌炽）视学甘肃时所收。然中州人皆不知。至光绪丁未，斯坦因氏与伯希和氏（Paul Pelliot）先后至敦煌，各得六朝人及唐人所写卷子本书数千卷，及古梵文、古波斯文及突厥回鹘诸国文字无算。我国人始稍稍知之，乃取其约万卷置诸学部所立之京师图书馆。前后复经盗窃散归私家者，亦当不下数千卷，其中佛典居百分之九五。其四部书为我国宋以后所久佚者：经部有未改字《古文尚书》，孔氏传未改字《尚书释文》、糜信《春秋谷梁传解释》、《论语郑氏注》、陆法言《切韵》等。史部则有孔衍《春秋后语》、唐西州、沙州诸图经、慧超《往五天竺国传》等（以上并在法国）。子部则有《老子化胡经》、《摩尼教经》、《景教经》。集部有唐人词曲及通俗诗、小说各若干种。己酉冬日，上虞罗氏就伯氏所寄影本写为《敦煌石室遗书》排印行世。越一年，复印其影本为《石室秘宝十五种》。又五年癸丑，复刊行《鸣沙石室逸书十八种》，又五年戊午刊行《鸣沙石室古籍丛残三十种》。皆巴黎国民图书馆之物。而英伦所藏，则武进董授经（康）、日本狩野博士（直喜）、羽田博士（亨）、内藤博士（虎次郎），虽各抄录影照若干种，然未有出版之目也。

（四）内阁大库之书籍档案。内阁大库在旧内阁衙门之东，临东华门内通路，素为典籍厅所掌。其所藏，书籍居十之三，档案居十之七。其书籍多明文渊阁之遗；其档案则有历朝政府所奉之朱谕，臣工缴进之敕谕批摺、黄本、题本、奏本，外藩属国之表章，历科、殿试之大卷。宣统元年，大库屋坏，有司缮完乃暂移于文华殿之雨庑，然露积库垣内尚半。时南皮张文襄（之洞）管学部事，乃奏请以阁中所藏四朝书籍，设京师图书馆，其档案则置诸国子监之南学。试卷等置诸学部大堂之后楼。壬子以后，学部及南学之藏复移于午门楼上之历史博物馆。越十年，馆中复以档案四之三售诸故纸商，其数凡九千麻袋，将以造还魂纸，为罗叔言所闻，三倍其价购之，商人移贮于彰义门之善果寺。而历史博物馆之剩余亦为北京大学取去，渐行整理其目在《大学日刊》中。罗氏所得以分量太多，仅整理其十分之一，取其要者汇刊为《史料丛刊》十册，其余今归德化李氏。

（五）中国境内之古外族遗文。中国境内古今所居外族甚多，古代匈奴、鲜卑、突厥、回纥、契丹、西夏诸国均立国于中国北陲，其遗物颇有存者。然世罕知之。惟元时耶律铸见突厥阙特勤碑及辽太祖碑。当光绪己丑，俄人拉特禄夫访古于蒙古，于元和林故城北访得突厥阙特勤碑、宓伽可汗碑、回鹘九姓可汗三碑。突厥二碑皆有中国、突厥二种文字；回鹘碑并有粟特文字。及光绪之季，英、法、德、俄四国探险队入新疆，所得外族文字写本尤多。其中除梵文、怯卢文、回鹘文外，更有三种不可识之文字。旋发现其中一种为粟特语，而他二种则西人假名之曰第一言语、第二言语。后亦渐知为吐火罗语及东伊朗语，此正与玄奘《西域记》所记三种语言相合。粟特语即玄奘之所谓“窣利”、吐火罗即玄奘之“睹货逻”、其东伊朗语则其所谓“葱岭以东诸国语”也。当时粟特、吐火罗人多出入于我新疆，故今日犹有其遗物，惜我国人尚未有研究此种古代语者，而欲研究之势不可不求之英、法、德诸国。惟宣统庚戌，俄人柯智禄夫大佐于甘州古塔得西夏文字书，而元时所刻河西文《大藏经》后亦出于京师，上虞罗福苣乃始通西夏文之读。今苏俄使馆参赞伊凤阁博士（Ivanoff）更为西夏语音之研究，其结果尚未发表也。

此外，近三十年中中国古金石、古器物之发见，殆无岁无之。其于学术上之关系，亦未必让于上五项。然以零星分散，故不能一一缕举。

惟此五者，分量最多，又为近三十年中特有之发见，故比而述之，然此等发见物，合世界学者之全力研究之。其所阐发尚未及其半，况后此之发见亦正自无穷，此不能不有待少年之努力也。

宋代金石学

宋代学术，方面最多，进步亦最著。其在哲学，始则有刘敞、欧阳修等，脱汉唐旧注之桎梏，以新意说经；后乃有周敦颐、程颢、程颐、张载、邵雍、朱熹诸大家，蔚为有宋一代之哲学。其在科学，则有沈括、李诫等，于历数、物理、工艺，均有发明。在史学，则有司马光、洪迈、袁枢等，各有庞大之著述。绘画，则董源以降，始变唐人画工之画，而为士大夫之画。在诗歌，则兼尚技术之美，与唐人尚自然之美者，蹊径迥殊。考证之学，亦至宋而大盛。故天水一朝，人智之活动与文化之多方面，前之汉唐，后之元明，皆所不逮也。近世学术多发端于宋人，如金石学，亦宋人所创学术之一。宋人治此学，其于搜集、著录、考订、应用各面，无不用力。不百年间，遂成一种之学问。今当就宋人对此学之功绩一一述之。

（一）搜集

宋初内府本有藏器。仁宗皇祐三年，诏以祕阁及太常所藏三代钟鼎器，付太乐所参校剂量，凡十又一器。至徽宗即位，始大事搜集。《铁围山丛谈》四云：“太上皇帝即位，宪章古始。及大观初，乃倣李公麟之《考古图》，作《宣和殿博古图》。凡所藏者，为大小礼器，则已五百有几。独政和间为最盛，尚方所贮至六千余数百器。时所重者，三代之器而已。若秦汉间，非殊特，盖亦不收。及宣和后，则咸蒙贮录，且累数至万余。若岐阳宣王之石鼓，西蜀文翁礼殿之绘象，凡所知名，罔间巨细远近，悉索入九禁。而宣和殿后，又创立保和殿者，左右有稽古、博古、尚古等阁，咸以古玉玺印、诸鼎彝、法书图画咸在。”此说徽宗一朝搜集古器事最为详尽。然亦有夸诞失实处，如谓《宣和博古图》之名取诸宣和殿，又谓其成书在大观之初而不在宣和之末，其实不然。《籀史》谓“政和癸巳秋，获兕敦于长安”，而《博古图》中已著录此敦。《金石录》谓“重和戊戌，安州孝感县民耕地得方鼎三，圆鼎二，甗一”，谓之“安州六器”，而《博古图》已著录其五。又谓，宣和五年，青州临淄县民于齐故城耕地得古器物数十种，其间钟十枚尤奇”，而《博古图》已著录其五。然则此书之成，自在宣和五年之后；而图中所载古器仅五百余。则政和六千余器、宣和万余器之说，殆不足信，或蔡氏并古玉印玺石刻计之。然第如《博古图》之所录，已为古今大观矣。其尤奇者，南渡以后，宣和殿器并为金人辇之而北，而绍兴内府藏器亦未尝不富，《博古图》著录之器见于张抡《绍兴内府古器评》者，尚得十之一二。盖金人不重视此种物，而宋之君臣方以重值悬购古器，故北宋内府及故家遗物往往萃于榷场。如刘敞旧藏张仲簋，刘炎于榷场得之；毕良史亦得古器十五种于盱眙榷场，其中八种皆宣和殿旧物也。《建炎以来系年要录》云：“绍兴十五年，以毕良史知盱眙军。”而《三朝北盟会编》谓“良史以买卖书画古器得幸于思陵。”良史之知盱眙，当由高宗使之访求榷场古器耳。当南渡之初，国势未定，而高宗孜孜搜集古器如此，则宣和藏器之富，固自不足怪也。

然宋人搜集古器之风，实自私家开之。刘敞知永兴军，得先秦古器十有一物。李公

麟博物精鑒，闻一器捐千金不少靳。而《考古图》，无名氏《续考古图》，王複斋《钟鼎款识》以及《集古》、《金石》二录跋尾，往往于各器之下，注明藏器之家，其人不下数十。虽诸家所藏，不及今日私家之富，然家数之多，则反过之。观于周密《云烟过眼录》所记南方诸家藏器，知此风至宋末犹存矣。又观徽宗敕撰《宣和博古图》，实用刘敞《先秦古器图》、李公麟《考古图》体例，则徽宗之大搜古器，受私家藏器之影响。实不少也。

宋人搜集古器，于铜器外，兼收石刻，如岐阳石鼓文，及秦告巫咸文，徽宗并致之宣和殿；又秦告大沈久湫文，在南京蔡挺家；告亚施文，在洛阳刘忱家；齐谢朓海陵王墓誌，在沈括家。至石刻之贵重者。虽残石亦收之，如汉石经残石，黄伯思谓张焘龙图家有十版，张氏婿家有五六版，王晋玉家有小块。其余碑碣，则收藏者尚少。而搜集拓本之风，则自欧阳修后，若曾巩，若赵明诚，若洪适，若王厚之，成为一代风气。而金石之外，若瓦当。若木简，无不在当时好古家网罗之内。此宋人搜集之大功也。

（二）传拓及著录

宋人于金石学，不徒以搜集为能事，其最有功于此学者，则流通是也。流通之法，分为传拓与著录二种。拓墨之法，始于六朝。始用之以拓汉魏石经，继以拓秦刻石。至于唐代，此法大行。宋初遂用之以拓古器文字。皇祐三年，诏以祕阁及太常所藏三代录鼎付太乐所参校剂量；又诏墨器家以赐宰执。此为传拓古器之始。刘敞在长安所得古器，悉以墨本遗欧阳修。甚至上进之器，如政和三年武昌太平湖所进古钟，及安州所进六器，皆有墨本传世，则当时传拓之盛可知。然拓本流传自不能广。于是有刊木刊石之法。有仅摹其文字者，如王俅《啸堂集古录》，薛尚功《钟鼎彝器款识法帖》是；有并图其形制者，自《皇祐三馆古器图》，刘敞《先秦古器图》以下，不下十余种，今惟吕大临《考古图》，《宣和博古图》及无名氏《续考古图》尚存。诸书体例，于形制文字外，兼著其尺寸。权其轻重，乃至出土之地，藏器之家，亦複纪载，著录之法，盖已大备。至石刻一项，则欧、赵二家始作所藏石拓目录；此外有一地方作目录者，例如田槩《京兆金石录》；有通海内作目录者，例如陈思《宝刻丛编》。而洪适作《隶释》，则并录其文字，图其形制，又于目录之外，别为一体例。而古玉、古钱、古印，又各有专书。今宋代藏器，已百不存一，石刻亦仅存十分之一，而宋人图谱目录尚多无恙，此其流传之功千载不可没者也。

（三）考订及应用

刘敞序其所撰《先秦古器图》，言攻究古器之法曰：“礼家明其制度，小学正其文字，谱牒次其世谥，乃为能尽之。”故宋考订古器物之外，可分为文字、形制、事实三项论之。

宋时首释古器文字者，为杨南仲。既释皇祐三馆古器，又尽释刘敞所藏器，其说散见于欧阳氏《集古录》及吕氏《考古图》者，颇为精审。而吕大临、黄伯思、王侁、薛尚功诸家继之，虽差谬间出，然近世阮元、吴荣光诸家，未有以远过之也。至形制之学，实为宋人所擅场，凡传世古礼器之名，皆宋人之所定也。曰钟、曰鼎、曰鬲、曰献、曰敦、曰、曰簋、曰壶、曰尊、曰蚕、曰盒、曰盘、曰匝，皆古器自载其名，而宋人因以名之者也；曰卣、曰盂、曰爵、曰觚、曰觶、曰角、曰学，于古器铭词中均无明文，宋人但以大小之差定之，然在今日，仍无以易其说。近世江西出徐器三，其形皆宋人所谓解也。其一铭曰：“郅王义楚冢（即择字）其吉金自作祭铺。”其一曰：“义楚作祭卣。”案“端”、“卣”即《说文》“端”、“膊”字，亦即“觶”字之异文。则宋人名圆酒器为解，于此得其证矣。又今估人所谓“虎头彝”者，古今著录家并谓之“匝”，而宋无名氏《续考古图》则谓之“兕觥”。案此器极大，而盖作牛首形。又铭辞多云：作某某宝尊彝。其为孝享之器，而非沃盥之器。甚为明白。

自以宋无名氏所名为是。又古戈戟之援皆横刃，非直刃。近世程氏瑶田始于《通茹录》中详论之。然宋黄伯思作“铜戈辨”已为此说，则宋人于古器物形制之学实远胜于近世，亦如其图谱之学，为近世所不及也。至宋人说古器铭中所见姓名、事实，则颇多穿凿可笑。如见甲字，而即以为孔甲；见丁字，而即以为祖丁。其说极支离难信。然宋人亦自知之，赵氏《金石录》跋“中姑匝”云：“右《中姑匝铭》，与后两器皆藏李公麟家。初伯时得古方鼎，遂以为晋侯赐子产器；后得此匝，又以为晋襄公母倡姑器，殊可笑。凡三代以前诸器物，出于今者皆可宝，何必区区附托书传所载姓名，然后为奇乎！此好古之蔽也。”后洪迈评《博古图》，陈振孙评刘原父、吕大临、黄伯思等，议论略同。可知宋人未尝不知其误，亦不必尽蹈其失。至于考订石刻，则欧、赵、黄、洪诸家，多翔实审慎，绝无此蔽。既据史传以考遗刻，复以遗刻还正史传，其成绩实不容蔑视也。

更就应用一方面言之，则宋初郊庙礼器，皆用聂崇义《三礼图》之说。聂图虽本汉人旧图，然三代礼器自汉已失其制。及宋时古器大出，于是陆农师（佃）作《礼象》十五卷，以改旧图之失。其尊爵彝舟皆取公卿家及秘府所藏古彝器，与聂图大异。逮徽宗政和中，圜丘、方泽、太庙、明堂，皆别铸新器，一以古礼器为式。后或铸以赐大臣，迄于近世犹有存者。元明以后，各省文庙礼器皆承用之，然其改革实自宋人始。又仁宗景祐间，李照修雅乐，所铸钟皆圆，与古制颇异。会官帑中获宝铎钟，其形如铃而不圆，于是仿之作新钟，一县十六枚。而高若讷奉诏详定新乐。亦据汉钱尺寸，造《隋书·律历志》所载十五种尺上之，可见宋人金石之学并运用于实际，非徒空言考订而已。

（四）后论

由是观之，金石之学，创自宋代，不及百年，已达完成之域。原其进步所以如是速

者，缘宋自仁宗以后，海内无事，士大夫政事之暇，得以肆力学问。其时哲学、科学、史学、美术，各有相当之进步，士大夫亦各有相当之素养。赏鑒之趣味与研究之趣味，思古之情与求新之念，互相错综。此种精神于当时之代表人物苏轼、沈括、黄庭坚、黄伯思诸人著述中，在在可以遇之。其对古金石之兴味，亦如其对书画之兴味，一面赏鑒的，一面研究的也。汉、唐、元、明时人之于古器物，绝不能有宋人之兴味，故宋人于金石书画之学，乃陵跨百代。近世金石之学复兴，然于著录考订皆本宋人成法，而于宋人多方面之兴味，反有所不逮，故虽谓金石学为有宋一代之学无不可也。√